

第一冊

傳

年

譜

文

集

詩

集

鳴原堂論文

孟子要略

會正文公全集

總目

第一冊
傳年文詩
譜集集集
鳴原堂論文
孟子要略
第二冊
奏稿
第三冊
手札
書牘

批日讀治雜
牘記錄錄錄
著
第四冊
家訓
家書
嘉言鈔
附
大事記
榮哀錄

世 界 書 局 印 行

凡例

一、會文正公學問事功。皆彪炳一代。謂之政治家可。謂之軍事家可。謂之文學家理學家亦無不可。得其一鱗一爪。已足窺豹一斑。今彙刊全集。則其彌中彪外。施於國。刑於家。修於身者。纖悉靡遺。而公之全面目見矣。

二、市上印行公集者甚多。編次往往少有系統。而訛奪又十之八九。讀者病焉。今重加編定。別爲六類。類復分目。苟能依類閱讀。則條理秩然。而無凌雜之患矣。其訛奪之處。亦多所補正。

三、公生平所著書。統具於是。故謂之全集。至如編纂手鈔之書。如經史百家雜鈔十八家詩鈔之類。當另爲印行。性質不同。讀者之需要各異。故也。各就所需購備。亦普及之一法耳。

四、板式字體以及校勘種種。均極注意。但仍當繼續改進。俾臻完善。以副讀者之雅意。

五、書首撰有傳狀。公之平生可詳也。附有肖像。公之儀容可接也。印有真蹟手札。公之風度可見也。置此一書。無異與公共處於一堂。

六全集共分七類。一總類。二文學類。三學術類。四奏疏類。五函牘類。六修治類。七家書類。

民國二十五年六月編者識

仿古字版

會
國
藩
傳

世界書局印行

曾國藩傳

曾國藩，字滌生，號伯涵，湖南湘鄉人。曾氏自清初由衡陽遷湘鄉。曾祖竟希，德望爲鄉里所敬重。祖玉屏，以力田好善聞。父麟書，困苦於學，授徒自



給。國藩九歲畢五經，十五讀周禮儀禮史記文選，二十三入縣學。次年，鄉試中式。會試不售，留京師窮研經史。好昌黎韓氏之文。又明年，再報罷，貸百金過金陵，盡以購書，歸而誦習益勦。至道光十八年成進士，改翰林院庶吉士。二十年散館，授檢討。二十三年三月，大考二等，以侍講陞用。六月，充四川鄉試正考官。七月，補侍講。十二月，充文

淵閣校理。二十四年。轉侍讀。二十五年三月。充會試同考官。五月。遷詹事府右春坊右庶子。九月。轉左庶子。旋陞翰林院侍講學士。十二月。充日講起居注官。二十六年。充文淵閣直閣事。二十七年五月。大考二等。遇缺題奏。六月。擢內閣學士兼禮部侍郎銜。二十八年。稽察中書科事務。二十九年正月。陞禮部右侍郎。八月。署兵部左侍郎。三十年正月。宣宗崩。文宗即位。國藩遵旨上疏議郊配廟祔禮。上深韙之。三月。又應詔陳言。疏曰。今日所當講求者。惟在用人。人才不乏。欲作用而激揚之。則賴皇上之妙用。有轉移之道。有培養之方。有攷察之法。三者不可廢一。臣觀今日京官辦事。通病有二。曰退縮。曰瑣屑。外官辦事。通病有二。曰敷衍。曰顛預。習俗相沿。但求苟安無過。不肯振作有爲。將來一遇艱鉅。國家必有乏才之患。今遽求振作之才。又恐躁競者因而倖進。臣愚以爲欲令有用之才。不出範圍之中。莫若使從事於學術。又必皇上以身作則。乃能操轉移風化之本。臣攷聖祖登極後。勤於學問。儒臣逐日進講。寒暑不輟。召見廷臣。輒與往復討論。當時人才濟濟。好學者多。康熙末年。博學偉才。大半皆聖祖教諭成就之。皇上春秋鼎盛。正符聖祖講學之年。臣請俟二十七月後。舉逐日進講例。四海傳播。人人向風。召見臣工。從容論難。見無才者。則勗之以學。以痛懲模稜罷輒之習。見有才者。則愈勗之以學。以化其剛愎刻薄之偏。十

年以後。人才必大有起色。此轉移之道也。內閣六部翰林院。爲人才薈萃之地。內而卿相。外而督撫。率出於此。皇上不能一一周知也。培養之權。不得不責成堂官。所謂培養有數端。曰教誨。曰甄別。曰保舉。曰超擢。堂官於司員。一言嘉獎。則感而圖功。片語責懲。則畏而改過。此教誨不可緩也。榛棘不除。則蘭蕙減色。害馬不去。則騏驥短氣。此甄別不可緩也。嘉慶四年。十八年。兩次令部院各保司員。此保舉成案也。雍正間。甘汝來以主事而賞人。凌放知府。嘉慶間。黃鉞以主事而充翰林。入南齋。此超擢成案也。蓋嘗論之。人才譬若禾稼。堂官之教誨。猶種植耘耔也。甄別。猶去稂莠。保舉。猶灌溉也。皇上超擢。譬之甘雨時降。茁勃然興也。堂官時常到署。猶農夫日在田間。乃熟穡事。今各衙門堂官。多內廷行走之員。或累月不到署。自掌印主稿外。司員半不識面。譬之嘉禾稂莠。聽其同生同落於畎畝之中。而農夫不問。教誨之法無聞。甄別之例亦廢。近奉明詔保舉。又但及外官。不及京秩。培養之道。不尙有未盡者哉。頃歲以來。六部人數日多。或廿年不得補缺。終身不得主稿。內閣翰林院人數。亦三倍於前。往往十年不得一差。不遷一秩。而堂官多直內廷。本難分身入署。又或兼攝兩部。管理數處。縱有才德俱優者。會不能邀堂官之顧。又烏能達天子之知。以數千人才。近在眼前。不能加意培養。甚可惜也。臣愚欲請皇上稍爲酌量。每部須

有二三堂官不入內廷者。令日日到署。與司員相砥礪。翰林掌院亦須有不直內廷者。與編檢相濡染。務使屬官之性情心術。長官一一周知。皇上不時詢問。某也才。某也直。某也小知。某也大受。不特屬官優劣燦呈。卽長官淺深。亦可互見。旁考參稽。而入衙門之人才。同往來聖主之胸中。彼屬官者。但令姓名達於九重。不必陞官遷秩而已。感激無地。然後保舉之法。甄別之例。次第舉行舊章。皇上偶有超擢。則梗柵一陞。而草木之精神皆振。此培養之方也。古者詢事攷言。二者兼重。近來各衙門辦事。小者循例。大者請旨。本無才猷可見。莫若於言考之。而召對臣言。天威咫尺。不宜喋喋便佞。則莫若於奏摺考之。國家定例。內而九卿科道。外而督撫藩臬。皆有言事之責。各省道員。亦許專摺言事。乃十餘年間。九卿無一人陳時政得失。司道無一摺言地方利病。科道奏疏。無一言及主德隆替。無一摺彈大臣過失。一時風氣。不解其所以然。本朝以來。匡言主德者。如孫嘉淦。以自是規高宗。高鋐以寡慾規宣宗。皆優旨嘉納。糾彈大臣者。如李之芳。劾魏裔介。彭鵬。劾李光地。後四人皆爲名臣。至今傳爲美談。直言不諱。未有盛於我朝者也。皇上御極之初。特詔求言。而褒答倭仁之諭。臣讀之。至於抃舞感泣。然猶有過慮者。誠見皇上求言甚切。諸臣紛紛入奏。或條陳庶政。頗多雷同。或彈劾大臣。懼長攻訐。臣愚願皇上堅持聖意。借奏摺爲考

覈人才之具。永生厭斲之心。涉於雷同者。不必交議而已。過於攻訐者。不必發鈔而已。此外則但見有益。不見有損。今考九卿賢否。憑召見應對。考科道賢否。憑三年京察。考司道賢否。憑督撫考語。若人人建言。參互質證。豈不更爲覈實乎。此攷察之法也。奏入。諭稱其剴切明辨。切中事情。命百日後舉行日講。國藩旋條陳日講事宜。下部議。格不行。六月。署工部左侍郎。咸豐元年五月。署刑部右侍郎。十月。充順天武鄉試正考官。二年正月。署吏部左侍郎。六月。充江西鄉試正考官。旋丁母憂。回籍時。廣西洪秀全倡亂。進湖南。圍長沙。不克。攻湖北武昌。陷之。連陷沿江郡縣。江南大震。初。敵至長沙城南。穿地道。蒸火藥。城崩入丈。以總兵瞿騰龍苦戰得完。然敵竟從容渡湘去。諸軍近萬人。但幸其去。莫敢問其踪跡也。十一月。乃命國藩會同湖南巡撫張亮基。辦理本省團練。搜剿土匪。時塔齊布尙以都司署撫標參將。國藩奏稱其奮勇耐勞。深得民心。並云。塔齊布將來如打仗不力。臣甘同罪。請旨獎敘。專令督隊剿敵。會秀全破金陵。逆流西上。皖鄂郡縣。相繼淪陷。上以國藩所練鄉勇得力。剿匪著有成效。諭令馳赴湖北。剿辦。國藩以爲賊所以恣意往來者。由長江無軍官扼禦故也。乃駐衡州。造戰艦。練水軍。勸捐助餉。四年二月。奏請將原任湖北巡撫楊健。從祀鄉賢。下部議處。尋議降二級調用。復督師東下。三月。與敵接戰岳州。四月。

又戰靖港。各軍相繼潰退。國藩立旗岸上。仗劍呼曰。過旗者斬。士皆繞旗旁下退。國藩憤甚。投水死。以救得免。乃有裁汰所部。添造戰船之議。未幾得旨革職。仍准專摺奏事。時國藩已遣守備湯載福知縣彭玉麟與塔齊布合擊於湘潭。大破之。復其城。敵退踞岳州。七月。國藩攻克之。燬其舟。敵浮舟上攻。再破之。遂與塔齊布水陸追擊。自城陵磯二百餘里。剽洗淨盡。賞三品頂戴。九月。復武昌漢陽。盡焚裏河敵舟。賞二品頂戴。署湖北巡撫。賞戴花翎。旋以國藩力辭。賞兵部侍郎銜。辦理軍務。毋庸署理。巡撫國藩建三路進兵策。奏言。江漢肅清。賊之回巢抗拒者。多集興國蘄州廣濟諸屬。自巴河至九江。節節皆有賊船。擬塔齊布由南路進攻興國大冶。湖北督臣派兵由北路進攻蘄州廣濟。臣由江路直下。與陸軍相輔爲進止。如所請行。國藩揚帆而下。連戰勝敵。蘄州敵來攻。再破之。會塔齊布復興國大冶。時敵以田家鎮爲巢穴。蘄州爲聲援。自州至鎮四十餘里。沿岸築土城。設礮位。對江轟擊。橫鐵鎖江上。以阻舟師。南岸半壁山富池口。均大股悍敵駐守。舟楫往來如織。國藩計欲破田鎮。當先奪南岸。十月。寧紹台道羅澤南大破之。半壁山克之。國藩部署諸將。分戰船四隊。一隊扼敵上進。一二隊備爐剪椎斧。前斷鐵鎖。敵礮船護救。三隊圍擊之。沈二艘。敵不敢近。須臾鎔液鎖斷。敵驚顧失色。率舟遁。四隊駛而下。追及於鄔穴。東南風大

作舟不能行。圍而焚之。百里內外。火光燭天。陸軍自半壁山呼而下。悉平田鎮。富池口營壘。蘄州敵遁。是役也。斃敵數萬。燬其舟五千。遂與塔齊布復廣濟。黃梅。孔壠口。小池驛上游。江面肅清。進圍九江。十二月。上以國藩調度有方。賞穿黃馬褂。並諸珍物。國藩遣水軍攻湖口。梅家洲。以通江西餉道。五年。敵竄武昌。分股乘夜。由小池口襲焚國藩戰艦。戰失利。越數日。大風復壞舟數十。國藩迺以其餘遣署湖南按察使李孟羣。知府彭玉麟。及湖北布政使胡林翼所帶陸軍。回援武漢。親赴江西造船募勇。增立新軍。連破姑塘。都昌。進攻湖口。大敗之。七月。湖南提督塔齊布卒。國藩馳往九江。兼統其軍。八月。水軍復湖口。九月。補兵部右侍郎。六年。石達開竄江西。郡縣多陷。國藩馳赴省城。遣道員彭玉麟統內湖水師。退駐吳城。以固湖防。同知李元度回剿撫州。以保廣信。諸將分扼要地。先後復進賢。建昌。東鄉。豐城。饒州。連破撫州。樟樹鎮。羅溪。瓦山。吳城之敵。會同湖北援師。知縣劉騰鴻。同知會國華等。大破之。瑞州。復靖安。安義。上高。自江西達兩湖之路。賴以無梗。七年正月。復安福。新淦。武寧。瑞昌。德安。奉新。軍聲大振。不一歲。石達開敗遁。江西獲安。國藩力也。二月。丁父憂。上諭賞假三個月。回籍治喪。俟假滿後。再赴江西督辦軍務。尋回請終制。上諭俟九江克復。江面肅清。賞假令其回籍營葬。俾得忠孝兩全。國藩復奏稱江西各營。安謐。

如常。毋庸親往撫馭。並歷陳才難宏濟。心抱不安。奉旨先開兵部侍郎缺。暫行在籍守制。江西如有緩急。卽行前赴軍營。以資督率。八年五月。命辦理浙江軍務。移師援閩。閩敵分股竄擾江西。國藩遣道員李元度破之。廣豐玉山。張運蘭復安仁。時國藩駐軍建昌。東南北三路皆敵。國藩計東路連城。敵勢已衰。閩事不足深慮。北路景德鎮。乃大局所關。又較南路信豐爲重。乃遣張運蘭攻景德鎮。道員蕭啓江追剿信豐之敵。九年。蕭啓江破之。南康。克新城。墟池江敵巢。遂復南安。解信豐圍。敵竄湖南。將由粵黔入蜀。國藩隨檄蕭啓江馳赴吉安。援應湖南。張運蘭復景德鎮。浮梁縣。江西肅清。餘敵竄皖南。國藩奉命防蜀。行至陽邏。奉諭皖省賊勢日張。飭籌議。由楚分路剿辦。國藩回駐巴河。簡校軍實。因奏言。自洪楊內亂。鎮江克復。金陵逆首。凶餒久衰。徒以陳玉成往來江北。句結捻匪。廬州浦口三河等處。疊挫我師。遂令皖北之糜爛日廣。江南之賊糧不絕。欲廓清諸路。必先破金陵。欲破金陵。必先駐重兵滁和。而後可去江南之外屏。斷蕪湖之糧路。欲駐兵滁和。必先圍安慶。以破陳逆之老巢。兼擣廬州。以攻陳逆所必救。進兵須分四路。南則循江而下。一由宿松石牌規安慶。一由太湖潛山規桐城。北則循山而進。一由英山霍山攻舒城。一由商城六安規廬州。南軍駐石牌。則與福建水師提督楊載福黃石磯之師。聯爲一氣。北軍至六

安州。則與壽州之師聯爲一氣。國藩請自規安慶。協領多隆阿、綏靖鎮、總兵鮑超取桐城。署湖北巡撫胡林翼取舒城。荆宜施道李續宜規廬州。奏入。上是之。十年二月。陳玉成攻太湖。國藩分兵破之。旋因金陵大營分兵援浙。城中悍敵大股出撲。統帥和春、張國樑以兵單敵衆。退守丹陽。旋皆戰歿。兩江總督何桂清棄常州。奔上海。致蘇常連陷。勢甚蔓延。四月。上特命國藩馳赴江蘇。並先行賞加兵部尚書銜。署理兩江總督。六月。實授。以欽差大臣督辦江南軍務。七月。命皖南軍務統歸國藩督辦。十一年。國藩進駐祁門。督飭楊載福按察使彭玉麟道員曾國荃等諸軍。水陸夾擊。爲逐層掃蕩之計。先後復黟縣、都昌、彭澤、東流、建德、休寧、徽州、義寧各城。悍敵數萬踞安慶。久不下。曾國荃副都統多隆阿等圍之。陳玉成來援。諸軍擊走之。拔其城。敵無脫者。進復池州、鉛山。無爲、銅陵。及泥汊、神塘河。運漕東關各隘。十月。穆宗御極。加太子少保銜。令統轄江蘇、安徽、江西、浙江四省軍務。巡撫提鎮以下悉歸節制。國藩力辭。上不許。先是。敵圍杭州。國藩疊奉援浙之命。咨令太常寺卿左宗棠統軍入浙。檄按察使張運蘭副將孫昌圖等。水陸各營均歸調度。以厚兵力。並撥給錢糧釐金。以清所部積欠。因奏稱。左宗棠前在湖南撫臣駱秉章幕中。贊助軍謀。兼顧數省。其才實可獨當一面。懇明降諭旨。令左宗棠督辦浙江全省軍務。上以浙江巡

撫王有齡及江蘇巡撫薛煥不能勝任。命國藩察看具奏。並迅速保舉人員。候旨簡放。國藩奏言。蘇浙兩省羣賊縱橫。安危利鈍繫於巡撫一人。王有齡久受客兵挾制。難期振作。欲擇接任之人。自以左宗棠最爲相宜。惟此時杭州被困。必須王有齡堅守於內。左宗棠救援於外。俟事勢少定。乃可更動。至江蘇巡撫一缺。目前實無手握重兵之人。可勝此任。查有臣營統帶淮揚水師之福建延建邵遺缺道員李鴻章。勁氣內斂。才大心細。若蒙聖恩擢署江蘇巡撫。臣再撥給陸軍。便可馳赴下游。保衛一方。奏入。上皆特如所請。復因杭州失守。奏陳補救之策。同治元年正月。命以兩江總督協辦大學士國藩奏言。自去秋以來。疊荷鴻恩。臣弟國荃。又拜浙江按察使之命。一門之內。數月之間。異數殊恩。有加無已。感激之餘。繼以悚懼。懇求皇上念軍事之靡定。鑒微臣之苦衷。金陵未克以前。不再加恩於臣家。又前此疊奉諭旨。飭保薦江蘇安徽巡撫。復蒙垂詢閩省督撫。飭臣保舉大臣。開列請簡。封疆將師。乃朝廷舉措之大權。如臣愚陋。豈敢干預。嗣後如有所知。堪膺疆寄者。隨時恭疏入告。仰副聖主旁求之意。但泛論人才。以備採擇。則可。指明某缺。徑請遷除。則不可。蓋四方多故。疆臣既有征伐之權。不可更分黜陟之柄。風氣一開。流弊甚長。辨之不可不早。尋遣將擊走徽州荻港之敵。復青陽太平涇縣石埭。國荃會同水師。復巢縣含山。

和州並銅陵牯雍家鎮裕溪口西梁山四隘。弟貞幹復繁昌南陵。破敵三山魯港。上以國藩前奏情詞懇摯。出於至誠。不再加恩。而進國荃貞幹等職。國藩駐安慶督師。奏請仍建安徽省會於安慶。設長江水師提督以下各官。指授諸將機宜。以次規取皖南北府縣各城。國荃率師進圍金陵。蘇浙李秀成等分道來援。大小數十戰。力卻之。二年五月。復江浦浦口。克九江州。長江肅清。因淮南運道暢通。籌復鹽務。改由民運。奏請疏銷輕本保價杜私之法。三年正月。克鍾山。國藩令弟國荃會諸將合圍金陵。六月。金陵克復。生擒忠王李秀成等。掘戮洪秀全屍。三日內。斃敵十餘萬人。全股殄滅。國藩紅旗奏捷。並稱洪逆倡亂粵西。於今十有五年。竊踞金陵。亦十二年。流毒海內。神人共憤。我朝武功之盛。超越前古。如嘉慶川楚之役。蹂躪僅及四省。淪陷不過十餘城。康熙三藩之役。蹂躪尙止十二省。淪陷亦第三百餘城。今粵匪之變。蹂躪竟及十六省。淪陷至六百餘城之多。實爲罕見之巨寇。卒能次第削平。剷除元惡。蔚爲中興之業。上覽奏嘉悅。諭曰。會國藩自咸豐四年。在湖南首倡團練。創立舟師。與塔齊布羅澤南等。屢建殊功。保全湖南郡縣。克復武漢等城。肅清江西全境。東征以來。由宿松克潛山太湖。遞駐祁門。疊復徽州郡縣。遂拔安慶省城以爲根本。分檄水陸將士。規復下游州郡。茲大功告成。逆首誅鋤。由該大臣籌策無遺。謀勇

兼備。知人善任。調度得宜。會國藩著加恩賞加太子太保銜。錫封一等侯爵。世襲罔替。並賞戴雙眼花翎。浙江巡撫會國荃。賞加太子少保銜。錫封一等伯爵。並賞戴雙眼花翎。將士錫爵進秩有差。時捻衆倡亂日久。徒衆數十萬。馬數萬匹。分合不常。颺忽無定。四年四月。欽差大臣科爾沁親王僧格林沁。戰歿於山東曹州。聲勢日熾。命國藩赴山東一帶督兵剿辦。山東河南直隸三省旗綠各營。及地方文武員弁。均歸節制調遣。國藩將赴徐州督師。乃召集新軍。添練馬隊。檄調皖南鎮總兵劉松山。直隸提督劉銘傳。總兵周盛波。道員潘鼎新諸軍會剿。五月。敵竄亳州雒河集。國藩駐臨淮關。遣兵擊走之。先後奏言。此賊已成流寇。飄忽靡常。宜各練有定之兵。乃足以制無定之賊。臣由臨淮進兵。將來安徽卽以臨淮爲老營。及江蘇之徐州。山東之濟寧。河南之周家口。四路各駐大兵爲重鎮。一省有急。三省往援。其援軍之口糧火藥。卽取給於受援之地。庶幾往來神速。呼吸相通。時張總愚任柱牛洛紅及太平軍賴汶光。擁衆十萬。倏分倏合。八月。國藩遣劉銘傳敗之。潁州。敵東走曹州。國藩檄潘鼎新力扼運河。派軍馳赴山東助剿。敵不能渡運。遂南走徐州。踞豐沛銅山境內。九月。國藩遣潘鼎新等敗之。徐州。豐縣敵復竄山東。十月。周盛波劉銘傳敗之。寧陵扶溝。敵竄陷湖北黃陂。五年正月。國藩遣劉銘傳破之。復其城。任柱回竄沈邱。

將踞蒙亳老巢。遣劉銘傳周盛波擊之。張總愚分股入鄆城。三月。劉銘傳廣西右江鎮總兵張樹珊敗之。潁州周家口。羣敵合踞濮范鄆鉅間。諸軍擊破之。張總愚趨單縣。任柱走靈壁。國藩駐徐州。修浚運河。以固東路。五月。遣諸將敗張會於洋河。王家林。敗任會於永城。徐州。敵自二月北竄。堅圖渡運。徘徊曹徐淮泗者兩月餘。迄不得逞。於是張總愚入豫。任柱入皖。國藩遣周盛波大破牛洛紅於陳州。敗任賴二會於烏江河。張樹珊敗之於周家口。牛張二會渡沙河而南。任賴二會亦竄渡賈魯河。國藩以前防守運河。粗有成效。必仿照於沙河設防。俾敵騎稍有遮攔。庶軍事漸有歸宿。定議自周家口下至槐店。扼守沙河。上至朱仙鎮。扼守賈魯河。因奏言。河身七百餘里。地段太長。不敢謂防務既成。百無一失。然臣必始終堅持此議。不以艱難而自畫。不以浮言而中更。以求有裨時局。自古辦流寇。本無善策。惟有防之。使不得流。猶是得寸則寸之道。俟河防辦成。則令防河者與遊擊者。彼防此戰。更番互換。庶足以保常新之氣。六月。遣劉松山宣化鎮。總兵張詩日大破之於上蔡西華。敵由河南巡撫所派防軍汎地逸出東竄。河防無成。七月。遣劉松山提督宋慶大破之南陽新野。九月。劉銘傳潘鼎新破之鄆城。運防賴以無恙。時以國藩行師迂緩。謗議紛起。乃自陳病狀。上命國藩仍回兩江總督本任。以李鴻章代辦剿匪事宜。國藩請

開總督缺。以散員留營自效。不許。十一月回任。六年六月。授大學士。仍留兩江總督任。七月。授體仁閣大學士。九月。奏稱製造輪船。爲救時要策。請將江海關洋稅酌留二成。一成爲專造輪船之用。一成酌濟淮軍及添兵等事。從之。十二月。捻平。賞雲騎尉世職。七年四月。授武英殿大學士。七月。調直隸總督。十二月入覲。賜紫禁城騎馬。八年二月。查明積滯大窪地畝。應徵糧賦。請分別豁減。從之。三月。奏直隸刑案積多。與臬司張樹聲力籌清釐。甫有端緒。張樹聲見調任山西。請暫留一年。以清積案。諭曰。會國藩到任後。辦事認真。於吏治民風。實心整頓。力輓做習。著如所請。俾收指臂之助。一年之中。凡清結積案三萬餘件。又先後二次查明屬員優劣。開單具奏。得旨分別嘉勉降革。時直隸營伍廢弛。廷議選練六軍。命國藩將前定練軍章程。妥籌經理。五月。國藩奏陳。一曰文法宜簡。一曰事權宜專。一曰情意宜洽。及免冒名頂替之弊。請敕原議各衙門覈議施行。復命國藩籌定簡明章程。奏報定議。國藩奏陳。試行果有頭緒。然後奏定簡明章程。允之。同治三年至九年正月。三屆京察。均蒙溫諭褒嘉。下部優敘。五月。通商大臣崇厚奏天津民人。因迷拐幼孩。有牽涉教堂情事。法國領事豐大業。出言不遜。對官施放洋槍。百姓激忿。毆斃豐大業。焚毀教堂。上命國藩赴天津查辦。並諭以查有實據。自應與洋人指證明確。將匪犯按律懲辦。

以除地方之害。國藩奏言。各省打毀教堂之案。層見疊出。而毆斃領事洋官。則從來未有之事。即使曲在洋人。而外國既斃多命。不肯更認理虧。臣但立意不欲與之開釁。使在彼有可轉圜之地。庶在我不失柔遠之方。六月抵津。查詢仁慈堂冤眼剖心。毫無實據。奏稱採生配藥。野番兇惡之族。尙不肯爲。英法乃著名大邦。豈忍爲此殘忍之行。以理決之。必無是事。況彼以仁慈爲名。而反受殘酷之謗。宜洋人之忿忿不平也。又奏誅爲首滋事之人。將辦理不善之天津府縣革職治罪。復諭以洋人詭譎性成。得步進步。若事事遂其所求。將來何所底止。是欲弭釁而不免啓釁也。如洋人仍有要挾恫喝之語。會國藩當力持正論。據理駁斥。庶可折敵綏而張國維。國藩復奏。中國目前之力。未便遽啓兵端。惟有委曲求全之一法。因陳時事雖極艱難。謀畫必須斷決。伏見道光庚子以後。辦理洋務。失在朝戰夕和。無一定之至計。遂至外患漸深。不可收拾。皇上登極以來。守定和議。絕無更改。用能中外相安。十年無事。津郡此案。因愚民一旦憤激。致成大變。初非臣僚有意挑釁。朝廷昭示大信。不開兵端。此實天下生民之福。以後仍當堅持一心。曲全鄰好。以爲保民之道。時時設備。以爲立國之本。二者不可偏廢。一時輿情大譁。責國藩畏葸辱國。威名重挫。八月。調兩江總督。國藩歷陳病狀。請另簡賢能。開缺調理。奉諭慰勉。十一月。命充辦理通

商事務大臣十年。以楚岸淮南引地。爲川鹽所侵占。偕湖廣總督李瀚章定議。與川鹽分岸行銷。奏請武昌漢陽黃州德安四府。專銷淮鹽。安陸襄陽鄖陽荊州宜昌荆門五府一州。暫行借銷川鹽。湖南巡撫劉崑請於永寶二府試行官運粵鹽。國藩復力陳二府引地。不便改運。部議皆如所請。十一年二月卒。年六十有二。清自道光以後。文酣武嬉。泄沓成風。國藩以公忠誠樸。爲天下倡。卽其居官治軍。亦粹然儒者氣象。咸豐十一年。作勸誠州縣營官委員紳士十六條。頒示於衆。勸誠州縣者曰。治署內以端本。明刑法以清訟。重農事以厚生。崇節儉以養廉。勸誠營官者曰。禁騷擾以安民。戒煙酒以儆惰。勤訓練以禦寇。尙廉儉以服衆。勤學問以廣才。戒傲惰以正俗。勸誠紳士者曰。保愚懦以庇鄉。崇廉讓以奉公。禁大言以務實。擴才識以待用。國藩文章精深博大。氣勢雄厚。自謂粗解文字。由桐城姚先生啓之。其閎肆之筆。實非姚鼐所及也。當時漢宋之爭最烈。國藩務調和二者。以爲義理考據詞章。不可缺一。其言曰。文之純駁。一視乎見道之多寡。以爲差。所謂見道多寡之分數何也。曰深也。博也。後之見道不及孔氏者。其深有差焉。其博有差焉。能深且博。而文復不失古聖之詣者。孟氏而下。惟周子之通書。張子之正蒙。醇厚正大。邈焉寡儔。許鄭亦能深博。而訓詁之文。或失之碎。程朱亦能深博。而指示之語。或失之隘。其他若杜佑

鄭樵馬貴與王應麟之徒。能博而不能深。則文流於蔓矣。游揚金許薛胡之儔。能深而不能博。則文傷於易矣。由是有漢學宋學之分。斷斷相角。竊欲取二者之長。見道既深。且博以爲文。復臻於無累。遊其門者。如李元度張裕釗吳汝綸黎庶昌薛福成。皆極文章之選。庶昌之言曰。湘鄉曾文正公出。擴姚氏而大之。並功德言爲一塗。絜攬衆長。輾歸掩方。跨越百氏。將遂席兩漢而還之三代。使司馬遷班固韓愈歐陽修之文。絕而復續。豈非所謂豪傑之士。大雅不羣者哉。蓋自歐陽氏以來。一人而已。又曰。曾氏之學。蓋出於桐城。固知其與姚先生之旨合。而非廣己於不可畔岸也。循姚氏之說。屏棄六朝駢麗之習。以求所謂神理氣味。格律聲色。法愈嚴而體愈尊。循曾氏之說。將盡取諸儒之多識格物。博辨訓詁。一納諸雄奇萬變之中。以矯桐城未流虛車之飾。其道相資。無可偏廢。其所推崇。初非盜美。時海禁初開。有志之士。爭習西學。國藩首派學生赴歐西留學。肄習學藝。造就甚多。其學一歸之有用。後人尊之爲湘鄉派云。所著有求闕齋集。遺疏入。上震悼。輟朝三日。追贈太傅。照大學士例賜卹。予諡文正。入祀京師昭忠祠賢良祠。於湖南原籍。江寧省城。建立專祠。尋湖廣總督李瀚章。安徽巡撫英翰。署兩江總督何璟。奏陳國藩歷年勳績。李瀚章奏略云。國藩初入翰林。卽與故大學士倭仁太常寺卿唐鑑徽寧道何桂珍。講明程朱

之學。克己省身。得力有自。遭值時艱。毅然以天下自任。死生禍福。置之度外。其過人識力。在能堅持定見。不爲浮議所搖。用兵江皖。陳四路進攻之策。剿辦捻匪。建四面蹙賊之議。其後成功。不外乎此。英翰奏略云。自安慶克復後。國藩督軍駐紮。整吏治。撫瘡痍。培元氣。訓屬僚。若子弟。視百姓如家人。生聚教養。百廢俱舉。至今皖民安堵。皆國藩所留貽。一聞出缺。士民奔走。婦孺號泣。以遺愛而言。自昔疆臣。湯斌于成龍而後。未有若此感人深者。何璟奏略云。咸豐十年。國藩駐祁門。皖南北十室九空。自金陵至徽州。入百餘里。無處無賊。無日無戰。徽州初陷。休祁大震。或勸移營他所。國藩曰。吾初次進兵。遇險卽退。後事何可言。吾去此一步。無死所也。賊至環攻。國藩手書遺囑。帳懸佩刀。從容布置。不改常度。死守兼旬。檄鮑超一戰。驅之嶺外。以十餘載稽誅之狂寇。國藩授鉞四年。次第蕩平。皆因祁門初基不怯。有以寒賊膽而作士氣。臣聞其昔官京師。卽留心人物。出事戎軒。尤勤訪察。一材一藝。罔不甄錄。又多方造就以成之。安慶克復。則推功於胡林翼之籌謀。多隆阿之苦戰。金陵克復。又推功諸將。無一語及其弟國荃。談及忠親王僧格林沁。李鴻章。左宗棠。諸人。皆自謂十不及一。清儉如寒素。廉俸盡充官用。未嘗置屋一廛。田一區。食不過四簋。男女婚嫁。不過二百金。垂爲家訓。有唐楊綰。宋李沆之風。其守之甚嚴。而持之有恆者。

曰不誑語。不晏起。前在兩江任內。討究文書。條理精密。無不手訂之章程。點竄之批牘。前年回任。感激聖恩高厚。仍令坐鎮東南。自謂稍有息安。負疚滋重。公餘無客不見。見必博訪周諮。殷勤訓勵。於僚屬之賢否。事理之原委。無不默識於心。其患病不起。實由平日事無鉅細。必躬必親。殫精竭慮所致也。奉諭於安徽湖北省城。建立專祠。此外立功省分。並著准其一體建立專祠。伊次子附貢生會紀鴻。伊孫會廣鈞。均著賞給舉人。准其一體會試。會廣鎔著賞給員外郎。會廣銓賞給主事。均俟及歲時分部學習行走。何璟李瀚章英翰摺三件。均著宣付史館。用示眷念勳臣。有加無已至意。尋賜祭葬。十二年。兩江總督李宗羲奏請將國藩入祀江寧府上元縣江寧縣三學名宦祠。光緒元年。大學士直隸總督李鴻章。以國藩遺愛在民。請於保定省城。建立專祠。並附祀省城名宦祠。先後均允之。十五年。慈禧皇太后歸政。追念功績最著諸臣。各賜祭一壇。國藩與焉。十八年。河南巡撫裕寬以國藩督師豫省。弟前任河道總督國荃。功德在民。請於河南省城捐建一祠合祀。詔如所請。子紀澤夔侯爵。

仿古字版

會文正公年譜

世界書局印行

曾文正公年譜

公諱國藩。字伯涵。號滌生。湖南湘鄉縣人。曾氏祖籍衡陽。國初有孟學公者。始遷湘鄉荷塘都之大界里。傳至元吉公。族姓漸多。資產漸殖。遂爲湘鄉人。元吉公之仲子曰輔臣公者。公之高祖也。曾祖諱竟希。誥贈光祿大夫。妣彭氏。誥贈一品夫人。祖諱玉屏。字星岡。誥封中憲大夫。累贈光祿大夫。妣王氏。誥封恭人。累贈一品夫人。考諱麟。書字竹亭。湘鄉縣學生員。誥封中憲大夫。累封光祿大夫。妣江氏。誥封恭人。累封一品夫人。仲父諱鼎尊。早卒。叔父諱驥雲。字高軒。以公官。封光祿大夫。星岡公以嘉慶戊辰年。遷居白楊坪。公兄弟五人。女兄弟四人。公則竹亭公之長子也。

〔辛未〕嘉慶十有五年公生。公生十月十一日亥時。時竟希公在堂。壽幾七十矣。是夜夢有巨蟒盤旋空中。旋繞於宅之左右。已而入室。庭踴踞良久。公驚而寤。聞曾孫生。適如夢時。大喜曰。「是家之祥。曾氏門楣。行將大矣。」宅後舊有古樹。爲藤所纏。樹已槁。而藤日益大且茂。矯若虬龍。枝葉蒼翠。垂蔭一畝。亦世所罕見者。

〔壬申〕嘉慶十七年公二歲。竟希公孝友敦篤。爲鄉里所敬。年七十。見曾孫。極欣愛之。

〔癸酉〕嘉慶十八年公三歲。公幼小時。狀貌端重。自初生至三歲。庭戶不聞啼泣聲。母江太夫人勤操作。恆不顧復。每日依祖母王太夫人紡車之側。花開鳥語。注目流眄。狀若有所會悟。王太夫人尤奇之。

〔甲戌〕嘉慶十八年公四歲。六月。妹國蕙生。

〔乙亥〕嘉慶二十年公五歲。冬十月。受學於庭。誦讀穎悟。竟希公益鍾愛之。

〔丙子〕嘉慶二十一年公六歲。公在家塾。以陳雁門先生爲公問字師。十月。竟希公薨。壽七十有四。葬西坑山。公哭泣甚哀。執喪若成人。

〔丁丑〕嘉慶二十二年公七歲。竹亭公粹然儒者。屢應童子試未售。績學不怠。名其塾曰利見齋。課徒十餘人。訓誘專勤。公稟學於庭訓者。凡八年。

〔戊寅〕嘉慶二十三年公八歲。八月。妹國芝生。

〔己卯〕嘉慶二十四年公九歲。是年讀五經畢。始爲時文帖括之學。

〔庚辰〕嘉慶二十五年公十歲。五月。公弟國潢生。竹亭公笑謂公曰。『汝今有弟矣。』命作時文一道。題曰。『兄弟怡怡。』公文成。竹亭公喜甚。曰。『文中有至性語。必能以孝友承其家矣。』

〔辛巳〕道光元年公十一歲。

〔壬午〕道光二年公十二歲。五月。公弟國華生。

〔癸未〕道光三年公十三歲。

〔甲申〕道光四年公十四歲。衡陽廩生。歐陽滄溟先生凝祉與竹亭公友善。常來家塾。見公所爲試藝。亟賞之。竹亭公請試以題。先生以共登青雲梯。命爲試律。詩成。先生覽而稱善。曰。『是固金華殿中人語也。』因以女許字焉。是歲始從竹亭公至長沙省城。應童子試。八月。公弟國荃生。

〔乙酉〕道光五年公十五歲。竹亭公設館同族家塾。曰錫麟齋。公從受讀周禮儀禮成誦。兼及史記文選。

〔丙戌〕道光六年公十六歲。應長沙府試。取前列第七名。

〔丁亥〕道光七年公十七歲。

〔戊子〕道光八年公十八歲。九月。公弟國葆生。

〔己丑〕道光九年公十九歲。竹亭公設館石魚之百魯菴。公從。

〔庚寅〕道光十年公二十歲。九月。公季妹生。肄業於衡陽唐氏家塾。從事汪覺庵先生。公姊國蘭出閣適王氏。婿名鵬遠。

〔辛卯〕道光十一年公二十一歲。公自衡陽還家塾。冬月肄業本邑澗濱書院。山長劉元堂先生名象履。見公詩文。嘆賞不置。以爲大器。

〔壬辰〕道光十二年公二十二歲。竹亭公以府試案首。入湘鄉縣學。公從應試備取。以侑生註冊。試罷還居家塾。利見齋。

〔癸巳〕道光十三年公二十三歲。本年科試。入縣學。時公名子城。提督學政爲岳公鎮南。竹亭公年四十有三。應

童試十七次。始補生員。積苦力學。授徒家塾者二十年。至是深喜公之繼起。而早獲售也。十二月。歐陽夫人來歸。〔甲午〕道光十四年公二十四歲。肄業嶽麓書院。山長爲歐陽坦齋先生。公以能詩文。名噪甚。試輒第一。是科領鄉薦。中式第三十六名舉人。本科鄉試四書首題。疑思問念。思難見得。思義。次題武王纘大王。王季文王之緒。三題智譬則巧也。聖譬則力也。由射于百步之外也。詩題賦得。前得秋光入卷來。座主爲徐公雲瑞。許公乃安。房考官爲張公啓庚。十一月入都。是歲始見劉公蓉於朱氏學舍。與語大悅。因爲留信宿。乃別。

〔乙未〕道光十五年公二十五歲。公寓長沙郡館。會試不售。留京師讀書。研窮經史。尤好昌黎韓氏之文。慨然思躡而從之。治古文詞自此始。

〔丙申〕道光十六年公二十六歲。會試再報罷。出都爲江南之遊。同邑易公作梅官隄寧知縣。因過訪之。由清江揚州金陵泝江而歸。公久寓京師。窘甚。從易公貸百金。過金陵盡以購書。不足則質衣裘以益之。比歸里。陳所購廿三史。竹亭公問所自來。且喜且誠之曰。爾借錢買書。吾不惜爲汝彌縫。但能悉心讀之。斯不負耳。公聞而悚息。由是侵晨起讀。中夜而休。泛覽百家。足不出戶者。幾一年。

〔丁酉〕道光十七年公二十七歲。公聞瀏陽文廟用古樂。詣瀏陽縣與其邑舉人賀以南等。諮考聲音律呂之源流。留兩月乃歸。過長沙。適劉公蓉與湘陰郭公嵩薰均在省城應試。相見。懽甚。縱談今古。昕夕無間。閱月餘。始各別去。公妹國蕙出閣。適王氏。壻名待聘。十月。公生子。命名禎。第十二月。公謀入都會試。無以爲資。稱貸於族戚家。攜錢三十二緡以行。抵都中。餘三緡耳。時公車寒苦者。無以逾公矣。

〔戊戌〕道光十八年公二十八歲。正月入都門。寓內城西登壇堂。本科會試。欽派大總裁大學士穆彰阿公及朱公士彥吳公文鏞廖公鴻荃。欽命四書首題言必信。行必果。次題。萬物並育而不相害。道並行而不相悖。三題。頌其詩。讀其書。不知其人可乎。是以論其世也。是向友也。詩題賦得泉細寒聲生夜壑。公中式第三十八名進士。房考官季公芝昌。同鄉中式者五人。寧鄉梅公鍾澍。茶陵陳公源充。尤公至好。四月。正大光明殿覆試一等。殿試三甲第四十二名。賜同進士出身。朝政一等第三名。進呈宣宗。拔置第二名。五月初二日引見。改翰林院庶吉士。公少時器宇卓犖。不隨流俗。旣入詞林。遂毅然有效法前賢。澄清天下之志。讀書自爲課程。編摩記注。分爲五門。曰

茶餘偶談。曰過隙影。曰饋貧糧。曰詩文鈔。曰詩文章。時有論述。不以示人。讀書務內自足。亦性然也。中式後。更名國藩。八月請假出都。與凌公玉垣郭公嵩燾偕行。道出襄樊。舟次安陸。遇大風。鄰舟數十。鮮有完者。公舟獨無恙。十二月抵家。曾氏自占籍衡陽以來。無以科名顯者。星岡公始督課子姪受學。賓禮文士。公遂以是年成進士。入翰林。星岡公年六十。健在。後公官至學士。堂上猶重慶。至侍郎。星岡公猶及見之。京朝官無及其盛者。公之以翰林歸也。親友踵門而賀。竹亭公治酒款客。比酒罷。星岡公語竹亭公曰。『吾家以農爲業。雖富貴毋失其舊。彼爲翰林。事業方長。吾家中食用。無使闕。以累其心。』自是以後。公官京師十餘年。未嘗知有家累也。

〔己亥〕道光十九年公二十九歲。正月。鄉里天行痘證大作。公季妹及子禎第皆染痘殤。季妹年十歲。禎第生甫十五日也。四月。公至衡陽。五月。公至耒陽。謁杜工部祠堂。遂至永興。有會紀詩者。執贄願從事。公爲書勸之。以學。六月。還至耒陽。舟行出昭陽河。至清泉縣之泉溪市。還寓石鼓書院。數日乃抵家。議修譜牒。清查源流。八月。公由邵陽至武岡州。還至新化及安化縣之藍田市。十月。抵家。公妹國芝出閣。適朱氏。壻名詠春。公弟國華出繼叔父高軒公爲後。十一月初二日。子紀澤生。是日啓行北上。竹亭公高軒公送之長沙。十二月。由漢口行。次羅山縣。遇大雪。遂留度歲。是歲始爲日記。逐日記注所行之事。及所讀之書。名曰過隙影。公會試座師朱文定公士彥卒於位。

〔庚子〕道光二十年公三十歲。正月。由羅山啓行。至周家口。換車入都。寓宣武門外南橫街千佛菴。與同年陳公源充梅公鍾樹聯課爲詩賦。四月。移寓旋園掛甲屯。十七日散館。欽命題正大光明殿賦。以執兩用中懷永圖爲韻。詩題賦得人。情以爲田。取列二等第十九名。引見授職檢討。是科散館改部屬者二人。改知縣者三人。餘皆留館。六月。移寓菓子巷萬順客店。病熱危劇。幾不救。同寓湘潭歐陽小岑先生兆熊經理護持。六安吳公廷棟爲之診治。八月初。病漸減。始能食粥。九月。乃大愈。欽派順天鄉試磨勘官。十月。移寓達子營之關侯廟。與同年編修錢振倫同寓。十二月。移寓棉花六條胡同北路。竹亭公入都。公夫人歐陽氏。公弟國荃子紀澤從入都。

〔辛丑〕道光二十一年公三十一歲。正月元日。入大內。隨班朝賀。嗣是歲以爲常。初十日。偕同鄉京官。至旋園遞摺謝恩。爲湖南岳常澧各處被水。緩徵借給籽種。去歲大西洋英吉利國兵陷定海。宣宗命大學士琦善往廣軍。

查辦。是月報英吉利攻破沙角礮臺。直逼虎門。上通諭中外。授奕山爲靖逆將軍。隆文楊芳爲參贊大臣。琦善革職。閏三月。竹亭公出都還鄉。五月。梅公鍾樹在都病故。公爲經理其喪。委曲周至。六月。管理長沙府會館事。益陽胡公源達卒。公作誄詞輓之。七月。皇上御門侍班。善化唐公鑑由江寧藩司入官太常寺卿。公從講求爲學之方。時方詳覽前史。求經世之學。兼治詩古文詞。分門記錄。唐公專以義理之學相助。公遂以朱子之書爲日課。始肆力於宋學矣。八月。移寓繩匠胡同北頭路東。十月。充國史館協修官。二十八日。偕同鄉京官遞摺謝恩。爲岳州水災蠲免錢糧。公寓書善化賀公長齡。自陳其所學所志。十一月十五日。公長女生。後適湘潭袁氏。壻名秉楨。公弟國荃肄業京寓。公爲之講課。

〔壬寅〕道光二十二年公三十二歲。公益致力程朱之學。同時蒙古倭仁公六安吳公廷棟昆明何公桂珍寶公塈仁和邵公懿辰及陳公源堯等。往復討論。以實學相砥礪。其爲日記。力求改過多痛自刻責之言。每日必自記錄。是爲日課。每月中作詩古文若干篇。是爲月課。凡課程十有二條。一曰主敬。二曰靜坐。三曰早起。四曰讀書。不。二。五曰讀史。六曰謹言。七曰養氣。八曰保身。九曰日知所亡。十曰月無忘所能。十一曰作字。十二曰夜不出門。是春英吉利洋船駛入鎮江。沿江諸城多不守。和議成後。乃退出海口。七月。公弟國荃出都。公送之都門外蘆溝橋。以詩爲別。有句云。「辰君平正午君奇。屈指老沅真白眉。」公弟國潢生庚辰歲。國華生壬午歲。國荃字沅甫也。〔癸卯〕道光二十三年公三十三歲。三月初十日。上諭正大光明殿致試翰詹。欽命題如石投水賦。以陳善閉邪。謂之敬爲韻。烹阿封卽墨論。詩題賦得半窗殘月有鶯啼。欽定一等五人。萬青黎殷壽彭張芾蕭良城羅敦衍。公列二等第一名。十四日引見。奉旨以翰林院侍講升用。五月。考試差。六月。欽命公充四川正考官。以趙楫副之。七月。公第二女生。公出都行至保定府。病暑不能食。扶病而行。閏七月行至西安。李公星沅時爲陝西巡撫。延之署中。治醫藥數日。病漸愈。卽啓入蜀。八月初四日抵成都。接准吏部咨文。已於七月十五日。補授翰林院侍講之缺。眞呈四川總督寶興公代奏謝恩摺。是科四川鄉試首題不知言無以知人也。次題體羣臣也。子庶民也。三題人有不爲也。而後可以有爲。詩題賦得萬點蜀山尖。揭曉得士宋文親等六十二名。副榜十二名。如例。九月二十一日由成都回節。十一月二十日抵都門覆命。充文淵閣校理。公居京師四年矣。宦况清苦。力行節儉。而遇窮困及

有疾病死。死者助資必豐。四川差竣。得俸千金寄家。爲醜遺族姻之用。

〔甲辰〕道光二十四年公三十四歲。正月。陳公源充之妻易安人病卒於京師。其子遠濟甫生一月。公攜之宅中。僱乳媪飼養之。以次女許字之。二月。侍班於文淵閣。贊經筵大典。三月二十四日。移寓前門內碾兒胡同西頭路北。四月。考試差。五月初十日。奉上諭。翰林院自侍講以下。詹事府自洗馬以下。每日召見二員。公於二十日。召見勤政殿。派充翰林院教習庶吉士。八月。新寧江公忠源以公車留京師。因郭公嵩燾求見公。江公素以任俠自喜。不事繩檢。公與語市井瑣屑事。酣笑移時。江公出。公目送之。回顧嵩燾曰。「京師求如此人才不可得。」旣而曰。「是人必立功名於天下。然當以節義死。」時承平日久。聞者或駭之。江公自是遂師事公。二十八日。公第三女生。後適羅氏忠節公澤南之子。名兆升。九月分枝庶常館。十二月初七日。上御門轉補翰林院侍讀。公作字初學顏柳帖。在詞垣兼臨楮帖。於詩則五七古學杜韓。近體專學杜。而於蘇黃之古詩。溫李之近體。亦最爲致力。還書家中。訓勉兄弟。以立志有恆爲本。作五箴以自警。一曰立志。二曰居敬。三曰主靜。四曰謹言。五曰有恆。公子紀澤是歲入家塾。塾師爲長沙馮樹棠先生。卓懷。

〔乙巳〕道光二十五年公三十五歲。三月。欽派會試同考官。簽分第十八房。薦卷六十四本。中式周士炳等十有九人。是科湖南中式八人。皆長沙府籍。貴州中式之黃輔相與姪彭年二人。原籍醴陵。而狀元爲蕭錦忠。朝元爲孫鼎臣。去秋鄉試。南元爲周壽昌。亦於是科入翰林。公時管理長沙郡館事。題名之日。公爲聯語云。「同科十進士。慶榜三名元。」蓋佳話也。五月初二日。上御門。公升授詹事府右春坊庶子。次日具摺謝恩。召見公於勤政殿。六月。轉補左庶子。夏間癘疾發。至秋微愈。自是以往。癘疾恆作。以至老年。未得全瘳也。九月。公弟國漢國華入都。二十四日。上御門。升授翰林院侍講學士。次日具摺謝恩。召見。宣宗時每歲舉行御門之典。至四五次。京朝官缺。多以其月簡放。示爵人於朝。與衆共之之意。合肥李公鴻章。本年家子也。中甲辰科舉人。是年入都會試。受業公門。公大器重之。十月初十日。皇太后萬壽。十五日。頒恩詔於太和殿。公祖父父母。以公官。皆封中憲大夫。恭人。十一月。唐公鑑乞假回湖南。公爲校刻其所著學案小識一書。十二月十二日。補日講起居注官。二十二日。充文淵閣直閣事。公名位漸顯。而堂上重慶。門祚鼎盛。公每以盈滿爲戒。自名其書舍曰求闕齋。其說云。「求闕於他。」

事而求全於堂上也。」同鄉京官及公車在都門者。遇疾患窮窘之事。恆有求於公。公嘗謂銀錢則量力攸助。辦事則竭力經營。人莫不稱厚焉。

〔丙午〕道光二十六年公三十六歲。公與弟國潢國華相砥厲於學。有如師友。爲國華納貢入監。應順天鄉試。五月。考試差。九月十八日。公第四女生。後適湘陰郭氏。郭公嵩燾之子。名剛基。夏秋之交。公病肺熱。僦居城南報國寺。閉門靜坐。攜金壇段氏所注說文解字一書。以供披覽。漢陽劉公傳瑩精考據之學。好爲深沈之思。與公尤莫逆。每從於寺舍。兀坐相對竟日。劉公謂近代儒者。崇尚考據。敝精神費日力而無當於身心。恆以詳說反約之旨。交相勸勉。寺前有祠一所。祀崑山顧亭林先生。十月。公在寺爲詩五首贈劉公。以明其志之所嚮。公嘗謂近世所學者。不以身心切近爲務。恆視一時之風尚以爲程而趨之。不數年風尚稍變。又棄其所業。以趨於新。如漢學宋學。詞章經濟。以及一技一藝之流。皆各有門戶。更迭爲盛衰。論其原皆聖道所存。苟一念希天下之譽。校沒世之名。則適以自喪其守。而爲害於世。公與劉公傳瑩討論務本之學。而規切友朋。勸誠後進。一以此意爲兢兢焉。公在京所爲詩古文。不自存錄。隨時散佚。是冬以後。乃稍檢而存之。公弟國華應鄉試未售。仍留京肄業。公弟國潢賈單恩誥命南歸。十月二十一日。領同鄉京官。具摺謝恩。爲湖南瀕湖圍田水災。奉旨蠲緩錢糧。湖南水災。迭奉恩旨。至是初用公名領銜奏事。十一月。聞祖妣王恭人之訃。請假兩月。設次成服。恭人歿以九月十八日。壽八十八歲。十二月。葬湘鄉二十四都木兜衝。

〔丁未〕道光二十七年公三十七歲。三月。移寓南橫街路北。四月二十七日。奉旨考試翰詹。欽命題遠使賦。以庸問下民。常厥德爲韻。君子慎獨論。詩題賦得操身浴德。公名列二等第四名。五月引見。奉旨記名遇缺題奏。賞大卷綬二件。六月。奉旨升授內閣學士。兼禮部侍郎銜。次日遞摺謝恩。召見勤政殿。欽派考試漢教習閱卷大臣。取士咸寧宮學教習黃文璧等十三名。景山官學劉紹先等十五名。宗學郭嵩燾等十五名。覺羅官學崔斌等三十名。八旗學張春第等四十八名。七月。公弟國荃以府試案首。入湘鄉縣學。十月。欽派武會試正總裁。中式楊登魁等六十四人。又派殿試讀卷大臣。凡武進士弓矢技勇。上親閱之。派大臣及兵部尙書侍郎等侍班。十月二十日。領同鄉京官。具摺謝恩。爲沅澧一帶水災。奉旨蠲緩錢糧。十二月初九日。又遞摺謝恩。爲三廳歉收。緩征屯田。是

歲山東河南亢旱盜賊蜂起兩省大吏交部嚴議欽差柏後陳孚恩前往捕賊平之李公鴻章郭公嵩燾李公宗毅均以是科成進士。

〔戊申〕道光二十八年公三十八歲正月初八日領同鄉京官具摺謝恩爲上年水災借給籽種二月二十四日子紀鴻生漢陽劉公傳瑩移病歸籍公爲文以送之七月公弟國荃科試一等補廩臆生九月十四日領同鄉京官具摺謝恩因水災奉旨撫卹十八日欽派稽查中書科事務公官至卿貳名望漸崇而好學不倦其於朝章國故如會典通禮諸書尤所究心又采輯古今名臣大儒言論分條編錄爲曾氏家訓長編分修身齊家治國爲三門其目三十有二公嘗謂古人無所云經濟之學治世之術壹衷於禮而已秦文恭公五禮通考綜括天下之事而於食貨之政稍缺乃取鹽課海運錢法河堤各事鈔輯近時奏議之切當時務者別爲六卷以補秦氏所未備又探國史列傳及先輩文集中心誌狀之屬分門編錄條分近代學術用桐城姚氏之說以主理考據詞章三者爲目依彙輯之星岡公病風痺踰年公令弟國華出都還湖南十月聞劉公傳瑩以病卒於家公設位哭之爲墓志一篇家傳一篇刻石寄其家劉公所著述無成編獨於金氏孟子集注考證中搜得朱子所編孟子要略一書公爲校刻行於世二十三日領同鄉京官具摺謝恩本年水災之區奉旨蠲緩錢糧公官京師十年俸薄不給於用取資稱貸及官侍郎每歲以其所得俸銀數十兩爲高堂甘旨之奉兼以周族戚之貧者

〔己酉〕道光二十九年公三十九歲正月初九日率同鄉京官具摺謝恩爲災區借給籽種二十二日奉旨升授禮部右侍郎次日具摺謝恩召見上嘉勉焉公勤於供職署中辦事無虛日八日一至淀園該班奏事有事加班不待期日在部司員咸服其條理精密三月十四日值班召見三十日又召見每有奏對恆稱上意禮部翰林院詹事府署中皆有土地祠祠皆祀先儒韓愈禮部之祠復有孔子木主胥吏相沿莫知所自公取木主焚化而爲文以祀韓子辯正其謬夏督修長沙府會館旋又修湖廣會館位置亭榭有紆餘卓犖之觀八月初二日奉旨兼署兵部右侍郎二十五日欽派宗室舉人覆試闈卷大臣九月十七日欽派順天鄉試覆試闈卷大臣十月初四日欽派順天武鄉試校射大臣武鄉試分四圍王大臣分較公所較中式者五十二名二十六日率同鄉京官具摺謝恩爲水災奉旨蠲緩錢糧是歲東南各省大水民飢江南浙江湖北均展期九月舉行鄉試湖南賊匪李沅

發倡亂於新寧。戕官據城。分擾黔粵邊境。粵逆亦從此萌芽矣。先是江公忠源在籍擒獲會匪雷再浩。遂以知縣擢發浙江。署秀水縣事。辦理賑災及保甲。甚得民譽。公聞新寧之亂。恐匪黨尋仇及江公之家。遂致書江公。勸其率官以赴家難。未幾而賊黨潰竄。江公家亦無損焉。十一月十五日。聞祖考星岡公之訃。請假兩月。設位成服。星岡公之卒。以十月初四日。壽七十有六歲。葬於八斗衝。遷王恭人之柩祔葬。十二月十一日。孝和睿皇后升遐。公以禮部職任所在。不俟假滿。即日入內供辦。其事仍不與聞。

〔庚戌〕道光三十年公四十歲。正月十四日。宣宗成皇帝升遐。殊諭遺命四條。其中無庸郊配。無庸廟祔二條。文宗嗣位。諭令臣工詳議具奏。十五日。奉移孝和睿皇后梓宮於漪春園。十六日。諭臣下議行三年喪禮。二十三日。召見。咨以大禮。二十六日。上諭太和殿頒登極詔書。二十七日。王大臣九卿集議。覆奏郊配廟祔二事。公專摺具奏稱。遺命無庸廟祔一條。攷古準今。萬難遵從。無庸郊配一條。不敢從者有二。不敢違者有三。疏對甚晰。時恭遇登極單恩。加一級。請封三代。皆封榮祿大夫。公以本身妻室應得封典。懇封叔父母。二月初二日。內賜遺念衣一件。玉佩一事。是日奉移大行皇帝梓宮於圓明園正大光明殿。初六日。奉上諭。侍郎曾國藩所奏。頗有是處。其餘京堂及科道等所奏。各紆己見。殊少折衷。各摺均著發還。欽此。初七日。召見。公奏對甚詳。上益嘉之。初八日。奉上諭。九卿科道。有言事之責者。得用人行政一切事宜。皆得據實直陳。封章密奏等因。欽此。三月。公遞應詔陳言一摺。奏稱用人行政。二者并重。然凡百庶政。著有成憲。未可輕議。今日所當講求。惟在用人一端。人才有轉移之道。有培養之方。有攷察之法。三者不可廢一。皇上春秋鼎盛。與聖祖仁皇帝講事之年相似。請俟二十七日後。舉行逐日進講之例。亦請廣開言路。借臣工奏章。以爲考核人才之具。疏入。奉上諭。禮部侍郎曾國藩奏陳用人之策。朕詳加披覽。剴切明辨。切中情事。深堪嘉納。連日左副都御史文瑞大理寺卿倭仁通政使羅惇衍等。各陳時事。朕四降旨褒嘉。其通政副使王慶雲鴻臚寺少卿劉夏駒及科道等摺。分別准行交議。如該侍郎摺內所請保舉人才。廣收直言。迭經降旨宣示。諒各大小臣工。必能激發天良。彌予郵治。惟稱日講爲求治之本。我聖祖仁皇帝登極之初。即命儒臣逐日進講。寒暑無間。朕紹承丕業。夙夜孜孜。景仰前徽。勉思繼述。著於百日後。舉行日講。所有一切應行事宜。著各該衙門查例詳議以聞。欽此。初四日。奏入春以來。雨澤稀少。農田待澤孔殷。請設壇祈禱。

以迓和甘。而慰民望一摺。十二日孝和睿皇后升祔。覃恩。公呈請本身妻室封典。十五日公弟國潢入都。相見極歡。時以職務繁劇。不遑兼顧家事。悉以屬公弟經理。十九日下淀園。恭送孝和睿皇后梓宮。奉安昌陵。四月初四日。奏陳日講事宜。補前摺所未備。凡十四條。其於講官員數。進講之地。所講之書。陳講之道。以及講官儀節體制等事。皆詳考聖祖御製文集。會典與國史列傳各書。先定大概規模。於贊助聖學之中。寓陶成人才之意。猶前疏中之指也。十二日宣宗成皇帝升配。覃恩。加二級。請封三代光祿大夫。公以本身妻室應得封典。馳封叔父母。十七日。欽派會試覆試闈卷大臣。十九日移寓賈家胡同南頭路西。二十九日。欽派朝考闈卷大臣。是科入館選者五十八人。是月湖南新寧賊酋李沅發就擒。檻送京師斬之。上年收復新寧。巡撫馮公德馨奏報李逆死於亂軍中。春間李逆復出。馮德馨逮問遣戍。詔以駱秉章爲湖南巡撫。五月初二日。公第五女生。後殤。十四日。在署考試各省優貢。時奉旨令部院九卿。各舉賢才。公疏薦五人。奏稱李棠階以學政歸家。囊囊蕭然。品學純粹。可備講幄之選。吳廷棟不欺屋漏。才能幹濟。遠識深謀。可當大任。王慶雲閱才精識。脚踏踏實。可膺疆宇之寄。嚴正基洞悉民隱。才能濟變。江忠源忠義耿耿。愛民如子。六月初四日。奉旨兼署工部左侍郎。十四日。欽派朝考拔貢闈卷大臣。是科取士二百餘人。七月。公弟國葆以縣試案首。入湘鄉縣學。年二十三歲。與公入學之年同。公每縮部務。悉取則例。博綜詳考。準以事理之宜。事至剖斷無滯。其在工部。尤究心方輿之學。左圖右書。鉤校不倦。於山川險要。河漕水利諸大政。詳求折中。八月十一日。召見。詢以工部職務。公奏對詳悉。移時乃退。二十一日。欽派考試國子監學正學錄闈卷大臣。取士五十名。引見記名者二十人。九月十八日。恭送宣宗成皇帝梓宮。奉安慕陵。欽派梓宮前恭捧冊寶大臣。二十四日。饗奠禮畢。禮部堂官各加二級。二十五日。具摺謝恩。次日。皇上駐蹕秋闈。行宮諭隨扈各員。均加一級。十月。回鑾。奉旨兼署兵部左侍郎。十一月三十日。領同鄉京官。具摺謝恩。爲水災州縣。蠲緩錢糧。十二月二十二日。禮部奏元旦禮節。殊批嚴飭禮部堂官。分別交部議處察議。尋奉旨。准予抵銷。處分是年夏間。廣西賊匪大起。巨股數十。六月。逆首洪秀全與其黨楊秀清。蕭朝貴等。起於桂平。縣之金田。邨。爲數最衆。且悍。詔以向榮爲廣西提督。起用林則徐爲欽差大臣。馳赴廣西督勦。以前雲南提督張必祿督師會勦。廣西巡撫鄭祖琛革職。既而林文忠公則徐卒於道。張武壯公必祿至潯州亦卒。詔以李星沅爲欽差大臣。以周天爵署廣

西巡撫

〔辛亥〕咸豐元年公四十一歲。正月初十日。領同鄉京官。具摺謝恩。爲上年災區借給籽種。十四日上祇謁慕陵。行初周年禮。禮部堂官悉從。公奉旨派留署辦事。二月。上諭廣州副都統烏蘭太馳往廣西。幫辦軍務。二十六日。公弟國潢出都還湖南。粵西賊勢益熾。三月。上命大學士賽尙阿爲欽差大臣。前赴廣西督師。以都統巴清德副都統達洪阿爲之副。初九日。公奏簡練軍實。以裕國用一摺。奏稱天下大患。一在國用不足。一在兵伍不精。近者廣西軍興。紛紛徵調。該省兵額。竟無一足用者。他省可推而知。當此餉項奇絀。惟有量加裁汰。痛加訓練。庶餉不虛糜。而兵歸實用。謹鈔錄乾隆增兵。嘉慶道光滅兵三案進呈。疏入召見。嘉其切中時弊。諭以俟廣西事定。再行辦理。疏留中。十四日。禮部奏請以宋臣李綱從祀孔子廟廷。時福建巡撫徐繼畬原奏稱李綱所著書。有周易傳論語說二種。公復查得綱所著中興至言建炎類編乘閒志預備志各書。文淵閣著錄者。梁溪集建炎時政記二種。奉旨准其從祀。在先儒胡安國之次。四月二十六日。公奏敬陳聖德三瑞。預防流弊一摺。維時上孜孜求治。在廷臣僚。鮮以逆耳之言進者。廣西軍事日棘。賽尙阿公以端揆大臣。出而督師。中外驚懼。公意欲爲人臣者趨尙骨鯁。培其風節。養其威稜。遇有事變。乃可倚之以折衝捍患。不至畏葸退縮。公所陳多切直之語。疏入時。恐犯不測之罪。上諭會國藩條陳一摺。朕詳加披覽。意在陳善責難。預防流弊。雖迂腐欠通。意尙可取。朕自卽位以來。凡大小臣工章奏。於國計民生。用人行政諸大端。有所補裨者。無不立見施行。卽敷陳理道。有益身心者。均著置左右。用備省覽。其或窒礙難行。亦有駁斥者。亦有明白宣諭者。欲求獻納之實。非徒沽納諫之名。豈遂以毋庸議三字置之不論也。伊所奏除廣西地利兵機。已查辦外。餘或語涉過激。未能持平。或僅見偏端。拘執太甚。念其意在進言。朕亦不加斥責。至所論人君一念自矜。必至喜諛惡直等語。頗爲切要。自維藐躬德薄。夙夜孜孜。時存檢身不及之念。若因一二過當之言。不加節取。采納不廣。是卽驕矜之萌。朕思爲君之難。臣亦當思爲臣之不易。交相咨儆。坐言起行。庶國家可收實效也。欽此。公是疏得奉覆旨。時稱盛事焉。是月李文恭公星沅卒於軍。五月。詔授鄒鳴鶴爲廣西巡撫。十八日。唐公鑑入都。召見十餘次。極耆儒晚遇之榮。二十六日。公奉旨兼署刑部左侍郎。次日具摺謝恩。并以前疏激直。未獲咎戾。具申感激之意。六月。賽尙阿公抵桂林。疏調江公忠源隨營差遣。江公方

丁憂在籍。應調赴湘。烏蘭太公一見而極重之。留於幕府。每事必諮焉。復委募楚勇五百人助勦。是爲湖南鄉勇出境勦賊之始。公前官翰林時。與倭仁公唐公鑑輩講學。逐日記注。中輟數年。劉公傳瑩爲公書齋額曰養德養身。縣縣穆穆之室。至是公乃仿程氏讀書日程之意。爲日記曰縣縣穆穆之室日記。其說曰。自戒懼而約之。以至於極中。而天地位。此縣縣者由動以之靜也。自謹獨而精之。以至於極和。而萬物育。此穆穆者由靜以之動也。由靜之動。有神主之。由動之靜。有鬼司之。始終往來。一以貫之。每日自課以八事。曰讀書。曰靜坐。曰屬文。曰作字。曰辦公。曰課子。曰對客。曰復信。觸事有見。則別識於其眉。八月。欽派順天鄉試搜檢大臣。公兼攝刑曹。職務繁委。值班奏事。入暑辦公。蓋無虛日。退食之暇。手不釋卷。於經世之務。及在朝掌故。分彙記錄。凡十有八門。大學士琦善公在新疆辦理番案得罪。欽差大臣薩迎阿公前往查辦。奏請將琦善交刑部治罪。奉旨逮問。閏八月。琦善至京師。入刑曹。欽派軍機大臣三法司會審。琦善自寫供摺千餘言。謂由薩迎阿之陷害。在廷諸公。亦頗咎薩公原奏之過。時薩公代琦善當任。未旋京邸。會審之際。琦善爭辯不已。軍機章京邵懿辰駁詰供詞十九事。諸公不之省。乃議傳薩公所隨帶查辦之司員四人。赴法堂與琦善對訊。至有議反坐者。公獨曰。琦善雖位至將軍。然既奉旨查辦。則研鞫乃其職分。司員職位雖卑。無有傳入廷尉與犯官對質之理。若因此得罰。將來大員有罪。誰敢過問者。且諭旨但令會審琦善。未聞訊及司員。必欲傳訊。當奏請奉旨然後可。一爭之甚力。詞氣抗厲。四坐爲之悚動。其事遂已。廣西逆匪竄陷永安州城。僭僞王號。賽尙阿公督師由桂林進勦。二十一日。上御門。聞永安失守之警。督兵將帥。皆奉旨申飭。二十六日。禮部考送軍機章京。二十九日。刑部考送軍機章京。九月初一日。領同鄉京官。具摺謝恩。爲水災州縣。豁免錢糧。十月十二日。欽派順天武鄉試大主考。以沈公兆霖爲之副。是科中式武舉一百六十六名。十七日。試竣。覆命召見。十一月初三日。監視郊壇開工。十九日。領同鄉京官。具摺謝恩。爲新寧縣經兵亂。奉旨蠲免錢糧。與倉穀之未完者。又因武陵等州縣水災。蠲緩錢糧。十二月十八日。公奏備陳民間疾苦一摺。奏稱國貧不足患。惟民心渙散。則爲大患。知前之急務。其大端有三。一曰銀價太昂。錢糧難納。二曰盜賊太衆。良民難安。三曰冤獄太多。民氣難伸。其時銀價昂貴。朝野均以爲苦。宣宗曾飭部院衙門。各省督撫。議變通平價之法。公疏於弭盜賊。清獄訟二條。請申諭外省。思所以更張之。其平銀價一條。卽於次日續遞銀錢并用章

程一摺。奏稱十年以來。中外臣工奏疏言錢法者。不爲不多。臣之所深服者。惟吳文鎔劉夏駒朱嶠三疏。謹就三臣原奏。參以管見。擬章程凡六條。并鈔錄吳文鎔等原疏。進呈御覽。奉旨交戶部議奏。二十六日。監視募陵隧道開工。是歲公選錄古今體詩凡十八家。又選錄古文詞百篇。以見體要。

〔壬子〕咸豐二年公四十二歲。正月二十四日。奉旨兼署吏部左侍郎。次日具摺謝恩。二月十九日。隨扈謁慕陵。是月廣西永安州賊竄出。官軍大挫。總兵官長瑞等四人陣亡。賊撲攻桂林省城。都統武壯公烏蘭太追賊至將軍橋陣亡。江公忠源之軍。初與烏公偕。至是回籍。益募楚勇赴桂林防勦。三月初二日。奉宣宗成皇帝永安地宮。上行虞祭禮回鑾。初七日。奉神牌升祔。頒恩詔於太和門。初八日。率同鄉京官。遞摺謝恩。爲豁免屯丁實欠。欽派會試搜檢大臣。十一月。警報至都下。奉旨烏蘭太向榮交部嚴加議處。賽尙阿交部議處。公赴部會議。以軍務關係重大。議處罪名。宜從重者。不當比照成例。會議罷後。公專摺奏請從嚴議處。詔改從寬典焉。十八日。禮部奏請以宋臣韓琦從祀孔子廟廷。二十七日。奉旨派恭送太廟冊寶。三十日。公第六女生。後字衡山。聶氏壻。名緝槩。歐陽夫人之兄柄銓入都。是時粵匪猖獗。河工未合。京畿亢旱。人情驚憫。上詔求直言。內閣學士勝保上疏失檢。交部嚴議。部議降三級調用。公奏請特旨寬免勝保處分。以廣言路一摺。上納用焉。疏留中。四月初一日。宣宗成皇帝升配。詔禮部諸臣各加一級。廣西省城解圍。賊竄陷全州。入湖南境。掠民船將浮湘而下。江公忠源以楚勇破之於叢衣渡。五月。賊竄陷道州。六月十二日。欽命充江西鄉試正考官。次日遞摺謝恩。附片奏請試竣後。賞假兩月。回籍省親。公自己亥之冬。入都供職。十有餘年。由翰林七遷至侍郎。眷遇甚隆。中間星岡公衰老疾病。屢思乞假歸省。於勢未得。至是得江西試差。乃請假回籍。殊批允之。二十四日。馳驛出都。二十九日。過河間府。吳公廷棟權守河間。相見於途次。七月十三日。道過宿州。周公天爵方引病在籍。以函約公相見於旅舍。縱談今古。自夜達旦。乃別去。二十五日。行抵安徽太和縣境。小池驛聞訃。江太夫人於六月十二日薨逝。公大慟。改服犇喪。取道黃梅縣。覓舟未得。乃乘小舟渡江。至九江府城。雇舟泝江西上。賊於六月由道州竄出。陷桂陽州。是月陷郴州。由安仁醴陵下犯長沙省城。湖南各郡舊有會匪。蠢焉思動。湘鄉尤多匪蹤。縣令朱孫貽緝治甚勤。禮請邑中儒士羅公澤南李公續賓兄弟。王公鑫劉公蓉等。團練鄉勇。加以訓練。而竹亭公以鄉老巨望。總其成。是時鄉團以湘

鄉爲稱首。八月十一日。公舟至黃州。登陸。十三日抵武昌。常公大醇爲湖北巡撫來唁。公始知逆匪撲長沙之警。十四日由武昌啓行。十八日抵岳州。取道湘陰寧鄉。二十三日抵家哭殯。旋謁星岡公墓。逆賊大股。均至長沙。官軍亦漸集。江公忠源於南門外。近逆壘爲營。賊不得逞。詔以張亮基爲湖南巡撫。張公入守長沙。以左公宗棠入贊軍幕。九月十三日。江太夫人葬於下腰里宅後山內。賊用地道轟長沙城。官軍拒卻之。時承平日久。驟經兵亂。人心惶怯。僞言四起。雖未見賊之地。亦相率挈家驚走。公在家遇鄉里人。則教之以保守之方。鎮靜之道。蹇尙阿公至長沙。奉旨逮問。以徐廣縉爲欽差大臣。督兵勦賊。十月長沙圍解。賊渡湘西。竄寧鄉益陽。東出臨資口。大掠民船。竄湘陰。陷岳州。官軍數萬人。自長沙拔營追之。十一月。賊船蔽江而下。陷漢陽府城。張公亮基於賊退後。搜捕土匪甚嚴。留江公忠源之楚勇二千人。駐省城防守。札委湘鄉羅澤南王鑫等招募湘勇千人。入省城防守。時巴陵匪徒晏仲武等作亂。江公忠源以楚勇往討捕之。是月湖南巡撫奉上諭。前任丁憂侍郎曾國藩籍隸湘鄉。於湖南地方人情。自必熟悉。著該撫傳旨。令其幫同辦理本省團練鄉民。搜查土匪諸事。伊必盡力。不負委任等因。欽此。十二月武昌省城失守。湖北巡撫常文節公大醇等殉難。十三日。公奉到寄諭。草疏懇請在家終制。并具呈請巡撫張公代奏。繕就未發。適張公專弁。以函致公。告武漢失守。人心惶恐。懇公一出。郭公嵩燾至公家力勸。出保桑梓。公乃燬前疏。於十七日起行。二十一日抵長沙。與張公亮基籌商。一以查辦匪徒爲急務。二十二日。拜摺敬陳團練鄉民。搜查土匪大概規模。且稱長沙省城兵力單薄。行伍空虛。不足以資守禦。因於省城立一大區。就各縣曾經訓練之鄉民。招募來省。實力操練。既足以資勦捕土匪。於防守省城。不無裨益。是摺奉硃批知道了。悉心辦理。以資防勦。欽此。公又附片奏稱。臣在京供職十有四年。今歲歸來。祖父母之墓。已有宿草。臣母之葬。亦未盡禮。若遽棄庭闈。出而蒞事。萬分不忍。請俟賊氛稍息。團防之事。辦有頭緒。即當回籍守制。以遂烏私。維時羅公澤南領所招湘鄉練勇三營。已至省城。仿前明戚繼光束伍成法。逐日操練。公爲之酌定訓練章程。故疏中及之。其後夏將輩出。實濫觴於此。瀏陽會匪煽亂。號曰徵義堂。其匪首爲周國瑜。聚黨逾萬人。江公忠源以楚勇往。出其不意。一戰破平之。武昌陷後。詔授向榮爲欽差大臣。徐廣縉稔問。前湖廣總督程喬采革職。詔以張亮基署總督。又特命琦善爲欽差大臣。偕直隸提督陳金綬內閣學士勝保督兵馳赴楚豫之交。堵賊北竄。又以兩江總

督陸建瀛爲欽差大臣。出省堵勦。

〔癸丑〕咸豐三年公四十三歲。正月公在長沙。督辦街團。委在籍江蘇候補知州黃廷瓚安徽候補知縣曹光漢編查保甲。以書函勸諭。不用公牘告示。又以書徧致各府州縣士紳。其大致以爲團練之難。莫難於集費。宜擇地擇人而行之。目前急務。唯在清查保甲。分別良莠。以除暴爲安良之法。遇有匪徒。密函以告。卽行設法掩拿處辦。庶幾省文移之煩。可期無案不破。其書中有不要錢不怕死二語。公所自矢者。一時稱頌之。十一日。張公亮基赴湖北署總督任。江公忠源從行。其楚勇留長沙者。江公忠濟劉公長佑接統之。二十二日。耒陽常寧報有匪徒嘯聚白沙堡。擾及嘉禾境。公調派劉長佑李輔朝帶楚勇五百。王鑫帶湘勇三百。二十五日啓行進勦。未至而常未之匪。聞風先潰。適衡山縣境之草市土匪竊發。楚勇湘勇留衡山。一戰平之。二月初三日。奉上諭。封疆大吏。翦除百惡。卽可保衛善良。著該署督撫等。認真查辦。并著會同在籍侍郎會國藩體察地方情形。應如何設法團練。以資保衛之處。悉心妥籌辦理等因。欽此。十二日。公奏嚴辦土匪。以靖地方一摺。奏稱湖南會匪名目甚多。近年有司掩飾彌縫。任其猖獗。非嚴刑峻法。無以銷遏亂萌。時公於長沙城中魚塘口爲行轅。設審案局。委候補知州劉建德照磨嚴良峻承審拿獲匪徒。立予嚴訊。用巡撫令旗。卽行正法。或即斃之杖下。分別會匪教匪盜匪。及尋常痞匪名目。按情罪以處辦。公意純用重法。以除強暴。而殘忍嚴酷之名。在所不辭也。是疏入。奉硃批。辦理土匪。必須從嚴。務期根株淨盡。欽此。初賊之犯長沙也。調集各省兵勇數萬人。旣而追賊東下。其餘丁散勇逗遛湖南。或數十百人爲羣。出沒附近邨墟。遇湘水行船。上下。輒以兵差爲名。強封之而詐索其財。商旅畏憚。百物幾不通。公捕得強封民船之川兵三人。徑行斬決。梟示江干。由是游手斂迹。風帆暢行無阻。賊陷武漢兩城後。大掠民船數千艘。於正月初旬。括掠丁壯婦女數十萬人。驅入舟中。順流而下。旌旗蔽江。沿江城鎮皆失守。十一日。陷九江府城。十七日。陷安慶省城。二月初十日。攻陷江寧省城。將軍忠勇公祥厚總督陸公建瀛等殉難。賊遂據爲僞都。僞爲號。造宮殿。分其黨林鳳祥等北竄。二十一日。陷鎮江府。二十三日。陷揚州府。皆踞守之。向公榮總統各路兵勇十餘萬。追至金陵而城已陷。遂駐營城外。琦善公率領北方各路官兵。攻圍揚州。是爲江南江北兩大營。劉公長佑等旣破衡山土匪。餘黨竄入攸縣界。遂督勇追勦。而安仁縣土匪又起。坵獄燒官署。在籍候選知州張榮組帶

鎮軍勇數百。與楚勇會勦平之。江公忠源赴鄂。尋奉旨授湖北臬司。又奉旨令赴江南大營。幫辦軍務。江公上書於公。言今日辦賊之法。必合江楚皖各省。造戰船數百艘。調閩廣水師數千人。先肅清江面。而後三城可復。否則沿江各省。後患方長。公治水師之議。萌芽於是矣。湖北崇陽通城兩縣匪徒大起。聚衆數千人。江公領兵勇。於三月初旬。回南勦捕。公飭江忠濟帶所部楚勇。由平江前往會勦。初五日。劉公長佑楚勇回長沙。公亦飭其馳赴崇通會勦。三戰而匪徒殲焉。江公遂盡挈楚勇。下赴江南。省城所招湘鄉練勇千餘人。署巡撫潘公鐸議汰之。還鄉。公前調取三百餘人。以王鑫領之。勦土匪於衡永各屬。其留未汰者。操練無虛日。塔齊布公方署長沙營都司。忠勇冠時。人鮮知者。公一見大奇之。委密捕巨盜數名。皆剋獲。千總諸殿元領辰勇數百人。亦經公所識拔。公委塔齊布兼管領辰勇。與湘勇合全操練。胆技精強。遂成勁旅。三月。潘公鐸具摺告病。駱公秉章仍奉旨署湖南巡撫。以四月十一日到任。奏委塔齊布署撫標中軍參將。各州縣捕送匪徒來省者漸多。嚴刑鞠訊。日有斬梟杖斃之案。前後所戮者二百餘名。湘中匪徒聞風斂迹。李公瀚章以己酉選拔朝考。出公門下。時署湖南益陽縣事。上書於公。勸以緩刑。公未之從也。安化縣屬藍田市。有串子會匪。聚衆謀亂。公飭湘鄉縣知縣朱孫貽以練勇往捕。擒百餘人。事乃解。桂東縣有江廣邊界匪徒竄入。城陷。公與駱公札委張榮組帶三廳兵勇往勦。又調候補道夏廷樾督湘勇七百餘人繼之。未幾桂東平。駱公增募湘勇一營。以監生鄒壽璋領之。歐陽夫人挈子女出都。還湘。夫人之兄柄銓隨行。五月初三日抵長沙。尋歸湘鄉。公弟國葆募湘勇一營。駐紮長沙南門外。江公忠源奏請招練楚勇三千。赴江南助勦。奉旨允之。公因函致江公之弟忠濬。忠濬與寶慶府知府魁聯。令招寶勇。湘鄉縣知縣朱孫貽令招湘勇。來省操練。然後遣赴大營。與江公舊部合成一軍。以壯其勢。江公以四月初七日。由鄂東下。行抵九江。值賊船數百。自金陵上竄。再陷安慶。直抵湖口。勢趨南昌。省城。江公方駐守九江。十日。即馳至南昌。籌備防守。部署粗定。而賊抵城下。設法堵禦。賊不得逞。江公飛檄請援於湖南。湘中聞鄰省之警。人心惶恐。公初擬六月歸行小祥之際。而湘省官紳。并以公爲防守。公乃札張榮組駐營永州。王鑫駐營郴州。以防南路土匪。而調夏廷樾羅澤南以湘勇回省。適奉到寄諭。因金陵賊船駛赴上游。有回攻長沙兼擾南昌之語。有旨令各省督撫嚴防。并令公與駱公會籌防禦。駱公咨提督鮑起豹調兵來省。并札飭所募寶勇湘勇三千人。留於省城聽調。六月十

二日。公與駱公會奏辦理防堵事宜一摺。公又專摺奏稱搜拿土匪。隨時正法。省局委員添派候補知縣厲雲官審訊各案。粗有頭緒。臣母喪初周。擬回修小祥之禮。適聞粵匪回竄江西。臣應留省城會籌防堵。不敢以事權不屬。且軍旅未嫻。稍存推諉。是日又與駱公會摺奏參長沙協副將清德。請旨革職。以儆疲玩。而肅軍政。又專摺奏保署撫標中軍參將塔齊布千總諸殿元。懇恩破格超擢。并稱該二人日後有臨陣退縮之事。即將臣一併治罪。附片特參副將清德性耽安逸。不理營務等款。請交部從重治罪。江忠淑募新寧勇千人。朱孫貽募湘鄉勇千二百人。均抵長沙。公檄江忠淑由瀏陽赴江西。朱孫貽由醴陵赴江西。夏廷樾郭嵩燾羅澤南以兵勇千四百人。由醴陵繼進。合計援江西兵勇三千六百人。是爲湘勇出境勦賊之始。二十二日。公與駱公會奏撥派兵勇。赴江西援勦一摺。湖南調各路兵勇防守省城者數千人。塔齊布公逐日抽調操閱。暑雨不輟。公亟獎其勤。提督鮑起豹至省城。而宣言盛夏操兵之非。由是營伍咸怨塔公。以及於公。時復與湘勇爭釁。公所奏參之副將清德乃依附鮑起豹。而與塔齊布爲仇者。公前疏入。二十九日奉到上諭。塔齊布著賞給副將銜。諸殿元以守備補用。先換頂戴。以示獎勵。欽此。又奉上諭。會國藩奏請將性耽安逸。不理營務之副將革職治罪一摺。清德著革職拿問。交張亮基駱秉章訊明定擬具奏等因。欽此。由是兵伍益怨公矣。七月。公以省城籌防之事粗備。援江之師已成行。遂回籍省親。家居數日。復出至省垣。時新寧勇援江者。行抵瑞州。遇警而潰。至義寧復行招集以進。湘勇援江者。以七月十九日抵南昌。二十四日與賊戰小挫。陣亡營官謝邦翰易良幹羅信東羅鎮南四人。湘勇死者八十餘人。羅公澤南以諸生講學。湘人多從受業者。是役陣亡各員。皆羅公子弟也。賊攻南昌。屢以地道轟城。官軍堵之。江公忠源復以書致公。謂長江上下。任賊船游弋往來。我兵無敢過問者。今日之急。惟當先辦船礮。攻水上之賊。時郭公嵩燾在江公幕中。力阻水師之議。文宗寄諭各督撫。亦屢及之。公商之巡撫駱公。奏請勅調廣東瓊州紅單船。放出大洋。由崇明入江口。以擊賊於下游。調廣東內江快蟹拖罟船。由梧州府江拆灘水。過斗門。浮湘而下。出大江以收上下夾擊之效。長江水師之議。自此始。湖南營兵。與湘勇斷斷不洽。七月十三日。提標兵與湘勇械鬪。公但將湘勇棍責。八月初四日。永順協兵與辰勇械鬪。公咨提督請按治軍法。未行也。初六日。永順協兵掌執執仗。至參將署。欲害塔齊布公。塔公匿菜園草中。以免。兵衆燬其房屋。旋出至公所館撫署側射園中大譁。駱公步

出諭飭之。乃解。時有勸公據實參奏者。公曰。『爲臣子者不能爲國家弭亂。反以瑣事。上瀆君父之聽。於心未安也。』二月中會經奏請移駐衡寶二郡。就近剿辦土匪。遂定計移駐衡州以避之。因與駱公商調塔齊布領寶勇辰勇八百人。益以撫標兵。移駐醴陵。調鄒壽璋領湘勇駐瀏陽。以防江西之賊。調訓導儲攻躬所領湘勇一營。往郴州以防土匪。公弟國葆率所領湘勇上駐衡州。八月十三日。公具摺奏言湖南衡永郴桂各屬。爲匪徒聚集之藪。數月以來。聚衆爲亂。巨案疊出。臣卽日移駐衡州。就近遣調。附片奏調委員厲雲官等隨往差遣。十四日。公由長沙起行。繞道湘鄉。抵家省親。以二十七日抵衡州府。先是南路土匪屢起。次第勦平。江西吉安府屬土匪大起。太和安福二縣失守。江公忠源派羅澤南以湘勇往勦。大破之。擒斬數千。克復兩城。餘匪潰竄湖南界。茶陵安仁皆不守。公乃調塔齊布以兵勇往勦。平之。王公鑫駐營郴州。聞江西援軍營官陣亡之信。欲回籍募勇。赴江西勦賊。以抒公憤。而復私仇。上書於公。詞氣慷慨。公嘉其義。札令來衡州面商以討賊之事。公言今日大弊。在於兵勇不和。敗不相救。而其不和之故。由於徵調之時。彼處數十。此處數百。東抽西撥。卒與卒不相習。將與將不相知。地勢乖隔。勞逸不均。彼營出隊。而此營袖手旁觀。或陔口而笑。欲以平賊。安可得乎。今欲掃除更張。非萬衆一心不可。擬再募勇數千。與援江各營。合成一軍。交江公忠源統之以平賊。八月二十二日。江西省城解嚴。竄陷九江府湖口縣。仍陷安慶省城。皆踞之。復分股上竄湖北。張公亮基以兵五千人。扼守田家鎮。賊至則大潰。江公忠源聞道馳援。戰不利。北屯廣濟。賊因上犯鄂渚。張公亮基奉旨調任山東巡撫。以吳文鎔爲湖廣總督。吳公者。公會試座師也。九月初由黔赴鄂。道出長沙。以書招公至省城相見。公以軍事方殷。未遑離次。吳公星馳赴任。時賊已陷黃州漢陽。北擾德安。南及與國湖南。岳州戒嚴。駱公乘章馳書與公謀防堵。公以茶陵安仁既平。札調塔齊布等軍。速赴長沙。并調援江之湘勇回援。二十七日。奉到上諭。長江上游。武昌最爲扼要。若稍有疎虞。則全楚震動。著駱秉章會國藩選派兵勇。并酌撥礮船。派委得力鎮將。馳赴下游。與吳文鎔等會合勦辦。力遏賊衝。毋稍延誤。欽此。十月初三日。奉上諭。會國藩團練鄉勇。甚爲得力。勦平土匪。業經著有成效。著酌帶練勇。馳赴湖北。所需軍餉等項。著駱秉章籌撥供支。兩湖膏齒相依。自應不分畛域。一體統籌也。欽此。王公鑫募湘勇。初議欲爲援江諸軍復仇。旣而聞賊竄湖北之警。駱公因札令募勇三千。赴防省城。公見王鑫氣太銳而難專用也。旣爲書以戒之。又

函致駱公言兵貴精不貴多。新招之勇未經訓練。見賊易潰。且餉糧難繼。宜加裁汰。駱公未能用。維時羅公澤南由吉安率勇回湘。李公續賓分領一營。戰功卓著。又有楊虎臣康景徽所帶湘勇二營。先後自江西回抵長沙。合以王鑫新募之勇。及所調兵勇。赴防省城者不下萬人。總督吳公到鄂。屢請援師。時又奉上諭。武昌情形萬分危急。著會國藩遵照前旨。趕緊督帶兵勇。礮船駛赴下游會剿。以爲武昌策應等因。欽此。公商之駱公。議飭王鑫帶所招湘勇赴鄂。旋以賊船東竄。湖北解嚴。湘勇亦未北行也。公言今之辦賊。不難於添兵。而難於籌餉。不難於募勇。而難於帶勇之人。不難於陸戰。而難於水戰。江公忠源之守南昌也。派夏廷樾郭嵩燾在樟樹鎮製造木牌數十載。具砲於其上。擬衝賊船。箚甫成將發。而賊退出鄱湖。至是公亦於衡州仿造衝箚。既試之水面。鈍滯難用。乃買民船。改造礮船。二十四日。公具摺奏言武昌現已解嚴。臣暫緩赴鄂。并請籌備戰船。合力勦堵。該匪以舟楫爲巢穴。長江千里。任其橫行。欲加攻勦。惟以戰船爲第一先務。臣即在衡州試行趕辦。果有頭緒。即親自統帶。駛赴下游。是疏奉硃批。所慮甚是。汝能斟酌緩急。甚屬可嘉。欽此。時廣東解江南大營餉銀。過長沙。公附片奏請截留四萬兩。以爲籌辦礮船。招募水勇之資。湘勇營制。以三百六十人爲一營。每營用長夫百四十人。合爲五百。公之選將領。以四科爲格。一曰才堪治民。二曰不畏死。三曰不急名利。四曰耐辛苦。公欲募成六千之數。合江公忠源舊部。足成萬人。甫立此議。江公遂奏請以公所練六千人。出省勦賊。奉上諭。湖北情形緊要。已有旨令江忠源暫留勦賊。著會國藩即將選募之楚勇六千名。酌配礮械。箚屋船隻。由該侍郎督帶駛出洞庭湖。由大江迎頭截勦。肅清江面賊船。想會國藩與江忠源必能統籌全局也。欽此。鄂中兵勇。前防田家鎮者。潰後或逃竄湘中。劫掠行旅。公捕得卽斬以徇。民賴以安。是月公致書湘鄉人士。議建忠義祠於縣城。祀援江陣亡營官四人。而以湘勇附祀焉。江公忠源回軍漢陽。奉旨授安徽巡撫。并諭令楚皖一體斟酌緩急。相機進剿。時賊已踞安慶。議建廬州爲省會。工部侍郎呂文節公賢基在籍辦理團練。賊自舒桐北竄。呂公迎勦陣亡。周文忠公天爵亦卒於家。江公見鄂賊甫退。皖事尤棘。力疾提師北趨廬州。行至六安病甚。十一月奉上諭。宋晉奏會國藩鄉望素孚。人樂爲用。請飭挑選練勇。雇覓船隻。順流東下。與江忠源水陸夾攻。速殄賊氛等語。現在安徽逆匪。勢甚披猖。連陷桐城舒城。逼近廬郡。呂賢基業經殉難。江忠源患病。皖省情形危急。總由江面無水師戰船。攔截追勦。任令賊艦往來自如。

以致逆匪日肆鴟張。該侍郎前奏亦曾籌慮及此。著即趕辦船隻墩位。并前募勇六千。由該侍郎統帶。自洞庭湖駛入大江。順流東下。與江忠源水陸夾攻。該侍郎忠誠素著。兼有胆識。朕所素知。必能統籌全局。不負委任也。欽此。前此寄諭。有肅清江面之語。各省亦苦賊踪颺忽。公壹以水師爲急。所造木簃。既不可用。水師舟艦。無人經見。舩爲此舉。相顧色駭。公日夜苦思。博採衆議。岳州營守備成名。標廣西候補同知褚汝航。知縣夏鑾等。先後奉委。抵公行轅。公留置戎幕。遂詢知拖罟長龍快蟹舩舩各船式。鳩集衡永工匠。依式製造。公研精覃思。不遺餘力。彭公玉麟。楊公載福。來營。公弟國葆。亟稱兩人之才。公拔而用之。廣西巡撫勞公崇光。委解墩二百尊。赴鄂。道出衡州。時田鎮防兵已潰。公因截留其墩位。并護解之水手。以備教練水師之用。公以湖南庫款不敷。提用其募練之餉。特勸捐接濟。公選派員紳。設局於各州縣。不用官牘。以防抑勒。自刊軍功執照。用撫藩鈐印。自六品自九品。按資填給。常寧縣土匪起。縣城失守。公調千總周鳳山。公弟國葆。帶勇往勦。十一日賊竄踞半泉洞。又調張榮組。儲玫躬帶勇會勦。十四日陷嘉禾。犯藍山。又竄踞道州之四庵橋。公又添調鄒壽璋。魏崇德。帶軍往勦。各營與賊戰。均有斬獲。而儲玫躬之功爲多。公與巡撫駱公會奏。常寧土匪滋事。戕官現已派勇往勦。峯獲首犯各要一摺。二十六日。公具摺奏言。籌備水陸各勇。馳赴安徽會勦。而墩船水軍一時未能就緒。前經奉旨。特派廣西右江道張敬修。購辦夷墩廣墩千尊。并帶工匠。自粵來楚。臣專候該道來楚。乃可成行。附片奏請設立水路糧臺。提用湖南酒米二三萬石。以資軍食。又附片奏請經手勸捐之款。准歸入籌餉新例。隨時發給部照。以免捐生觀望不前之弊。公前擬募陸勇六千。以付江公忠源統帶。尋奉旨。籌備水師。始建水陸萬人。大舉東征之計。先派江公之弟忠濬帶勇一千名赴皖。公則經營戰艦。規造墩船二百號。雇民船二百以從。其後船行中流。陸兵則夾江而下。其規畫大局如是。庶事草創。經費繁巨。有求弗應。則與巡撫駱公書函往來。駱公委曲應副。漸以就緒。公嘗以蚊虻負山。商距馳河自況。又嘗有精衛填海。杜鵑泣山之語。蓋公之水師。爲肅清東南之基本。而是年冬間。最爲盤錯艱難之會矣。十二月初一日。委褚汝航至湘潭。分設一廠。監造戰船。其衡州船廠。委成名標監督之。船大者曰快蟹。次曰長龍。又購民間釣鉤船。改修以爲墩船。褚公又依式添造舩舩小艇數十號。兩廠之船。往來比較。互相質證。各用其長。潭廠所造。尤堅利矣。賊船回竄湖北。仍陷黃州。公致書於總督吳公。言今日南北兩省。且以堅守省會。

爲主。必俟水師辦成。乃可以言勦。湖北巡撫崇綸公奏參督臣閉城株守。奉旨切責。吳公乃出督師於黃。吳公遺書於公。其略云。「吾意堅守。待君東下。自是正辦。今爲人所逼。以一死報國。無復他望。君所練水陸各軍。必俟稍有把握。然後可以出而應敵。不可以吾故。率爾東下。東南大局。恃君一人。務以持重爲意。恐此後無有繼者。吾與君所處固不同也。」公得書。深憂之。駱公秉章調羅澤南等湘勇二營。沂湘而上。會勦土匪。初十日抵衡州。公與羅公商榷兵事。更定陸軍營制。以五百人爲一營。每營四哨。每哨八隊。親兵一哨六隊。火器刀矛。各居其半。每營用長夫百八十人。營官哨官。以至隊長勇夫薪糧。分毫悉經手定。刊立營制數十條。營規亦數十條。自此以後。湘勇轉戰遍於各省。亦依公所定規制行之。廣東協撥鄂餉七萬兩。委員解楚。道出郴桂。適永興土匪起。公乃令羅澤南帶勇迎護粵餉。勦捕土匪平之。公前奏一疏。於十六日奉到硃批。現在安省待援甚急。若必偏執己見。則太覺遲緩。朕知汝尙能激發天良。故特命汝赴援。以濟燃眉。今觀汝奏。直以數省軍務。一身克當。試問汝之才力。能平否乎。平時漫自矜詡。以爲無出己之右者。及至臨事。果能皆符其言甚好。若稍涉張皇。豈不貽笑於天下。著設法趕緊赴援。能早一步。即得一步之力。汝能自擔重任。迥非畏葸者比。言既出諸汝口。必須盡如所言。辦與朕看。欽此。公於二十一日具疏。逐條陳明。其一起行之期。必俟粵東解礮到楚。稍敷配用。即行起程。其一黃州巴河。被賊踪占踞。必先掃蕩鄂境江面。乃能赴皖。其一武昌爲金陵上游。賊所必爭。目今宜力保武昌。然後可以進勦。其一臣所練之勇。現在郴桂一帶。勦辦土匪。不能遽行撤回。俟來年正月。船礮將齊之時。一併帶赴下游。其後一條。奏稱餉乏兵單。成效不敢必。唯有愚誠不敢避死而已。與其將來毫無功績。受大言欺君之罪。不如此時據實陳明。受畏葸不前之罪。疏入。奉硃批。成敗利鈍。固不可逆睹。然汝之心。可質天日。非獨朕知。若甘受畏葸之罪。殊屬非是。欽此。公又具摺奏稱。衡永郴桂一帶。尙有一股會匪。勦捕未畢。餘黨尙多。此股會匪。實爲湖南巨患。亦是臣經手未完之件。奉硃批。汝以在籍人員。能如是出力。已屬可嘉。著知會撫臣勦辦。或有汝素來深信之紳士。酌量辦理亦可。欽此。公又因衡陽清泉兩縣。每用保甲催征錢糧。民戶抗欠。則追比保甲。而保甲亦包攬爲姦。反置團防事於不理。公批飭兩縣。令但責成保甲稽查土匪。而催徵仍責之吏役。亦於是摺附片陳奏。奉硃批。此應亟改易者。著知照駱秉章將改辦章程。速行覆奏。欽此。衡州府縣差役。人數甚多。詐索鄉閭。倚勢作威。公訪得惡差數

人誅戮之。不少寬貸。公於地方之事。知無不爲。意在鋤宄奸。以安良善。不以侵官越俎爲嫌也。江忠烈公忠源自六安力疾入守廬州府。賊糾黨合圍數重。劉長佑江忠濤等。以楚勇往援。及各路援軍皆阻隔不得進。十二月十七日。府城陷。江公赴水死之。城中殉難者。不能悉紀。候補知府陳公源。充知縣鄒公漢。勳死尤烈。陳公者。公同年友。鄒公者。亦公所推許也。船廠趕工。歲暮不息。成者過半。二十七日。公自衡州回籍省親。是年夏四月。賊黨林鳳祥自揚州掠衆北竄。陷滁州。踞臨淮關。復陷鳳陽府。遂北竄河南。陷歸德。撲開封省城。渡黃河。六月圍攻懷慶府。八月竄入山西。陷平陽府。復出至臨洛關。陷深州。九月陷天津府。踞靜海。獨流二城。江南大營向公榮江北。大營琦善公駐兩城外。圍攻經年。未得一戰。內閣學士勝保公率兵追林逆一股。轉戰數千。賊勢颯忽。不可遏。欽差大臣直隸總督訥爾經額督兵敗戰於懷慶。賊之竄山西。擾畿輔也。山西巡撫以下失守各員。與督兵之都統提鎮大員。多獲罪。詔授勝保爲欽差大臣。逮訥爾經治罪。特命惠親王爲奉命大將軍。科爾沁郡王僧格林沁爲參贊大臣。會兵進剿。賊勢少蹙。左都御史雷以誠募勇於揚州。勅收釐捐。以濟軍餉。各省釐捐始於此。

〔甲寅〕咸豐四年公四十四歲。正月初五日。公由家出抵衡州。督催船工。招募水勇。時湘中人未見水師。應募者少。乃招船戶水手。不怯風濤之民。用廣西礮勇爲之教習。快蟹船。用槳工廿八人。擄八人。長龍船。槳工十六人。擄四人。舢舨船。槳工十人。每船用礮手數人。又另置艙長一名。頭工二名。柁工一名。副柁二名。其口糧較優。亦刊發營制一篇。吳文節公文鏐督兵於黃州。駐督堵城。亟攻黃州不下。賊焚燬堵城營壘。吳公力戰陣亡。賊船上犯。武昌戒嚴。十三日奉到初二日上諭。前因賊擾安徽。疊次諭令會國藩置辦船礮。督帶楚勇。由湖入江。與安徽水陸夾攻。本日據袁甲三奏。請令會國藩督帶兵勇船礮。由九江直赴安徽安慶。刻下賊數無多。或先復安慶。亦可斷賊歸路等語。廬州爲南北要衝。現在爲賊所據。必須乘其喘息未定。趕緊進剿。遏賊紛竄之路。會國藩製辦船礮。并所募楚勇數千人。此時諒已齊備。著即遵旨。迅速由長江駛赴安徽。會同和春福濟水陸并進。南北夾攻。迅殄逆氛。以慰廬念。欽此。公既聞廬州失守。江公殉難。而探卒自鄂歸者。亦報黃州堵城之敗。公於時心愈迫矣。廿六日。船廠畢工。成快蟹四十號。長龍五十號。舢舨百五十號。拖罟一號。以爲坐船。購民船改造戰船者數十號。僱民船百數十號。以載糧重。募水勇五千人。分爲十營。其五爲正。其五爲副。每營置一營官。又設幫辦一人。在湘潭募

水軍四營。以褚汝航夏鑾胡嘉垣胡作霖爲營官領之。衡州募六營。以成名標諸殿元楊載福彭玉麟鄒漢章龍獻琛爲營官領之。二十八日自衡州起程。會師於湘潭。前後左右中營旂幟。各用其方色。陸勇五千餘人。則以塔齊布周鳳山朱孫詒儲玖躬林源恩鄒世琦鄒壽璋楊名聲及公弟國葆等領之。水路以褚汝航爲各營總統。陸軍以塔齊布爲各將先鋒。糧台設於水次。載米一萬二千石。煤一萬八千石。鹽四萬斤。油三萬斤。配砲五百尊。軍械數千件。子藥二十餘萬斤。需用之器物。應用之工匠。相隨以行。輜重民船。亦給予旂幟鎗礮。以助軍勢。合計員弁兵勇夫役一萬七千餘人。軍容甚盛。作討粵匪檄文一道。布告遠近。賊船上竄。仍陷漢陽。湖北按察使唐公樹義迎戰死之。賊止竄湖南境。二月初一日。岳州失守。初二日。公在衡山舟次。奏報東征起程日期一摺。并奏陳水陸營制糧台章程。大概情形。并奏調署撫標中軍參將塔齊布未陽縣知縣陳鑑源平江縣知縣林源恩善化縣知縣李瀚章等。隨同東征差遣。又附片代遞唐樹義遺摺一件。公之爲是役也。水陸并進。尤注重於水師。自上年劫爲戰船。每事躬自考察。材木之堅脆。縱橫之縲度。帆檣樓櫓之位。火器之用。營陣之式。下至米鹽細事。皆經於目而成於心。糧台設立八所。條綜衆務。曰文案所。內銀錢所。外銀錢所。軍械所。火器所。偵探所。發審所。採編所。皆委員司之。羅公澤南李公續賓湘勇二營。留駐衡州。以防南路土匪。委知府張丞寶督辦捐局。以資接濟。時又奉到上諭。此時惟會國藩統帶礮船兵勇。迅速順流而下。直抵武漢。可以扼賊之吭。此舉關係南北大局。甚爲緊要。此時水路進剿。專恃此軍。該侍郎必能深悉緊急情形。兼程赴援等因。欽此。貴州候補道益陽胡公林翼應前總督吳公之調。帶練勇六百名。由黔赴鄂。軍抵金口。聞吳公陣亡。賊舟上犯。阻隔不能進。公商之巡撫駱公秉章。由湖南支給餉糈軍械。并飭令回軍會剿岳州之賊。王公鑫所招湘勇在長沙者。不用公所定營制。有自樹一幟之意。駱公札飭王鑫率所部先趨黃州。軍未發而賊已由岳州竄湘陰。上踞靖港市。擾陷寧鄉。公舟師抵長沙。調陸路各營剿之。十五日。公具疏奏稱賊船上竄。東南大局。真堪痛哭。湖廣江皖四省。止有臣處一枝兵勇較多。每月餉需銀近八萬兩。專恃勸捐。以濟口食。現在湖南江西四川較爲完善。請旨飭派大員辦理捐輸。專濟臣軍之用。并言世小亂。則督兵較難於籌餉。世大亂。則籌餉更難於督兵。此次成師以出。已屬竭力經營。若復飢疲潰散。此後不堪設想。附片奏胡林翼黔勇暫令駐岳州附近地方。相機會剿。王鑫湘勇剿賊於喬口敗之。公所派陸營趙

煥聯儲攻躬公弟國葆等分頭攻勦。儲公攻躬擊破賊大隊於寧鄉。旋因追賊陣亡。賊敗潰下竄。公飭各營及戰船追擊之。二十四日。公與駱公會奏逆船上竄。派員前往分途截勦。連獲勝仗一摺。附片奏留胡林翼在楚勦賊。暫未能赴鄂。又附報官兵收復湘陰乘勝追勦一片。於時奉到上諭。會國藩統帶礮船。想已啓行。著即兼程馳赴下游。迎頭截勦。此時水路進攻。專恃湖南礮船。遏其兇鋒。務須趕急前進。勿稍延誤。欽此。又奉到上諭。本日據青慶奏稱。探聞會國藩帶勇已距金口百有餘里。貴州道胡林翼隨同前來。現復退往上游。賊船聽忽上竄。急須出其不意。順流轟擊。該侍郎礮船。早入楚北。胡林翼何以退守。著會國藩飭知該道。迅速前進。毋稍遲延。等因。欽此。公迺專摺陳明胡林翼一軍。未能赴鄂。留於湖南之由。并稱胡林翼之才。勝臣十倍。將來可倚以辦賊。胡公之軍回湖南境。崇陽通城各屬。土匪四起。賊由興國上竄。陷崇通二邑。匪黨大熾。公調胡公黔勇。由平江往勦。平江縣知縣林源恩帶勇繼之。胡公軍至通城。請援於公。公又令塔齊布周鳳山等帶勇往勦。賊退出岳州。王鑫湘勇先抵岳州。由蒲圻前進。公所派陸軍三營。亦抵岳州。公自統水軍進勦。三月初二日抵岳州。初五日。公由驛具摺奏稱。賊蹤全數退出南省。臣現駐岳州。搜捕湖汊餘匪。就近勦辦。崇通股匪。上游肅清。則馳赴下游。庶無彼此牽掣之患。又具奏訓導臣儲攻躬屢著戰功。擬保以同知直隸州升用。該員衝鋒遇害。懇恩准照同知直隸州例議卹。陣亡之勇目喻西林文生楊華英均請一體議卹。以慰忠魂。附片奏在籍道員蔣徵蒲捐助軍餉。請先提銀十萬兩。撥付臣營口糧。并請旨飭令該道員赴行營。總辦糧台事務。以期呼應較靈。是日公派戰船。搜捕西湖餘匪。衛千總鄒國彪遇賊擲火。燒傷而亡。初七日北風大作。戰船及輜重船在岳州湖畔者。漂沈二十四號。撞損數十號。勇夫多溺斃者。駱公乘章屢奉旨籌兵援鄂。駱公於二月內奏稱。湖南弁兵存數無多。歷次勦辦土匪。及此次所派追勦賊匪者。俱係臣與會國藩督飭士紳招募自練之壯勇。較爲得力。該逆現竄湖南。鄂省情形較緩。擬俟南省勦辦事竣。臣即派兵馳往鄂省。跟蹤追勦。奉硃批。楚南之賊。明係分竄。現在湖北尙有多賊。會國藩礮船原爲肅清江面。但此時道路不通。暫可留在湖南勦辦。亦不能專待事竣。緩緩北上。楚南辦有頭緒。仍應速赴湖北。爲是。會國藩素明大義。諒不致專顧桑梓。置全局於不問。北重於南。皖鄂重於楚南。此不易之局也。欽此。湖北賊勢方熾。武昌省城岌岌不保。公屢奉寄諭。飭令統領舟師。馳赴下游。諭旨又云。「此時得力舟師。專恃會國藩水上

一軍。倘涉遲滯。致令漢陽大股竄踞武昌。則江路更形阻隔。朕既以勦賊重任。付之曾國藩。一切軍情。不爲造制。一等因。公啓行之初。派陸路勁軍。由崇通勦賊。欲以次掃盪。進援武昌。公自統水師。順流而下。既至岳州。遇風沈損各船。而王鑫湘勇之前進者。初八日抵羊樓司。遇賊潰散。退回岳州。賊乘勝上犯。公弟國葆鄒壽璉楊名聲等營。在岳州者。皆潰退入城。賊撲城甚急。初十日。公急調礮船。齊赴岳州。登岸擊賊。拔出城中各營。潰勇乘風南返。十四日泊長沙城外。賊船復上犯湘陰。公在衡州時。原任湖北巡撫楊健之孫楊江捐助軍餉銀二萬兩。公因奏請以楊健入祀鄉賢祠。奉旨交部議處。部議革職。奉旨改爲降二級調用。十五日駱公奏岳州官軍失利。省城現籌防勦情形。王鑫革職。留營効力贖罪。十八日。公具摺奏陳岳州陸軍敗潰。水師遇風壞船。力難應敵。恐戰船洋礮。反以資賊。遂乘風退保省城。皆由臣不諳軍旅。調度乖方。請交部治罪。附片奏船隻遇風沈損情形。鄒國彪傷亡請卹。又奏探明前路賊情一片。官軍在崇通者。屢獲勝仗。胡公林翼有初六日上塔市之勝。塔齊布公有十四日沙坪之勝。賊勢少挫。值賊船上竄。長沙戒嚴。公迺調胡林翼塔齊布兩軍旋省。委林源恩以平江勇扼守。防其南竄。二十二日。奏報崇通勝仗一摺。奏稱武昌以南等屬州縣。皆已爲賊所踞。臣本擬痛勦崇通一股。即可直抵鄂省。以資救援。不謂岳州一敗。大股上竄。須酌撤通城之兵。回保長沙。此皆臣調度乖方所致也。公之回長沙也。竹亭公爲書以誡公。謂其築壘不堅。調軍太散。皆取敗之道。結陣之法。緝奸之法。皆宜加意講求。尤以早起早食爲要。自是以後。公每日未明而起。甫明而食。凡十餘年如一日。賊船竄踞靖港市復分股由陸路擾寧鄉。南及湘潭。二十七日。湘潭失守。賊於城外築壘自固。於湘水上游。掠民船數百號。豎立木城。以阻援師。二十八日。塔齊布公督軍馳至湘潭。奮攻賊營。大破之。連戰四日夜。斃賊數千人。官軍力戰殺賊之多。實自此役始。二十九日。公派水師五營。駛赴湘潭助勦。四月初一日。水師大破賊船於湘潭。陸軍攻賊壘。盡破之。初二日。公自督戰船四十號。陸兵八百人。攻賊於靖港市。西南風發。水流迅速。不能停泊。爲賊所乘。水勇潰散。戰船爲賊所焚。或掠以去。公自成師以出。竭力經營。初失利於岳州。繼又挫敗於靖港。憤極赴水兩次。皆左右援救以出。而是日水師適破賊船於湘潭。連日報捷。軍勢少振。初三日。水師盡燬賊所掠船。塔齊布公會各軍兜勦。屢破之。初五日。克復湘潭縣城。賊乃大潰。自粵逆稱亂以來。未受大創。湘潭一役。始經兵勇痛加勦洗。人人有殺賊之志矣。公之回長沙也。駐

營南門外高峯寺。湘勇屢潰。恆爲市井小人所詬侮。官紳之間。亦有譏彈者。公憤欲自裁者屢矣。公言古人用兵。先明功罪賞罰。今時事艱難。吾以義聲倡導鄉人。諸君從我於危亡之地。非有所利也。故於法亦有所難施。所以兩次致敗。蓋由於此。湘渾未捷之時。公與駱公會奏賊勢全注湖南。大局堪虞。請旨飭廣東貴州邊調兵勇來楚。協勦一摺。初十日。兵部火票遞到前摺。奉上諭。會國藩奏岳州水陸各軍接仗情形。并自請治罪一摺。此次岳州水軍。雖獲小勝。惟因陸路失利。以致賊匪復行上竄。會國藩統領水陸諸軍。調度無方。實難辭咎。著交部嚴加議處。仍著督帶師船。迅速進勦。克復岳州。卽行赴援武昌。毋得再有延誤。欽此。又奉上諭。會國藩所統各勇。爲數過多。既須勦辦粵逆。又須搜捕土匪。卽如所奏。有撥赴平江通城者。有撥赴臨湘蒲圻者。又有不能依限前進者。散布各處。照料既不能周。勦捕自難得功。一有敗衅。人無固志。似此何能力圖進取。此時肅清江面。專恃此軍。會國藩初次接仗。卽有挫失。且戰船被風沈損多隻。何事機不順若是。現在湖北待援孔亟。會國藩以在籍紳士。若祇專顧湖南。不爲通籌全局之計。平日所以自許者安在。鮑起豹本係水師大員。何以不令督帶舟師。勦辦賊匪。是更不能得力。且該提督何以陸路亦未帶兵前進。著駱秉章查明具奏。欽此。十二日。公與駱公會奏官軍擊賊靖港互有勝負。賊由陸路攻陷湘潭。官軍水陸夾擊。大獲勝仗。巨股殲滅。克復縣城一摺。隨摺奏保塔齊布副將守備周鳳山同知褚汝航知縣夏鑾千總楊載福文生彭玉麟哨官張宏邦訓導江忠淑八員。是役以塔齊布公爲功首。而水師立功。亦於是始著。公專摺奏靖港戰敗。水師半潰。實由臣調度乖方。請交部從重治罪。并請特派大臣。總統此軍。臣未赴部之先。仍當力圖補救。附片奏保塔齊布褚汝航等數員。可分水陸將領之任。奉上諭。屯聚靖港逆船。經會國藩親督舟師進勦。雖小有斬獲。旋以風利水急。戰船被焚。以致兵勇多有潰敗。據會國藩自請從重治罪。實屬咎有應得。姑念湘渾全勝。水勇甚爲出力。著加恩免其治罪。卽行革職。仍趕緊督勇勦賊。帶罪自効。湖南提督鮑起豹自賊竄湖南以來。並未帶兵出省。疊次奏報軍務。僅止列銜會奏。提督有統轄全省官兵之責。似此株守無能。實屬大負委任。鮑起豹著卽革職。所有湖南提督印務。卽著塔齊布暫行署理。該部知道。欽此。又奉上諭。會國藩統領舟師。屢有挫失。此摺所陳紕繆各情。朕亦不復過加譴責。現在所存水陸各勇。僅集有四千餘人。若率以東下。誠恐兵力太單。該革員現復添修戰船。換募水勇。據稱一兩月間。當有起色。果能確有把握。

亦尙不難轉敗爲功。目下楚北賊蹤。由應山竄回德安。隨州之賊。亦回武昌。是鄂省望援甚急。該撫等務當飭督水陸各軍。迅將此股敗竄之匪。殲滅淨盡。兼可赴援武昌。以顧大局。欽此。官軍旣復湘潭。餘賊潰竄者。擒捕殆盡。賊船在靖港者。聞風下駛。岳州賊亦退出。公所造戰船。經岳州之損。靖港之敗。去其大半。旋委員於衡州湘潭設兩廠。續造船六十號。較前更加堅緻。長沙亦設廠重修百數十號。已潰之勇丁。不復收集。別募水陸兵勇數千人。每船增設哨官一員。調羅澤南李續賓帶所部湘勇同長沙。又委募增湘勇數營。將領立功者。獎拔保奏。潰散者革退更置。奏調水師弁兵於兩粵。廣西巡撫委知府李孟羣募水勇一千名。廣東派委總兵陳輝龍帶水師四百員名。礮一百尊。赴湖南會剿。規模重整。軍容復壯矣。通城賊南犯。林源恩帶勇堵之。公調江忠淑陳鑑源等。帶勇會剿破之。五月初八日。公具摺恭謝天恩。奏稱臣屢奉諭旨。飭令迅速東下。數月之久。未能前進。復多挫折。且愧是以籲請治罪。迺蒙皇上俯從寬宥。貸其前愆。期其後效。臣現將水陸各軍。嚴汰另募。重整規模。一俟料理完竣。卽星夜邁征。誓滅此賊。以雪挫敗之恥。贖遲延之罪。又因前摺。奉到批諭。有太不明白之語。附片覆陳湘潭寧鄉靖港三處。賊蹤來去。官兵勝敗曲折情形。又附片奏請署提督塔齊布會師東下。出省剿賊。又奏稱。臣係革職人員。此後出境剿賊。一切軍情。必須隨時奏報。請容臣專摺奏事。奉硃批。准汝單銜奏事。欽此。又奉上諭。會國藩添募水陸兵勇。及新造重修戰船。旣據奏稱。已可集事。則肅清江面之舉。仍藉此一軍。以資得力。塔齊布胆識俱壯。堪任剿賊之任。著駱秉章即飭統領弁兵。迅速出境。會國藩與該署提督。共辦一事。尤應謀定後戰。務期確有把握。萬不可徒事孟浪。再致挫折等因。欽此。賊旣退出湖南。旋復上犯。陷華容。踞岳州。分擾洞庭之西湖。十三日。陷龍陽。掠民船。攻常德府。十六日。陷踞之。塔齊布公統帶兵勇三千。先赴岳州進剿。公乃調胡林翼與周鳳山李輔朝等。帶勇由益陽進剿常德。行抵龍陽。湖水驟漲。賊船乘水攻營。周鳳山等小挫。胡公林翼督各勇回益陽。攻道繞赴常德。六月。船廠修造戰船畢工。廣東總兵陳輝龍到長沙。添造淺水拖罟二號。李孟羣募廣西水勇千名。亦到長沙。與公所新募水勇。日夜操練。刻期進剿。漢陽之賊。於春初分股。泝漢水陷德安隨州。江漢城邑。大半殘破。湖北學政侍郎青馨入守武昌。署巡撫事。將軍台湧駐營隨州。署總督事。賊於三月陷安陸府。四月陷荊門州。犯荊州府。將軍官文公遣兵擊卻之。賊竄陷宜昌府。五月復下宜都。竄枝江。由太平口南入洞庭。與西湖股

匪合併陷澧州安鄉等城。青巖守武昌數月。城外賊蹤四布。糧盡援絕。乃率飢軍數千。突圍南出。就餉於長沙。賊遂陷武昌省城。駱之。公與駱公籌撥銀二萬兩。以賑鄂軍。資遣至荊州。青巖奉旨正法。台湧革職。詔以楊需署湖廣總督。公水師既集。分三幫起碇。十三日先遣褚汝航等四營。擊檝而下。陸師則以塔齊布公之軍爲中路。駐營於新牆。胡公林翼等軍出西路。趨常德。江忠淑林源恩等。由平江進。勤崇通者爲東路。先後進。勤合計兵勇數近二萬。賊聞官兵大至。遂退出常德。澧州各城。將所掠船。盡集岳州。駱守。公以新牆兵力稍單。調派羅澤南等。以勇二千繼進。又調周鳳山等兵勇。齊赴岳州。二十二日。塔齊布公破賊於新牆。進逼岳州。晦日。水師破賊於南津港。賊乃宵遁。七月初一日。官軍收復岳州。初三日。賊船數百來犯。水師力戰破之。初六日。公督水師後幫。由長沙起行。陳輝龍李孟羣率師繼進。十一日。公會駱公銜。馳奏水師克復岳州。越日。大股續至。復被水師痛勦。全數殲滅。南省已無賊蹤。一摺。隨摺奏保褚汝航夏鑾彭玉麟楊載福何南青五員。附片奏調浙江候補知縣翼振麟來楚。鑄造袍位。接濟舟師之用。又附片奏稱水師以造船置砲爲最要。出征船艦。不無漂損。臣設衡州長沙兩處船廠。仍不停工。酌留水勇在長沙操演。預備接濟。請旨飭催兩廣督臣。趕緊解運。砲數百尊來楚。以資攻勦。又附片奏報水師前後起行日期。并雇船載陸勇二千。以資護衛。奉硃批。覽奏稍慰朕懷。汝能迅速東下。藉此聲威。或可掃除武漢之賊。朕日夜焦盼。憂思彌增。護船陸勇。終恐未可深靠。欽此。又奉上諭。此次克復岳州。大獲勝仗。湖南逆蹤。業就肅清。江路已通。重湖無阻。即著塔齊布會國藩會督水陸兵勇。乘此聲威。迅速東下。力搗武漢賊巢。以冀掃平羣醜。欽此。水師既克岳州。進破賊船於道林磯。十四日。賊船上犯。水師復破之於城陵磯。十五日。公抵岳州。十六日。馳奏水師疊獲勝仗。將犯岳之賊船。全數殲滅。一摺。隨摺仍奏保褚汝航等五員。陣亡哨官秦國長請卹。是日。公專摺請旨。飭部頒發部監執照。以速捐務。而濟要需。現在臣與提臣塔齊布水陸一軍。共計一萬三千餘人。月需餉銀六七萬兩。萬分焦灼。是以專差赴部。守領執照。水師乘風擊賊船於城陵磯下。南風大作。官兵失利。總兵陳壯勇公輝龍游擊沙公鎮邦戰歿。褚公汝航夏公鑾等馳救。亦陣亡。戰船陷失者數十號。兵勇死傷者甚多。十八日。塔齊布公陸軍破賊於搗台。陣斬賊目會天養。二十一日。馳奏水師失利。陸軍獲勝一摺。陣亡總兵陳輝龍道員褚汝航同知夏鑾遊擊沙鎮邦千總何若澧府經歷唐嶸均奏請卹。隨摺奏保陸營將弁童添雲周

岐山黃明魁三人，并自請交部嚴加譴處。其時水師營官道員李孟羣之父李愍肅公，卿毅在湖北署臬司任內，殉難。公附片奏報李卿毅殉難情形，請照臬司例賜卹，并稱其子孟羣忠勇奮發，思報仇殄逆，請留營勦賊，并請從權統領水師前營，以專責成。奉上諭：覽奏，曷勝憤懣。曾國藩係在水路督戰，於陳輝龍出隊時，不能詳慎調度，可見水上一軍，毫無節制，卽治以貽誤之罪，亦復何辭。惟曾國藩前經革職，亦不必交部嚴議，仍責令督飭水師將弁奮力。此時攻勦，斷不可因一挫之後，遂觀望不前等因。欽此。又奉上諭：李孟羣現在丁憂，著准其仍留軍營，帶勇勦賊。欽此。賊屯聚城陵磯者，爲數尙衆，諸公殿元等擊賊陣亡。二十六日，賊黨大至，羅公澤南奮擊破之。二十八日，湘勇由陸路進攻賊壘。二十九日，水師燬賊船於城陵磯，賊大潰。閏七月初三日，馳奏岳州水陸官軍四獲勝仗一摺。隨摺奏保知府羅澤南、守備楊名聲、千總唐得陞、李榮華四員。陣亡都司諸殿元、千總劉士宜，請卹。奉上諭：塔齋布、曾國藩自帶兵以來，旣未嘗遇敗而怯，定不致乘勝而驕。總宜於妥速之中，持以慎重，則楚省賊蹤漸可掃蕩。欽此。塔齋布、公陸軍初二日，攻破賊營十三座，殺賊二千餘人。李公孟羣、楊公載福等，率水師以火焚賊船，乘勝攻擊，盡平沿江兩岸賊營，窮追二百里。至嘉魚縣境，賊潰下竄。公督水軍出江，進駐螺山。初九日，馳奏水陸兩軍大勝，賊巢盡平。大股殲賊一摺。隨摺奏保周鳳山、李續賓、何越、珽、余星元、滕國獻、蕭捷三六員。附片奏調湖北藩司夏廷樾、總理行營糧台、暫駐岳州，以資轉運。又附片奏稱新授四川臬司胡林翼才大心細，爲軍中不可少之員，請旨飭令該臬司管帶黔勇，酌撥他路兵勇，能自成一隊，隨同東征。知府羅澤南、經江西撫臣咨調赴援。該員現帶湘勇，屢次大捷，獨當要隘，以寡勝衆，亦請隨同出境東征，免其赴援江省。賊之上犯也。潁江城市村鎮，悉被殘掠。岳州城陵磯以下，築壘江岸，以圖抗拒。至是水陸屢捷，乘勢掃平，賊壘悉破，難民焚香跪道，以迎。公約束嚴明，秋毫不犯，解散脅從，撫卹瘡痍，軍抵湖北境，與將軍官文公總督楊公霈之軍，聲息漸通。奉上諭：塔齋布、曾國藩奏水陸官軍大獲勝仗一摺，辦理甚合機宜。塔齋布著交部從優議敘。曾國藩著賞加三品頂戴，仍著統領水陸官兵，直擣武漢，與楊滯所統官軍會合，迅掃妖氛。欽此。駱公秉章具摺奏稱東南形勝，利用舟楫，自逆賊掠取江湖舟艦，以數萬計，以致糜爛數省，兇燄日張。官軍坐受其困，自奉明詔，籌備舟師，始有湘潭岳州諸大捷，疆圉危而復安。此舟師奮勦之明效也。曾國藩所統水師船礮，本不爲多，接仗失利，所失不少。現在曾國

藩整軍東下。通籌防勦大局。以船礮爲最要。現飭紳民設局。捐辦船礮。以固本省藩籬。而資大營接濟。又奏留胡林翼一軍。仍駐岳州。奉旨皆允之。賊之大股竄回武漢。而江岸支港汝湖。尙有餘匪藏匿。崇陽踞賊。數近二萬。蒲圻咸寧等縣之匪。倚崇陽爲巢穴。公與塔公籌商分路進勦。公督水軍搜勦潁江賊船。進扼金口。賊屢來犯。擊卻之。塔公督陸軍馳赴崇陽。連破賊卡。二十六日。破賊於牟樓司。賊敗竄。塔公追勦。直抵崇陽。八月初四日。克復崇陽縣城。初九日。追擊賊於咸寧。破之。荊州將軍官文公所遣魁玉楊昌泗等。帶兵五千。會於金口。水陸併勢。復破賊於沌口。公於初四日駐軍嘉魚。馳奏水陸官軍疊獲勝仗。及現籌勦辦情形一摺。奉批諭。汝等自湘潭大捷後。屢次得手。有此聲威。豈可自餒。惟利在速戰。莫待兩下相持。師勞餉乏。大有可慮處。塔齊布不致爲崇陽一股牽制。方好。欽此。十一日。公進駐金口。十九日。馳奏崇陽克復。咸寧大獲勝仗。水師連日接戰獲勝一摺。又奏恭謝天恩一摺。奏稱。臣丁憂在籍。墨經從戎。常負疚於神明。不敢仰邀議敘。乃荷溫綸寵錫。慚悚交增。嗣後湖南一軍。再立功績。無論何項褒榮。概不敢受。奉硃批。知道了。殊不必如此固執。汝能國爾忘家。鞠躬盡瘁。正可慰爾亡親之志。盡孝之道。莫大於是。酬庸褻績。國家政令所在。斷不能因汝一請。稍有差池。汝之隱衷。朕知之。天下無不知也。欽此。胡公林翼軍至通城。因駱公奏留。遂回駐岳州。塔齊布公羅公澤南由咸寧北趨。擊破賊黨於橫溝橋。與公會於金口。而崇陽餘匪。仍聚攻縣城。陷之。公兼督水陸各軍。分途進勦。公與塔齊布公羅公澤南規畫進取武昌之策。賊於城外洪山花園兩路。皆駐重兵。築堅壘。羅公自請攻花園一路。塔公攻洪山一路。二十一日。羅公破賊壘九座。塔公亦破洪山賊壘。水師破燬賊船五百餘號。二十二日。馳奏水陸續獲勝仗。現籌進兵。武漢情形一摺。是日水軍奮擊賊船。焚燬殆盡。陸軍攻武漢城外賊壘。悉破平之。先後斃賊萬餘。二十三日。克復武昌省城。漢陽府城賊大潰。湖廣總督楊公需軍漢陽以北。馳奏武漢克復大概情形。奉上諭。曾國藩等攻勦武漢情形。尙未奏到。塔齊布陸路官兵。此時諒與曾國藩水陸合爲一軍。著俟楊需抵省後。商榷挑選精兵。水陸進勦。朕日盼捷音之至也。欽此。二十七日。公馳奏水陸大捷。武昌漢陽兩城。同日克復一摺。奏稱。臣等先後入城。鎮撫士黎。飛咨督督臣楊需迅速渡江。妥籌進勦。隨摺奏保水軍營官道員李孟羣游擊楊載福守備蕭捷三。陸營將領知府羅澤南知縣李續賓都司彭三元守備唐得陞文生李光榮。并奏保荊州將領已革都統魁玉總兵楊昌泗共十員。附

片奏稱軍務殷繁。差遣乏員。不能不兼用丁憂降革之員。從權辦理。如果奮勉出力。仍當懇請天恩。一律保獎。以收後效。而勵戎行。又具摺奏六七月以來。水陸兩軍。疊次勝仗。已奏請將員弁勇兵保獎。奉旨允准。謹分爲三起。先將第一單彙列。并糧台各員。晝夜辛勤。經各營官開單請保。臣等核實。繕單恭呈御覽。其武漢克復摺。奉硃批。覽奏感慰實深。獲此大勝。殊非意料所及。朕惟兢業自持。叩天速赦。民劫也。另有旨。欽此。奉上諭。此次克復兩城。三日之內。焚舟千餘。蹋平賊巢。淨盡。運籌決策。甚合機宜。尤宜立沛殊恩。以酬勞勩。曾國藩著賞給二品頂戴。署理湖北巡撫。并加恩賞戴花翎。塔齊布著賞穿黃馬褂。并賞給騎都尉世職。等因。欽此。又奉上諭。楚省大局已定。亟應分路進剿。由九江安慶直抵金陵。掃清江面。應如何分兵前進。如何留兵防守。著楊霽曾國藩塔齊布妥籌商定。即行具奏。曾國藩以殺賊自任。必能謀定後戰。計出萬全。沿江剿賊之事。朕以責之曾國藩。與塔齊布。楚省防賊回竄。及搜捕江北等處。餘匪事宜。朕以責之楊霽。務當協力妥籌。不可稍存大意。等因。欽此。武漢既克。賊船在襄河者。尙多奔出漢口。以圖下竄。公派魁玉楊昌泗帶兵進剿。而楊載福等以水師舢板數十號。泝流駛入漢口。縱火焚賊船千餘號。幾盡。三十日。馳奏水師搜剿襄河。續獲大勝一摺。奏稱。戰船用功甚少。成功甚多。江漢上。賊舟無幾。從此一意東下。無牽制之虞。然臣細察大局。有可慮者數端。一在兵氣之散佚。一在亂民之太多。一則軍去湖口日遠。軍火米銀輪轉爲難。恐有缺乏潰散之患。不能不熟慮而縷陳之。附片奏請旨飭江西撫臣等銀八萬兩。廣東四川兩省各籌銀數萬兩。迅解行營。現因陸兵太單。擬添募陸勇二千。率以東下。又附片奏鄂省克復以後。查獲賊中僞文卷。七月十八日。城陵磯之戰。賊酋曾天養被殲情形。前奏未及詳悉聲明。又訊據賊供。武漢賊情曲折。一併聲明。奉上諭。曾國藩等以剿賊自任。雖當乘此機會。急思順流而下。以次攻復沿江諸城。然須計出萬全。謀定後戰。方無挫衄之虞。若能由九江安慶直抵金陵。使長江數千里。盡蕩妖氛。則從征將弁。朕必破格施恩。以酬懋績。欽此。總督楊公霽自德安入駐武昌時。賊已退出黃州。南則踞興國州。北則屯聚蘄州廣濟。仍以船爲巢穴。公與楊公會商進剿。分爲三路。以塔齊布公統率湖南兵勇進剿。與國大冶爲南路。派提督桂明等領鄂省兵勇進剿。蘄州廣濟等處爲北路。公自督水軍。浮江而下。九月初七日。馳奏統籌三路進兵。分別水陸。先後直擣下游一摺。附片奏請諭飭陝西撫臣籌銀二十四萬兩。解赴行營。又片奏參都司成名標監造船工。淨

開款項。請革職查辦。是日又具摺彙保出力員弁兵勇第二單。奉上諭。曾國藩等奏統籌三路進兵。直搗下游一摺。覽奏布置各情。甚合機宜。以長江大局而論。楚北上游。既已漸次肅清。則各路官軍。乘勝東趨。自成破竹之勢。但兵機移步換形。賊情亦詭詐百出。總須出奇應變。步步爲營。以免孤軍深入。方操勝算。其桂明一軍。較之楚南兵勇。強弱是否相當。倘彼強此弱。南岸被勦緊急。該逆必至伺隙北渡。該督等曾否慮及。此次東下之師。關係大局轉機。務期成算在胸。相機籌辦。能制賊而不爲賊制。庶可次第廓清也。所請飭撥陝西餉銀。已諭知王慶雲照數籌撥。源源接濟矣。欽此。十三日。馳摺恭謝天恩。并奏陳奉命署理湖北巡撫。於公事毫無所益。於臣心萬難自安。臣統率水師。即日啓行。於鄂垣善後事宜。不能兼顧。且母喪未除。遽就官職。得罪名教。何以自立。是以不敢接受關防。仍由督臣收存。公前奉上諭。曾國藩雖係署任巡撫。而勦賊之事。重於地方等因。是摺未奏到時。奉上諭。曾國藩著賞給兵部侍郎銜。辦理軍務。毋庸署理湖北巡撫。陶恩培著補授湖北巡撫。未到任以前。著楊需兼署。欽此。是摺奏到。奉硃批。朕料汝必辭。又念及整師東下。署撫空有其名。故已降旨。令汝毋庸署理湖北巡撫。賞給兵部侍郎銜。汝此奏雖不盡屬固執。然官銜竟不書署撫。好名之過尙小。違旨之罪甚大。著嚴行申飭。欽此。又奉上諭。曾國藩既無地方之責。即可專力進勦。但必須統籌全局。毋令逆匪南北分竄。方爲妥善。并隨時知照江皖各撫。及托明阿向榮等。四路兜擊。以期直搗金陵。固不可遷延觀望。坐失事機。亦不可銳進貪功。致有貽誤。諒曾國藩等必能兼權熟計。迅奏膚功也。欽此。水師楊公載福領戰船先行。公與李孟羣等繼進。南路陸營以十三日披營進勦。北路陸軍魁玉楊昌泗等以十七日披營。十九日水師破賊於蘄州城下。二十一日。塔齊布公克復大冶縣城。羅公澤南等克復興國州城。公舟次黃州。按行前總督吳文節公堵城營壘。於其殉難之處。爲文以祭之。詞甚哀厲。祭文稿今失。二十七日。公駐舟道士湫。馳奏陸軍克復興國大冶。水師在蘄州勝仗一摺。附片奏探明賊蹤。於田家鎮堅壘抗拒。橫江鐵鎖二道。擬先攻半壁山。奪其要隘。又具摺奏稱。臣自入鄂城以來。探訪輿論。僉謂武昌再陷之由。實因崇綸台湧辦理不善。督臣吳文鏞忠勤憂國。殉難甚烈。官民至今思之。卽於前撫臣青巒亦尙多哀憐之語。無怨憾之詞。前任督撫優劣情形。以及年餘之成敗始末。關係東南大局。不敢不據實縷陳。又奏遵保出力員弁兵勇第三次彙單請獎一摺。奉上諭。蘄州賊勢尙衆。水師既經攻勦得手。何以桂明等陸路一軍。

未能趕到。曾國藩經朕畀以勦賊重任。事權不可不專。自桂明以下文武各官。均歸節制。倘有不遵調遣。或遷延畏葸。貽誤事機者。卽著該侍郎專銜參奏。以肅戎行。等因。欽此。是月奉旨。胡林翼調湖北按察使。楊載福補湖南常德協副將。羅澤南授浙江寧紹台道。均督勇勦賊。欽此。二十九日。蘄州賊船上犯。楊公載福彭公玉麟等縱火。盡焚之。十月初一日。羅公澤南陸軍破賊於半壁山。奪其營柵。初四日。羅公澤南等大破賊於半壁山。殲賊逾萬人。初五日賊至。復擊破之。初七日。馳奏陸軍踏破半壁山賊壘。水師續獲勝仗一摺。陣亡員弁何如海石熾然徐國本請卹。附片專奏營官白人虎陣亡請卹。又片奏查明前湖北道員劉若珪殉難情形。請飭部議卹。又片奏軍中子藥。概係湖南支應。今全軍將出楚境。距湘省千數百里。請旨飭江西撫臣遴委幹員。籌款開局。監製火藥。鑄造鐵子鉛彈。解營接濟。是日具摺謝恩。賞兵部侍郎銜。附片陳明前摺未署。署湖北巡撫新銜。奉批諭申飭。蒙恩寬宥。謹奏申謝。又代奏浙江寧紹台道羅澤南呈謝天恩。仍請留營勦辦賊匪。初八日。水師攻賊船於蘄州。繞出賊前。初十日。賊船退至田家鎮南岸。鐵鎖已爲陸營湘勇砍斷。楊公載福彭公玉麟督水軍。於十三日攻蘄江中鐵鍊。舟師飛槳而下。至鄔穴縱火焚賊舟。適東南風大作。賊船四千五百餘號。皆盡。伏尸萬數。田家鎮北岸之賊大潰。燬營而遁。十四日。馳奏陸路南軍大捷。斃賊萬餘。砍斷江岸鐵鎖。水師屢獲勝仗一摺。隨摺奏保李續賓彭三元普承堯三員。陣亡千總蕭世祥請卹。附片奏陳賊蹤逼擾。驛郵多梗。偵探難遣。文報難通。江皖各省。不克隨時知照。請旨飭軍機處。將江南北大營現在情形。及紅單船現泊何處。隨時示知行營。期通消息。奉硃批。獲此大勝。皆因汝等和衷共濟。調度有方。故能將士用命。以少擊衆。朕披覽之餘。感慰莫能言喻。仍另有旨。欽此。奉上諭。此次我軍陸路奪取半壁山。水師屢獲大勝。逆賊不敢復窺南岸。辦理甚爲得手。據奏北兵不甚得力。究竟桂明一軍。現在何處。何以未與南軍會合。著楊霽親督後軍。迅速前進。爲會國藩等後路聲援。不准稍有遷延。致滋貽誤。等因。欽此。十四夜蘄州之賊。棄城竄去。水師追賊。船至九江城下。塔齊布公破陸軍。平南岸富池口賊壘。二十日與羅公澤南率師渡江而北。二十一日。公舟次田家鎮。馳奏。官軍水陸大捷。燒燬賊船四千餘號。田家鎮蘄州兩處賊悉潰竄。一摺。隨摺奏保副將楊載福同知彭玉麟道員羅澤南游擊普承堯水師將弁劉培元秦國祿孫昌國洪定陞八員。附片奏報水師前隊追逐賊蹤。已至九江城外。陸軍卽日渡江北岸。進勦。又片奏臣等一軍。以

肅清江面。直搗金陵爲主。設該逆旁竄他縣。陸軍竟難兼顧。請旨飭各路帶兵大臣。及各省督撫。擇要堵禦。預防流賊之患。奉硃批。續獲此勝。皆因汝等籌畫盡心。朕甚廡念。欽此。又奉上諭。會國藩塔齊布自岳州統師東下以來。沿江攻克城池。殲除醜類。所向克捷。皆由同心戮力。調度有方。節次披覽奏章。朕心實深欣慰。在事文武員弁兵勇。亦能人人用命。奮不顧身。尤堪嘉獎。欽此。陸軍渡江循北岸而下。二十六日。遇賊於蓮花橋。擊破之。二十八日。克復廣濟縣城。水師追擊賊船。二十六日。戰於九江城外。破之。十一月初一日。陸師破賊於雙城驛。初三日。破賊於夏新橋。初四日。克復黃梅縣城。初六日。馳奏蓮花橋勝仗。克復廣濟。及水師九江勝仗一摺。陣亡將弁蘇勝鄭沐李金樑請卹。附片預報黃梅勝仗。并陳桂明一軍。未能會勦緣由。又附片奏蘄州判魏作霖殉難請卹。又片奏調湖南永州府知府張丞實來營添募湘勇。交該守管帶。以厚兵力。又附片奏報服闋日期。現在辦理軍務。在營釋服。是日具摺奏保克復武漢。及大冶興國蘄州各案。水陸兩軍出力員弁兵勇。共三百四十人。開單請獎。羅公澤南自黃梅拔營進勦。破賊於濯港。十一日。公馳奏雙城驛大河埔夏新橋勝仗。黃梅克復一摺。隨摺奏保周友勝余星元滕國獻三弁。陣亡千總王映軫請卹。附片奏濯港勝仗。又奏陳近日勦辦情形一摺。奏稱。九江賊船不多。我師兩次苦戰。未能大挫兇鋒。皆因兩岸賊營太多。水陸依護。抵拒甚力。我之水師。與陸軍隔絕。晝夜戒嚴。勞苦倍甚。并陳可恃者數端。可慮者亦數端。時疊奉諭旨。令湖北江西兩省派兵會勦。總督楊公霈派桂明一軍。留駐黃州。魁玉楊昌泗。隨同勦賊。蘄州以下。楊公霈自駐黃梅廣濟之間。江西派臬司惲光宸總兵趙如勝駐軍九江境上。皆奉旨歸公節制調度。又奉上諭。楊霈奏克復廣濟黃梅一摺。所敘進攻九江情形。似該郡賊黨。尙復不少。塔齊布渡江而北。南岸官軍。卽不能得手。是江西陸路兵勇。殊不足恃。塔齊布仍須渡回南岸。尙南北兩岸專恃一塔齊布奔馳追勦。則湖北江西兩省官兵。豈不皆成虛設耶。欽此。十二日。塔齊布公羅公澤南等。破賊於孔隴驛。十三日。小池口賊遁去。十四日。水師焚賊船。潯郡江面賊踪略盡。公卽日進駐九江城外。十五日。塔公陸軍抵小池口。水師擊破賊船。進泊湖口。賊踞守九江。堅不可下。十八日。陸軍渡江南岸。駐營九江南門外。二十一日。馳奏濯港孔隴驛小池口勝仗。潯郡江面肅清。水師進扼湖口一摺。隨摺奏保朱南桂董添雲二員。附片奏參鄂軍營官李光榮所帶川勇擄掠滋擾。請革職訊辦。又片奏稱攻圍九江陸軍單薄。湖北臬司胡林翼識略

冠時。已札飭帶勇二千。駐防田家鎮。就近飛調該軍。來潯助勦。副將王國才都司畢金科樸實勇敢。馭軍有法。請撥帶勁旅。交臣調遣。皖省道員何桂珍知縣李沛蒼。在六安等處。帶勇防勦。亦請歸臣調遣。請旨飭江西撫臣趙造攻具。解交行營。均奉旨允准。又奉上諭。曾國藩塔齊布運籌決勝。戮力同心。麾下戰士。率皆轉戰無前。爭先用命。皆由曾國藩等調度有方。覽奏之餘。實堪嘉獎。曾國藩著賞穿黃馬褂。並發去狐腿黃馬褂一件。白玉四喜搬指一個。白玉巴圖魯翎管一枝。玉靶小刀一柄。火鏢一把。交曾國藩祇領。以示優獎。欽此。賊踞九江湖口兩城。濬濠堅壘。結木簾於湖口城下。以阻官軍入湖之路。而別築石壘於梅家洲。水陸相倚。賊舟屯踞大姑塘。擾犯南康府。二十一日。羅公澤南湘軍渡江未畢。爲賊所乘。回軍擊卻之。胡公林翼軍亦至。均駐九江城外。水軍登岸攻賊。屢破之。賊每乘夜驚營。水師亦徹夜戒嚴。十二月初一日。陸軍合攻九江城未克。初三日。馳奏水軍屢獲勝仗。陸軍圍逼潯城。現籌攻勦情形一摺。陣亡將弁曾獻成周福友羅嘉典請卹。奉上諭。我軍自肅清潯江。進扼湖口以後。滿擬九江郡城乘勝可克。乃連日焚燬賊船。蹋破賊壘。而該逆死黨。仍負固堅守。殊屬兇悍。賊情變幻靡常。著曾國藩塔齊布相機籌畫。不可稍有孟浪。致誤事機。欽此。初六日。胡公林翼羅公澤南擊賊於梅家洲破之。水師乘勢攻破湖口木簾賊卡。初八日。童壯節公添雲因攻城受傷。卒於軍。初十日。水陸合攻湖口賊營未克。十二日。水師舢板船駛入內湖。焚賊舟數十號。乘勝追逐。至大姑塘以上。賊復於湖口設卡築壘增柵。以斷其後。舢板船遂不得出。其在外江者。皆快蟹長龍諸大船。掉運不靈。賊以小艇乘夜來襲。戰船被焚者三十九號。餘皆追回九江大營。十四日。馳奏九江湖口水陸攻勦情形一摺。隨摺奏保劉國斌孫昌國二弁。陣亡參將童添雲暨兵弁葉楚南楊玉芳黃嶺南姜凌浩請卹。水師既退。集九江城外湖口之賊。分股渡江。踞小池口皖賊復上犯鄂境。公派周鳳山陸營渡江攻勦小池口賊壘。大挫而還。公急調胡林翼羅澤南回援九江。駐營南岸官牌夾。二十五日。賊復以小艇夜襲水軍。放火焚戰船十餘號。公座船陷於賊。文卷冊牘俱失。公棹小舟。馳入陸軍以免。調舟師悉泊南岸。與羅公澤南湘勇陸營。緊相依護。糧台輜重。各船皆退駛至鄔穴以上。戰艦亦多潰而上泝者。公憤極。欲策馬赴敵以死。羅公澤南劉公蓉及幕友等。力止之。三十日。馳奏水師在內湖三獲勝仗一摺。外江水師兩次敗挫一摺。奏稱。水師屢獲大捷。聲威尤震。自至湖口苦戰經月。忽有挫失。皆由臣國藩調度無方。請交部嚴加議處。水

師陣亡將弁史久立李允升李選聚沈光榮葛榮冊及座船弁兵劉盛槐等請卹。奉上諭。水師銳氣過盛。由湖口駛至姑塘以上。長龍三板各船。與外江師船隔絕。以致逆氣頓熾。兩次被賊襲營。辦理未爲得手。曾國藩自出兵岳州以後。與塔齊布等協力同心。掃除羣醜。此時偶有小挫。尙與大局無損。曾國藩自請嚴議之處。著加恩寬免。欽此。楊公載福留鄔穴養病。聞敗力疾而下。督戰船拒賊卻之。尋以病甚回籍。水軍在外江者。李公孟羣彭公玉麟與陸軍依岸而守。其入鄱湖者。營官蕭捷三段瑩器孫昌國黃翼升等領之。由是水師遂有內湖外江之分。是歲正月。科爾沁郡王僧格林沁及勝保公督兵破賊於獨流。二月。破賊於阜城。三月。賊由安徽分股竄山東。臨臨清州。四月。勝保公殲賊於臨清。僧王大軍克阜城。五月。賊陷高唐州。大兵圍之。江北大兵。於去冬收復揚州。賊竄踞瓜州。是年二月。瞿威壯公騰龍陣亡於瓜洲。賊陷太平府。孫文節公銘恩死之。閏七月。江南官軍克太平府。江北督師文勤公琦善卒於軍。江寧將軍托明阿代其任。廬州陷後。皖北城邑多殘破。詔以福濟爲安徽巡撫。江南大營復遣提督和春以兵援皖。五月。克六安州。擒匪乘亂起於皖豫之交。副都御史袁公甲三督師駐臨淮關防勦。何公桂珍奉旨授皖南兵備道。道阻不得之任。袁公委以帶勇勦賊。駐於霍山。屢有功。欲西與楚軍會合。公亦疏調來營。阻於賊而不能達。

〔乙卯〕咸豐五年公四十五歲。正月。公駐羅澤南湘勇陸營中。賊既踞小池口。皖中大股續至。塔齊布公羅公澤南率勇渡江擊之。挫敗而還。賊以一股循江北岸上竄蘄州。一股竄犯廣濟。官軍潰退。總督楊公需退駐漢口。又退守德安。賊至漢口。泝襄河大掠民船。武昌戒嚴。江漢之間紛擾矣。公派臬司胡林翼總兵王國才都司石清吉領兵勇六千餘人。先後回援武漢。李孟羣以戰船四十號。泝江上駛。以援蘄黃。初四日夜。東北風大作。巨浪撞擊。水師老營戰船。在九江城外者。漂沈廿二號。撞損數十號。公迺飭外江戰船。全赴鄂省。扼紫金口。李公孟羣彭公玉麟領之。而於沔陽州境之新堤鎮。設立船廠。修補已損之船。添造舢板小艇。其陷入內湖之水師。聞老營被襲。及大風壞船之警。相率赴南昌。巡撫陳公啓邁給以口糧。撫而輯之。軍心漸定。公自督陸軍。急攻九江城。未克。賊屢出撲營。均擊退之。初五日。拜摺恭謝天恩。上年十二月奉旨賞穿黃馬褂等。并年終奉賞福字荷包銀錢銀鏢食物等件。是日馳奏陸軍渡江。挫於小池口。北岸賊蹤。大股上竄。并陳近日賊勢軍情一摺。奏稱。目前局勢可慮。

者多端。臣等一軍進止機宜。有萬難者。初八日。馳摺奏報大風擊壞戰船。飭令全數赴鄂。並自陳辦理錯謬之處。一在武漢既克。未留重兵防守。一在九江未克。遽攻湖口。又遭風壞船。事機不順。目前籌辦之法。凡四條。其一在鄂省添修外江水師。以固荆湘門戶。其一飛飭鄂省兵勇胡林翼等軍。先後回援武昌。其一擬親至南昌。修整內湖水師。其一圍攻九江之陸軍。有進無退。攻克潯城。仍當鼓行東下。直擣金陵。以雪積憤。又奏潯城賊出撲營。陸軍獲勝一摺。奉上諭。覽奏殊深懸系。所稱辦理錯誤之處。如水師衝入內河。以至聲勢隔絕。誠不免銳進貪功。至武漢收復。未留後路聲援一節。則其勢本有不及。水陸兩軍全數進剿。猶恐兵力單弱。若彼時即分防武漢。兵數愈少。刻下更不知如何棘手。曾國藩等既定直擣金陵之計。即著迅速設法攻克九江。合軍東下。毋得再存顧慮。等因。欽此。十二日。公由九江啓行。十六日抵南昌。諭營官蕭捷三等撫輯衆心。委員設局製造礮位子藥。專供楚軍礮船之用。是爲楚師三局。派委員弁。回湘增募水勇。撥用江西省所造長龍戰艦三十號。歸入楚軍。添造快蟹十餘號。又委在籍候選知府劉于濬設立船廠。添造各船。署臬司鄧仁荃總理船礮。支應各局。內湖水師。自成一軍矣。援鄂之師。胡公林翼一軍先發。抵鄂後駐軍沌口。石公清吉之軍繼行。王公國才一軍守領餉項。猶駐九江城外。賊出撲營。塔公合擊破之。蘄州賊黨由富池口渡江南竄。踞興國通山崇陽通城咸寧各城邑。擾陷殆遍。并擾及江西武寧縣境。武昌戒嚴。陶公恩培入守武昌。飛書請援。公急調王國才一軍。取道武寧。轉戰而前。以爲之援。二十七日。馳奏九江陸軍勝仗。內湖水師重加整理情形。及調派鄂軍。先後赴鄂援勤情形一摺。附片奏江西署臬司鄧仁荃經理船礮等各要務。於秋審事件。勢難兼顧。江西臬司惲光宸擬即調回本任。所帶之勇。歸九江鎮將居隆阿統轄。又片奏水師哨官萬瑞書乘賊匪襲營之時。搬搶糧臺銀兩。請旨飭湖南撫臣嚴奉正法。又奏保上年半壁山田家鎮蘄州廣濟黃梅五案出力員弁兵勇一摺。奏稱。武漢以下。復爲賊蹤往來之地。前此戰功。竟成空虛。可憤可憾。然事機之不順。調度之失宜。咎在臣等。而將士之勞勤。究不可沒。惟錄其既往之功。冀作其將來之氣。奉旨允之。又奉上諭。楚北賊燄復燃。於曾國藩等勦賊機宜。大有關係。此時惟有會合各兵。迎賊攻勦。使曾國藩塔齊布各軍。無腹背受敵之患。方爲妥善。欽此。二十八日。公在南昌派大小戰船六十餘號。進泊康山。賊在九江湖口及江北岸小池口者。益浚濠增壘。守備益固。湖口之賊。由都昌竄陷饒州府。分犯樂平景德鎮祁門。

徽州。擾及廣信之境。公調派羅公澤南統帶湘勇三千。由南昌繞出湖東攻勦。又增募平江勇四千名。同出東路會勦。塔齊布公所轄陸營。在潯城外者。僅五千人。但主堅守。不復仰攻矣。水師至武昌。泊舟城外。連遇大風。復多沈損。乃上泊金口。以扼賊上竄。胡公林翼一軍。亦退駐金口。二月賊撲武昌省城。十七日城陷。巡撫陶文節公恩培死之。各軍馳援皆不及。二十七日。公馳奏統籌全局一摺。奏稱。臣來江省。已逾月餘。探悉各路賊情大略。諭江楚皖三省全局。陸路必須勁兵四枝。水路須兵兩枝。乃足以資勦辦。江之北岸。自蕪水廣濟黃梅。以達於太湖宿松爲一路。自漢口黃蘄循江岸而下。達於小池口爲一路。南岸自九江以下。興國通山等屬爲西一路。湖口以下。至於皖南爲東一路。臣之水軍。已分爲兩枝。陸軍若再分。則立形單弱。謹就目前急務。及臣力所能辦者。分條陳奏。併聲明前月奏報。均未奉批諭。此次改由湖南繞出荊州驛遞進京。附片奏稱。鳳陽臨淮由壽州光固。以達於麻城黃州。不過八百餘里。請旨飭令袁甲三募勇五千。練成勁旅。馳出黃州。以通皖鄂聲息。以挽江北大局。又片奏水師大營。被賊襲燬之時。座船被奪。文卷全失。其所領部照監照。遺失數目。俟查明咨報。又片奏臣軍萬餘人。餉道梗阻。請旨飭撥江西漕折銀兩。就近接濟。并請閩浙兩省。每月各籌銀二萬兩。解赴行營。是日又奏恭謝天恩寬免處分一摺。時袁公甲三奉旨革職來京。公所籌四路分兵勦辦之策。諭旨嘉之。亦未能行也。楊公需軍駐德安。賊復逼擾江漢各城邑。由岳家口僂桃鎮窺犯荆襄。荊州將軍官文公拒卻之。胡公林翼抵鄂後。擢授湖北藩司。尋奉旨署理湖北巡撫。水陸兩軍在金口者。爲數無多。而賊勢益熾。鄂軍在德安者。屢敗不振。餉尤絀。無所出。胡公與李公孟羣彭公玉麟王公國才等。竭力守禦荆湘。上游賴以稍安。江西新募平江勇至南康。公委幕中候選同知李元度管帶操練。因調戰船。前赴南康。令陸軍緊相依護。公言此軍之起原。專爲肅清江面而設。陸軍所以護水營。九江湖口之挫失。皆以水師孤懸。與陸師遠隔之故。時塔公軍在潯城。羅公東勦廣饒。不得合併。三月。公在南昌登舟。督將弁操練。分起調赴南康。與平江勇水陸駐扼。使賊不得掠舟。來往湖中。十九日。羅公澤南一軍由貴溪進勦。二十日擊賊破之。二十一日。克弋陽縣城。公兩奉旨統籌全局。二十三日覆奏。謹陳水陸軍情一摺。奏稱。臣等一軍。水陸分爲四枝。回援武漢之師。距臣營在八百里外。江之兩岸。仍爲賊踞。欲以楚軍回勦武漢。其難有三端。一則潯郡爲長江腰膂。陸兵未可輕撤。一則內湖水師。乘此春漲。可以由湖出江。所處在既出以

後孤懸無依。一則金口水陸諸軍餉項缺乏。若再添師前往。更無可支撥。恐餉匱而有意外之慮。臣實乏良策。惟有堅扼中段。保全此軍。以供皇上之驅策而已。奉上諭。行兵之道。合則力厚。分則力薄。自師船陷入鄱湖。賊匪再擾武漢。廣饒一帶。復有賊衆竄突。該侍郎等水陸兩軍。實有不能不分之勢。該侍郎所謂千里馳逐。不如堅扼中段。所奏亦不爲無見。當此上下皆賊。總宜計出萬全。勿以浪戰失機。勿以遲迴誤事。一切機宜。朕亦不爲遙制。該侍郎不可因挫失之餘。遂至束手無策。仍當激厲軍士。踴躍用命。謀定後動。勿負初心。以副委任。塔齊布攻勦九江。近日情形。未據奏及。豈爲賊氛阻隔。竟不能聲息相通耶。并著隨時奏報。以紓懸系。欽此。刑部侍郎黃公贊湯在籍。公於上年奏請督辦江西勸捐。至是計捐銀數四十餘萬兩。公軍入江西後。皆賴黃公籌捐銀兩接濟。湖南協餉。專撥供湖北金口之師。公所請撥浙閩協餉。以有警不時解到。公乃議借運浙鹽。行銷於江西湖南。舊日淮南引地。用鹽抵餉。仍請以黃公贊湯總理鹽餉事務。江西巡撫陳公啓邁與公謀調遣兵勇。意見多不合。餉尤掣肘。萬載縣知縣李皓與其鄉團舉人彭壽頤以團事互相控愬。公見彭壽頤賞其才氣可用。札調來營差遣。陳公乃收繫彭壽頤。令臬司惲光宸嚴刑訊治之。以是尤多齟齬。二十三日。賊竄陷廣信。羅公澤南由弋陽追勦破之。二十七日克廣信府城。賊竄入浙江境。公由南昌督水師進發。駐吳城鎮。四月初一日。馳奏羅澤南陸軍克復弋陽一摺。陣亡勇弁張以德易傳武喻能益請卹。又奏陳湖北兵勇不可復用。大江北岸。宜添勁旅一摺。奏稱。自粵匪至鄂。迄今不滿三載。而全軍覆潰者五次。小潰小敗。不可勝數。既潰之後。仍行收集兵勇。皆爲故常。恬不爲怪。宜變易前轍。埽除而更張之。請飭下湖北督撫。另立新軍。滌除舊習。使江之北岸。得兩路足恃之兵。則不惟有益大局。卽臣等水陸各軍。亦有恃而不恐。奉寄諭。交湖廣總督楊需署巡撫胡林翼辦理。時鄂軍屯聚德安。湘軍回援武漢者。爲數無多。公屢函致胡公林翼。論東南大勢。以武昌據金陵上游。爲必爭之地。宜厚集兵力。以圖恢復。楊公載福傷病在籍。病稍痊。湖南巡撫駱公秉章委令招募水勇。又添造戰船。赴鄂助勦。李公孟羣補授湖北臬司。胡公委令添募陸勇。扼防金口。餉械均仰給於湘中。兵勢稍振。是日又奏請撥浙引。用鹽抵餉一摺。奏稱。賊踞金陵。長江梗塞。淮南鹽務。片引不行。奸民偷送賊中。賤售於各岸。江西湖南民間皆食私鹽。方今餉項缺乏。請旨飭撥浙鹽三萬引。設法運銷於淮引口岸。以濟軍餉之不足。附片奏現當干戈擾攘。招商領運爲難。擬仍用勸捐

之法行之。請旨飭派在籍侍郎黃贊湯在江西臨江府屬樟樹鎮設局勸諭紳富。措資辦運。并請浙江學政侍郎萬青黎在浙督辦鹽運。江西道員史致謬萬啓琛協理西省鹽運。湖南鹽法道裕麟在籍知府黃廷瓚協理楚省鹽運。又將鹽餉章程。分條咨商戶部。并咨商浙江巡撫。及江西湖南湖北巡撫。戶部議准。既而賊氛大擾。未能暢行也。公又奏湖北在籍禮部主事胡大任。江西在籍禮部主事甘晉。并辦理巨軍糧台。未能赴部當差。請飭吏部查照辦理。是時南昌設立後路糧台。公委甘晉李瀚章綜理之。羅公澤南移軍勦賊於景德鎮。賊竄入徽州境。羅公乃移駐饒州。以圖湖口。十二日。公馳奏陸軍克復廣信郡城一摺。奏保羅澤南轉戰千里。謀深勇沈。常能從容鎮定。以少勝衆。請交部從優議敘。十三日。公由吳城進駐南康。派前隊戰船進泊青山。以攻湖口。十九日。賊由姑塘上犯。水師擊之挫敗。退泊火燄山。二十一日。水師焚賊船於馬家堰。於徐家埠。又追焚之於都昌城下。計百數十號。湖北興國崇通等屬。賊黨日熾。分股竄入江西境。陷踞義寧州。殺掠甚慘。五月初八日。公派水師。搜剿賊船於都昌。十三日。水師擊賊船於青山破之。追奔至鞵山以下。羅公澤南駐軍饒州。浙江巡撫檄調湘軍。往徽州會勦。未行而江西聞義寧之警。省城戒嚴。陳公啓邁亟調湘軍回南昌。羅公遂移軍而西。二十一日。公馳奏內湖水師。近日接仗情形一摺。附片奏臣前在江省吳城。近在南康。與臣塔齊布信息常通。九江與南康僅隔一廬山。因賊匪時時窺伺。晝夜巡防。臣等二人。不敢遠離營次。屢約以匹馬相見。而未能也。又稱羅澤南一軍。既須回省。則不能由都昌進剿湖口。東岸無陸兵。則水軍孤懸可慮。奉上諭。該侍郎等務當通籌大局。謀勇兼施。以副朕望。欽此。楊公載福督帶舟師。由岳州出大江。勦賊於蒲圻。會紮金口。三十日。內湖水師擊賊於青山破之。奪回拖罟大船。并獲他船礮等。拖罟即九江之敗所失座船也。六月初五日。湖南巡撫咨送萬瑞書到案正法。十二日。馳奏水師勝仗。奪回拖罟大船一摺。陣亡外委蘇光彩請卹。公又專摺奏參江西巡撫陳啓邁劣蹟較多。恐誤大局一摺。奏稱。臣與陳啓邁同鄉同年。同官翰林。向無嫌隙。自共事數月。觀其顛倒錯謬。迴改常度。深恐貽誤全局。不敢不縷晰陳之。奉上諭。江西巡撫著文俊補授。未到任以前。著陸元烺署理。陳啓邁著即革職。按察使惲光宸先行撤任。聽候新任巡撫文俊查辦。該撫到任後。著即將會國藩所參各情節。逐款嚴查。據實具奏。不得稍有徇隱。欽此。十三日。公派水師攻賊於徐家埠。委知縣李錕帶陸勇會勦破之。燬船八十餘號。塔齊布公陸軍擊賊於新壩破

之十五日。水師攻賊卡於梅家洲。衝出卡外。戰船四號。陷於賊。兵勇傷亡數十人。羅公澤南軍至南昌。二十四日。拔營進勦義寧之賊。湖北德安府失守。楊霈退走襄陽。革職。官文公奉旨授湖廣總督。欽差大臣。都統西凌阿由河南赴湖北督師。以攻德安。二十七日。塔齊布公與公相見於青山營次。會商攻勦之策。七月初六日。馳奏潯城陸軍勝仗。水師在徐家埠獲勝。湖口小挫一摺。陣亡將弁黃明魁。洪建勛。李文田。請卹。附片奏潯郡陸營久無成功。日對堅城。頓兵糜餉。擬於七月。臣與塔齊布移駐青山。渡湖而東。會勦湖口。是亦大局旋轉之一策。又片奏新選湖北督糧道萬啓琛。現在樟樹鎮協理鹽餉事務。請暫緩赴任。羅公澤南陸軍抵義寧。初八日。破賊於梁口。十三日。破賊於乾坑。十四日。大破賊於鰲嶺雞鳴山。斃匪六千餘名。水師蕭捷三等破賊於鞋山。李元度率平江勇渡湖而東。十五日。擊賊於徐家埠。破之。羅公澤南陸軍攻賊營。大破之。十六日。克復義寧州城。十八日。湖南提督忠武公塔齊布卒於軍。十九日。公馳赴九江。陸營哭之慟。派副將周鳳山接統其軍。公親巡營壘。撫定其衆。派副將玉山等弁兵三百人。護喪至南昌。李元度擊賊於文橋。二十一日。李元度攻賊於蘇官渡。破之。二十三日。平江營與水師會攻湖口。破賊營數座。燒賊船幾盡。舟師駛出大江。仍回泊青山。是日。蕭節愨公捷三陣亡。平江勇攻下鐘山賊營。未克。乃駐軍蘇官渡。周鳳山督軍會操。賊出撲營。力戰卻之。公在大營中。復督衆攻城。未克。二十四日。馳奏提督塔齊布因病出缺。臣馳赴大營。料理喪事。兼統陸軍。拊循士卒。保此勁旅。請旨將提臣塔齊布交部從優議卹。准於湖南省城建立專祠。以慰忠魂。而洽民望。附片奏派廣東羅定協副將周鳳山統領全軍。旋獲勝仗。士氣猶銳。可無渙散之虞。又附片奏報義寧湖口水陸三路勝仗大略。當名將新失之際。而事機尙爲順利。軍威尙足自振。堪以仰慰聖懷。公於是日聞蕭捷三陣亡。即帶陸勇數百名。馳赴青山。撫定水勇。二十五日。公回駐南康水營。札調彭玉麟來江西。督領內湖水師。二十七日。平江營擊賊於流澌橋。二十八日。燒賊柵於柘磯。八月初四日。賊撲平江營拒卻之。初七日。馳摺奏報羅澤南陸軍攻勦義寧。疊次大勝。克復州城。隨摺奏保羅澤南及李續賓李杏春唐訓方蔣益澧五員。又奏水陸兩軍攻勦湖口。疊獲勝仗。湖內賊船幾盡一摺。陣亡都司蕭捷三。請照副將例議卹。羅公澤南既克義寧。軍威振於南服。是時湖南四境皆有賊氛。兩粵匪徒攻陷郴州。逆餓尤盛。駱公秉章奏調湘軍。折回湖南剿賊。羅公由義寧策單騎謁公於南康舟次。指畫吳楚形勢。謂方今欲圖江皖。必

先復武昌。欲圍武昌。必先清岳鄂之交。定計率軍出崇通。以援武漢。公從其策。初八日。羅公渡湖。督平江勇攻湖口。下鐘山賊壘。未克。是日水師擊賊於梅家洲。大敗。失戰船二十一號。其時江西之賊。惟存九江湖口兩城。梅家洲下鐘山兩壘未克。堅踞不可攻。羅公旋至南康。謂湖口水陸官軍。但當堅守。不宜數數進攻。以頓兵損威。仍當俟江漢上游攻勦有效。以取建瓴之勢。公又從之。飭水師勿事浪戰。抽調九江大營寶勇千五百人。併歸羅公統帶。由義寧進勦。十六日。羅公還義寧營。胡公林翼攻武昌未下。乃議先攻漢陽。由金口渡江。軍於麥山。進攻漢陽。楊公載福彭公玉麟。率水師進泊沌口。燬賊船數百號。南岸崇通各屬之賊。攻金口李孟羣陸營。陸營大潰。德安賊黨回援漢陽。麥山陸營亦潰。惟沌口水師。屹然未動。胡公度不可攻。率水軍退駐新堤。以扼荆湘之路。委都司鮑超增募湘勇數千。以爲援。馳疏奏調羅澤南湘軍援鄂。公已令羅公由義寧拔營前進矣。二十一日。馳奏陸軍攻勦湖口勝仗。水師小挫一摺。奏稱。去年湖南水師靖港城陵磯之役。均因風順水利。不能收隊。以致挫敗。臣屢飭水營。不令順風開仗。乃各弁勇輕進。致蹈覆轍。請將營官吳嘉賓秦國祿等。分別撤革。陣亡千總葛維柱請卹。又奏調派羅澤南一軍。由崇通回勦武漢一摺。附片奏提臣塔齊布病故後。周鳳山新領全軍。尙爲奮勉。臣令其專意防守。不圖進取。又片奏派委員弁護送塔齊布靈柩回京。時長江梗塞。塔公之柩。由南昌取道長沙荊州以北也。公又專摺彙報安徽道員何桂珍在江北英山蕪水羅田等處。勦賊勝仗。附片奏稱蕪黃英霍當楚皖之交。匪黨最多。與粵逆勾結響應。何桂珍以二千餓疲之卒。轉戰於羣盜出沒之區。與地方紳民。以信義相孚。請旨飭令何桂珍督辦皖楚交界英山麻城各處團練。嚴清土匪。實於大局有益。公前奏調何公一軍。歸東征大營。調遣旣而阻於賊。不得合併。何公提一旅。崎嶇苦戰。屢立戰功。克英山蕪水兩城。斬賊目田金爵。而軍餓餉匱。皖中大府不之恤。專恃勸捐米麥。接濟軍食。頻遣探卒。聞關跋涉。抵公大營以求援。公爲縷陳其戰績十餘案。請旨授以團練之任。蓋欲設法以援之。而勢未能也。羅公澤南回義寧營。上書於公。申陳前議。公所調九江之寶勇。以參將彭三元都司普承堯領之。併湘勇各營爲五千人。劉公蓉在公幕中二年。至是亦從羅公軍赴鄂。二十七日。由義寧州拔營。直趨通城。彭公玉麟接公札調。阻於賊未能前。公因委劉于溥暫統內湖水師。九月初三日。公至青山。巡視水陸各營。初五日。公駐屏風水營。具摺具保陸軍。克復廣信一案。水師肅清鄱陽一案。出力員弁兵勇。彙單

請獎。附片請飭浙江巡撫補解五月以後餉銀。又片奏羅澤南一軍去臣營日遠。湖北撫臣胡林翼尙在江北。亦恐爲賊氛所隔。擬令羅澤南自行具摺奏報軍情。又奏稱。臣自抵江西。整理水師。已逾半年。師久無功。虛糜餉項。請交部嚴加議處。至助臣辦理軍務。實有勞績。不可泯滅者。侍郎黃贊湯督轉捐輸。力拯大局。南昌府知府史致諤支應軍需。候補知州李瀚章辦理糧台。權衡緩急。湖南巡撫駱秉章與其幕友同知左宗棠一力維持。接濟軍餉。照料船礮。知府彭玉麟保守金口。力能堅忍。主事胡大任勸捐濟餉。歷險不渝。知府黃冕造礮精利。實屬有用之才。除黃贊湯駱秉章未敢仰邀恩敘外。其史致諤等各員。擬歸入義寧案內。開單保奏。奉上諭。會國藩奏師久無功。自請嚴議。並保勞績較多人員等語。兵部侍郎會國藩督帶水師。屢著戰功。自得九江。雖未能迅即克復。而鄱湖賊匪。已就肅清。所有自請嚴議之處。著加恩寬免。前刑部侍郎黃贊湯督辦捐輸。以濟軍餉。尤爲出力。著加恩賞戴花翎。欽此。初六日。公渡湖至蘇官渡。巡視陸營。留二日。還屏風營。羅公澤南進攻通城。初六日克之。賊大潰。十四日進克崇陽縣。二十三日。公馳奏羅澤南一軍。進勦獲勝。克復通城一摺。陣亡把總李懋勛請卹。附片奏。探明湖北撫臣胡林翼駐紮嘉魚縣六溪口。與羅澤南之軍。聲息可通。此後援鄂一軍。由胡林翼轉奏。又遵奉諭旨。保舉堪任總兵人員一摺。奏保副將楊載福周鳳山參將彭三元三人。湖南兵勇援鄂者。至牟樓司大潰。江壯節公忠濟殉難。羅公澤南駐軍崇陽。派李公續賓等五營。進勦牟樓司。旋派彭公三元等營。進勦濠頭堡。二十四日。賊大股來犯。彭勤勇公三元李公杏春等陣亡。弁勇挫潰。二十六日。羅公督軍至牟樓司。擊賊破之。二十七日。奉到上諭。兵部右侍郎著會國藩補授。會國藩現在督辦軍務。兵部右侍郎著沈兆霖兼署。欽此。夏秋之間。黔粵匪徒侵擾湖南西南境。其東北岳鄂之交。賊勢正熾。公弟國漢國華皆治團練於鄉邑。公弟國荃考取是科優貢。亦辦鄉團。是月廣東匪徒自茶陵竄入吉安境。江西之西境又紛擾矣。十月初三日。羅公澤南大破賊於牟樓司。十三日。胡公林翼至牟樓司會商軍事。十七日。被管進勦蒲圻。二十日。公具摺謝恩授兵部侍郎。又奏報羅澤南一軍。在濠頭堡敗挫。在牟樓司獲勝。陣亡參將彭三元知府李杏春將弁彭獻傑蕭馥山李光熾劉碧山請卹。奏稱此次軍情。應由楚省具報。緣彭三元係臣軍屢戰得力之將。未便沒其忠績。是以仍行奏報。附片奏稱。臣前請於湖南省城。准塔齊布建立專祠。奉旨允准。應請以去年陣亡參將童倅雲及彭三元入祠祀。二十一日。羅公

澤南克蒲圻。轉戰而前。師銳甚。楊公載福以水師破賊於金口。湖廣總督官文公至德安。接受欽差大臣關防。都統西凌阿督兵力攻德安府城克之。乘勝收復江北各城邑。官文公督各軍進逼漢陽。收集王國才李孟羣陸營兵勇兼轄之。與南岸楚軍爲犄角之勢。九江湖口陸營數月無大戰事。賊亦不以大股來犯。水師泊紮青山屏風各岸。陸勇二營護之。公自駐屏風水營。不時巡視青山蘇官渡各營。壹意嚴防。不事進剿。而賊酋石達開由湖北崇通等處。糾合匪黨。竄入江西境。陷踞新昌縣。其在吉安境內匪徒連陷安福分宜萬載等縣。與石逆合股。於是贛水以西。亂民響應。衆至十餘萬。瑞臨袁吉同時告警。署巡撫陸公元煇調兵援剿。日不暇給。乃抽調湖口陸勇回援西路。十一月初五日。九江賊出撲營。周鳳山擊卻之。初七日。湖口賊出撲營。李元度擊卻之。初十日。賊陷瑞州府。十一日。陷臨江府。攻撲袁州吉安二府。四郡屬邑大半失守。省城戒嚴。維時江西官軍西路則臬司周玉衡總兵阿隆阿一軍。援剿吉安。東路則道員耆齡遊擊遮克敦布一軍。防守饒州。其平江勇由湖口調回者。勦賊於瑞州。營官李錕劉希洛陣亡。勇遂潰散。陸公元煇復調耆齡遮克敦布之師回援。十五日。公調周鳳山九江軍回南昌。調水師防守省河。添調平江一營。駐紮青山。以護水師。十七日。九江賊撲營。周鳳山擊卻之。十八日。周鳳山拔營回省。二十日。湖口賊撲營。李元度擊卻之。二十一日。公具摺謝恩。寬免處分。又奏九江湖口陸師。青山水師。接仗情形一摺。又奏逆匪攻陷瑞州臨江。逼近省垣。急調周鳳山全軍。并抽撥水師。馳往堵剿一摺。分條奏目前布置情形。其一。江省腹地。別無重兵。不得不撤九江之軍。先其所急。其一。江西水軍單薄。抽調戰船。駛赴省河。防其東渡。其一。擬調羅澤南一軍。回駐通城。牽掣逆賊後路。亦可兼顧楚省。其一。擬留遮克敦布一軍。防守東北四府。庶錢糧有可徵之處。奏報有可通之路。凡四條。又聲明本年三月以後。奏報均由湖南馳遞。此次道途梗塞。仍由浙江馳驛呈遞。奉上諭。曾國藩陸元煇著委籌兼顧。萬不可因有警信。張皇失措。徒使兵勇有調撥之煩。轉授賊以可乘之隙也。欽此。又奉上諭。石逆所帶賊黨雖多。一經羅澤南痛剿。卽連次挫敗。可見兵力不在多寡。全在統領得人。曾國藩等著激勵在事文武。奮勉圖功。殄此巨寇。至九江一路。能否足資堵剿。倘有疏懈。不特江西內地堪虞。並礙長江大局。該侍郎等不得顧此失彼。是爲至要。欽此。羅公澤南克咸寧縣大破賊於山坡。會師金口。進攻武昌。二十八日。大破城外賊壘。駐營於洪山。水師進泊沌口。三十日。賊陷袁州府城。彭公玉麟屢接公催調。

函牘。由衡州赴江西。值賊氛遍布。彭公聞關微服。徒步七百餘里。行抵南康。公見大喜。派領戰船。赴臨江扼剿。何文貞公桂珍駐軍英山。是月爲降人李兆受所戕。皖中大吏。不爲奏請議卹。公聞而深痛之。十二月初三日。九江賊出撲青山陸營。營官林源恩黃虎臣胡應元等擊卻之。賊既踞臨江。分股屯聚樟樹鎮。周鳳山回至南昌。初四日進擊樟樹鎮克之。劉于濤以水師毀賊之浮橋。初十日。周鳳山陸軍進剿新淦縣城。克之。十二日。馳奏九江湖口青山姑塘水陸接仗情形。陣亡千總呂國恩請卹。附奏瑞州勦賊殉難之知縣李錕劉希洛二員。請加贈知府銜議卹。又附報樟樹鎮勝仗一片。十九日。馳奏周鳳山一軍。會合水師。克復樟樹鎮。收復新淦縣城一摺。又具奏彙保陸軍。克復義寧攻勦湖口兩案。出力員弁兵勇。開單請獎。公每於軍事孔棘之際。獎拔有功。優卹死傷。二者必詳必慎。由是人心維繫。軍雖屢挫。氣不少衰。江西巡撫文俊公到任。賊攻吉安。臬司周公玉銜入城。堅守經月。請援甚急。周鳳山既克樟樹。收新淦。將赴吉安。慮賊復至。撥派八百人。回駐樟樹。以護水師。扼防南昌之西南路。是年正月。江蘇巡撫吉爾杭阿公克上海縣。僧王督軍殲滅連鎮之賊。擒賊酋林鳳祥。檻送京師斬之。河北肅清。二月。僧王攻克高唐州。賊竄馮官屯。官軍圍之。四月克之。山東肅清。官兵凱撤。七月。江南大營分兵克蕪湖縣。十月。安徽官軍克廬州府。皖鄂賊勢少衰。吉爾杭阿公督師攻鎮江未克。蘇州浙江湖北湖南皆於是年仿辦釐捐。以濟軍餉。浸及於川廣矣。

〔丙辰〕咸豐六年公四十六歲。正月。公駐南康水營。初二日。賊撲樟樹鎮。陸營挫潰。營官岳炳榮走豐城。劉于濤以水師擊賊船破之。初三日。周鳳山自新淦回援樟樹。遇賊於瓦山。擊破之。彭公玉麟水師至樟樹鎮。初七日。擊賊船破之。初九日。攻臨江賊壘。又破之。先是御史蕭浚蘭條陳江西軍務。公奉諭旨責問。又奉兼顧臨江及嚴扼九江之旨。公遂覆奏縷陳各路軍情一摺。奏稱瑞臨切近省城。臣與撫臣文俊商令周鳳山一軍。先勦臨江之賊。扼湖口青山水陸存營。至爲單薄。九江之賊。日夜環伺。又有湖北興國土匪竄擾德安縣。去來無常。勉力支撐。深虞決裂。臣軍自岳州而下。水陸萬餘人。併爲一支。今則分調爲四五支。其得力之將。如塔齊布中道阻謝。羅澤南楊載福分往鄂省。不克合併。所以久困一隅。未能掃蕩羣醜。寸心焦灼。愧悚難名。江西西路四郡。賊蹤徧擾。值冬春水落。贛水處處可涉。賊又於上游掠民船。兼造小艇。有東犯撫州。撲省城之勢。公飭令彭玉麟劉于濤以戰船往

來扼截。飭周鳳山一軍駐紮樟樹鎮。與水師戰船全力扼守。十八日青山陸營出隊擊賊於九江破之。二十二日馳摺奏報周鳳山分兵小挫。旋以全隊擊賊大勝。水師在樟樹三獲勝仗。附片奏報青山陸營同知林源恩都司黃虎臣等擊賊獲勝。請獎拔數人。歸案彙保。又奏楚軍在江西境內。每月需餉六萬有奇。而入款約有三端。一曰撥用漕折。二曰督辦捐輸。三曰借運浙鹽。今賊匪大勢全注江西。漕折難以催徵。捐輸不能措辦。鹽引無處銷售。來源俱竭。有坐困之勢。惟查江蘇上海縣商貨雲集。請旨飭令該省督撫轉飭道府等官。於上海抽釐。撥解臣營。專濟楚軍之用。臣軍無饑潰之虞。得專心於戰守機宜。不復以請餉之奏。屢瀆聖聰也。公於上年奏議借運抵餉。及鹽引到江時。賊氛大擾。不復行銷。江楚之交。文報梗阻。不能通者累月。賊圍攻吉安。外援不至。贛州周汝筠一軍來援。阻於泰和之賊。不得前。文俊公派邁克敦布率勇赴援。行至樂安。二十五日。吉安府城失守。周貞恪公玉衡等死之。文俊公因令邁克敦布駐軍樂安。扼撫建之路。二十九日。青山水師擊賊於姑塘。挫失戰船六號。二月初五日。奉到上諭。文俊甫經到任。於該省地勢軍情。一時未能周悉。現當萬分棘手之時。倘布置稍疏。難免貽誤。曾國藩自抵江西。爲時已久。賊情亦所深悉。此時江西匪蹤。幾欲蔓延全省。既不能處處調兵。又不能顧此失彼。自應擇其最要之處。先爲攻剿。著曾國藩與文俊妥速會商。務籌全局。不可徒事張皇。亦不可專顧一處。軍情變幻靡常。大勢所關。應從何處下手。則身行聞者。必能挈其綱領。該侍郎與該撫酌度機宜。即著會同馳奏。以慰廬系。等因。欽此。賊既陷吉安。大股東竄。江西官軍潰於樂安。賊撲犯撫州。建昌所屬城邑多失守。十四日撲樟樹營。周鳳山擊破之。十七日。大股撲營。周鳳山出擊之。挫敗。十八日。周鳳山出隊大敗。營壘全陷。弁勇潰回南昌省城。人心大震。奪門奔走者。不可禁禦。或相踐以死。公亟棹舟赴省。途次聞警。飛調青山陸營赴南昌。調水師退紮吳城鎮。調李元度一軍。由饒州繞回。進剿撫州之賊。二十日。公至南昌。收集潰勇。暫統之。籌備守禦。撫定居民。人心稍安。時自鄂渚以南。達於梅嶺。賊蹤綿亙千數百里。衆號數十萬。公遣弁勇懷密函赴楚請援。多爲賊所截殺。不得達。湖南巡撫駱公秉章派委劉長佑蕭啓江等。募勇分道赴援。劉公長佑由醴陵克萍鄉。蕭公啓江由瀏陽攻萬載。皆募死士。懷贖函牘。間行赴南昌。旬月而始達。公與文俊公會商軍事。意見甚協。廿一日。具摺會奏各路堵剿情形。并奏覆諭旨垂詢各件。奏稱江西全省。贛水中分。以樟樹鎮最爲扼要。石逆久踞臨江。凶悍之賊。必萃

於此。意圖盡披枝葉。困我省會。至德安縣城。被賊竄踞。乃湖北新到之股匪。既乃竄入武寧。併歸石逆。至周汝筠一軍。不能救援吉安。擬令其退守贛州。贛郡天然雄鎮。爲古來必爭之地。倘有疏虞。則兩廣湖南股匪。皆得以贛州爲巢穴。後患不可勝言。請旨飭廣東督撫。迅派兵勇數千。赴贛會同戰守。保此重鎮。顧全大局。又奏江西賊氛日熾。岌岌將殆。請旨飭湖北巡撫。速令羅澤南一軍。兼程來江援剿。又奏江西需餉甚迫。請旨飭江蘇督撫。撥借上海關稅銀十萬兩。迅解江西。以濟眉急。又片奏臣國藩單舟晉省。途次聞周鳳山全軍挫敗之警。飛調湖口青山水陸各營。同回省城。以固根本。公又專摺奏謝年終恩賜福字荷包等件。又奏捐輸實官人員。請給部照一摺。附片奏布政司銜羅澤南鹽運司銜李續賓。經湖北撫臣胡林翼奏請。給予二品三品封典。奉特旨允准。臣軍水陸員弁。奮勇出力。未經補缺者。實不乏人。請照羅澤南李續賓之例。容臣擇尤。照升階咨請封典。以示鼓勵。又片奏水師在姑塘小挫。請將營官陳炳元劉國斌參處。陣亡勇弁周華堂請卹。又奏知府李瀚章知縣黎福疇張秉鈞三員。在營聞訃丁憂。該員等辦理臣軍糧臺。洵爲得力熟手。仍請留營當差。二十二日。賊陷撫州府。二十九日陷建昌府。分股由安仁萬年竄入徽州境。李元度帶平江勇由湖口拔營至饒州。與耆齡會軍駐守。公之調回青山諸軍也。南康府亦沒於賊。綜計是時賊陷江西府城八州。縣城邑五十有奇。屢分股黨。南撲贛州。東擾廣信。文報往來。餉需轉運。僅廣饒一路可通。亦時有賊蹤焉。三月初一日。奏報周鳳山陸軍在樟樹鎮挫敗情形。請將副將周鳳山革職。營官岳炳榮黃玉芳分別參革。并自請交部議處。陣亡委員馬丕慶林長春李清華請卹。附片奏稱廣信一府。爲奏報進京。江浙轉餉之路。一有疏虞。四面梗塞。現調李元度一軍。由饒州繞回。進剿撫州。以保廣信。上年九江湖口水陸萬餘人。今全數撤入內地。前功盡棄。回首心傷。然舍此亦無他策。廣東援防贛州之師。請旨再飭催迅速來江。并請飭浙閩督撫嚴防竄越。公在南昌孤危之中。奏報軍情。每以贛州廣信爲急。是後全局之轉機。亦賴兩城之存也。初二日。賊犯吳城鎮。水師擊退之。初四日。彭公玉麟赴吳城水營。督領防剿。分派水師紮饒州南河。公又派戰船。分紮省河及市汊。扼截防守。又與巡撫文俊公調派駐省城之平江勇二千人。委侯選知府鄧輔綸同知林源恩帶領進剿撫州。又派周鳳山畢金科等帶勇隨往會剿。輔綸者臬司鄧公仁壘之子也。羅忠節公澤南攻武昌未克。親督隊進攻受傷。初八日卒於洪山營次。胡公林翼奏派李續賓接統湘軍。公回省

後。收集陸軍。裁併訓練。每日巡視操場。既而出踞營盤。雖當士民惶恐之際。從容鎮定。時以詩古文自娛。羽檄交馳。不廢吟誦。作陸師得勝歌以教軍士。於戰守技藝。結布陣諸法。曲盡其理。弁勇咸傳誦之。十一日。鄧輔綸林源恩擊賊於羅溪。十二日。克進賢縣城。彭公玉麟擊賊於吳城。卻之。十四日。水師破賊於徐家埠。二十日。李元度克東鄉縣城。廿二日。鄧輔綸周鳳山等會軍於東鄉。公派都司黃虎臣帶勇三營。赴吳城鎮。會水師。廿三日。克建昌縣城。撫州賊撲東鄉。李元度林源恩等擊破之。二十四日。黃虎臣回軍南昌。二十五日。李元度等軍進紮江橋。以攻撫州。二十六日。馳奏陸軍平江營在湖口羅溪勝仗。克復進賢縣城一摺。又奏吳城水師三獲勝仗。并水師分布各處情形一摺。又奏報湖南援軍劉長佑等。克復萍鄉一摺。附片奏報賊分大股。竄至徽州婺源一帶。江西賊勢稍分。剿辦較易措手。又片奏正月廿一日。所奏摺片。未奉批諭。想因賊氛方盛。中途沈失。請飭軍機處鈔錄。寄交臣營。又專摺奏保樟樹新淦兩案水軍出力員弁。開單請獎。其陸軍後來潰敗前功盡棄。應毋庸保奏。以示懲警。文俊公屢疏請援師。楚粵閩浙各省督撫。均奉寄諭。派撥兵勇。赴江西援剿。方江西之初警也。衆議請調羅公澤南軍回援。公函致胡公林翼羅公澤南。謂東南大局。當力爭上游。亟望武漢速克。水陸東下。不欲其奔馳於崇通之郊。以援瑞臨也。及賊氛大熾。乃從衆議。奏調羅公湘勇馳回援剿。而羅公已傷亡。公弟國華奉竹亭公命。赴鄂請援師。胡公邊派知縣劉騰鵬劉連捷湘勇千五百人。同知吳坤修彪勇七百人。參將普承堯寶勇千四百人。交公弟國華總領之。以援江西。募勇夫懷蠟丸書。閒行以達南昌。公始聞羅公之亡。鄂軍之來援矣。二十七日。李元度林源恩擊撫州賊壘破之。四月初二日。平江軍渡撫河。紮五里塘。進攻撫州未克。初四日。調派黃虎臣陸軍。又派劉于濤市汶水師進攻瑞州。初八日。進攻未克。初九日。水師回泊市汶。黃虎臣勦奉新縣之賊小挫。回軍南昌。平江營連日攻撫州未克。湖南援軍劉公長佑等。攻萬載縣賊。以大股踞守不下。湘軍擊賊盡平之。二十日。劉于濤領水師克豐城縣。南昌省城附近各城邑。均陷於賊。建昌進賢東鄉豐城四邑。經官軍收復。而賊蹤猶往來不絕。二十一日。奏報李元度等軍克復東鄉。破賊五營。圍攻撫州一摺。奏報黃虎臣等水陸兩軍。克復建昌。攻勦瑞州奉新一摺。附片奏臣請撥上海關稅銀兩。經戶部議駁。臣等何敢再瀆。惟江西餉源已竭。補救無術。請旨仍飭江蘇省撫於上海稅項。籌撥銀十萬兩。以濟急需。又片奏稱吉袁臨瑞撫建等府之賊。浚濠堅守。近省各

縣亦有老賊踞守城池。蓋欲使省會成坐困之勢。目前勦辦之法。惟當力保廣饒。通蘇杭之餉道。先勦撫建。固閩浙之藩籬。其南路贛州必藉廣東之援。西路吉袁必藉湖南之援。請旨飭催廣東援兵。星馳踰嶺。保全贛州。不勝跂幸。又奏江西士民請建羅澤南專祠。以伸愛慕一摺。二十八日。楊公載福焚漢陽賊船幾盡。劉公長佑進軍袁州。蕭公啓江攻萬載。二十九日克萬載。進軍合攻袁州。耆齡公一軍防守饒州。賊屢犯境。公調派都司畢金科帶勇千人。紮營童子渡以援之。建昌府城陷後。知府何忭團紳張家駒等招勇謀收復。公派委都司黃虎臣彭山。叱訓導羅萱等帶勇三千餘名。馳往助之。五月初一日。楊公載福督水軍沿江下勦。破焚兩岸賊船。賊潰莫敢抵拒。初三日。水軍直抵九江城外。初四日回舟泝江旋鄂。公遣卒探知水軍江面之捷。函告楚軍各營。士氣爲之一振。撫州城賊踞守益堅。屢攻不克。建昌臨江之賊。各分股來援。城賊亦屢出撲營。李元度等均擊卻之。十二日。黃虎臣等軍至建昌。與何忭張家駒分途進攻。十三日。賊船犯吳城。彭公玉麟擊卻之。十五日。畢金科擊賊於由墩。破之。十九日。賊援撫州。李元度等渡河擊賊破之。二十三日。公馳奏官軍攻勦撫州情形一摺。又奏饒州防勦情形。及畢金科在饒州勝仗。奏稱畢金科身先士卒。驍勇冠倫。軍中稱爲塔齊布之亞。此次以少勝衆。請賞加勇號。又奏建昌官紳辦理防勦。並由省城撥兵會勦一摺。附片奏報水師劉于濬克復豐城。彭玉麟吳城勝仗。水師分紮要地。均尙得力。但無陸軍以輔之。祇能扼守。未能進勦。又片奏報湖南援軍已至袁州。湖北援軍已克咸寧而進。兩湖集厚力以相拯救。賊亦出死力以相抗拒。臣等募長髮探卒。蠟丸隱語。以通消息。但能知其大略。而不能詳悉。浙江邊防孔亟。不暇議及援江。福建援軍亦無入境確信。每念贛州天險必爭之地。非得厚援。終恐疏虞。懇恩飭下廣東督撫。迅撥兵勇。保守贛州。不獨江西之幸。亦廣東之先著也。公是時注意贛州。而兵力不及。籲請援師。疏已三上矣。又奏江西城池淪陷甚多。凡在地方有守土防汛之責者。固應一律嚴辦。其中不無情有可原之人。如建昌府知府何忭。萬載縣知縣李吉言。宜春縣知縣錫榮。此三人者。實係失守案內。愧奮有爲之員。臣等責令襄辦一切。如果出力。再請寬免處分。黃虎臣等攻建昌未克。二十八日。福建援軍至建昌。副將陳上國張從龍領之。公調派參將阿達春帶勇赴饒州。與耆齡畢金科合軍防勦。公謂兵家以攻堅爲最忌。再三諭飭各營將領。勿徒事仰攻。以損精銳。而賊踞城壘。亦以堅守爲坐困我師之計。數月以來。無大戰事可紀。惟力支危局。以待援師。

而已。江西學政廉兆綸奏陳江西軍務。奏參臬司鄧仁荃物議沸騰。其子捐職知府鄧輔綸。本不知兵。不宜管帶兵勇。公遂札撤鄧輔綸解兵回省。周鳳山督勇攻撫州久未下。自請閒道回湘招募舊部。以援江西。公批答許之。周鳳山遂由建昌取道於閩廣。繞回湖南。其在撫州之勇。併歸李元度林源恩兼轄之。六月初二日。建昌援賊大至。都司黃公虎臣陣亡。初五日。賊撲饒州。耆齡畢金科阿達春軍皆敗潰。府城失守。公聞警。急調建昌六營。彭山峴羅登李大雄胡應元等撤回撫州。仍調回南昌。學使廉兆綸方駐河口。公又與咨商奏調建昌城外官兵。撤赴廣信防守。其福建援師。在建昌者未撤也。十九日。彭公玉麟帶水師收復南康府城。城荒不能守。乃回泊吳城鎮。畢金科回南昌整輯弁勇。仍赴饒州。公調派總兵居隆阿都司林葆帶勇會剿。二十二日。畢金科等力攻饒州。克之。公弟國華總領劉騰鴻普承堯吳坤修等軍。克咸寧蒲圻崇陽通城四縣。轉戰而前。暑雨不息。進抵江西境。十八日克新昌。二十四日克上高。二十九日軍抵瑞州城外。其鋒銳甚。公聞上高之捷。急調彭山峴李新華滕加洪胡應元等帶勇四千。先後拔營。馳赴瑞州以迎之。南贛道汪報閏於春閒勦賊泰和失利。退守贛州。多隆阿遮克敦布均以潰兵入城協守。賊來撲犯郡城。屢拒卻之。五月。廣東援軍抵贛州入守。是月出攻賊營。破平之。贛郡解嚴。三十日。馳奏撫州攻勦情形一摺。會勦建昌府城一摺。陣亡都司黃虎臣請卹。隨摺奏保李大雄胡應元江永和。三弁。又奏水師收復南康府城一摺。又奏報饒州失守。旋經克復一摺。布政司耆齡專辦饒防。與知府張澧瀚等均有應得處分。惟以克捷迅速。請免議。陣亡將弁李鶴齡李遐齡請卹。附片奏報福建援江兵勇。現到建昌者。已有二千六百人。湖北援師。已克新昌上高。兩湖聲息可通。廣東援師。已入守贛州。當可保全要郡。先是賊蹤四布。贛吉袁瑞聲息久不達於南昌。至是音問漸通。賊至江西以來。水師扼勦屢勝。賊不得逞。乃於吉袁瑞臨各處。造戰船。製攻具。乘夏水漲盛時。齊舉以趨南昌。於瑞河口臨河口塘頭接生米司皆爲營壘。七月初一日。賊舟下犯劉于潯。以水師擊賊瑞河口破之。湖北援軍抵瑞州。初二日紮營西門外。初三日拔瑞州之南城。公之遣軍迎援軍也。賊之大股擾犯省河西岸。屯壘於沙井。初四日。營官牟瀛萬泰胡應元李大雄滕加洪帶勇五營。渡河擊賊破之。初五日。援軍攻瑞州未克。水師擊生米司賊壘。賊潰走。初九日。彭山峴李新華拔營赴瑞州。瑞州城賊屢出撲營。援軍擊卻之。楚軍中以劉公騰鴻謀勇最著。公所派彭山峴牟瀛等帶勇四千人。委彭山峴總理營務。又

以訓導羅萱兼理各營營務。十五日軍抵瑞州。與援師會合。公令羅萱與劉騰鳩合併爲營。以聯合江楚兩軍之勢。十七日瑞州賊出撲營。江軍稍卻。劉騰鳩普承堯擊破之。公弟國華以暑月行師。得病甚重。棹小舟至南昌。見公。公爲之悲喜。吳公坤修偕至南昌。迎餉還瑞州。公與文俊公籌撥銀五千兩。以犒援軍。公弟國華留省養病。旬日漸愈。二十七日瑞州賊出撲營。楚軍江軍合擊破之。彭公玉麟以水師擊賊於南康破走之。劉子潯水師擊臨河口賊船破之。二十八日水師攻臨河口賊壘悉平之。饒州之復。都司畢金科戰功爲最。藩司耆齡揭參畢金科。公與文俊公商調藩司回省履任。委畢金科駐軍饒州防勦。楚軍既至瑞州。新昌上高仍爲賊陷。吳坤修率勇收復二邑。回勦奉新。爲援軍之游兵。是月有邊錢會匪。起於吉安建昌之界。勾結粵匪游勇。有衆千數百人。竄陷廣昌南豐新城廬溪。復竄貴溪縣境。建昌府官軍分途援勦。賊勢颯忽不可遏。八月初一日賊大股援瑞州。城賊亦出撲營。官軍迎擊破之。初四日瑞州軍擊賊壘破之。賊潰走。楚軍江軍立營始固。初七日馳摺奏湖北援師進攻瑞州府城。江省派兵四千前往會合。屢獲勝仗。江楚之路漸通。全局轉機。胥係乎此。奏保知縣劉騰鳩謀勇爲全軍之冠。參將普承堯同知吳坤修戰功卓著。請將該員等分別保獎。會國華係巨胞弟。未敢仰邀獎敘。又奏劉子潯水師在瑞河口臨河口勝仗。彭玉麟水師在南康勝仗。隨摺奏保劉子潯請賞戴花翎。又奏攻勦撫州勝仗一摺。附片奏請救山西陝西兩省。每月各籌銀三萬兩。撥解至江西瑞州等處。專供兩湖援師之用。又奏虎字營哨長周萬勝私逃回籍。請救湖南撫臣嚴奉正法。又奏奉諭旨咨催廣東提督崑壽赴江南大營。并奏稱江西賊勢浩大。黨類衆多。刻下兵力不爲不厚。鏖戰不爲不苦。迄未能克復要郡。挽回全局。臣惟當壹意鎮靜。化大爲小。以安軍民之心。又具摺奏報贛州府城解嚴。并防守勤辦情形。實爲江省大局轉旋之一端。又奏查明吉安府陣亡及殉難文武員弁。請從優議卹。又附報瑞州勝仗一片。建昌城外官軍設糧臺於新城縣。會匪竄陷新城。何忒率領兵勇援勦。在建昌者。惟存福建援軍。賊出犯營。閩軍擊卻之。江西練勇日廣。義營者。道員石景芬等領之。由廣信赴貴溪迎勦。會匪失利。匪徒大熾。由弋陽竄陷河口鎮及鉛山縣。撲廣信府城。吏民驚走。城爲之空。署知府沈公葆楨登陴固守。飛函請援於浙江總兵饒公廷選。方駐防玉山。率浙兵二千赴援。十五日浙軍擊賊於廣信城外破之。賊潰走入徽州境。廣信以平。瑞州援賊既退。城賊猶時出犯。官軍皆擊卻之。吳坤修軍破賊於奉新。分軍

收復靖安安義二縣。公弟國華病痊愈。仍回瑞州營。公弟國荃在長沙招募湘勇千五百人。周鳳山既抵長沙。募勇千七百人。黃公冕夏公廷樾督領以行。由南路直趨吉安。是爲楚軍援江之第三支。黃公冕時奉旨放吉安府知府。三十日。馳奏官軍攻圍瑞州。屢獲大勝。分軍出勦奉新。收復靖安安義二縣。隨摺奏保營務處彭山峴羅萱。將領萬泰膝加洪詹榮清黃純珍黃在玉七員。陣亡千總黃兆麟請卹。又具摺奏報邊錢會匪竄陷各屬。圍攻廣信府城。浙兵援勦解圍。奏稱近年以來。江西連陷數十郡縣。皆因守土者先懷去志。惟沈葆楨守廣信。獨能申明大義。裨益全局。參將榮壽知縣楊昇千總胡再陸協同堅守。請分別保獎。其在新城殉難之官紳楊堃諸葛槐馬長廠吳毓濬周光裔陳德亮陳濟之何彥琦八員名。均請優卹。何忭之妻薛氏。及其女三人。僕婢八人。全家盡節。請旨旌表。仍請分別建祠立坊。以慰忠魂。又奏閩兵援勦建昌府前後獲勝情形。陣亡兵弁會瑞英請卹。附片奏閩軍都司玉亮在建昌軍營病故。請照陣亡例議卹。又片奏請飭湖南撫臣籌撥硝磺火藥十萬斤。迅解來江。以資攻勦。又片奏臣營發審委員李沛蒼係何桂珍軍營差遣之員。因案革職。交部治罪。現在營中。實爲得力。懇恩免其治罪。留營當差。仍飭確具親供。咨皖定結。奉上諭。李沛蒼著准其免罪。仍留江西軍營。交會國藩差遣。欽此。

九月初三日。公至瑞州勞師。巡視營壘。劉公騰鴻治軍嚴整。公深嘉獎之。李元度等軍圍攻撫州數月。大小五十餘戰。雖屢攻未克。而江西東路十餘州縣。賴以屏蔽無患。廣信饒州。通蘇杭之道。許灣河口。商販所集。餉需器械。賴以接濟。公飭誠平江各營。壹意堅守。且令其退紮十里之外。勿事進攻。李元度志在克城。未能從也。是月初二日。分軍攻勦近縣。初四日。收復宜黃縣。初九日。收復崇仁縣。撫州之賊。乃自城出撲營。復有援賊擾犯東鄉。至撫州。十七日。大營爲賊撲陷。林公源恩等陣亡。李元度力戰突圍以走。崇仁賊勢愈張。南昌戒嚴。廣信建昌皆震。二十日。公由瑞州營。遷至南昌。咨留浙軍饒廷選駐防廣信。調李元度收集潰勇。扼守貴溪。以保河口。調吳坤修率勇赴廣信。吳坤修爲奉新紳民所留。未果往。二十七日。瑞州軍分勦南路賊。二十八日。賊出撲營。擊破之。連日與賊戰。皆破之。上高縣再陷。知縣傅自銘陣亡。十月初四日。瑞州分軍收復上高縣。初十日。軍回瑞州。遇賊擊破之。十一日。馳奏瑞州勝仗。收復上高一摺。陣亡知縣傅自銘守備詹榮清請卹。又奏撫州一軍。被賊撲陷一摺。李元度調度失宜。請以知縣降補。殉難同知林源恩請賞加道銜。照道員例議卹。營官唐得陞耿光宣委員周尙桂。均

請從優議卹。附片奏請旨飭浙江撫臣咨行總兵饒廷選率得勝之師。仍駐廣信府城。臣等札飭李元度駐紮貴溪。則河口商民可以復業。饒廷選一軍。仍可策應四路。於浙江兵力無損。於江西籌餉有益。又片奏新授吉安府知府黃冕與前任湖北藩司夏廷樾。在湖南勸捐募勇。規復吉安。已革副將周鳳山懷樟樹挫敗之恥。亦欲另募勁勇。力掃寇氛。兩軍合併。兵力較厚。臣等即飭徑搗吉安。取上游建瓴之勢。請飭頒部照二千張。發交黃冕夏廷樾勸辦捐輸。專濟此軍之用。歸臣處糧臺報銷。又片奏江西捐輸。請照湖南章程。以制錢千六百元。抵銀一兩。俾捐生踴躍樂輸。實於軍餉有濟。瑞州軍攻城未克。賊之出入接濟者。屢被各營截擊。仍不能絕。劉公騰鴻等督率弁勇夫役。毀瑞州之南城。築新壘二座。以勁兵五千人堅守。分調各軍。分途雕勦。以扼截賊援。吳坤修擊賊於奉新。屢破之。撫州既敗。建昌之賊。屢出撲營。江西兵勇。福建援軍皆潰。二十五日。大營失陷。閩軍副將陳上國等死之。張從龍領閩兵退回杉關。新淦縣復陷於賊。劉于濤以水師再克之。是月。奉上諭。曾國藩文俊自八月奏報瑞州建昌勝仗之後。已及月餘。未見續報。前聞賊匪多回至金陵。而江西失陷各郡。尙無一處克復。據江浙各省奏報。皆言金陵內亂。恐石逆不得志於皖楚。勢必竄入江西。該逆於諸賊之中。最爲凶悍。若令回竄江西。占踞數郡。煽惑莠民。其勢愈難收拾。著曾國藩等乘此賊心渙散之時。趕緊克復數城。使該逆退無所歸。自不難窮蹙就擒。若徒事遷延。勞師糜餉。日久無功。朕卽不遽加該侍郎等以貽誤之罪。該侍郎等何顏對江西士民耶。又聞石逆開與韋逆不睦。頗有投誠之意。尙向曾國藩處乞降。應如何處置之法。亦當預爲籌畫。經權互用。以收實効。現在仍將失陷各城。先圖攻克。使該逆無所憑藉。不敢退至江西。是爲至要。欽此。十一月初一日。劉公長佑蕭公啓江等力攻袁州克之。十三日。公弟國荃周鳳山會克安福縣城。進攻吉安。十七日。馳奏瑞州一軍。屢次勝仗。現在新修南北兩城。併力堅守。以爲西路官軍根本。以通江楚要路。并奏報吳坤修一軍。在奉新勝仗。陣亡將弁王吉昌請卹。又具摺奏贛州南安一路。匪勢蔓延。兵勇職守。漸形疲乏。贛南距省城千里而遙。路途多梗。實有鞭長莫及之勢。仍請添調粵兵來江會勦。又奏建昌官軍挫敗。營壘被陷。閩兵退回本境一摺。陣亡副將陳上國。與其殉難員弁蘇廷美伍連青呂文烜丁開第請卹。又奏報湖南援軍。克復袁州一摺。又具摺覆陳江西近日軍情。奏稱石逆若歸命投誠。當令其獻城爲質。乃爲可信。不敢貪招撫之虛名。弛防勦之實務。刻下瑞州奉新勦辦。尙爲得手。

周鳳山吉安之師。差稱勁旅。袁州新復。西路大有振興之機。水師則彭玉麟劉于濬均甚得力。惟撫建屢挫。東路空虛。惟當嚴飭諸將。克復數城。以副聖主拯民水火之意。奉硃批。爾等主見。甚屬允妥。勤撫固應並用。尤重先勦後撫。可隨時審其機宜好焉之。欽此。先是湖南巡撫駱公秉章奏稱侍郎曾國藩招募鄉勇。屢著戰功。請加湘鄉縣文武學額。江西巡撫文俊公。奏保曾國華以同知選用。均奉旨允准。公於是日。具二摺恭謝天恩。又奏保饒州豐城等前後六案出力員弁。彙單請獎一摺。陣亡員弁汪煥文趙德溶黃邦治請卹。附片奏彭澤都昌湖口鄱陽四縣久陷賊中。其閒頗有忠義之士。抗節不屈。辨團殺賊。忠憤激發。不避艱險。請將該四縣出力紳董。開單保獎。袁州克後。賊竄樟樹鎮。聚黨日盛。劉于濬以水師攻戰連日。擊破之。畢金科駐防饒州數月。破賊於泥灣。又破賊於陶溪渡。又破賊於線州。鄱陽境內肅清。賊之初起。以飄忽見長。及去年再陷武漢。竄擾江西各府州縣。則壘壘浚濠。以困官軍。兵勇仰攻。累月不下。官文公胡公林翼之師。攻武漢兩城。疊奉嚴旨督促。李公續賓楊公載福擊各路援賊。戡除幾盡。惟兩城未下。江西八府。惟南康賊衆不多。餘城則皆以悍賊數千守之。公在軍終日凝然。奏牘書札。躬親經理。不假手於人。益治書史。不廢吟誦。嘗謂軍事變幻無常。每當危疑震撼之際。愈當徵心定慮。不可發之太驟。蓋其數年所得力者在此。所以能從容補救。轉危爲安也。二十二日。湖北官軍水陸大舉。克復武昌漢陽兩城。乘勝東下。江寧將軍都興阿公總統馬隊。李公續賓總統步軍。楊公載福總統水軍。水陸並進。沿江賊黨。望風瓦解。二十四日。克武昌縣。二十五日。克黃州府。遂連克興國大冶蘄州蘄水四城。李孟羣王國才石清吉等。以兵勇從將軍都公。十二月。克廣濟黃梅。水軍直抵九江。焚奪賊舟淨盡。江面肅清。合力以攻九江。李公續賓一軍八千人。屯九江城外。楊公載福率戰艦四百號。泊江兩岸。都公馬隊。益以副將鮑超之步軍三千六百人。扼小池口。兵威鼎盛。公由南昌至吳城鎮。巡視水師。十八日。馳至九江。迎勞諸軍。二十三日。馳奏湖南援師周鳳山等。克安福縣一摺。饒州防軍畢金科等。屢次勝仗。鄱陽縣境肅清一摺。江西水師劉于濬再克新淦。在樟樹鎮壘次勝仗一摺。隨摺奏保劉于濬。蔡康業二員。又奏保瑞州援軍出力員弁。開單請獎一摺。陣亡將弁潘河清李經元。高長源唐梅洪李。上安彭益勝姚長青。劉家全吳秀山。向秀武請卹。附片奏臣馳赴九江。迎勞水陸各軍。見其軍威嚴肅。士氣樸誠。實爲不可多得之勁旅。請旨飭促山西陝西將每月協江之餉。解交湖北撫臣胡林翼經收。

專濟九江大軍之用。其江西分駐各府兵勇。再請敕廣東督撫。每月籌撥銀四萬兩。解交湖南撫臣駱秉章轉解江西各營。夏間奉旨飭查鄧仁堃被參各款。是日具摺覆奏。請將臬司鄧仁堃交部嚴加議處。并陳明鄧輔綸帶勇原委。自公入南昌以來。軍務章奏。與文俊公會銜。均推公主稿。二十八日。公旋至南昌。是時楚軍在江西東路者。李元度貴溪一軍。畢金科饒州一軍。勢稍單弱。裁足自守。西路軍勢大振。瑞昌德安武寧建昌新喻永寧六縣城。先後收復。劉公長佑蕭公啓江等。進軍臨江府。南昌袁州兩郡。全境肅清。九江南康瑞臨吉安各屬邑。收復過半。賊勢益衰。湖北崇通一帶。疊經官軍勦克。仍爲賊蹤擾踞。王公鑫募勇一軍。曰老湘營。旣勦平湖南南路各匪。巡撫駱公調令赴鄂。進勦通城崇陽通山咸寧等縣。皆破平之。是年三月。揚州復陷。托明阿陳金綬雷以誠均革職。欽差大臣都統德興阿接統江北大營。翁同書幫辦軍務。收復揚州。賊陷寧國府城。皖南大營。浙江戒嚴。鄧紹良率兵援之。四月。江蘇巡撫勇烈公吉爾杭阿陣亡。道員劉剛愨公存厚副都統勇節公綸闈亦戰死。五月。江北大營失陷。向榮張國樑退走丹陽。六月。賊攻丹陽。張公國樑擊破之。七月。向忠武公榮卒於丹陽。八月。金陵賊內亂。賊酋楊秀清韋昌輝皆斃。石達開竄安慶。和春奉旨授欽差大臣。由皖北渡江。接統江南大營。

〔丁巳〕咸豐七年公四十七歲。正月公在南昌。初五日。吳公坤修克奉新縣城。舉剛毅公金科由饒州率軍勦賊於景德鎮。遇伏陣亡。十七日。奏報吳坤修一軍。疊獲勝仗。克奉新縣城。隨摺奏保吳坤修請以道員用。並保杜霖孔廣晉二員。陣亡勇弁陳有才余瑞林請卹。又奏報江西官軍克建昌武寧二縣。湖北援軍收復瑞昌德安。湖南軍收復新喻永寧等縣城。附片奏九江南北兩岸水陸至二萬餘人之多。臣即日擬由瑞州前往九江。料理聯絡。惟現患目疾。請賞假一月。即在軍營調理。是日拜摺後。出至奉新督帶吳坤修一軍。赴瑞州扼紮府城東面。始合長圍。掘塹周三十里。以斷賊之接濟。西安將軍福興奉旨領兵千人。由浙江赴江西會勦。於是月抵南昌。二月初四日。公由瑞州回至南昌。會商軍務。初九日。仍還瑞州營。竹亭公以初四日薨於里第。十一日。訃至瑞州。公大慟。仆地欲絕。次日。赴告南昌。及湘軍各營。設次成服。十六日。馳摺奏報丁憂開缺。奏稱。微臣服官以來。二十餘年。未得一日侍養親闈。前此母喪未周。墨經襄事。今茲父喪。未視含殮。而軍營數載。又功寡而過多。在國爲一毫無補之人。在家有百身莫贖之罪。瑞州去臣家不過十日程途。即日奔喪回籍。查臣經手事件。以水師爲一大端。提督

楊載福道員彭玉麟外江內湖所統戰船五百餘號。礮位至二千餘尊之多。此非臣一人所能爲力。合數省之物力。各督撫之經營。楊載福等數年之戰功。乃克成此一枝水軍。請旨特派楊載福總統外江內湖水師事務。彭玉麟協理水師事務。該二人必能了肅清江面之局。並請飭湖北撫臣。江西撫臣。每月籌銀五萬。解交水營。以免飢潰。仍懇天恩。准臣在籍守制。稍盡人子之心。合家感戴皇仁。實無既極。抑或賞假數月。仍赴軍營效力之處。聽候諭旨遵行。江西巡撫文俊公派委督糧道李桓至瑞州營。李公續賓之弟續宜自九江馳赴瑞州。公。二十一日。公與公弟國華自營啓行。二十九日抵里門。越數日。公弟國荃自吉安營奔喪回籍。湖南巡撫駱公秉章奏報公丁父憂一摺。奉上諭。該侍郎現在江西督師。軍務正當喫緊。古人墨經從戎。原可奪情。不令回籍。惟念該侍郎素性拘謹。前因母喪未終。授以官職。具摺力辭。今丁父憂。若不令其奔喪回籍。非所以遂其孝思。曾國藩著賞假三箇月。回籍治喪。并賞銀四百兩。由湖南藩庫給發。俾經理喪事。俟假滿後。再赴江西督辦軍務。以示體恤。欽此。三十日。具呈駱公請代奏報奔喪到籍日期。三月初一日。奉上諭。曾國藩奏丁憂回籍。請派員督辦軍務一摺。業經降旨賞假三箇月。回籍治喪。所有曾國藩前帶水師兵勇。著派提督銜湖北鄖陽鎮總兵楊載福就近統帶。廣東惠潮嘉道彭玉麟協同調度。所需兵餉。並著官文翰林翼文俊源源接濟。毋使缺乏。該侍郎假滿後。著仍遵前旨。即赴江西督辦軍務。以資統率。欽此。安徽官軍潰於桐城。皖北之賊大熾。官文公檄調李孟羣督軍援皖。二十六日。公具呈駱公請代奏謝恩賞假并銀兩。四月。賊酋陳玉成由安徽糾黨犯鄂境。蕪黃以北各州縣城皆擾陷。李公續宜由瑞州分軍回鄂以擊賊。江西吉安臨江瑞州等府城。久攻未克。賊酋石達開率賊黨往來江楚境。爲城賊之援。駱公秉章檄調王鑫老湘營三千人。赴江西爲雕勦游擊之師。五月。石逆大股援吉安。王公鑫馳往奮擊。大破之。二十二日。公以假期將滿。具摺奏瀝陳下情。懇請終制。臣在京十四年。在軍五年。祖父父母先後見背。生前未伸一日之養。沒後又不克守三年之制。寸心愧負。實爲難安。臣恭閱邸鈔。大學士賈禎丁憂。皇上賞假六箇月。旋因賈禎奏請終制。奉旨允其所請。臣葬事未畢。懇照賈禎之例。在籍終制。閏五月。奉上諭。曾國藩奏瀝情懇請終制一摺。曾國藩在江西軍營。聞丁父憂。前經降旨賞假三箇月。回籍治喪。俟假滿時。再赴江西督辦軍務。以示體恤。茲據該侍郎奏稱假期將滿。葬事未畢。籲准在籍終制。曾國藩本以母憂守制在籍。奉諭幫辦團練。當

賊氛肆擾皖鄂。卽能統帶湖南船勇。墨經從戎。數載以來。戰功懋著。忠誠耿耿。朝野皆知。伊父曾麟書。因聞水師偶挫。又令伊子曾國華帶勇遠來援應。尤屬一門忠義。朕心實深嘉尚。今該侍郎以假期將滿。陳請終制。並援上年賈楨奏請終制蒙允之例。覽其情詞懇切。原屬人子不得已之苦心。惟現在江西軍務未竣。該侍郎所帶楚勇素聽指揮。當茲勦賊喫緊。亟應假滿回營。力圖報效。曾國藩身膺督兵重任。更非賈楨可比。著仍遵前旨。假滿後卽赴江西督辦軍務。並署理兵部侍郎。以資統率。俟九江克復。江面肅清。朕必賞假。令其回籍營葬。俾得忠孝兩全。毫無餘憾。該侍郎殫心事主。卽以善承伊父教忠報國之誠。當爲天下後世所共諒也。欽此。初三日。奉竹亭公葬於湘鄉廿四都周壁衝山內。丙山壬向爲塋。李元度軍駐貴溪禦賊。屢有功。專弁詣公函商軍事。公復書謂江西軍務。刻不去懷。所以奏請終制者。實以奪情兩次。乃有百世莫改之誓。至其所自愧憾者。上無以報聖主優容器使之恩。下無以答諸君子患難相從之義。常念足下與雪芹皆有極不忘者。前因困守江西。賊氛環逼。雪芹之芒屨徒步千里赴援。足下之力支東路。隱然巨鎮。鄙人自讀禮家居。回首往事。睽睽於辛苦久從之將士。尤睽睽於足下與雪芹二人。雪芹彭公玉麟字也。王公鏊擊賊於寧都州永豐縣境。皆大破之。六月初六日。公具摺恭謝天恩。請開兵部侍郎署缺。又具摺瀝陳歷年辦事艱難竭蹶情形。臣處一軍。概係募勇。雖能奏保官階。不能挑補實缺。將領之在軍中。權位不足。以相轄。大小不足以相維。臣居兵部堂官之位。而事權反不如提鎮。此其一端也。籌餉之事。如地丁漕折。勸捐抽釐。均須經地方官之手。臣職在軍旅。與督撫勢分主客。難以呼應靈通。此又一端也。臣辦團之始。仿照通例。刻木質關防。文曰。欽命幫辦團防查匪事務。前任禮部右侍郎之關防。四年八月。勦賊出境。湖南巡撫咨送木印一顆。文曰。欽命辦理軍務。前任禮部侍郎關防。五年正月。換刻。文曰。欽差兵部侍郎銜。前禮部侍郎關防。秋閒。又換刻。文曰。欽差兵部右侍郎之關防。臣前後所奉寄諭。援鄂援皖。籌備船廠。肅清江面。外間皆未明奉諭旨。時有譏議。關防更換既多。往往疑爲僞造。如李成謀已保至參將。周鳳山已保至副將。出臣印札。以示地方官而不見信。反被詰責。甚至捐生領臣處實收。每爲州縣猜疑。號令所出。難以取信。此又一端也。三者其端甚微。關繫甚大。臣處客寄虛懸之位。又無圓通濟變之才。恐終不免貽誤大局。目下江西軍務。無意外之虞。無所容其規避。若果賊氛逼迫。當專摺馳奏。請赴軍營。不敢避難。若猶是平安之狀。則

由將軍福興巡撫着齡兩臣會辦。事權較專。提挈較捷。臣在籍守制。多數月。盡數月之心。多一年。盡一年之心。疏入奉上諭。曾國藩以督兵大員。正當江西喫緊之際。原不應遽請息肩。惟據一再陳請。情詞懇切。朕素知該侍郎並非畏難苟安之人。著照所請。准其先開兵部侍郎之缺。暫行在籍守制。江西如有緩急。即行前赴軍營。以資督率。此外各路軍營。設有需才之處。經朕特旨派出。該侍郎不得再行瀆請。致辜委任。欽此。王公鑫破賊於廣昌。又破賊於樂安。賊回竄吉安。周鳳山等軍敗潰。胡公林翼督軍於黃州。擊賊連破之。王剛介公國才陣亡於黃梅。七月。楚軍攻克瑞州府城。劉武烈公騰鴻陣亡。着齡公檄調普承堯等移師會攻臨江府。八月初四日。王壯武公鑫卒於樂安營次。其老湘營一軍。以張運蘭王開化分領之。十四日。奉上諭。昨據給事中李鶴年奏。曾國藩自丁父憂後。疊蒙賜金給假。褒獎慰留。此後墨經從戎。宜爲天下所共諒。豈容以終制爲守經。再三瀆請。請飭仍赴江西。及時圖報等語。軍務奪情。原屬不得已之舉。朕非必欲該侍郎即入仕途。然如該給事中所奏。亦可見移孝作忠。經權並用。公論自在人心。現在江西軍務。有楊載福統帶。雖無須曾國藩前往。而湖南本籍。逼近黔粵。賊氛未息。團練籌防。均關緊要。該侍郎負一鄉重望。自當極力圖維。急思報稱。所有李鶴年原摺。著鈔給閱看。欽此。李公續宜引軍渡江。至黃州會鄂軍。克蕪水廣濟黃梅。擊小池口賊壘破平之。湖北全境肅清。胡公林翼至小池口督諸軍。合攻九江。九月初八日。官軍水陸齊舉。克湖口縣城。攻破梅家洲賊壘。內湖外江水師始合。初九日。公具摺覆奏。臣兩奉諭旨。現在江西軍務。辦理得手。自可毋庸前往。湖南目下全省肅清。臣仍當暫行守制。如果賊氛不靖。應須團練籌防之處。屆時商之撫臣。奏明辦理。臣自到籍以來。日夕惶悚。欲守制。則無以報九重之鴻恩。欲奪情。則無以謝萬世之清議。惟盼各路軍事。日有起色。即微臣寸心。亦得以稍安。附片奏稱。此後不輕具摺奏事。前在江西經手未完事件。擬函致江西撫臣着齡。請其代奏。疏入。奉硃批。江西軍務漸有起色。即楚南亦就肅清。汝可暫守禮廬。仍應候旨。大臣出處。以國事爲重。抒忠即爲全孝。所云懼清議之訾。猶覺過於拘執也。欽此。十三日。楊公載福督水師。破小姑山賊卡。二十一日。克彭澤縣。拔其僞城。乘勝而下。連克望江東流。直抵安慶城外。進克銅陵縣。又拔其僞城二座。逐北千里。遂與定海鎮之紅單船相接。紅單船見楚師旗幟。大驚以爲神。楊公分銀米火藥。以餉下游船兵。皆大感服。仍率水師回泊湖口。自公在衡州。創立舟師。苦戰四載。至是克奏奇功。肅清江面之

勢成矣。胡公林翼以水面一軍。本自公建立。楊公載福。彭公玉麟。皆經公識拔。於風塵之中。所統將弁。皆公舊部。遂於二十四日。在九江營次。馳奏起復水師統將。以一事權一摺。奉上諭。曾國藩丁憂後。奏派楊載福。總統內湖外江水師。彭玉麟協同辦理。業經明降諭旨。允其所請。朕因該侍郎懇請終制。情詞懇切。且江西軍務漸有起色。是以令其暫守禮廬等因。欽此。湘軍之攻吉安也。公弟國荃所部湘勇。曰吉字營。夏間周鳳山之敗。公弟國荃方在籍。而吉字營獨全軍而退。保守安福。於是江西巡撫耆齡公奏請起復曾國荃治軍吉安。旋令總統吉安各軍。公居禮廬。愴念江西援軍。連失劉騰鴻。王鑫二勁將。於國荃之行也。反覆訓誡。以和輯營伍。聯絡官紳。與夫攻戰之法。至數千言。并令辭總統之任。十日。公弟國荃抵安福。約會各軍。并集吉安城外。十一月。石達開糾賊黨由皖入江。犯湖口。李公續宜擊破之。賊由饒撫疾趨吉安。官軍合力迎擊。破賊於吉水縣之三曲灘。城圍遂合。十二月初八日。楚軍克臨江府城。劉公長佑因病回籍。其所部勇。併歸蕭公啓江總統。而以劉公坤一分領之。進攻撫州。張公運蘭等進軍建昌府。於時江西西路。僅吉安九安兩城未復而已。公治軍五載。糧臺無定處。經涉三省。頭緒繁多。公於讀禮之次。酌擬報銷大概規模。於是月具摺咨江西巡撫附奏。奏稱。臣處一軍。未經奏派大員。綜理糧臺。亦無專司之員。始終其事。越境勦賊。用銀漸多。歷時既久。散漫難清。擬將水陸各軍。分爲數大款。在臣處領餉之月日。截清起訖。歸臣處報銷。至若經手人員。如同知陶壽玉。知府李瀚章。道員裕麟。厲雲官。禮部員外郎胡大任。甘晉等。經臣前後派委。分處江楚各省。俟江西軍務將畢。即飭該員等。爲臣辦理報銷事件。造冊送部。如有款目不符。著賠追繳之處。皆臣一身承認。不與該員等相干。請旨飭部核議施行。附奏報鄧輔綸捐造戰船。請敘一片。請注銷李新華捐案一片。是歲安徽之賊。與河南之搶匪相結。黨衆熾盛。安徽巡撫福濟罷職。以李孟羣署理巡撫。欽差大臣都統勝保與副都御史袁甲三均駐皖豫之交。督辦軍務。又以翁同書爲安徽巡撫。十一月。德興阿公克瓜洲。張公國樑克鎮江府。

〔戊午〕咸豐八年公四十八歲。正月。公在里第卜宅兆。將謀遷葬。公過羅忠節公家。劉武烈公家。慰其老親。撫其孤子。又至劉公蓉家。小住二日。暢談忘倦。江西巡撫耆齡公奏委公弟國荃總理吉安攻勦事務。二月行小祥禮。公弟國華除服。公與弟國華議立家廟。祀曾祖以下。置祭田四十六畝。廟中虔藏御賜衣物若干事。誥命十一軸。

祖考遺念衣履几硯宗器若干件。書籍數千卷。分條記注於簿。公之爲學。雅重禮典。國朝尙書徐公乾學讀禮通攷。秦文恭公蕙田更爲五禮通攷。二書皆公素所服膺。自上年奉諱家居以來。日取二書。昕夕研校。讀之數反。凡几筵奠祭。必參攷古今。衷於至是而後已。三月。公弟國華出從軍於九江。李公續賓留之軍中。遇事諮之。戶部議覆東征一軍。水陸各營報銷規模。如公前疏中所擬。奉旨依議。公初行軍。糧臺設於水次。總屬於內銀錢所。公之回里也。彭公玉麟兼綜理之。公致書胡公林翼商立報銷局。又致書彭公玉麟籌撥卹銀數千兩。給內湖外江水師殉難員弁。及陸軍平江營殉難員弁之家。如林汝航夏鑾林源恩唐得陞白人虎伍宏鑑六人。尤公所加意。又如畢金科之在饒州。力戰死綬。李元度之駐貴溪。堅忍扼守。屢捍巨股。均以公不在軍中。賞與卹爲之缺然。公恆自謂負之。李元度軍駐貴溪兩年。賊酋石達開由江西竄入浙江之境。連陷城邑。胡公林翼奏保李元度。請旨飭令率所部平江勇前赴浙江。擇要扼守。以遏賊鋒。并由鄂省籌銀一萬兩以資之。從公所請也。四月初七日。水陸兩軍合攻九江府城克之。屠戮無遺。二十日。蕭公啓江劉公坤一等。克復撫州府城。廿四日。張公運蘭王公開化等。克復建昌府城。賊悉竄入浙江境。將軍福興駐軍廣信。奉旨切責。以總兵周天受督辦浙江防勦事宜。尋詔和春兼督江浙軍務。李公續賓補授浙江布政使。既克潯城。軍威大振。浙人官都中者。奏請其移軍援浙。浙中官紳爭催其督師赴任。適逆酋陳玉成竄擾皖鄂之交。城邑多陷。勢方大熾。李公續賓率師回援。五月。擊賊於黃安麻城克之。楚境以清。官文公胡公林翼會奏。統籌東征大局。先勦皖北。次及皖南。節節掃蕩。請以陸路軍事。專屬之。李續賓奉旨嘉獎。尋復奉旨。李續賓加巡撫銜。軍入皖境後。得專摺奏事。而調湘軍之在江西。東路者。悉移師以援浙。五月二十一日。奉上諭。前因江西賊匪竄入浙江。恐周天受資望較淺。未能統率衆軍。復諭和春前往督辦。茲據和春奏。現在患病未痊。刻難就道。東南大局攸關。必須聲威素著之大員。督率各軍。方能措置裕如。會國藩開缺回籍。計將服闋。現在江西撫建。均經克復。止餘吉安一府。有會國荃劉騰鴻等兵勇。足敷勦辦。前諭耆齡飭令蕭啓江張運蘭王開化等。馳援浙江。該員等皆係會國藩舊部。所帶勇丁。得會國藩調遣。可期得力。本日已明降諭旨。令會國藩馳驛前往浙江。辦理軍務。著駱秉章卽傳旨。令該侍郎迅赴江西。督率蕭啓江等星馳赴援浙境。與周天受等各軍。力圖掃蕩。該侍郎前此墨經從戎。不辭勞瘁。朕所深悉。現當浙省軍務喫緊之時。諒能仰體

朕意毋負委任。何日起程。并著迅速奏聞。以慰廑念。欽此。二十五日。駱公秉章具疏奏稱。現在援江各軍將領。均前侍郎會國藩所深知之人。非其同鄉。卽其舊部。若令其統帶赴浙。則將士一心。於大局必有所濟。且江浙本屬澤國。利用舟師。楊載福彭玉麟兩軍。皆係會國藩舊部。會國藩統陸師赴浙。或從常山更造戰船。順流而下。或派船由長江入太湖。沂流而上。江南大軍。既免後顧之虞。援浙陸軍。亦得戈船之助。其勇餉一項。擬由湖南每月籌解餉銀二萬兩。請旨飭下湖北撫臣胡林翼。每月籌解銀二萬兩。專供會國藩一軍之用。六月奉上諭。駱秉章奏分撥楚軍援浙。并請飭會國藩統率前往。與前降諭旨。適相符合。每月籌解銀二萬兩。作爲援浙勇餉。實能統籌大局。不分畛域。著卽照辦。該侍郎兵力既精。餉需又足。必當迅奏膚功也。欽此。初三日。接奉諭旨。初七日。公治裝由家啓行。初九過湘鄉縣城。十二日。抵長沙。與駱公秉章左公宗棠會商軍事。刻木質關防。其文曰。欽命辦理浙江軍務。前任兵部侍郎關防。且札調派蕭啓江張運蘭王開化等湘軍。由江西撫建一路。拔營進駐鉛山縣之河口鎮。公擬由水路東下。過九江登陸。會軍於河口。督師以赴浙。駱公派委主簿吳國佐管帶練勇千二百人。隸公麾下。公札令由陸路先赴江西。十七日。具摺恭報起程日期。並陳明進兵援浙之道。奉硃批。汝此次奉命卽行。足徵關心大局。忠勇可尙。俟抵營後。迅將如何布置進剿機宜。由驛馳奏可也。欽此。是日。又會奏蕭啓江請假兩月。回籍一片。十九日。由長沙登舟。二十四日。行抵武昌。與胡公林翼會商進兵之路。籌餉之數。大營轉運糧臺報銷各事。留署中旬日。鄂省協餉二萬兩。亦奉旨允准飭撥。公素稱胡公才大心細。事無鉅細。虛衷商度。胡公亦悉心力代爲之謀。談議每至夜分不息。七月初三日。由武昌解纜。初四日。泊巴河。公弟國華李公續賓續宜彭公玉麟等。先後謁見於巴河。籌商陸營統領營官哨長。及隨營委員章程。兵勇行軍止營出隊之法。李公續賓派撥湘勇二營。以副將朱品隆唐義訓領之。隸公麾下。以爲親兵營。公與李公議改修湘鄉忠義祠。李公捐銀二千兩。公捐銀一千兩。以爲之倡。十一日。行抵九江府。致祭塔忠武公祠。楊公載福來見公。十二日。舟次湖口。彭公玉麟修建水師昭忠祠於石鐘山。祀楚軍水師之死事者。蕭公捷三以下弁勇夫役等。凡數千人。十五日。公至昭忠祠致祭。遍賞外江內湖水勇。爲錢二千二百餘貫。札調朱品隆唐義訓率所部勇。先行赴河口鎮。公之初出也。以肅清江面爲期。公自駐水營。設糧臺於水次。至是楚皖江面。以漸廓清。下游雖有賊踪。勢不得復逞。賊酋石達開由

江西竄擾浙閩邊界。所陷郡縣。不復踞守。漸成流寇之勢。公督師援浙。舍舟而登陸。治兵轉餉。均改前規。設立報銷總局於湖口。札調李瀚章來江總理報銷局。清釐東征水陸各軍餉糈收發之數。分款核銷。設陸路隨營糧臺。派委喻吉三、彭山、紀帶勇數百以護之。武昌、九江、貴溪皆設轉運局。南昌省城設支應局。札委道員李元度知府王勳綜理營務處。札委陸營管理銀錢所、軍械所、發審所、公牘案卷各員弁十有餘人。二十一日。舟抵南昌。與巡撫耆齡公會商軍餉。札撤前年江省所設楚軍支應礮位子藥三局。以所餘硝磺火器之屬。歸於陸軍支領。撤遣李大雄、滕加洪兩營。其上年在江西差委員弁。分別撤留。是時楚軍在江西者。張運蘭、蕭啓江所領兩軍。已集於河口鎮。合以朱品隆等軍。共萬餘人。其劉公長佑一軍。經江西巡撫派委。由撫州移防杉關。李元度一軍。亦秦派由貴溪拔營援浙。賊既解浙江衢州之圍。由處州竄入福建。分股由浦城竄出二度關。圍攻廣豐玉山二縣。廣信戒嚴。李元度力守二城。擊賊卻之。尋接公札委辦營務處。以所部平江勇屬沈公葆楨權領之。二十四日。公由南昌解纜。泊瑞洪。江西水師道員劉于濤來見公。途次奉上諭。前因浙江軍務緊急。諭令曾國藩赴浙勦辦。現在衢州業已解圍。處州等府縣亦相繼克復。境內餘匪。不難剋日肅清。惟閩省浦城、崇安、建陽、松溪、政和等處。賊勢蔓延。亟應趕緊勦辦。和春等現飭總兵周天培於援浙兵勇內。挑選精銳三千數百名。由龍泉一帶進剿。饒廷選帶漳州兵勇。亦馳往浦城。曾國藩業已奏報起程。著即以援浙之師。由江西鉛山直搗崇安。相機進剿。迅將閩省各匪一律掃除。毋少延誤。欽此。又奉上諭。總兵李定泰前令幫辦和春軍務。此時周天培等會勦竄閩各匪。著總歸曾國藩調度。欽此。又奉上諭。署福建漳州鎮總兵周天培著加恩賞選提督銜。即著馳往福建。與周天培、饒廷選、張騰蛟等。分路進剿。俟前任侍郎曾國藩到後。即歸曾國藩調度。欽此。是月。胡公林翼丁母憂。解任回籍。詔官文兼署巡撫事。八月初八日。公抵河口營。沈葆楨、李元度來見。札各營管官支發勇糧。每日每名領銀一錢四分。夫糧每名一錢。晝一定制。楚軍在江西境內者。疊被鄉團截殺。多至數十百人。公出示曉諭各兵勇。嚴禁騷擾。又出示曉諭團練。禁毋得妄殺人。委員提各案證。訊鞫得實。按法處辦。十二日。馳奏遵旨援閩。擬即日由崇安進剿。并陳明現在賊情軍勢一摺。又奏報閩賊竄撲廣豐玉山兩縣官軍力戰獲勝。兩城解圍一摺。奏稱李元度自從軍以來。備嘗艱險。百折不回。臣丁憂回籍。該員以孤軍支柱東路。屢能以少勝衆。此次力保兩城。有裨大局。請賞加

按察使銜并給勇號陣亡弁勇易金榜李傳綸翼茂發張應龍翼拱綸李家純黃查七名請卹。附片奏調游擊喻吉三隨營差遣。又奏此次由江入閩。應於廣信府城鉛山縣城設立糧臺。轉運米糧軍火等件。已劄委駐防廣信之九江道沈葆楨兼理。臣軍糧臺。并委在籍道員雷維翰經理鉛山水陸轉運。又札調李元度帶所部平江勇一營。隨臣赴閩辦理營務處。餘勇并交沈葆楨接管。留防廣信。札調王勳來營會辦營務處。又會奏九江府城建立提督塔齊布祠。湖口建立水師昭忠祠。臣在途次。經歷兩處。見其祠宇將次工竣。請勅下地方官。春秋致祭。又奏湘鄉縣城捐建忠義祠。彙祀陣亡員弁勇丁一摺。附片奏湖南補用知府李瀚章在臣軍糧臺。經手最久。該員現回廬州原籍。應令速來湖口水營辦理報銷。所請皆奉旨允之。公弟國荃督各營攻克吉安府城。江西全省肅清。江西湖南巡撫會奏保曾國荃。以知府遇缺卽選。并加道銜。賊由福建邵武分股竄出鐵牛關。劉公長佑擊賊失利。廬溪金谿皆失守。賊竄陷安仁縣。十五日。公率軍移駐弋陽縣。調張運蘭回軍截勦。十九日。克復安仁縣。賊由萬年竄入饒州境。屯踞景德鎮。公調吳國佐會勦安仁之賊。吳國佐追賊於萬年小挫。幫辦營官劉本傑陣亡。二十四日。馳奏閩賊竄入江西。官軍克復安仁一摺。隨摺奏保道員張運蘭知府王文瑞二員。陣亡千總周玉田請卹。附片奏陣亡知縣劉本傑請卹。又片奏請旨敕四川督臣每月籌銀二萬兩。由湖北轉解行營。又片奏同知胡兼善在營病故。請卹。二十七日。公拔營赴雲際關。二十九日。行抵雙港聞警。駐營閩中之賊。分大股回竄新城縣。吉安餘匪。竄陷崇仁宜黃兩縣。撫州建昌兩郡戒嚴。公調張運蘭一軍。進勦新城。公改道南趨建昌。九月初二日。李元度請假回籍。劉公長佑擊賊於新城。大破之。賊退回閩境。崇仁宜黃股匪亦竄入閩境。初七日。公行抵金谿。聞新城大捷。初九日。抵建昌府駐軍城外。劉公長佑來見公。公登麻姑山。周覽建昌形勢。高下遠近攻守之途。峻濠堅壘。委弁勇嚴守壘門。每夜親巡查之。委員弁專司更鼓。晨昏漏刻。毋得參差。委員分巡營壘附近數里之地。嚴禁賭博。及吸食鴉片之館。出示曉諭弁勇。嚴禁強索夫役。抑勒貨物。每日傳見哨長三人。察其材力能否。密爲記注。十三日。馳摺奏移師建昌。商籌撫建各府防勦事宜。擬從杉關入閩勦賊。附片請給捐生紀以鳳等執照。蕭公啓江假滿還江西。抵建昌大營。公調張運蘭一軍。由杉關進勦。蕭啓江一軍。由廣昌進勦。派吳國佐一軍。爲後路策應。時閩中賊氛方熾。官紳函牘迭至。催公赴援。而嶺路崎嶇難行。天雨不止。疾疫大作。不能速進。公弟國荃

克吉安後。撤遣所部之勇回湘。所統湖南援軍各營。亦先後遣回湖南境。自率所部勇千人。從公於建昌。二十六日。抵大營。公留其勇爲親兵。謂之護衛軍。其營官哨長。亦每日傳見數人。視其能者獎拔之。公弟國荃留營十餘日。李公瀚章由廬州應調來營。公核定在營委員夫役等薪水口糧章程。查核火器大小礮位。擡鎗鳥鎗等項。所食子藥多少輕重之數。爲表以記之。十月十一日。公弟國荃回湘。公送之行。以課子讀書爲屬。十六日。具摺奏保玉山廣豐守城案內。出力員弁。開單請獎。又馳奏調派官軍。分道入閩。并陳現在辦理情形一摺。附片奏報疾疫盛行。從前所未見。張運蘭蕭啓江吳國佐等軍。報病多者千數百人。少或數百人。臣亦不忍亟催其進。劉長佑一軍。積勞過深。患病尤衆。請移駐撫州調理。奉上諭。曾國藩奏辦理情形。朕亦不爲遙制。該侍郎惟當督飭將士。相機勦辦。探知何處有賊。卽由何處進勦。以期迅殲醜類。至建昌等屬。疾疫流行。各營兵勇。現多染病。著該侍郎妥爲拊循。俾得迅速調治。無誤軍行。欽此。李忠武公續賓公弟愨烈公國華於巴河相見。別後督軍入皖。八月克太湖潛山。九月克桐城舒城。兵勢甚銳。時廬州復陷。賊屯聚三河鎮。李公續賓督軍攻三河賊壘。是月賊酋陳玉成糾合大股援賊。連營圍之。官軍全覆。李公赴敵陣亡。公弟國華及在軍員弁兵勇。從殉難者六千人。湘軍精銳殲焉。舒城桐城後路之軍。相率潰退。楚皖之間。大震。都與阿公由宿太進攻安慶之師。亦退屯鄂境。李公續宜撫定潰卒。屯於黃州。官文公奏請公移師援皖。奉寄諭。以江西援閩之軍。疾疫方盛。難以跋涉長途。詔起復胡林翼署理湖北巡撫。督辦軍務。以援皖北。是月。公編紀浙江皖閩各省府州縣所屬山川阨塞。逐日記注。以爲常課。出示曉諭被賊州縣。流亡戶口。招集復業。十一月。公聞三河之警。悲慟填膺。減食數日。作母弟溫甫哀詞。專遣弁勇。開行入皖北。收覓骸骨。公核定大營閱視操練之期。每月逢三日。閱步箭刀矛之屬。逢八日。閱馬箭火器之屬。其時江西鄉團。猶有截殺楚勇之案。公作愛民歌一篇。令軍中習誦之。張公運蘭進軍福建邵武府。賊已悉數南竄。由汀州竄擾江西贛州南安之境。蕭公啓江軍至石城縣。值潮勇爲匪。擾亂縣境。蕭公捕討平之。皖北軍覆後。賊之在景德鎮者。乘勢益張。江西之兵進勦失利。公迺調蕭啓江勦江西南路之賊。調張運蘭回軍建昌。移勦景德鎮。與劉于濤水師會勦。二十六日。馳奏分調官軍。追勦閩省竄賊。移剿景德鎮股匪一摺。附片奏蕭啓江軍過石城。討捕潮匪一案。又奏探明賊蹤大略一片。胡公林翼營葬甫畢。馳至湖北接受關防。進駐黃州。拊循士卒。人心稍

安。劉公長佑因軍中多病，由撫州撤遣楚勇回籍。駱公秉章奏陳軍情緩急，請公由江援皖。奉上諭：皖北賊勢鴟張，楚省邊防喫緊，諒曾國藩亦必有探報。此時閩省之賊已南趨拊泉，距江西漸遠，詔照駱秉章所請，令該侍郎移師赴皖，而留蕭啓江所部四千餘人防守江西，亦未始非權衡緩急之計。惟曾國藩所部各軍多染疾疫，前奏尙須休息，且景德鎮尙有大股逆匪，隨剿隨進，亦非計日可到。著曾國藩豫爲籌度，如果閩省兵勇足資勦辦，而江西邊境防勤有人，自以援皖省尤爲緊要，不獨廬州省城可收南北夾攻之效，卽上竄湖北之路亦可藉資堵扼。儻因汀州等處尙須兵力，一時不能移軍，或須俟景德鎮股匪殲除，再回楚北，亦著斟酌具奏。欽此。十二月十一日，公具摺覆奏。近日賊勢以皖江南北兩岸爲最重，皖南大山縣互自山以北，久爲粵匪出沒之區，自山以南，現惟婺源縣景德鎮兩處有賊，皖北賊勢浩大，實倍甚於皖南。論大局之輕重，則宜併力江北，以圖清中原。論目前之緩急，則宜先攻景德鎮，保全湖口。臣已札張運蘭一軍，馳勦景德鎮，至福建之賊爲數無多，其回竄江西者已飭蕭啓江一軍迅速追剿，奉硃批：所擬尙屬妥協，欽此。公又附片奏目疾請假一月，在營調理。李公鴻章來謁於建昌，因留幕中。十五日，李元度假滿來營，王勳請假回籍。十七日，張公運蘭等軍至景德鎮，吳國佐遇賊軍敗，公批飭責之，令其撤營回湘。賊陷南安府城，蕭公啓江進軍攻之。張公運蘭擊賊於景德鎮破之。是歲二月，和春公張公國樑克秣陵關，復進攻金陵，詔授何桂清爲兩江總督。前江西巡撫張芾督辦皖南軍務，駐徽州。七月，江南大營築長圍於金陵，以困賊。九月，德興阿軍大潰於浦口，賊復陷揚州府城。及儀徵、天長、六合等縣。溫壯勇公紹原死於六合。張公國樑引兵渡江，克揚州。十月，擒匪李兆，受以天長歸順，更名世忠。十二月，戴武烈、公文英、鄧忠武、公紹夏勦賊於寧國府之黃池灣址，先後陣亡。

〔己未〕咸豐九年公四十九歲正月，公在建昌營奉旨通籌全局。十一日，公具摺奏稱數省軍務，安徽喫重，江西次之，福建又次之。計惟大江兩岸各置重兵，水陸三路鼓行東下，勦皖南則可以分金陵之勢，勦皖北則可以分廬州之勢。北岸須添足馬步軍三萬人，都與阿李續宜鮑超等任之。南岸須添足馬步軍二萬人，臣率張運蘭等任之。中流水師萬餘人，楊載福彭玉麟任之。至江西軍務，分南北兩路，臣願與撫臣耆齡分任之。粵賊勾結捻匪，近來常以馬隊衝鋒，擬調察哈爾馬三千匹，募馬勇數千，擇平曠之地，馳騁操習。臣願竭數月之力，訓練成熟。皖

豫軍務。可期大有起色。附片請救健銳營內外火器營。選派精練馬。曾經戰陣之員。咨送來營。并奏調翰林院編修郭嵩燾禮部主事李榕二員。又片奏江西南路防勦喫緊。暫難移師北行。請飭贛南總兵饒廷選帶兵來江駐防南路。是日又奏陳明李續賓死事甚烈。功績最多一摺。又奏陳臣弟曾國華殉難之情形一摺。奉上諭。巡撫銜浙江布政使李續賓前在三河陣亡。業經降旨優加褒卹。茲據曾國藩臚陳該員功績具奏。覽之益深悼惜。李續賓從軍數載。所向成功。及其見危授命。麾下將士無一偷生。實有古名將之風。允宜垂諸信史。百世流芳。著將曾國藩此奏。交國史館探入列傳。以示褒嘉。欽此。又奉上諭。曾國藩奏伊弟曾國華殉難情形一摺。候選同知曾國華在三河鎮殉難。當經降旨追贈道員。從優議卹。該故員歷著戰功。一門忠義。著再加恩。賞給伊父曾驥雲從二品封典。以示褒嘉。欽此。同日又奉上諭。曾國藩奏遵籌全局。請添馬隊進取一摺。該侍郎統籌全局。意在併力大江兩岸。爲節節進勦之計。所見甚是。惟現在江西南贛等處。賊氛尙熾。該侍郎未能即日北行。俟南路稍鬆。再赴楚皖交界。籌辦大局。編修郭嵩燾現隨僧格林於前赴天津。俟該處撤防。再降諭旨。主事李榕已令赴營差委。汝弟曾國華在三河陣亡。可嘉可憫。業經追贈道員。從優賜卹。該員之子。例有應得世職。本日復明降諭旨。賞給伊父曾驥雲從二品封典。以示褒獎。欽此。公作聖哲畫像記。圖畫昔時聖賢先儒三十三人。系之以說明。抗希古人之意。略依孔門四科。及近世桐城姚氏論學。以義理考據詞章三者。分門依類而圖之。官軍攻景德鎮小挫。分調駐防廣信之平江勇等營。赴鎮助勦。飭張運蘭等堅守營壘。與賊相持。軍心以安。蕭公啓江擊賊於南康縣大破之。克新城墟及池江賊壘。二月初三日。蕭公啓江等攻克南安府城。收復崇義縣城。賊酋石達開糾黨西竄。入湖南境。初四日。公在營中行大祥祭禮。初九日。奏報蕭啓江一軍勝仗。陣亡將弁龍復勝等十七名。請卹。又奏張運蘭一軍。攻勦景德鎮情形一摺。彙奏水陸各軍陣亡病故員弁何長庚等八十員名。開單請卹。又奏彙保新城安仁兩案。老湘營平江營出力員弁兵勇。開單請獎一摺。是日又具摺謝弟國華從優賜卹恩。又摺恭謝年終恩賞。附片奏鄧輔綸捐造戰船。請敘一案。經工部咨查何項工例。臣查江楚創造戰船。本係臣新立規模。並未仿照他省戰船成式。實無工例可援。仍請照前案議敘。奉硃批。著照所請獎勵。該部知道。欽此。十一日。公查核報銷七柱清單。公聞閩省已無賊擾。十二日。由建昌拔營。移駐撫州。李忠武公遺骨。經難民收得。負送大營。胡公林翼

遣弁覓得公弟愍烈公遺骨。而喪其元。公聞而益悲之。胡公委員弁先後斂送回湘。十五日。公在途次馳摺奏報。蕭啓江一軍。協同各勇攻克南安府城。現在引兵馳援信豐縣。江省南路可望肅清。隨摺奏保道員蕭啓江請加勇號。附片奏移軍撫州。距景德鎮較近。軍中聲息易通。又具摺恭謝天恩。并奏稱臣胞叔曾驥雲臣在侍郎任內。恭遇兩次覃恩。曾邀勲封至正一品光祿大夫。茲復渥荷褒嘉之典。誥軸則祇領新綸。頂戴則仍從舊秩。奉上諭。前因曾國藩奏伊弟曾國華殉難情形。當經賞給曾國華之父曾驥雲從二品封典。本日曾國藩謝恩摺內。聲明曾驥雲曾邀勲封正一品封典等語。所有曾國華之子曾紀壽。著再加恩。俟及歲時。由吏部帶領引見。以示朕褒崇忠節。有加無已之至意。欽此。十六日。公至撫州。賃城內謝氏宅。以爲行館。蕭公啓江援勲信豐。力戰賊解圍去。賊之竄湖南者。連陷桂陽郴州各城邑。攻撲永州府。江西南境餘匪。相繼西竄。公迺調蕭啓江一軍。馳赴吉安府境。以爲湖南援應之師。駱公秉章亦奏調蕭啓江由間道回軍湖南。聽候調遣。自是南路軍餉。不復關公慮矣。公以景鎮之賊。久攻未克。委副將朱品隆游擊喻旨三知縣張岳齡縣丞凌蔭廷等。回湖南續招鄉勇四千人。赴撫州訓練。以備攻勲。二十七日。派委員弁巡查撫州城防。二十八日。具摺奏謝弟國荃保選用知府。加道銜恩。又奏報蕭啓江一軍。力解信豐城圍。現在飛調該軍。馳赴吉安。爲湖南援應一摺。陣亡將弁李先益李楚文黃龍光劉文友請卹。附奏添招練勇。卽由江西添籌月餉一片。三月。朱品隆等所募鄉勇。先後抵撫州。公按日閱操。傳見各營哨官。時時訓飭之。十三日。張公運蘭擊賊於景德鎮。軍勢復振。劉公騰鴻領鄉軍駐防湖口。皖南之賊竄陷建德。劉公進勲陣亡。公調派平江勇千人。委知府屈蟠領之。以防湖口。二十六日。奏報景德鎮官軍兩月以來。攻勲情形一摺。陣亡將弁喻福慶易福陞等五十二員名。開單請卹。附片奏添募湘勇。在撫州教練。俟吉安防務稍鬆。卽調派各營。合攻景鎮之賊。又具摺奏謝曾紀壽由吏部帶領引見恩。是月李武愍公孟羣攻勲廬州陣亡。四月。湖南永州解圍。賊以全股圍撲寶慶府城。公弟國潢治團練於鄉邑。湘勇從軍在外者。人懷家鄉之慮。公札飭各營官禁勇丁告假回籍。委員至衡州府城。坐探湖南賊勢軍情。三日一報。隨時函告各營以慰之。公出城閱視操演。其隊伍整齊者。亟犒賞以獎勵之。二十五日。拜發萬壽賀摺。專弁入都。二十七日。公弟國荃到撫州營。五月初九日。公與弟國荃設次行釋服禮。仿通禮中品官祭儀。而略變通以行之。初十日。派調湘軍之在撫州者。舊部

四營。新募者七營。爲數共五千八百人。公弟國荃總領之。赴景德鎮助勦。李公鴻章同往贊畫。二十二日。總兵饒公廷選來見公。二十六日。奏報楚軍進攻景德鎮。連獲勝仗。現在添軍助勦一摺。附片奏飭九江道沈葆楨赴本任。調總兵饒廷選接防廣信。又奏記名道編修李鴻章留營襄辦軍務。檄令會同國荃等督勦景德鎮。又奏陳明服闋日期一片。公麾下各軍。悉赴景德鎮。其留防撫州者千數百人。皆本歸江省調度之營。藉公爲之鎮撫而已。六月初三日。禮部主事李榕來撫州見公。湖南賊國寶慶久不解。蕭公啓江軍亦至寶慶。總督官文公奏。探知湖南賊勢將竄入蜀。請令公帶兵赴夔州一帶。擇要扼守。奉上諭。官文奏請飭會國藩迅赴夔州一摺。詳覽該大臣所奏各情。實爲通籌大局起見。本日已諭令有鳳派兵扼要嚴防。惟該省兵力。恐不能當此悍賊。會國藩前派蕭啓江帶兵援勦湖南。現在湖南喫重。此一軍自未能調回。此外如江西湖北等兵。素稱得力。着會國藩即日統帶由楚江前赴四川夔州扼守。以據兩湖上游之勢。倘賊蹤竄至。即可有備無患。至江西景德鎮之賊。尙未勦平。著會國藩斟酌情形。咨商耆齡。妥爲布置。俾得迅掃逆氛。不至顧此失彼。是爲至要。欽此。公弟國荃督軍至景德鎮。三戰皆獲勝。十四日克景德鎮。賊竄浮梁縣。十五日。公弟國荃張公運蘭等追擊賊於浮梁克之。賊潰入徽州境。江西全省肅清。十八日。復奏寄諭防蜀一摺。奏稱。臣所部兵勇。爲數無多。目下景德鎮攻勦之師。難以遽行抽動。若令由鄂赴蜀。應須兵力稍厚。乃可攜以入峽。維時湖廣實慶賊勢猶盛。湘軍既克景德鎮後。弁勇等思歸尤切。勢不能止。公迺調張運蘭引軍回湘。以援實慶府。擬自率六千人。泝江西上至宜昌。駐軍扼湖廣之西路。二十二日。馳奏克復景德鎮及浮梁縣城。江西全省肅清一摺。奏稱。會國荃係臣親弟。不敢仰邀議敘。隨摺奏保道員張運蘭王文瑞游擊任星元三員。陣亡都司李印典守備向其昌陳玉才高成春請卹。附片奏調張運蘭一軍。會勦寶慶。以副弁勇迫救桑梓之情。可期得力。臣擬先駐湖北宜昌等郡。如賊果入川。再行酌量前進。又奏保已革編修吳嘉賓前奏保升同知。經吏部核駁。請以內閣中書選用。并加五品銜。又片奏副將黃翼升復姓歸宗一案。二十八日。張公運蘭拔營回湘。公弟國荃率吉字中營。拔赴撫州。公飭調朱品隆等軍。由景德鎮拔營。取道湖口。渡江駐軍於小池口。七月初一日。公弟國荃至撫州。公作林君殉難碑記刊石。立于撫州城外林源恩殉難之處。以表其忠。初六日。奏報景德鎮官軍。分兩路赴楚。拔營日期一摺。奏保蕭啓江一軍。南安信豐兩案出力員弁。開單請獎。附

片奏臣前在江西重整水師。設立楚師子藥礮位三局。歷時三載有餘。始行裁撤。請將該局員量予保獎。公弟國荃以病留撫州數日。初七日。公由撫州啓行。紳民酌酒於路。以餞公行。初十日。公行抵南昌省城。奉上諭。現在江西全省一律肅清。勦辦甚爲得力。會國藩調度有方。着交部從優議敘。在事出力之道銜候選知府曾國荃。著以免選知府。以道員用。欽此。李公續宜由黃州率軍回援湖南。擊賊於寶慶城外。大破之。石達開竄入廣西境。湖南解嚴。公弟國荃病愈。由撫州拔營回湘。公弟國葆更名貞幹。從軍於黃州。胡公林翼奏留辦理軍事。是月至撫州。旋至南昌見公。沈公葆楨見公於南昌。十五日。公登舟啓行。李公瀚章鴻章皆從。十七日。泊吳城鎮。李公瀚章所設報銷總局在焉。十八日。核閱報銷清冊。十九日。泊湖口。彭公玉麟楊公載福來見。公棹小舟石鐘山下。作湖口水師昭忠祠記。彭公立石焉。是月奉上諭。該侍郎原摺所稱。駐紮宜昌等處。即可穩占上游。但爲鎮守湖北起見。尙未籌防蜀省。會國藩當熟思大勢。應如何定計之處。詳悉馳奏。毋得遷延。欽此。又奉上諭。會國藩雖先駐宜昌等處。仍當偵探賊情。如寶慶一帶。未能遏其入川之路。卽當親督兵勇赴蜀。以便調度堵勦機宜。未可遷延貽誤。欽此。又奉暫留兵勇。赴徽州會勦之旨。又奉酌撥兵勇。留防江西之旨。二十五日。復奏四次諭旨一摺。奏稱。江西北路。饒州有劉于濤一軍。彭澤有普承堯一軍。臣與耆齡熟商。擬令饒廷選吳坤修各添置一軍。或以留防本省。或以助攻皖南。臣所帶領人數無多。不能抽撥赴皖。亦不能酌留防江。臣籌防全蜀。斷不能遷延貽誤。俟抵鄂後。察看賊勢。與官文胡林翼會商。再行馳報。是日。又奏摺恭謝天恩交部優敘弟國荃以道員用。公舟次湖口。所調朱品隆唐義訓等營咸集。駐營於江之兩岸。觸暑多病。公留湖口旬日。令各營休息醫調。八月初一日。札調朱品隆等拔營。由陸路赴鄂。駐紮巴河。公舟解纜。泝江而上。泊九江。謁先賢周子墓。十一日。行抵黃州。與胡公林翼相見於行館。留七日而行。公在舟中。定每日靜坐讀書日課。武昌門人張裕釗謁見公舟中。公教以文詞甚詳。途次奉到上諭。官文奏皖省賊勢日張。籌議由楚分路勦辦一摺。皖省粵匪與捻匪勾結。蔓延日甚。官文以寶慶解圍。敗賊悉數南竄。川省已有備無患。請飭會國藩緩赴川省。暫駐湖口。分軍四路進勦皖省。所籌實於大局有益。會國藩如已啓程赴鄂。著與官文商酌。如湖南大局已定。川境可保無虞。卽暫駐湖北。調回湖南各軍。爲分路進勦皖省之計等因。欽此。二十三日。公至武昌省城。與官文公會商軍事留旬日。是月公弟國潢國荃遷葬竹亭公江

太夫人於台州新塋。胡公林翼委公弟貞幹回湘募勇二營。赴鄂助勦。九月初三日。公由武昌解纜回黃州。與胡公林翼商籌進兵皖省之途。須分四路。循江而下者爲南二路。循山而進者爲北二路。胡公撥派兵勇十營。隸公麾下。初五日。至巴河登陸。駐陸營中。接見各營營官哨長。簡校軍實。胡公林翼至公營視師。十二日。馳奏遵奉諭旨會商大略。由鄂省回駐巴河一摺。催調蕭啓江一軍。剋日前來。會師東下。副都統多隆阿公攻克石牌賊壘。進規安慶。二十五日。公至黃州。留二日還營。李公鴻章奉旨授福建延建邵遺缺道。留公營幕中。不之任。兩淮賊氛肆擾。勝保翁同書督師屢失利。漕運總督袁公甲三奏請。以公一軍。由河南光固進勦。遏賊北竄。奉上諭。袁甲三等所慮。不爲無見。著官文會國藩胡林翼再行悉心籌酌。至此次官文等會籌大舉。關係全局利害。總須計出萬全。不妨稍遲時日。謀定後動也。欽此。十月初一日。核定馬隊營制章程。初二日。公弟國荃領所部吉字營勇至巴河。公弟貞幹領所招鄉勇至黃州。初八日。見公於巴河。十七日。會奏悉心籌酌一摺。奏稱。逆賊洪秀全踞金陵。陳玉成踞安慶。竊號之賊也。石達開竄擾楚粵。流賊之象也。皖豫諸捻。股數衆多。分合不定。亦流賊之類也。目前要策。必先攻安慶。以破其老巢。兼搗廬州。以攻其所必救。現擬四路進兵之局。第一路由宿松石牌以規安慶。臣國藩任之。第二路由太湖潛山以取桐城。多隆阿鮑超任之。第三路由英山霍山以取舒城。臣林翼任之。先駐楚皖之交。調度諸軍。兼籌轉運。第四路由商城固始以規廬州。調回李續宜一軍任之。湘勇久戰江濱。於淮北賊情地勢。不甚熟悉。能否繞出懷蒙以北。應俟李續宜到後。察看情形。再行奏明辦理。附片奏李續宜因母病請假歸省。先調該道所部各營回鄂。由北路進發。又具摺奏保員外郎胡大任道員厲雲官。請特旨記名簡放。以昭激勸。又附片請旨。飭浙江巡撫羅遵殿月籌餉銀四萬兩。解交湖北糧臺。是日公專銜奏保張運蘭等軍。克復景鎮。淨梁案內出力員弁。開單請獎。附片奏江西紳士劉錫綬報捐餉銀一萬兩。請照例給獎。又奏參將鄒世蓮復姓歸宗一案。又片奏報目疾未痊。兼患頭暈。請假一月。在營調理。奉上諭。會國藩著賞假一月。在營調理。該侍郎一路兵勇。既待另籌。而李續宜亦係獨當一面。復因母病給假。是四路中已有二路。急難進征。於皖北待援情形。實有緩不濟急之勢。至所稱先圖安慶。兼搗廬州等語。所籌尙屬周妥。但恐言之易而行之難。所有前諭派出一軍。取道光固潁州。繞出懷蒙以北之處。仍著官文會國藩胡林翼悉心籌酌辦理。欽此。二十四日。公督各營。拔營入皖。分

爲前後幫啓行。公弟國荃請假回湘。十一月初三日。公駐軍於黃梅縣。十三日。拔營進駐宿松縣。公統領步隊二十營。馬隊一營。派朱品隆李榕總理營務處。蕭公啓江張公運蘭兩軍。由湖南分途出境。援勦兩粵。公兩次奏調蕭啓江一軍。諭旨飭調張運蘭赴皖。均經廣西湖廣奏留。十九日。奏報入皖日期。一摺。奏稱蕭啓江張運蘭兩軍均不調回。諭旨另籌一軍。繞赴淮北。由臣官文會奏辦理。前月通籌四路進勦之議。由公主稿。其後奏報各路軍情。多由胡公林翼主稿。公會銜而已。十二月。胡公林翼由黃州拔營進軍英山。公弟貞幹從之。公調派前幫十營。以朱品隆李榕總領之。進駐太湖縣。派委彭山圮總理營務處。公與營官講求堅壘浚壕之法。壕深丈有五尺。躬親巡視量度。雖風雪不避也。是月。公弟國潢國荃遷葬星岡。公王太夫人於大界新塋。江西巡撫耆齡公調任廣東。公乃作畢君殉難碑記。刻石立於景德鎮。畢剛毅公陣亡之處。是歲。和春公奏劾德興阿罷職。江北大營不復置帥。詔和春兼轄之。周武壯公天培陣亡於浦口。勝保丁憂。陳請回京穿孝。以袁甲三爲欽差大臣。與南河總督庚長督辦軍務。攻克臨淮關。袁公駐守之。

〔庚申〕咸豐十年公五十歲。正月。公在宿松大營。賊酋陳玉成大股。由安慶上犯小池驛。圍撲鮑超營甚急。公與胡公林翼調各營援之。飛札調蕭啓江一軍。馳回援皖。每遇寒風雨雪。沈霾陰噎之晨。則終日惶然。以前敵爲慮。二十五日。多隆阿鮑超大破賊於小池驛。二十六日。擊破賊壘七十餘座。克太湖潛山兩縣。賊下竄。公叔父高軒公卒於家。蕭公啓江軍至長沙。駱公秉章派令援皖。公以陳逆敗退。皖軍解嚴。而蕭啓江一軍。疊奉旨令赴蜀。遂咨湖南止其前來。蕭公乃引軍由常德入川。是月。張公國樑攻克沿江賊壘。袁公甲三克鳳陽府城。而潁州府又爲賊所陷。石達開踞廣西之慶遠府。分擾湖南廣東邊境。二月初五日。聞高軒公訃。悲痛。目疾復劇。初六日。專摺奏謝年終恩賞。專差費部監執照一百八十七張。歷年籌餉勸捐所餘者。具摺奏繳。附片報官軍大捷。擬分路進勦。臣目疾復發。又得臣叔父會曠雲病故之信。請假四十日。在營調理。初七日。公入宿松縣城。設次成服。設奠服衰。十有四日。公弟貞幹自太湖營來。就次成禮。官文公胡公林翼會奏小池驛大勝。克復太湖潛山兩縣。奉上諭。官文胡林翼會國藩督師進勦。調度有方。著先行交部從優議敘。欽此。二十日。公改服還營。公每日黎明。卽出巡視營牆。按期閱視操練。雖羽檄交馳。而不廢書史。是月始輯錄經史百家雜鈔。以見古文源流。略師桐城姚氏

籓之意。而推廣之。李公續宜假滿到鄂。尋赴大營。張公國樞攻金陵上下關賊壘。克之。皖南之賊。陷涇縣及廣德州。竄入浙江境。張公玉良由金陵大營。分兵援浙。二十七日。杭州省城陷。羅壯節公遵殿等死之。三月初一日。探明安慶城內賊蹤之強弱多寡。及城外賊壘拒守之形勢。定計攻之。初五日。李公續宜來見。籌度分兵進剿。議以公所部圍攻安慶。多隆阿公圍攻桐城。李公駐軍於青草壩。以爲援。鮑超傷病發。請假回籍。二十六日。公調所部吉字等營。拔赴安慶。是月。杭州將軍瑞昌公督駐防兵。堅守省城。賊攻之不下。提督張公玉良以援兵至。克復杭州省城。尋收復廣德州。賊竄陷建平東壩。溧陽。糾皖南大股。萃於金陵。閏三月初五日。奏摺恭謝天恩。交部優敘。又奏景德鎮浮梁案內。保舉文員。邊部議分晰開單。聲明各員勞績一摺。十一日。會奏鄂皖軍情一摺。又奏保小池口擊破援賊。克復太湖潛山三案出力員弁。開單請獎一摺。十四日。作何君殉難碑記。以立石於英山縣何文公殉難之處。二十二日。編經史百家古文雜鈔成。又約選四十八篇。以爲簡本。公寄書家中。以名其所居曰八本堂。其目曰讀書以訓詁爲本。詩文以聲調爲本。事親以得歡心爲本。養生以少惱怒爲本。立身以不妄語爲本。居家以不晏起爲本。居官以不要錢爲本。行軍以不擾民爲本。二十六日。李元度來見公。公派令綜理宿松大營營務處。二十七日。公弟國荃到營。公令督勇攻安慶集賢關賊壘。左公宗棠自英山來見公。是月。賊攻陷江南大營。官軍潰走丹陽。張忠武公國樞陣亡。欽差大臣忠壯公和春受傷。卒於潯墅關。賊陷丹陽縣。攻常州府城。總督何桂清退走常熟。江浙戒嚴。詔令公傳旨荊州將軍都興阿。馳赴江北。辦理軍務。四月。奉上諭。江浙安危。在於呼吸。會國藩現紮安慶。若與楊載福率領所部水陸各軍。迅由東流建德一帶。分勦蕪湖。並入寧境。以分賊勢。而顧蘇常。於東南大局。實有裨益。惟安慶賊勢頗衆。會國藩能否舍安慶而東下。著酌度情形。相機辦理。迅速奏聞。有人奏左宗棠熟悉形勢。運籌決策。所向克敵。現在賊勢披猖。東南蹂躪。請酌量任用等語。應否令左宗棠仍在湖南本籍。襄辦團練等事。抑或調赴該侍郎軍營。俾得盡其所長。以收得人之效。並着會國藩酌量辦理。欽此。初二日。羅壯節公靈柩。自浙歸宿松。公派隊迎護。尋與胡公林翼詣其家祭之。十三日。馳摺復奏。臣軍萬餘人。兵力單薄。若盡撤赴蕪湖。則桐城之師。不能獨立。左宗棠剛明耐苦。曉暢兵機。當此需才孔亟之時。無論何項差使。求明降諭旨。必能感激圖報。附片奏目疾未痊。肝氣復發。軍中又乏著名統將。擬調張運蘭一軍前來。以厚兵力。左公宗

棠留營中兩旬。昕夕縱談東南大局。謀所以補救之法。十八日。左公回鄉募勇。奉旨以四品京堂候補。襄辦軍務。二十日。公核定報銷稿案。賊攻陷常州府城。連陷蘇州省城。江蘇巡撫徐莊愨公有壬死之。奉上諭。曾國藩規取安慶。頓兵堅城。即使安慶得手。而蘇常有失。亦屬得不償失。全局糜爛。補救更難。爲今之計。自以保衛蘇常爲第一要務。著官文曾國藩胡林翼熟商妥議。統籌全局等因。欽此。是時都中猶未聞蘇常已失。公接奉諭旨。咨商胡公林翼稱蘇常業已失守。救援不及。據安慶各營。搜獲逆首陳玉成僞文。定於秋間。兩路大舉上犯湖北江西。欲合江西兩湖三省之力。防禦陳逆秋間大舉之狡謀。如能併力擊退。再行分兵駛赴下游。圖復蘇常也。又咨商江西湖南巡撫。賊由蘇州犯浙江。陷嘉興府。張玉良引兵退守杭州。奉旨。何桂清革職逮訊。以張玉良暫署欽差大臣關防。總統江南諸軍。又奉上諭。曾國藩著先行賞加尙書銜。迅速馳往江蘇。署理兩江總督。欽此。又奉上諭。目下軍情緊急。曾國藩素顧大局。不避艱險。務當兼程前進。保衛蘇常。次第收復失陷地方。重整軍威。肅清醜類。朕實有厚望焉。欽此。是月。蕭壯節公翰慶奉調援浙。陣亡於湖州。蕭壯果公啓江卒於四川省城。胡公林翼奏請以左宗棠入蜀。接統湘軍。劉公長佑蔣公益澧克廣西慶遠府城。賊竄貴州境。五月初三日。拜摺恭謝天恩。署兩江總督。又馳摺復奏通籌全局。並辦理大概情形。奏稱。目下安慶一軍。已薄城下。關係淮南全局。卽爲克復金陵。張本。不可以遽撤。臣奉恩命。權制兩江。必須帶兵過江。駐紮南岸。以固吳會之人心。而壯徽寧之聲援。無論兵之多寡。將之強弱。職應南渡。不敢稍緩。擬於江之南岸。分兵三路。一由池州進規蕪湖。與楊載福彭玉麟水師。就近聯絡。一由祁門進圖溧陽。與張芾周天受等軍。就近聯絡。一分防廣信。以至衢州。與張玉良王有齡等軍。就近聯絡。臣函商官文胡林翼酌撥萬人。先帶起程。仍分遣員弁。回湘添募勁勇。趕赴行營。以資分撥。至於餉糈軍械。必以江西湖南爲根本。臣咨商兩省撫臣。竭兩月之力。辦江楚三省之防。布置漸定。然後可以言勤。又具摺奏請起用告養同籍道員沈葆楨。馳赴江西。仍辦廣信防務。附片奏陳察看海漕。兼保鹽場之利。又片奏請救下湖南撫臣。迅催張運蘭一軍。取道江西至饒州一帶。聽候調遣。又奏委道員李元度馳赴湖南。另募平江新勇三千。與饒廷選之平江勇五營。合爲一軍。防勤廣信衢州一路。又片奏請設糧臺於江西。委江西藩司總辦。添委道府數員。幫同辦理。自咸豐三年。至十年五月。由臣分作三案。造冊報銷。自接受總督印務以後。卽由江西藩司報銷。以專責

成。而免牽混。另設江西通省牙釐局。遴委大員專管。此後江西錢漕。歸撫臣經收。以發本省兵勇之餉。牙釐歸臣經收。以發出境征兵之餉。疏入。奉上諭。會國藩奏統籌全局。並辦理大概情形。甚合機宜。即著照所擬辦理。胡林翼奏保之左宗棠一員。前已有旨。賞給四品京堂。令其襄辦會國藩軍務矣。欽此。又奉上諭。會國藩現署兩江總督軍務地方。均屬責無旁貸。所請調張運蘭一軍。本日已寄諭駱秉章。飭令該道。前赴該署督軍營。聽候調遣等因。欽此。公自奉到署兩江總督之旨。與胡公林翼函商兵餉大計。籌餉以江西爲本。籌兵以兩湖爲本。調餉起所部六千人。朱品隆唐義訓所領二千人。楊鎮魁所領千人。渡江而南。駐軍徽州之祁門。其圍攻安慶之師。堅壘不撤。攻勦之事。以公弟國荃任之。初六日。專弁遞萬壽賀摺。又專摺奏歷年軍需。支給官弁兵勇鹽糧等款。照例造冊。分送部科核銷。自咸豐三年起。至六年十二月止。是爲報銷第一案。初九日。李元度回平江募勇。十五日。公登舟啓行。朱品隆等拔營。由陸路至華陽鎮渡江。期集於祁門。十六日。舟泊老洲頭。宿松紳民數千人。餞送於江干。十七日。馳奏欽奉諭旨。先行覆陳。並報起程日期一摺。又具摺奏預籌三支水師。俟皖南賊勢稍定。即行分途試辦。查淮揚裏下河。產米最多。而鹽場爲大利所在。非於淮安急辦水師。造船購礮。實有岌岌不保之勢。欲克金陵。必先取蕪湖。欲取蕪湖。必於寧國另立一支水師。徧布固城南漪諸湖。與外江水師。爲夾攻之勢。蘇州旣失。四面皆水。賊若阻河爲守。陸軍無進兵之路。欲攻蘇州。必於太湖另立一支水師。此三者皆目前之急務。如力不能兼。則先辦淮揚寧國二支。力仍不逮。則專辦淮揚一支。蘇省財賦之區。淪陷殆遍。若不設法保全。則東南之利盡失矣。附片奏保彭玉麟任事勇敢。勵志清苦。實有烈士之風。如須與辦水師。再行奏請簡派。湖南道員李瀚章廉正樸誠。遇事精核。請以道員改歸江西。遇缺簡用。與署藩司李桓會辦江西通省牙釐事務。又片請敕下戶部。查明京倉米石存餘若干。咨行到臣。俾得斟酌緩急。設法籌辦。又奏調飭下游水師總兵吳全美李德麟所領師船。分扼狼山福山焦山瓜州一帶江面。與揚州陸軍聯絡。無任賊船得渡北岸。以保全裏下河爲主。又奏鄂省爲用兵之樞紐。據上游之形勢。全局攸關。一有疏虞。則南六省之奏報。不能達於京師矣。臣與都興阿分調數萬千人。撥餉數萬。湖北之力。甚形竭蹶。應請嗣後無再抽撥該省兵勇。俾官文胡林翼等。勉力支持。不蹈金陵覆轍。天下幸甚。二十日。李公瀚章赴江西辦理牙釐局。公行泊華陽鎮。彭公玉麟來見。二十一日。泊黃石磯。公弟國荃貞幹楊

公載福皆來見。公派委員弁。察看皖南山路。二十三日。札江西糧臺支發銀數千兩。委守備成名標赴廣東購買洋礮。二十六日。飭諭巡捕門印簽押各員弁吏役。約以三條。一不許凌辱州縣。二不許收受銀禮。三不許薦引私人。凡六百餘言。二十七日。登陸行至東流。二十八日。至建德巡視普承堯營壘。接見各營哨官。是月。張玉良革職留營。以瑞昌公總統江南諸軍。江蘇巡撫薛煥駐上海。暫署兩江總督印務。松江府失守。官軍旋復之。六月初三日。公駐建德縣。馳摺奏安慶之圍。不可撤動。蓋取以上游制下游之勢。臣南岸一軍。先守徽寧要縣。暫不深入。庶免賊抄我後路之虞。至於地方公事。未可置爲緩圖。臣在皖南。駐紮行營。仍於安慶水次。設立老營。規模與行省衙署相似。歷年文卷。概存水次官署。委司道大員經管。其地方尋常事件。卽令代拆代行。緊要者。彙封送營核辦。此臣兼管地方。變通辦理之大概也。附片奏已革守備成名標請開復原官。又片奏水師各營。候補候選人員。請援照咸豐六年。奏准前案。各照升銜。給予封典。又片奏調四川萬縣知縣馮卓懷來營差委。又奏副將成發翔復姓歸宗一案。初四日。拔營啓行。初九日。途次奉到上諭。曾國藩現已抽調兵勇萬人。由宿松進駐祁門。俟鮑超張運蘭李元度到後。卽行分路進兵。具見胸有成竹。謀定後戰。蘇省待援迫切。該署督惟當催令鮑超等迅速來營。會籌進剿。但能援師早到一日。卽早一日救民水火。實深殷盼。該督現統兵勇較單。未可輕率前進。宜加持重爲要。欽此。十一日。行抵祁門縣。各軍以次集。公調派擇要駐軍。十三日。派員專管地方案牘。其時文卷。日以繁多。迺仿照平時衙署章程。分別吏戶禮兵刑工六科。擇書吏收貯。彙歸安慶老營。十六日。奏報行抵祁門日期一摺。并奏陳鮑超張運蘭均難刻期至皖。左宗棠李元度新募之勇。則須七八月間。陸續前來。臣兵力過單。未敢輕進。又具摺奏稱楊載福彭玉麟本係臣之舊部。茲復奉旨。歸臣調遣。自應欽遵辦理。惟軍情未可遙度。奏報不可太遲。楊載福統率水師。謀勇器識。度越諸將。所有江面戰守事宜。仍令該提督自行具奏。附片奏欽奉寄諭。徽寧等府。本會國藩兼轄地方。該處軍務。併由該署督督辦。自覺事權歸一。等因。臣查詢徽寧兩郡兵勇。不能得力。臣初到祁門。情形未熟。兵將未齊。未便接辦皖南軍務。張芾所部各軍。應暫由該副都御史統籌調度。是日。又與官文公胡公林翼會奏。請令左宗棠督勇來皖一摺。維時張公芾在徽州被人糾劾。而左公宗棠會奉旨赴川省督辦軍務也。公治軍八載。轉戰兩湖江皖等省。與地方大吏。分主客之勢。至是兼任疆圉。百務填委。迺以安慶水次爲老

營設立行署。奏派大員。總理地方文卷。札委銀錢所軍械所及發審所各員弁。刊發營制營規。訓飭各營將領士卒。刊發居官要語一編。訓飭僚吏。密札司道。舉劾屬員。札各營統領。舉劾營官哨弁。均得以密函上達。札飭道府州縣官。訪求地方利病。山川險要。留心所屬紳民之才俊。田野之樹畜。現前急應辦理事件。均用書函答覆。出示曉諭江南北士民。凡六條。其一禁官民奢侈之習。謂吳中民俗好善。而遭禍之故。由於繁華。其二令紳民保舉人才。以兩江之才。足平兩江之亂。其三安插流徙。凡衣冠右族。經生大儒。與殉難死事之家。均令地方官加意存卹。貧乏者給予口食之資。其四求聞已過。凡己之過失。與軍中各弊端。許據實直告。其五旌表節義。於行營設立忠義局。委員採訪。詳覈事實。或由地方官彙報。或由該家屬親鄰徑稟。隨時彙案具奏。請建總祠總坊。其死事尤烈者。另建專祠專坊。以慰忠魂。而維風化。其六禁止辦團。軍興以來。各省各團練未聞守城殺賊之功。徒有斂費擾民之害。自後非其地。非其人。毋得擅自舉辦。其從前各處練丁。支領口糧者。概予裁撤。又出示曉諭軍營兵勇。嚴禁騷擾。三令五申。詞極剴切。接見守令各員。教之以廉靜爲體。以善聽斷爲用。雖軍事倥偬之時。而條理秩然不紊矣。二十日。公子紀澤來營省視。江蘇城邑。擾陷殆遍。避賊者羣集於上海。賊復陷松江。撲犯上海。薛公煥督官軍固守。賊之入浙江者。圍湖州。逼近杭州。分陷各屬城邑。皖南之賊。攻圍寧國甚急。官紳皆望公以赴軍援。公牘私函。至者日以十數。公以軍將未集。弗能遽進也。公之在營也。未明即起。黎明出巡營壘。閱操練。日中清釐文卷。接見賓僚。以其餘時。披覽書史。不使身心有頃刻之暇逸。嘗稱時局艱難。惟勞動心力者。可以補救。前後數十年。治軍治官。雖當困苦危險之際。以至功成名遂之時。不改其度焉。二十四日。奉上諭。兩江總督。着會國藩補授。並授爲欽差大臣。督辦江南軍務。欽此。七月初三日。馳奉諭旨。斟酌進兵。兼顧皖南軍務一摺。奏稱。臣自行抵祁門後。瑞昌王有齡迭次催臣援浙。張芾亦催撥兵赴援寧國。欽奉諭旨。飭臣斟酌辦理。臣以鮑超尙未旋鄂。張運蘭一軍。雖入江西境。又經撫臣毓科留防袁州。新軍未齊。統將未至。往返商辦。徒託空言。且待兵將齊集。察賊勢最重之處。疾趨而痛勦之。至徽寧兩處防軍。歷年取用浙餉。約計千萬。浙中恃爲長城。本省別無防守之師。一旦藩籬盡撤。任賊長驅。杭人慘遭浩劫。周天受張芾不能不任其咎。皖南地方遼闊。處處與江浙連毗。一片逆氛。幾無完土。惟係臣兼轄地方。自應力籌兼顧。如奉旨歸臣督辦。斷不能更顧浙江。又具摺奏保道員李鴻章。請簡授江

北地方實缺。與辦淮揚水師。附片奏江河道總督奉諭旨裁撤。添設總兵一員。特保水師營官副將黃翼升請簡授淮揚鎮總兵一缺。又具摺奏湖南午江縣捐建忠義祠。彙祀陣亡員弁勇丁。請列入祀典。飭地方官春秋致祭。附片奏行營設忠義局。采訪江蘇安徽等省。歷年勦賊陣亡殉難官紳士女。隨時奏請。分別旌卹。茲以寧國縣殉難紳士程枚一家男女十人爲第一案。初七日。兵部火票。遞到補授總督諭旨。同日奉上諭。薛煥僻處海隅。兵力單弱。勦辦恐難辦得手。此時蘇常一帶。並無重兵攻勦。都與阿尙在英山駐紮。江北各軍。無人總統。深恐賊勢北趨。勦辦愈難措手。會國藩現授爲欽差大臣。事權歸一。責無旁貸。大江南北。均應妥爲布置。着卽飛催左宗棠李元度鮑超張運蘭等到齊。由池州廣德分路進兵。規復蘇常。其江北一帶。尤爲緊要。應如何布置之處。並著先行籌畫。免至臨事周張。該大臣膺茲重任。務當統籌全局。迅掃逆氛。以副委任。欽此。初十日。置木匭於營門外。許軍民人等。投書言事。十二日。公拜發恭謝天恩一摺。奉硃批。卿數載軍營。歷練已深。惟不可師心自用。務期虛己用人。和衷共濟。但不可無定見耳。欽此。公又奏通籌全局一摺。奏稱。左宗棠李元度鮑超張運蘭均未到皖。頃聞竄杭之賊。回撲廣德州。城失守。寧國一城。羣賊環萃。勢孤援絕。目下皖南。危乎其危。臣軍調齊以後。須攻廣德。援寧國。不能繞越皖境。逕趨蘇常。上海嘉興相距愈遠。文報梗塞。實難兼顧。至江北軍務。迭奉諭旨。飭催都興阿馳赴揚州。迄今未能成行。以臣愚見。淮徐風氣剛勁。不患無可招之勇。但患無訓練之人。擬卽函商官文都興阿酌帶楚軍千人。先行馳往。到江北後。用楚軍之營制。練淮徐之勇丁。若得一二名將。出乎其閒。則兩淮之勁旅。不減三楚之聲威。臣力所能勉者。當勤懇以圖之。力所不逮。亦不敢欺飾。又奏保新授浙江溫處道李元度調補皖南道缺一摺。江浙賊氛大熾。紛紛請援於公。十四日。接奉派兵援勦寧國之旨。十五日。接奉由嚴州轉戰而東赴援浙江之旨。十七日。接奉統帥南下。規復蘇常郡縣之旨。二十一日。接奉派兵救援浙省之旨。二十二日。馳奏覆陳四次諭旨一摺。奏稱。臣由皖南進兵。以急援寧國。急攻廣德爲要。力不能兼顧。則以專救寧國爲要。徽寧等屬。一片賊氛。皖南不安。臣軍且有岌岌不保之勢。何能屏蔽浙江。更何能規復蘇常。目下兵力未齊。上不能分聖主宵旰之憂。下不能慰蘇人雲霓之望。寸心負疚。惶悚無地。附片奏團練一事。實爲地方大弊。皖南嶺隘紛歧。若築礮臺卡。尙可以資防守。在籍編修宋夢蘭衆論稱許。請賞加侍講銜。令其董勸紳民。興築礮臺。又片奏保安徽臬司

毛鵬賓堪勝江蘇藩司之任。又奏報江長貴收復廣德州城一摺。是日接奉上海危急設法救援之旨。二十四日。張公運蘭到祁門營。二十八日。拔營由徽州旌德進解寧國。是月。薛公煥擊賊卻之。上海解嚴。張良玉攻嘉興不克。全軍敗潰。杭州戒嚴。賊陷金壇縣。周威毅公天孚等死之。賊殺戮極慘。京口將軍巴棟阿守鎮江府。派提督馮子材攻丹陽。八月初一日。公出至漁亭。巡視營壘。奉到上諭。張芾著即來京。所有皖南軍務。統歸會國藩督辦。周天受著交會國藩差委。欽此。又奉上諭。薛煥片奏江南賊匪滋蔓難圖。惟以重兵直搗金陵。該逆必回顧根本等語。著會國藩體察情形。或即先搗金陵。亦可牽制賊勢等因。欽此。公調派副將宋國永代領鮑超所部霆字營一軍。進攻涇縣。以援寧國。李元度新募平江勇。行抵江西貴溪。公亟調來徽州會剿。初三日。馳奏張運蘭宋國永分路進兵日期一摺。附片奏上濟情形已鬆。臣軍未能即圍金陵。又片奏杭城危急。浙省賊勢浩大。非數千人所能救全。必須左宗棠新軍到後。配足萬人。乃可赴杭援剿。駱秉章奉命督辦四川軍務。奏請左宗棠入蜀。湖南本省空虛。人心驚恐。左宗棠未克成行。懇恩敕令駱秉章暫緩入蜀。俾左宗棠星夜兼程來皖。合兩湖江西之全力。以救浙而攻蘇。或有補於萬一。初七日。李元度領軍到祁門。賊再陷廣德州。攻撲寧國府。初九日。朱威肅公景山陣亡。十二日。寧國府城失守。周忠壯公天受死之。於是周氏兄弟殉難者三人。十四日。李元度赴徽州。接辦防務。廿二日。鮑超到祁門。公飭令迅赴營中。公移駐祁門城北。廿三日。馳摺奏報援軍甫進。寧國府城被陷。徽州戒嚴。自請交部議處。鮑超遷延不如期抵營。請革去勇號。仍責令督軍進剿。道員廖士彥委解浙餉。聞警折回。以致寧國軍因飢敗潰。請卽革職。周天受捐軀殉節。查明另摺請卹。附片奏。瀝陳身在皖南。心懸江浙。俟立腳稍穩。卽當分軍先趨蘇境。以符原議。又片奏。臣軍及皖南防軍。需餉甚鉅。所收江西牙釐。實多不敷。請旨飭江西每月撥解漕折銀五萬兩。以濟微寧之防。陝西每月協解銀二萬兩。專發安慶一軍。三月之後。卽行截止。又以前奏奉到批諭。啓牖愚蒙。指示親切。附片覆陳。懷遵感激之忱。李元度率軍至徽州。賊以大股由績溪撲犯徽州。平江勇敗潰。原防官軍亦潰。廿五日。賊陷徽州府城。勢趨祁門。公飛調鮑超回軍漁亭。張運蘭回軍黟縣。以遏其鋒。左宗棠軍行抵南昌。公飛咨調赴樂平婺源之間。以防賊竄江西之路。是月。僧王軍敗於天津都城戒嚴。勝保奏請飛召外援。鑾輿巡狩熱河。恭親王留守京師。九月初一日。公遣子紀澤赴安慶大營。由安慶回湘。爲書以訓之。初四日。李

公續宜率軍四營。至祁門。公聞都下之警。悲不自勝。初六日。馳摺奏稱。臣自恨軍威不振。甫接皖南防務。旬日之間。徽寧失陷。又聞夷氛內犯。憑陵郊甸。東望吳越。莫分聖主累歲之憂。北望灤陽。驚聞君父之變。且愧且憤。涕零如雨。應懇天恩。於臣與胡林翼二人中。飭派一人。帶兵北上。冀效尺寸之勞。稍雪敷天之憤。又奏報徽州失守一摺。自請交部議處。又咨呈恭親王文書一道。公與李公續宜籌商北援之舉。一切調度。李公留營旬日乃去。公又函致胡公林翼。作北援要議八條。尋以和議既成。奉上諭。皖南北均當吃緊之時。大臣等一經北上。難保逆匪不乘虛思竄。擾及完善之區。江西湖北均爲可慮。曾國藩與胡林翼均著毋庸來京。該大臣甫接皖南防務。連失兩郡。雖因餉絀兵單。究屬籌畫未密。著卽振作軍心。再接再厲。勿以一挫之後。卽損軍威。李元度謀勇兼優。此次失衄。殊屬可惜。人材難得。著卽迅速查明下落具奏。欽此。十六日。馳摺奏查明周天受殉節情形。請開復原官。從優賜卹。於寧國府建立專祠。周天受之胞弟周天培。周天孚。先後殉難。一門忠烈。請於四川本籍。建立三人祠宇。署皖南道福咸。寧國知府顏培文。宣城縣令王乃晉。副將朱景山。均請優卹。皖南道李元度。請革職拿問。徽州知府劉兆璜等。請革職。陣亡同知童梅華。守備張斐文。二員請卹。附片奏請旨飭廣西藩司蔣益澧。率所部三千人。迅由江西入皖。會合左宗棠一軍。併力東征。又奏皖南北近日軍情賊勢一片。左公宗棠軍抵樂平縣。賊由安徽分股竄浙江。陷嚴州府城。十八日。接奉撥兵援救上海之旨。廿八日。接奉撥兵援救鎮江之旨。是月賊攻撲鎮江府。巴棟阿馮子材拒卻之。都興阿公抵揚州。接辦江北軍務。十月初四日。馳奏統籌緩急機宜一摺。奏稱。臣處止左宗棠鮑超張運蘭三軍。尙爲得力。已有應接不暇之勢。皖南立腳未穩。於鎮江松江未能赴援也。附片奏報鮑超張運蘭會攻休寧縣勝仗。又片奏興辦淮揚水師。擬於上游先造戰船。請截留江西應解江北餉銀二萬兩。通融接濟。又摺奏查明江蘇金壇縣守城殉難官紳。總兵蕭知音。參將周天孚。知縣李准。紳董吳秉禮等七十三員名。開單請卹。於金壇縣建立總祠。彙祀各員。附片奏丹陽知縣方濬泰陣亡請卹。又片奏請展緩江西南江西各營將弁。舉劾年限。初九日。公出營至黟縣。查閱嶺路。十四日。祁門回營。十九日。賊由牟棧嶺竄入。黟縣失守。公飭祁門各營嚴守。二十日。鮑超張運蘭破賊於黟縣。賊退出嶺外。廣東韶州股匪竄入江西贛南。犯建昌。陷河口。連擾廣饒州各屬邑。左公宗棠軍至景德鎮。廿二日。分軍破賊於貴溪。克德興婺源二城。餘匪潰竄入浙境。廿六日。馳奏

休寧勝仗。黟縣克復一摺。隨摺奏保鮑超請加清字勇號。張運蘭請交部從優議敘。又保管官楊鎮魁。雲慶張玉田。余大勝。四員。附片奏鮑超營中副將宋國永。黃慶陳由立。請先拔補實缺。又奏已故統兵臬司蕭啓江功績最多。懇恩賜諡。於湖南江西建立專祠一摺。代奏新授淮揚鎮總兵黃翼升。謝恩一摺。附奏安徽學政邵亨豫患病。請開缺回籍一片。又奏參代理懷寧知縣莫祥芝一片。廿七日。左公宗棠到祁門營。與公商度軍事。留數日。回景德鎮。是月。張公玉良克復嚴州府。多隆阿公大破賊於桐城。十一月初四日。賊陷建德縣。普承堯一軍敗潰。又陷東流縣。時譏借洋兵助勦金陵之賊。委洋商採米運天津。以代南漕。奉旨令公酌量具奏。初八日。公具摺覆陳。并陳明大西洋各國夷情。且云。款議雖成。中國豈可忘備。河道既改。海運豈可不行。日前借其力以助勦濟運。得紓一時之憂。將來師其智以造礮製船。尤可期永遠之利。附片奏報建德失陷。及皖南北五日軍情。又片奏遵旨飭查安徽道員蕭盛遠。在和春軍營債事實蹟。請革職發往新疆。皖南鎮總兵陳大富駐軍南陵縣。督率軍民堅守數月。糧盡援絕。四面皆賊。楊公載福率水師礮船。駛入魯港。破平賊壘。拔出陳大富全軍。及土民男婦十餘萬人。安置東流縣城。歡聲騰於江介。建德既陷。普承堯退走九江。賊分股一擾彭澤湖口。都昌。一擾犯浮梁鄱陽景德鎮。彭公玉麟以水師赴湖口。收集陸路潰勇。協守湖口。城得以完。十四日。分軍收復都昌鄱陽。楊公載福以水師收復東流彭澤。左公宗棠分軍收復浮梁。十七日。公派唐義訓一軍。克建德縣。公之接統徽防也。調取原防兵勇。以副將楊名聲領一軍。駐上溪口。副將王夢麟程永年領一軍。駐江灣。扼守東路。公調鮑超一軍。回祁門。賊撲陷上溪口。江灣各壘。兵勇潰退。公乃委提督江長貴收集簡汰。以成一軍。十九日。北路之賊踰嶺而入。廿日。鮑超回軍黟縣。與張運蘭軍合擊賊於盧村。大破之。是時皖南賊黨分三大股。環繞祁門。欲以困公。一出祁門之西。至於景德鎮。一出祁門之東。陷婺源縣。復南竄玉山。一由祁門之北。越嶺南犯。直趨公營。盧村既捷。公乃調鮑超赴景德鎮。與左公宗棠合力堵剿。以保餉路。張公運蘭一軍。仍防黟縣。當其賊氛四逼。羽檄交馳。日不暇給。文報轉餉之路。幾於不通。旬有五日之間。危險萬狀。復值寒風陰雨。自治軍以來。以此時最爲棘迫之境矣。廿一日。兩營賊退出牟棧嶺外。軍心乃安。候選知府馮卓懷到營。公委令巡查皖南碉堡。廿八日。馳摺奏左宗棠一軍。在貴溪大捷。克德興婺源兩城。十日之內。轉戰三百餘里。實屬調度神速。將士用命。隨摺奏保王開化楊昌濬劉典等十

三員。又奏建德失守。旋經官軍克復。請將九江鎮總兵普承堯革職拿問。隨摺奏保唐義訓朱聲隆沈寶成黃惠清陳玉恆葉光岳六員。附片奏稱安慶合圍以來。江北則大戰於桐城。江南則鬪集於徽州。無非欲救援安慶。此次南岸之賊。分三大支。環繞祁門作大圍包抄之勢。欲斷臣之糧路。掣臣之軍勢。賊之狡謀。顯而易見。今西路大股未退。而各城均經收復。東路賊已南竄。北路之賊。曾受大挫。當不敢再來犯嶺。可望轉危爲安。此近日軍情之梗概。是月援賊至安慶。公弟國荃擊卻之。十二月十三日。具摺馳奏賊犯湖口。彭玉麟以水師保守。並派船克復都昌縣城。彭玉麟請旨交軍機處記名。遇有按察司缺出。請明簡放。隨摺奏保副將成發翔都司丁義方二員。陣亡勇弁李逢貴吳修霖請卹。又奏提臣楊載福水師。拔出南陵全軍。救全百姓十餘萬人。處之善地。楊載福出奇制勝。請賞賚荷包搬指等物。以示旌異。其出力將弁。由該提臣奏保。又奏官軍在黟縣盧村大捷。並迎勦小溪漁亭等處。接仗情形一摺。又奏上溪口江灣兩處營盤失陷一摺。副將王夢麟程永年請革職。楊名聲已經參革。不准留營。另繕清單。開報上溪口江灣兩營陣亡員弁徐祚明等二十名。休寧黟縣陣亡傷亡將弁陳青雲等二十一名。水陸各營。前後陣亡病故員弁張繼興等五十四名請卹。附奏陳明皖南江西全局一片。前此賊氛環逼之時。有勸公移營江干。以與水師相附。或退入江西境。公雅不欲輕退。以搖軍心。堅忍數十日。勢乃稍定。既而隆冬盛寒。各軍與賊相持。無大戰事。公自言精力漸衰。若不克自持者。然胸懷豁達。成敗生死。不復計較。故不生煩惱耳。浙江巡撫王公有齡奏調處州鎮總兵劉培元候選道金國琛赴浙。委公奉寄諭。二十八日具摺覆奏。劉培元現在湖南。能否赴浙。應由湖南撫臣酌核覆奏。金國琛現在安徽。李續宜營中。綜理營務。不能馳赴浙江。又奏湖南官紳。設立東征局。於本省釐捐之外。酌抽釐金。協濟皖南北兩軍之餉。凡鹽茶各商。抽收較多者。應仿照江西茶捐之例。給予獎敘。請飭部頒發執照。寄交湖南經收填用。附片奏湖南一省。向食淮鹽。自粵匪擾亂。運道梗塞。於是湖南盡食川私。本年川井被賊蹂躪。鹽價驟貴。臣在江西。曾奏借浙鹽抵餉。擬仿照成案。借運粵鹽。於湖南行銷。酌抽釐金。以抵淮課。猶不失爲兩江任內應籌之餉。請敕下戶部。查照辦理。又奏請簡放九江鎮總兵一缺。又奏報近日江皖軍情一片。又奏桐城縣知縣杜滋銅陵縣知縣柴時霖開缺。改選教職一片。又奏臣駐祁門。距京較遠。部文到營太遲。諸多不便。應請飭下軍機處。凡遇臣處奏事。批摺發下之日。即將本日諭旨。隨同抄發。

又具摺奏采訪忠義第二案。官紳士民歸女共二百五十九名。附片奏報常州武進縣舉人趙起闔家男婦共三十二人。在常州府城殉難。陽湖縣職員曹禾守城傷亡。均請撫卹。并請建立趙起專祠。是爲第三案。是歲東南寇亂方劇。惟秦晉差安。其餘各行省征戰之事。紛不可紀。公職任崇高。控馭廣遠。章奏較多於前。嗣是循例奏案。不能悉紀矣。

〔辛酉〕咸豐十一年公五十一歲。正月。公在祁門營。初六日。賊由石埭縣分二股。一由大洪嶺竄入。一由大赤嶺竄入。直趨祁門。公老營單薄。人心震恐。居民驚走。初七日。提督江長貴擊賊於大洪嶺卻之。初八。公派唐義訓朱品隆出隊。擊賊於歷口破之。追勦出嶺。外城之內犯者殲焉。初九日。左公宗棠鮑公超合擊賊於洋塘大破之。賊竄屯下隅坂。鮑超引軍擊之。賊之在祁門東路者。竄擾江西之玉山鉛山。攻撲贛信府。內犯撫建之境。公札飭劉于濤防守撫州。黃鳴珂守建昌。魏喻義防守南昌省城。左公宗棠一軍。仍駐景德鎮。防勦婺源之賊。二十四日。馳奏左宗棠鮑超兩軍。扼守景德鎮。迭獲勝仗。會勦洋塘大捷一摺。又奏逆匪分犯大赤大洪二嶺。進撲祁門老營。官軍迎勦獲勝。追賊出嶺一摺。附單彙奏陣亡員弁周芸亭等三十六人請卹。附片奏報皖南江西賊勢軍情。又片奏請敕頒欽差大臣關防。并令箭旗牌等件。由江西遞至行營交領。二十六日。鮑超攻賊於黃麥鋪。左公宗棠分軍助勦。大破之。賊瀕江下竄。總兵陳大富收復建德縣。江西北路饒州九江境內肅清。是月公作解散歌一首。流布陷賊之境。於難民之久困賊中者。曲達其苦衷。士民讀之。莫不感泣。因此而自拔來歸者頗多。二月初八日。馳摺奏官軍擊賊黃麥鋪大捷。奏稱鮑超勇冠三軍。每戰必克。請以提督記名簡放。陣亡守備曹有餘請卹。附片奏逆匪李秀成一股。由廣信內犯。圍攻建昌府城。意圖竄江西腹地。陳玉成大股在皖北。亦須勁旅援勦。擬移駐東流建德。防堵下游池州各股。而抽出鮑超一軍。爲游擊之師。視其尤急者而應援之。是日具摺恭謝年終恩賞。初九日。張運蘭唐義訓朱品隆等。擊上溪口賊壘破之。進攻休寧。十一日收復休寧縣城。胡公林翼移營太湖。合圍安慶。賊酋陳玉成糾皖北大股。犯霍山。總兵余際昌全軍敗績。賊遂陷英山縣。直趨湖北之蘄水。撲黃州府陷之。分陷德安隨州。武漢戒嚴。李公續宜奉旨授安徽巡撫。率軍回援鄂省。十七日。馳奏上溪口勝仗。克復休寧一摺。道員張運蘭請以按察使記名簡放。總兵朱品隆唐義訓請簡授實缺。并奏保葉光岳胡玉元朱聲隆李公選

禹志燁五員。附片奏報江楚軍情。江西撫州喫緊。省城震動。飛調鮑超一軍。由九江馳赴南昌。以固根本。臣因休寧新克。徽州可圖。暫緩移營。仍駐徽境。當力攻徽郡。以通江浙之氣。而開米糧之路。二十三日。賊由榨根嶺竄入箬坑。撲副將沈寶成之營於歷口。其北路一股。由禾戍嶺竄入。分擾各嶺路。二十四日。提督江長貴擊北路犯嶺之賊。卻之。二十五日。朱品隆援歷口。二十六日。會勦箬坑之賊。破之。左公宗棠由景德鎮移軍進勦婺源賊。分軍勦樂平竄賊。皆獲勝。賊大股繼至。左公駐軍樂平之境。三十日。賊竄陷景德鎮。總兵陳威肅公大富陣亡。全軍挫潰。公所設轉運糧臺。在鎮德者。水師救護以免。是月。公於祁門修築碉堡。設局督工。公每日親出巡視。數旬而工畢。二月初三日。公由祁門拔營。初三日。駐休寧。調張運蘭唐義訓等軍九千人。集於休寧。分兩路進攻徽州。初五日。唐義訓軍進攻失利而潰。維時景鎮既失。祁黠休寧三縣四面皆賊。米糧接濟已斷。公軍有坐困之勢。公商之各軍統領營官。擬再力攻徽州。以圖克復。函致左公宗棠。鮑公超。令其夾攻景鎮。十二日。公督各軍進攻徽州。不克。賊出迎戰。官軍敗退。夜還休寧。十三日。賊跟蹤來犯。公聞警憤甚。自書遺教二千餘言寄家。誓有進而無退。諸將力勸公回祁門。公乃飭張運蘭朱品隆兩軍。堅守休寧。十八日。公回駐祁門。左公宗棠大破賊於范家村。駐軍於樂平縣。賊由景鎮來犯。左公迭擊破之。乘勝進勦。前後六獲大捷。計殺賊逾萬人。賊乃潰走浮梁。樂平一帶肅清。轉運道通。皖南軍氣稍伸矣。賊攻建昌撫州兩郡。皆堅守得完。賊乃西竄。陷吉安府。旋經官軍收復。二十日。賊陷瑞州府城而踞之。賊酋陳玉成由鄂竄皖。連陷黃梅宿松。以爲安慶城賊之援。二十三日。公亟調鮑超一軍。渡江援勦。多隆阿公截勦援賊於桐城懷南之境。大破之。賊悉竄踞集賢關。二十四日。奏報上月箬坑禾戍嶺等處。擊賊勝仗一摺。又奏進攻徽州未能得手一摺。奏參營官總兵唐義訓副將沈寶成同知朱聲隆。其陣亡之副將葉光岳胡玉元千總梅魁員請卹。又奏報上月左宗棠一軍。分勦婺源樂平等處。先後接仗勝負情形一摺。陣亡游擊陳明南將弁陳石台趙玉蓮曾文清喻拔元陳正彪請卹。又奏報景德鎮失陷一摺。總兵陳大富力戰捐軀。請照總兵例。從優賜卹。并於南陵縣建立專祠。以表忠藎。而留遺愛。所部將弁田應科蕭傳科胡占鼇胡鳳雛熊定邦吳定魁羅廷材七員請卹。附片奏參婺源縣團紳余述祖黠縣知縣王峻婺源知縣申協煊均請革職。又片奏江皖軍情賊匪。約分四股。惟李秀成一股西竄。距祁門較遠。其三股環繞祁門。無日不戰。現已疊獲大勝。皖

南軍務日有起色。惟安慶官軍危急。已調派鮑超一軍馳援。臣亦即日拔營。移駐東流。就近調度。二十六日。公由祁門拔營。飭派張運蘭守休寧。朱品隆守祁門。江長貴沈寶成等分守嶺隘。暫輟進攻之謀。爲堅守之計。公自率親兵數百人以行。三十日。行抵建德縣。鮑超迎見。公。四月初一日。公行抵東流縣。按視鮑超霆字軍營。飭催渡江。會勘安慶援賊。初二日。馳奏左宗棠一軍。大破賊於樂平。景德浮梁鄱陽等處。一律肅清。一摺。陣亡副將羅近秋。游擊史聿舟及其將弁李啓昭聶棠本張致和聶福申孫紹凱請卹。傷亡將弁趙克振周崇高楊清和請卹。隨摺保道員王開化知縣劉典二員。三品京堂左宗棠疊破巨股。振江皖之全局。勛績甚偉。御賞珍物。以示旌異。又附奏請將左宗棠改爲幫辦軍務。俾事權漸屬。儲爲大用。又附片奏移駐東流。援助江北。臣所統全軍。皆留徽州境內。布置防守。左宗棠一軍伺賊所向。跟蹤追勦。是日。又具摺彙保左宗棠一軍出力員弁。開單請獎。又具摺彙保鮑超一軍出力員弁。開單請獎。初四日。接奉欽差大臣關防。初七日。拜印開用。初八日。諭文案委員書吏。凡軍務地方公私函牘。分條呈送核閱。賊撲安慶官軍營。楊公載福派水師助守。多隆阿公連戰破賊。賊酋陳玉成遁走。其集賢關內賊壘十三座。公弟國荃掘長壕以困之。公弟貞幹移營菱湖以扼之。鮑超率軍攻赤岡嶺賊壘。悍賊堅守不下。胡公林翼調副將成大吉一軍助勦。築礮台進逼賊營。日夜攻之。左公宗棠追擊賊於廣信府境。賊竄入浙江。陷金華府及所屬數城。瑞州踞賊分擾武寧義寧奉新靖安等縣。竄入湖北之境。五月初一日。鮑超成大吉合攻赤岡嶺賊壘。破之。擒斬數千人。賊之由瑞州竄湖北者。分擾興國大冶通山崇陽等屬。初二日。胡公林翼調成大吉一軍。渡江勦之。鮑超盡平赤岡嶺賊壘。擒斬賊目劉增琳。初三日。訊失律營官李金賜張光照於軍前斬之。徽州之賊犯羊棧嶺。竄陷黟縣。初五日。朱品隆江長貴等攻黟縣賊壘。破之。收復縣城。初六日。張運蘭唐義訓等擊犯嶺之賊。破之。初九日。諸軍進勦廬村賊壘。破之。十三日。徽州之賊棄城遁去。十四日。張公運蘭率軍收復徽州府城。左公宗棠派軍擊敗竄賊於鄱陽縣。賊竄入浙境。胡公林翼自太湖拔營回鄂省。揆勦。與公期相見於華陽鎮。公棹舟至香口候之。十五日。胡公來見。會議軍政。通籌大局。留三日。時胡公已病咯血。公則癰疾大作。如官京師時。十八日。馳奏鮑超成大吉圍攻赤岡嶺賊壘。悍賊悉數殲除。一摺。又隨摺奏保吳亮才周開錫。余大勝顏紹榮王衍慶李文益明吳伍華瀚曾昭仕蕭玉元十員。陣亡副將蘇文彪等三十二員弁。開單請卹。又

奏江南鄉試。未能舉行一摺。附奏李金場張光照正法一片。又奏代遞前太常卿唐鑑遺摺。奏請特旨賜諡。奉旨予諡確慎。十九日。公還東流營。左公宗棠由廣信回軍景德鎮。值池州之賊。竄陷建德縣。二十二日。左公分軍擊賊敗之。收復建德縣城。二十四日。札飭鮑超引軍擊勦宿松黃梅之賊。二十八日。馳奏逆匪犯嶺。襲陷黟縣。旋經官軍克復。并乘勝仗復徽州一摺。隨摺奏保臬司張運蘭總兵唐義訓副將婁雲慶知縣朱聲隆。奏參將袁國祥黃朝陞均革職。不准留營。又奏遵旨酌保唐義訓升署皖南鎮總兵。江西知府姚體備以道員歸於安徽補用。卽令署理皖南道缺。又奏提督楊載福請假四月。回籍省親一摺。附片奏參霆營將弁鄭陽和等。分別降革。又片奏飭水師營官陳金鼇赴南贛鎮總兵任。又片奏陳江楚皖三省賊勢軍情。安慶賊糧垂盡。必須力爭此城。而後大局有挽回之望。金陵有恢復之期矣。六月初一日。公弟國荃攻菱湖兩岸賊壘。悉破平之。安慶城外賊營俱盡。福建汀州股匪竄江西境。又將竄徽州。左公宗棠由景德鎮拔營赴婺源扼勦。賊犯祁門嶺路。朱品隆擊卻之。胡公林翼回駐武昌。派成大吉等擊賊破之。收復武昌所屬各城邑。初八日。奏水陸各軍陣亡病故員弁。彙案請卹一摺。單開一百二十一員名。又奏皖南江西官軍克復黟縣建德等城。前後七案。出力員弁。開單彙保一摺。又具摺覆奏諭旨。飭令左宗棠一軍。應援浙江。臣查徽州一郡。羣賊環伺。防守爲難。景德鎮婺源縣皆皖浙扼要。戰守事宜。均賴左宗棠就近維持。該軍縱橫策應。七百餘里。以目下形勢而論。實不能分身赴浙。附片奏新授廣東按察使彭玉麟統帶水師。扼要駐守。暫難赴任。又片奏遵旨查參江西藩司張集馨革職。十三日。緝獲徽防將弁黃勝林於軍前斬之。賊酋李秀成一股。擾逼南昌省城。公調鮑超一軍。渡江由九江進勦。十八日。馳奏欽奉諭旨。覆陳江西各路賊情。奏稱。江西之賊。凡五大股。其由皖境竄入者三股。惟李秀成一股。深入江西腹地。占踞瑞州。旁擾各屬。其由兩廣竄入者二股。五股之中。或分或合。頭緒迷離。并陳明斟酌緩急。調派援勦先後節次。以及飭調官軍籌防江西南路大略情形。附奏江楚皖三省戰守情形一片。又奏黃勝林正法一片。二十六日。左公宗棠分軍迎勦竄賊於德興縣境。破之。賊敗竄入浙境。七月初四日。江蘇巡撫薛煥委員賈送兩江總督關防。兩淮鹽政印信到營。初六日。行禮拜印。公聞胡公林翼病甚劇。委弁至武昌饋藥。且問之。十一日。湖北官軍克復德安府城。賊酋陳玉成糾大股圍撲太湖縣。攻犯桐城圍師。多隆阿公擊卻之。十八日。馳奏彙報左宗棠一軍。五六兩月戰守

情形一摺。又奏覆陳恭親王奕訢等。奏請購買外洋船殼。實爲今日救時之急務。附奏請調現泊上海之輪船。由長江駛赴安慶。就近察看試用。令楚軍水師將弁。預爲練習。俟明年購到洋船。庶收駕輕就熟之功。卽與撫臣文報往來。數日可達。不致淹滯。請飭下江蘇撫臣薛煥。迅派幹員。押令上駛。以資演習。附片奏派委員弁。驛買口外戰馬八百匹。請飭部查驗。免稅放行。又片奏五月由驛拜發摺片。踰期已久。未奉批諭。請查驛遞在何處沈失。照例辦理。又奏報江楚皖軍情一片。公弟國荃攻安慶城外石壘。盡拔之。賊以大股來撲營。公弟國荃堅守卻之。鮑公超軍渡九江進剿。賊退出瑞州。竄豐城。二十四日。鮑超引軍追擊於豐城西北岸。大破之。擒賊逾萬人。賊由撫州東竄。二十七日。公弟國荃擊援賊於城外。破走之。二十八日。專差奏報接印日期一摺。八月初一日。公弟國荃克安慶省城。賊黨殲焉。初二日。馳奏鮑超一軍。進援江西在豐城大獲勝仗一摺。奏稱。鮑超盛暑鏖兵。所向克捷。立功最偉。請賞賚珍物。以示旌異。隨摺保朱國永。陳由立。黃慶等十七員。陣亡知州袁觀豐。都司殷雄亮。請卹。附片奏報克復安慶省城大概情形。稱楚軍圍攻安慶。已逾兩年。畫謀決策。皆胡林翼一人所定。卒得克此堅城。殲除悍賊。臣卽日前往部署。其詳細情形。另由官文。胡林翼。李續宜。會銜具奏。初三日。多隆阿。公克復桐城縣。初五日。楊公載。福派水師克復池州府城。楊公謁辭回籍。初七日。公舟抵安慶。初八日。公與公弟國荃。貞幹。入安慶省城。巡視城垣。安撫士民。治行館廡。搜擒降賊。之知縣孫潤。於軍前斬之。多隆阿。公分軍克舒城。宿松。黃梅等縣。初十日。馳報水師克復池州。進攻銅陵一摺。附片奏各營欠餉過多。請旨飭江西每月撥解漕折銀五萬兩。籌清欠餉。并請江西停解各省協餉。所有地丁入款。漕折釐稅。先清本省守兵。及臣處征兵欠餉。以免決裂之患。是日接奉批摺。及贊襄政務王大臣咨文。驚聞七月十六日文宗顯皇帝龍馭上賓。公慟哭失聲。自以十餘年來。受上知遇。值四方多難。聖心無日不在憂勤。惕厲之中。現值安慶克復。軍務方有轉機。不及以捷報博玉几末命之懽。尤爲感慟無已。十一日。湖北官軍克廣濟縣。旋收復蘄州。蘄水等城。十二日。水師進克銅陵縣。十七日。賊撲浙江嚴州。府城失守。十八日。接奉哀詔。乃設次於安慶城中。率文武員弁。成服哭臨三日。日三哭。鮑公超追賊至撫州。賊竄貴溪。雙港。湖坊。河口一帶。與閩廣股匪合併。其數猶衆。鮑公追剿。連戰破之。十三日。大破賊於雙港。平賊壘八十餘座。擒斬萬餘人。二十三日。克鉛山縣。追剿河口賊。悉潰竄浙境。江西全省肅清。二十四日。湖北官軍克復

黃州府城二十六日。胡文忠公林翼卒於武昌。公聞胡公之卒也。悲悼不已。謂胡公赤心以憂國家。小心以事友生。苦心以護諸將。天下寧復有似斯人者哉。二十七日。專弁賈奏恭慰大孝一摺。官文公奏請以李續宜署湖北巡撫。奉旨調授湖北巡撫彭公玉麟補授安徽巡撫。毛公鴻賓補授湖南巡撫。九月初二日。公弟國荃督軍循江北岸而下。派道員劉連捷等進軍廬江縣。總兵黃翼升以淮揚水師順流下駛。初九日。公馳摺奏鮑超一軍追剿江西股匪於湖坊河口等處。大獲勝仗。克復鉛山縣城。江西全省一律肅清。陣亡將弁王友得王友勝等十一名。請卹。隨摺保譚勝達明興李文益劉玉堂等十一員。附奏稱提督鮑超轉戰三省。風馳電掣。驍勇罕匹。請旨授提督實缺。其部將宋國永陳由立黃慶雲婁慶張玉田等。請授總兵實缺。以示獎勵。又奏臣移駐安慶省城。酌派司道大員。分任責成一摺。附片奏張運蘭奉旨補授福建按察使。例應赴任。該司帶勇徽州。防勦喫緊。無人可以接辦。請俟軍務稍平。再請陛見。又奏報孫潤正法一片。十六日。公弟國荃克泥汊口賊壘。十九日克神塘河賊壘。官文公會奏安慶克復情形。奉上諭。會國藩調度有方。著加恩賞加太子少保銜。欽此。又奉上諭。官文等另片奏會國荃等。於圍攻安慶時。智勇兼施。道員會國荃著賞加布政使銜。以按察使記名。遇缺題奏。並加恩賞穿黃馬褂。以示優獎。候選訓導曾貞幹著免選本班。以同知直隸州知州儘先選用。並賞戴花翎。等因。欽此。又奉上諭。官文等奏請將殉難道員予諡等語。候選同知會國華前在三河殉難。今其兄會國藩其弟會國荃曾貞幹率師勦賊。克復安慶。一門忠義。深堪嘉尚。會國華著加恩予諡。以彰忠烈。欽此。二十日。公弟國荃克復無爲州城。二十一日。公作勸誠淺語十六條。營官僚屬委員紳士各四條。二十二日。查閱城上防守兵勇。巡視城堞及城外營壘。二十三日。公弟國荃克運漕鎮時外洋輪船。由上海駛至漢口者漸多。上下往來。一日千里。奸商往往僱民船載貨。繫於其後。拖帶以行。藉免課稅釐金。亦或藉以資賊。公咨行通商衙門。稱鹽茶爲貨稅大宗。餉源所賴。請照會上海洋商。毋得攬帶民船貨物。壽州練總苗沛霖亦捻匪之黨。前歲與李世忠先後受撫。督師勝保公疊次奏保。補授四川北道。加布政使銜。李世忠升任江南提督。幫辦軍務。苗沛霖與在籍辦團之員外郎孫家泰等爲仇。率其黨圍攻壽州。巡撫翁同書屢出諭之。苗沛霖不退。孫家泰自殺。苗沛霖攻陷壽州。袁公甲三派李世忠以兵擊之。詔命公移得勝之師。分討苗逆。二十九日。公弟國荃克東關賊壘。前後所克城鎮。派軍扼守。乃還安慶。是月浙江

之賊。陷紹興處州二府城。其餘州縣屬邑。蹂躪殆遍。十月初一日。公弟國荃還至安慶。商定增募湘勇。直搗金陵之計。湖北官軍克隨州城。初三日。頒發捐輸章程。札派委員。按費填給。札飭水師營官嚴拿游勇。出示撫卹殉難員紳家屬。被難流亡之士民。招集復業。清釐房屋爭訟。左公宗棠軍至廣信。公調鮑超一軍。回皖進軍青陽。調朱品隆唐義訓等軍。進勦石埭。規復寧國。初六日。接奉遺詔。設次大行禮。公弟國荃回湘增募湘勇六千人。初十日。彭公玉麟至安慶見公。彭公時奉安徽巡撫之命。具疏力辭。十四日。公具摺奏陳湖北撫臣胡林翼忠勤盡瘁。勦績最多。乞飭付國史館。查照施行。又馳摺奏陳水陸各軍。克復銅陵縣無爲州運漕鎮。并沿江要隘三處。隨摺奏保王明山黃翼升李朝斌等二十員。附片奏官軍攻克運漕以後。本可直搗金陵。惟深入腹地。人數單薄。應令會國荃添募湘勇六千。替出各城防守之師。進勦巢和。與下游都興阿一軍聯絡勦辦。易於得勢。又奏保知府陳濬補安慶知府一摺。附片奏前辦皖南軍務張芾所有文卷簿領。均因徽郡失陷。燬焚無存。請免造報。又片奏稱軍與十載。凡地方查辦餽賊資糧。受僞官職之案。徒爲奸吏訟棍訛索之柄。江西新建縣候選通判程迪昌疊次以餽賊重罰。誣告箝良。請將程迪昌革職嚴辦。以儆刁風。又片奏皖南督辦團練在籍編修宋夢蘭知府張韶南與其子張同生均以積勞病故。請卹。浙江杭州兩郡。久被賊撲。岌岌不保。公咨商左公宗棠由廣信進軍衢州。以援浙江。調派張運蘭防徽之軍。及江西東境防守之師。均歸左公調遣。江蘇官紳棲葆上海縣。十六日。錢公鼎銘由輪船赴安慶見公。痛哭以請援師。且呈遞官紳公函。謂吳中有可乘之機。而不能持久者三端。曰鄉團。曰槍船。曰內應。是也。有僅完之士而不能持久者三城。曰鎮江。曰湖州。曰上海。是也。公見而悲之。時餉乏兵單。楚軍無可分撥。與李公鴻章籌議。期以來年二月濟師。十八日。奉上諭。欽差大臣兩江總督曾國藩著統轄江蘇安徽江西三省。並浙江全省軍務。所有四省巡撫提鎮以下各官。悉歸節制。浙江軍務。著杭州將軍瑞昌幫辦。並著曾國藩速飭太常寺卿左宗棠馳赴浙江。勦辦賊匪。浙省提鎮以下各官。均歸左宗棠調遣。欽此。廿六日。專摺奏謝天恩。加宮保銜。又代奏弟國荃貞幹謝恩晉秩一摺。又奏謝弟國華奉旨予諡恩一摺。是月湖北全境肅清。官文調派成大吉等軍。進駐霍山。以規壽州。劉公蓉奉旨署四川布政使。十一月初二日。公巡視安慶城垣。度地擬建試院一區。令上下江分闈鄉試。既而不果。多隆阿公收復三河鎮。十四日。奉到節制四省之旨。旋又奉酌保封疆將帥人

才之旨。又奉察看江蘇巡撫薛煥浙江巡撫王有齡。能否勝任。據實具奏之旨。公自以任大責重。值時事之艱難。彌覺惕然。不敢自安。十六日。馳摺奏左宗棠一軍。定議援浙。請將廣信徽饒諸軍。統歸節制。以一事權。該處一切軍情。即由左宗棠自行奏報。以昭迅速。信郡錢糧。河口景德鎮釐金。撥歸左宗棠經收。其防勦進止。均由左宗棠相機辦理。又具摺奏保江西署藩司李桓留辦糧臺。并請敕交軍機處記名。以藩臬兩司。遇缺題奏。又具摺奏保道員萬啓琛署理安徽按察使。李榕署理江寧鹽巡道。均隨同駐安慶。籌辦善後事宜。附片奏新授衢州鎮總兵朱品隆現調令會合鮑超一軍。進攻寧國。暫難赴任。又片奏兩江政務殷繁。現在行營。一無成案可查。所有刑名錢穀。及鹽員武職補缺。與夫地方尋常事件。應由臣衙門循例具題者。請暫行展緩。抑或改題爲奏。以歸簡易。是日又奏水陸各軍。攻克赤岡嶺菱湖賊壘。克復安慶省城三案出力員弁。開單請獎一摺。又奏克復休寧黟縣及徽州府城迭次攻勦各嶺隘出力員弁。開單請獎一摺。又奏行營探訪忠義第四案。附片奏刑部主事柯鉞之母柯王氏罵賊殉難。請建專坊。又查明柯氏一門殉節者五名。列爲第五案。廿五日。奏辭節制浙省一摺。奏稱。臣自受任兩江以來。祁門被困。僅得自全。至於安慶之克。悉賴鄂軍之功。胡林翼籌畫於前。多隆阿苦戰於後。非臣所能爲力。江蘇乃職分應辦之事。尙無一兵一卒。達於蘇境。乃蒙寵遇非常。節制四省。自顧菲材。實難勝任。左宗棠之才。實可獨當一面。即無庸臣兼統浙省。苟思慮所能到。才力所能及。必與左宗棠合謀。不分畛域。不必有節制之名。而後盡心於浙事也。又具摺覆奏查明蘇浙兩省撫臣優劣情形。奏參候補鹽運使金安清請卽革職。附片奏保道員李鴻章可膺封疆重寄。現在臣處統帶水軍。請酌撥陸軍數千人。駛赴下游。以資援勦。又奏保提督鮑超功績甚偉。請賞穿黃馬褂。以示旌異。又片奏常州一郡。士尙節義。多可用之材。就所知者。奏保周騰虎劉翰清趙烈文方駿謨華衡芳徐壽六員名。請量材錄用。二十六日。奉到大行頒賞遺念衣物一箱。公拜領行禮謝恩。浙江賊攻撲徽州。左公宗棠派軍援勦。公調朱品隆回軍援徽。是月賊攻杭州。張忠壯公玉良陣亡。賊分陷寧波台州府城。二十八日。杭州省城失守。將軍忠壯公瑞昌巡撫王壯愨公有齡總兵饒莊勇公廷選等皆死之。十二月。鮑公超擊賊於青陽。屢破之。進攻縣城未克。張公運蘭病甚回籍。其弟運桂代領其軍守徽州。朱品隆軍至。擊賊破之。十七日。奏遵旨籌商苗苗沛霖勦撫情形。該練逆跡昭彰。斷無再撫之理。現在楚軍勦辦粵逆。難以同時并舉。

須俟廬州克後。與袁甲三臨淮之師聯絡。乃可併力勦苗。彭玉麟素統水師。舍舟登陸。用違其長。且江面太長。照料非易。該撫兩次奏請開缺。應請旨另簡大員接任皖撫。俾得仍領水師。於南北大局。兩有裨益。又奉遵旨派員赴上海押解革員何桂清來京候訊一片。又奏保鮑超一軍。攻克安慶賊壘。肅清江西全省。兩案出力員弁。開單請獎一摺。十八日恭接登極詔書。是日馳奏浙江省城失守。徽郡被圍。臣奉援浙之命。赴救莫及。請交部嚴加議處。謹通籌全局。力圖補救之策。分條陳奏。其一浙江全省惟衢州一府。可以圖存。左宗棠一軍。先固江皖邊防。再籌進剿。其一請敕下閩浙督臣慶端速派勁旅。嚴守浦城。俾賊不得由閩境而竄江西。其一請調廣西臬司蔣益澧帶領所部五六千人。迅赴浙江。隨同左宗棠籌辦防剿。道員陳士杰帶勇馳赴安慶。聽候調遣。並請將該二員補授蘇浙兩省實缺。其一請飭下閩廣督撫粵海關閩海關。按月籌撥銀十三萬兩。解交左宗棠軍營。附片奏團練一法。不能勦大股悍賊。請將江南團練大臣裁撤。又奏左宗棠一軍。樂平建德德興等處大捷。出力員弁。彙案請獎。附片奏布政使銜道員王開化積勞病故。請照布政使例。從優賜卹予諡。奉旨予諡貞介。廿六日。朱品隆等大破賊於徽州。左宗棠分軍破賊於大鱗嶺。徽境肅清。廿七日。奉到上諭。會國藩奏奉節制江浙等四省軍務。瀝陳懇辭一摺。謙卑遜順。具見悃忱真摯。有古大臣之風。深堪嘉尚。江浙軍情。本屬相關一氣。凡該大臣思慮所到。諒無不協力同心。相資爲理。節制一事。該大臣其毋再固辭。欽此。侍郎宋公晉奏請飭川楚江皖五省。會勦粵逆。詔公與官文李續宜等詳議。公會奏稱。增兵必先增餉。非一省所能爲力。必須二省合力籌畫。衆志一心。方於事有實濟。現擬咨商各省。詳議餉數。是月公弟國荃奉旨賞加頭品頂戴。左公宗棠授浙江巡撫。沈公葆楨授江西巡撫。李公桓授江西藩司。暫署巡撫。彭公玉麟以兵部侍郎候補。詔公酌保皖撫。安慶復後。公至省城。招徠士人。修葺敬敷書院。每月按期課試。校閱文藝。其優等者捐廉以獎之。於嘉惠寒士之中。寓識拔才俊之意。皖中人士。莫不感奮。公札司道設立善後局。安撫遺黎。清查保甲。刊發勸誠淺語十六條。分設穀米局。及製造火藥子彈各局。委員司之。又設內軍械所。製造洋槍洋礮。廣儲軍實。委員查核民田。分別荒熟。其已墾者。暫令按畝出錢四百文。以助軍餉。謂之抵徵。除日派忠義局委員協同街團紳士施放錢米。以賑飢民。是歲親王僧格林沁與兵部侍郎勝保。皆奉旨授欽差大臣督師勦辦捻匪。內閣學士毛昶熙。奉旨督辦河南團練。提督馮子材辦鎮江軍務。

以副都統魁玉爲幫辦。

〔壬戌〕同治元年公五十二歲。正月。公在安慶。初一日。內閣奉上諭。曾國藩著以兩江總督協辦大學士。欽此。又奉上諭。曾國藩節制四省。昨又簡授協辦大學士。其敷乃腹心。弼予郅治。朕實有厚望焉。欽此。初十日。奏遵旨保皖撫大員一摺。又奏再陳下情。力辭節制浙江軍務一摺。奏稱。圖浙之道。必以廣信爲運糧之路。以嚴州爲進兵之路。現在惟左宗棠一軍。不能遽達於嚴州。必俟蔣益澧之軍到衢州後。兩路并進。取勢漸緊。所以規復浙江者在此。所以保全江西皖南者亦在此。至臣所以再三瀆陳。不願節制四省者。非因浙事既已決裂。有諉過之意。實因權位太重。恐開斯世爭權競勢之風。兼防他日外重內輕之漸。機括甚微。關係甚大。又奏遵旨保舉李朝斌喻俊明任星元丁泗濱四員。堪勝水師總兵之任。附片奏前浙江巡撫羅遵殿殉難杭州。已奉旨賜卹。旋經御史高延祐奏請撤銷卹典。苛刻之論。殊欠公允。仍請從優賜卹。並將隨同殉難之家屬等。一併旌卹。以彰忠節。王有齡以糧盡援絕。見危授命。其在任時。疊被參劾。難保無身後之訾議。請併從優議卹。以爲死勤事者勸。又片奏參安徽巡撫翁同書釀成苗逆之禍。兩次失守。不能殉節。請旨革職議罪。不敢因其門第鼎盛。稍爲遷就。又片奏報徽郡解圍。及各路軍情大概。是日奉到諭旨。李續宜調安徽巡撫。嚴樹森調湖北巡撫。欽頒令箭。令旗王命旗牌到營。十一日。批飭江西藩司停止州縣官吏攤捐之案。公謂地方親民之官。必須令其曠然無累。然後可責之以民事。不至苛取民財也。十七日。公奉到協辦大學士之旨。公弟國荃授浙江臬司。蔣益澧授浙江藩司。陳士杰授江蘇臬司。鮑超補浙江提督。并賞穿黃馬褂。從公奏也。二十日。左公宗棠擊賊於開化縣破之。廿一日。新購外洋火輪船一號。到安慶。公出閱視。派委員弁管帶。配以兵勇。於江面試行之。二十二日。拜摺恭謝天恩。附片奏稱。自去秋以來。臣一門之內。疊荷殊恩。感激之餘。繼以悚懼。懇求於金陵未克以前。不再加恩於臣家。庶可以全保功名。永承聖眷。前此疊奉保薦督撫大員之旨。封疆將帥。乃朝廷舉措之大權。豈敢干預。疆臣既有征伐之權。不當分黜陟之柄。不特臣一人爲然。凡爲督撫者。辦之不可不早。所以預防朝廷外重內輕之漸。杜植私樹黨之端。庶幾紀綱彌肅。朝廷愈尊矣。賊竄吳淞口。上海告急。鎮江府城屢被賊攻撲。又分股渡江。撲江浦浦口官軍營盤。趙公景賢堅守湖州府城。一年有餘。糧援俱斷。文報亦梗阻不得達。大學士翁心存奏蘇中士民結團抗賊。望曾國藩

如慈父母。請飭該大臣派一素能辦賊之員。馳往援勦。侍郎宋公晉條陳恢復江南大略。是時公屢奉籌畫全局。派援江浙之旨。於是日具奏。浙江之事。必俟左宗棠進攻嚴州。蔣益澧進駐衢州。鮑超進抵寧國。乃有下手之處。江蘇之事。必先清江北。次及江南。現催李鴻章募練淮勇。酌撥湘軍數營。駛赴下游。察看情形。再行馳奏。江浙賊勢浩大。盡占富庶之區。財力與人數。皆數倍於官軍。不敢過求速效。以至債事。又奏徽州官軍勝仗。郡城解圍。一摺。隨摺保奏張運桂。朱品隆。唐義訓。劉松山等十三員。陣亡參將黃和鳴等四十六員名。開單請卹。附片奏鮑超一軍。在青陽大獲勝仗。陣亡弁勇唐泗和等十一名。請卹。又片奏江蘇紳士譏借洋兵勦賊之事。上海本通商之地。借洋兵以保守人財則可。若令勦蘇州金陵以代復中國之疆土則不可。蓋以現在攻城。我無助勦之師。將來克城。又無防守之師。專恃洋兵。洋人或見德而生怨望。不可不慮。維時上海已設立公局。會同洋人防守。公咨商巡撫薛煥言。蘇州金陵非可以倖襲而得。目前權宜之計。祇可借兵防守。滬城尤當坦然。以至誠相與。不可稍涉猜疑。致礙大局。其函致蘇州紳士。言之尤詳。二十四日。奉到上諭。賊氛日熾。而該大臣等章奏寥寥。南服惓懷。殊深廬念。其如何通籌全局。緩急兼權。著將一切機宜。隨時馳奏。以紓懸系。欽此。李公鴻章募淮勇到安慶。公爲定營伍之法。器械之用。薪糧之數。悉仿湘勇章程。亦用楚軍營規以訓練之。撥湘勇數營以助之。兩省將卒。若出於一家然。公所教也。二十六日。咨瀕江各省督撫。商定長江通商章程。飭善後局查辦保甲。公自核定門牌團冊之式。是月。李世忠收復江浦浦口二城。賊糾捻匪圍攻潁州府。勝保公督師援之。彭公玉麟補授兵部右侍郎。二月初二日。公拜摺奏稱。忝列戎行。奏報甚少。其所以輕輕自守者。蓋亦有故。一則不輕奏謠傳之言。一則不輕奏未定之事。一則不輕奏預計之說。因此三者。遂蹈遲延之咎。臣忝非常之遇。倚任彌重。延訪更殷。嗣後擬十日奏事一次。有急則加班具奏。所有諭旨垂詢之件。謹分條詳覆。其一計會國荃楊載福張運蘭回營之期。其一李鴻章募練淮勇。二月可以成軍。擬由陸路馳至鎮江。其一攻搗金陵。必先清後路。腳跟已穩。而後可進。其一李續宜籌派兵勇。援潁州之路。其一左宗棠援勦浙江。必從衢嚴之間下手。其一上海籌借洋兵。以助防守之法。凡六條。飭安慶藩司核定釐金卡局支發軍餉。坐支章程。初四日。閱視李公鴻章營勇及所部程學啟滕嗣林等營。多隆阿公大破賊於廬州城外。盡平賊壘。初五日。奉到上諭。會國藩奏瀝陳下情。遵保皖撫名摺片。具見該大臣慮遠思

深。實深嘉悅。已明白宣示。仍令該大臣節制四省矣。朝廷黜陟之權。原非封疆大吏所能侵越。第該大臣簡任綸扉。督師江皖。膺股肱心膂之寄。朕疇咨岳牧。延訪甚殷。該大臣圖濟時艱。不當稍有避嫌之見。方合古大臣知無不言之義。嗣後如有所知。不妨密封呈進。以備採擇。欽此。同日奉上諭。會國藩馳賜戎機。公忠體國。中外咸知。當此江浙軍務吃緊。生民塗炭。若非會國藩之惻忱真摯。豈能輕假事權。所有江南安徽江西浙江四省巡撫提鎮以下。仍歸會國藩節制。該大臣務當以軍務爲重。力圖攻勦。以拯生民於水火之中。毋許再行固辭。欽此。時又因三載考績之典。奉上諭。大學士湖廣總督官文久任封圻。虛懷延攬。於吏治戎行。均能整飭。著交部從優議敘。協辦大學士兩江總督會國藩督軍辦賊。勤勞罔懈。於江皖地方。疊復名城。戰功卓著。甄拔所部將士。賢能稱職。前經簡授協辦大學士。仍著交部從優議敘。四川總督駱秉章前在湖南巡撫任內。勤辦賊匪。不分畛域。其所薦舉人才。尤爲有裨實用。自升任川督。辦理丹稜股匪。及整頓地方。均能妥速。著加太子少保銜。用示嘉獎。欽此。初六日。專弁入都。賈奏登極賀表。初八日。張公運蘭假滿還皖。初九日。李公績宜抵任來見。公派提督成大吉等進軍固始。以援潁州。左公棠擊賊於遂安縣。大破之。克復縣城。初十日。拜發萬壽賀摺。專弁入都。又代弟國荃奏謝天恩一摺。十二日。馳摺奏安徽省城。仍宜設於安慶。前此改建廬州。係一時權宜之計。安慶處濱江適中之地。足資控制。至大江水師戰船千餘號。礮位三千餘尊。逐年積累。成此巨觀。事定之後。江防仍不宜撤。請專設長江水師提督一員。添設將弁額缺若干。均候吏兵二部詳覈議奏。附片奏江海雖同一水面。而風濤氣候各殊。楚軍水勇戰船。但可用之江面。未可以出重洋。臣料粵匪所掠江楚之民。必無遽能縱橫海上之事。又附片奏浙江衢河淺窄。不宜水軍。江西劉于濬水師專防本省汛地。不能赴浙援勦。又奏采訪忠義第六案。附片奏委員王敬恩請卹。十五日。公弟國荃至安慶。所募湘勇以次集於皖境。是日奉到上諭。江蘇布政使。著會國荃補授。卽赴新任。毋庸來京請訓。該員係兩江總督會國藩之弟。例應迴避。惟該省軍務緊要。需員辦理。著毋庸迴避。以資得力。欽此。又以李元度補授浙江臬司。二十二日。拜摺代弟國荃奏謝天恩。附片奏參新授臬司李元度請革職。交左宗棠差遣。又具摺分條奏報軍情。其一會國荃募勇。已經抵皖。飭令進勦巢縣含山一帶。其一李鴻章帶勇擬會同會國荃。攻勦江邊一路。衝過賊中。以期速達鎮江。其一多隆阿進攻廬郡大捷。傷亡亦多。需稍事休息。再圖進取。其

一李續宜派兵援潁情形。由李續宜具奏。其一左宗棠勦賊大捷。克遂安城。由左宗棠詳報。其一援浙之軍。必須蔣益澧到後。乃能合力兜勦。其一湖州孤懸賊中。無路赴援。惟聞城中糧米。足支數月。或可保全。其一徽州解圍後。改令朱品隆接防郡城。派張運蘭老湘營爲游擊之師。其一上海有高橋蕭塘之捷。當可保全。馮子材仍守鎮江。凡九條。公出城巡閱新到之湘勇七營。二十四日。公弟國荃啓行。督軍沿江岸進勦。李公鴻章成軍八千人。擬潁江而下。傍賊壘衝過。以援鎮江。計未決。二十八日。上海官紳錢公鼎銘等籌銀十八萬兩。僱洋人輪船七號。駛赴安慶。以迎李公鴻章之師。定以三次載赴上海。是月。上海官紳借洋兵。連破賊於浦東。賊少卻。勝保公督兵援潁州解圍。三月初一日。札調張運蘭扼婺源白沙關。以防賊竄江西之路。初七日。鮑公超援賊於青陽城外。破之。初八日。李公鴻章領所部勇第一起三千人。由安慶附輪舟啓行赴滬。公拜摺奏謝京察從優議敘。又馳報李鴻章一軍改由輪船赴滬。啓程日期一摺。又馳摺奏稱東南寇氛。蔓延日久。生靈之塗炭深矣。臣受命兩年。無一兵達於蘇境。無一旅進攻寧國。左宗棠苦戰衢嚴。獨任其難。不克分兵往助。趙景賢困守湖州。堅貞蓋世。不克設法往援。徒有兼轄之名。並無統籌之實。倘蒙聖恩。收回成命。俾臣稍釋神魂之震懼。尤感聖慈之曲盡矣。又查廣東一省。財力殷富。爲東南之冠。請特派大員。馳赴廣東辦理釐金。專供蘇浙皖三省之餉。附片奏浙江殉難提督饒廷選。請於廣信府建立專祠。又附片奏報各路軍情。又片奏新授河南歸德鎮總兵蕭孚泗。現在會國荃軍營。隨同進勦。記名總兵陳由立。經河南撫臣奏調。現在鮑超軍營。圍勦青陽。該二員仍留原營。均未便飭赴河南。十三日。公弟貞幹破賊於荻港。舊縣三山夾等處。賊壘皆平。十四日。李公鴻章所部勇第二起。由安慶啓行。公派黃翼升附輪船赴上海。察看下游地勢賊情。李公續宜赴六安州督師。以規潁壽。十五日。公弟國荃破賊於望城岡。十六日。鮑公超克復青陽縣城。十八日。公弟國荃破賊於銅城關。十九日。克雍家鎮賊壘。二十日。克巢縣含山二城。二十一日。公弟貞幹克復繁昌縣城。二十二日。公弟國荃克復和州城。鮑公超連克石埭太平二縣城。左公宗棠勦賊於江山常山之境。連戰破之。二十三日。公弟國荃攻克裕溪口。二十四日。攻克西梁山沿江北岸賊壘。悉破平之。公馳摺奏報青陽克復。隨摺奏保葦雲慶馮標等二十七員。陣亡將弁羅春鵬李遇春等十七員名。開單請卹。附片奏水陸各軍。破賊於荻港舊縣三山等處。一律肅清。陣亡將弁劉照志王虞廷劉華泗三名請卹。又

片陳報皖浙各路軍情。又具摺覆奏江浙紳士請借洋兵。規復蘇常各屬城邑。臣謬膺重寄。治軍無狀。致使蘇省士民。迫於水深火熱之中。爲此不擇之呼籲。此皆臣之咎也。以目前之賊勢。度臣處之兵力。縱使洋人轉戰內地。實無大枝勁旅。與之會勦。尤爲可愧。請飭下總理衙門。照會洋人。定議於先。或不至責怨於後。又奏擬結普承堯罪名一摺。二十七日。公弟貞幹破賊於魯港。二十八日。鮑公超克復涇縣。公札飭鮑超派兵援湖州。三十日。公弟貞幹克復南陵縣城。李公鴻章全軍抵上海。奉旨署理江蘇巡撫薛煥授通商大臣。專辦中外交涉事件。詔以副都御史晏端書赴廣東辦理釐金稅務。是月。金陵賊黨渡江北竄。都與阿等軍擊破之。維時公統制各軍。公弟國荃循江北岸。至於和州。公弟貞幹循江南岸。至於南陵。彭公玉麟派水軍中江而下。助勦兩岸。是爲直搗金陵之師。李公鴻章領湘淮陸勇。佐以黃翼升淮揚水軍。突過賊境。是爲援勦蘇瀘之師。大江以北。多隆阿公爲圍攻廬州之師。李公續宜有派員潁州之師。大江以南。鮑公超爲進攻寧國之師。張公運蘭等爲防勦徽州之師。左公宗棠爲規復全浙之師。十道並出。皆受成於公。公建節於安慶。居中控馭。廣轄數千里。此外如袁公甲三及李世忠淮上之師。都與阿公防江北之師。馮子材魁玉守鎮江之師。或不出自楚軍。或不歸公節制。均奉旨統籌兼顧。軍書輻湊。英彥風驅。上而朝端倚畀之隆。下而薄海想望之切。洵千載一時矣。四月初二日。張公運蘭等軍。克旌德縣城。初四日。公馳摺奏水陸各軍。克復北岸巢縣含山和州三城。奪銅城關雍家鎮裕溪口西梁山四要隘。隨摺奏保李成謀李朝斌劉連捷張勝祿等二十四員。又摺奏官軍擊敗大股賊衆於三山夾。乘勝攻克繁昌縣城。隨摺奏保會止明黃潤昌等七員。附片奏報南陵克復。統計沿江兩岸。克城池九座。關隘五處。并報廬州寧國湖州等處軍情。又馳摺奏鮑超一軍。連破賊壘。克復石埭太平涇縣三城。陣亡將弁劉蘭桂等二十四員名請卹。又奏遵查閩浙總督慶端事蹟一摺。初五日。水師進攻金柱關。初六日。公出閩湘勇操演。初七日。巡視穀米局火藥局。十五日。馳摺奏水陸各軍。會克魯港。陸師攻克南陵縣城。彭玉麟馳赴下游銅陵西梁山一帶。察看進兵形勢。又奏報徽州防軍。克復旌德縣城一摺。又奏江南鄉試。現難舉行。仍請展緩酌辦一摺。附片請開復余述祖革職處分。多隆阿公攻克廬州府城。賊潰走壽州。多公追擊大破之。賊首陳玉成自投壽州。苗沛霖縛獻勝保公軍前斬之。二十日。公弟國荃引軍渡江南岸。會合水陸各軍。克太平府城。二十一日。攻克金柱關東梁山賊寨。二十二日。

克復蕪湖縣城。水師進攻江岸賊壘。下抵大勝關。公核定賑廠章程。給與飢民錢米。毋或不均。出示曉諭城廂內外居民。綏輯約束。李公鴻章會洋兵收復青浦奉賢二城。三十日。奉到上諭。該大臣調度有方。深堪嘉尚。會國荃等宣力戎行。連克要隘。洵足以褫賊魄而快人心。若不量予恩施。將何以昭激勸。頭品頂戴江蘇布政使會國荃。著交部從優議敘。候選同知直隸州知州曾貞幹。著賞給迅勇巴圖魯名號。以示鼓勵。朝廷賞功罰罪。一秉大公。非獨有厚於該大臣也。該大臣惟當督飭會國荃等乘勝進攻。盡殲醜類。同膺懋賞。毋再固辭。欽此。是月都興阿公軍破賊於揚州。李世忠追擊竄賊。破之。江北肅清。浙江官軍收復台州府城。上海洋兵由海道收復寧波府城。浙東之賊少衰。皖北之賊由河南竄入陝西境。陝中亂作。回民交訌。詔多隆阿移軍入秦。公與官文公商留多公部將石清吉等十營。防守廬州。五月初三日。公馳摺奏報水陸各軍。克復太平城蕪湖縣城金柱關東梁山要隘。開單奏保王明山李成謀李朝斌等二十七員。附片奏保道員黃冕李瀚章趙煥聯等九員。前往廣東隨同晏端書辦理分卡。抽收釐金。又附片覆奏奉旨籌議江蘇巡撫宜駐鎮江。居適中之地。扼形勝之區。責成新任巡撫李鴻章辦理。又片奏結莫祥芝參案。留營差委。是日又具密摺覆陳勝保袁甲三辦理軍務優劣情形。請責成李續宜專辦安徽軍務。其時曾奉密諭。飭公籌議也。湖州失守。趙忠節公景賢被執不屈。其後死於蘇州。公弟國荃攻克大勝關稜陵關三汊河賊壘。會合水師。攻克頭關江心洲蒲包洲賊壘。遂進軍金陵城外。駐營雨花臺。初四日。鮑公超擊賊於寒亭管家橋等處。大破之。初五日。核減江西丁漕規費。永定章程。初十日。核定皖南茶引捐釐章程。出示曉諭茶商。期歸畫一。十三日。課試在皖委員。公弟國荃破賊於六郎橋。十五日。鮑公超破賊於抱龍岡。越敬亭山進攻寧國府。十七日。馳摺奏官軍水陸並進。迭復稜陵關江心洲等要隘六處。官軍駐金陵之雨花臺。附片奏報浙江徽寧等處軍情。並稱會國荃軍進逼金陵。屯紮南面一隅。洪逆見慣不驚。無恒懼之意。此時宜以全力會辦江南先復財賦之區。則各處可以次勦辦矣。又奏特參私行遠颺之將領。以肅軍紀。一摺。鮑超所部管官陳由立余大勝鄭陽和均保至總鎮。任意遠颺。請將該員等革職。并請敕下湖南撫臣。派員押回皖南原營。通諭各路軍營。不准輒留投效將弁。以懲跋扈之風。杜效尤之漸。附片密陳軍營積習。設法懲究。請將分統霆營宋國永授以總官實缺。又片奏查覆馮子材所部兵勇滋事情形。十九日。馳摺奏鮑超一軍。進攻寧郡。破賊於寒亭管

家橋等處。逆壘悉平。陣亡將弁鄭永福等十八員名請卹。附片奏准揚鎮總兵黃翼升統帶水師戰船。於本月十二日。駛過金陵。前赴鎮江上海一帶。請令其接署江南水師提督員缺。節制松滬各軍。又片參奏江西河口釐務委員向紹先弊混巧取。請卽革職。又奏遵查克復沿江兩岸城隘。出力員弁六案。併保開單請獎一摺。二十日。出示曉諭江西通省軍民。札飭各府州縣。永定徵收丁漕畫一章程。二十三日。楊公載福假滿回營。至安慶見公。尋出視水師於金陵。李世忠降衆幾數萬人。不領官餉。專兩淮鹽利。委員至安慶請餉。公籌撥軍火銀米以給之。世忠感悅。二十八日。拜發萬壽賀摺。又專奏代弟國荃貞幹恭謝天恩一摺。是月。李公鴻章收復南匯縣川沙廳。賊大股犯青浦嘉定。洋兵敗退。上海戒嚴。李公鴻章擊賊於虹橋大破之。松江圍解。滬防亦解嚴。李公屢奉移駐鎮江之旨。至是以上海軍務吃緊。遂奏請直攻蘇州。不復移軍矣。六月初三日。公與彭公玉麟修元臣余忠宣公墓。工畢詣墓前致祭。時皖省印委各務。懸缺以待人。乏員差委。公定以每日接見州縣佐雜三人。與之久談。而訓之以吏治。西洋兵既爲賊所敗。遂有調印度兵來滬大舉會勦之說。公接總理衙門咨文。深恐江浙士民。大遭蹂躪。慨然憂之。初六日。具摺覆奏。請勿裁撤南洋通商大臣之缺。改爲長江通商大臣。專辦瀕江四省中外交涉事件。所有廣東閩浙三省。卽由監督道員經理。又奏揀員署理安徽各府州縣之缺。開單呈覽。並附片奏稱安徽地方漸次克復。急須講求吏治。請敕下吏部。於本年新進士拔貢兩班。掣籤分發之時。皖省多分十數員。庶幾正途較盛。氣象一新。又片奏上海賊氛四偪。李鴻章不能移駐鎮江。多隆阿統軍入陝。不克會勦金陵。并附陳鮑超曾國荃兩軍大概情形。又片奏新授甘肅臬司劉于濤在江西本省防務緊要。暫難赴任。又奏報江西紳商捐餉。開單請獎一摺。公弟國荃擊援賊卻之。初十日。金陵大營營官張壯勇公勝祿擊賊陣亡。十五日。鮑公超攻克寧國府城。賊目洪容海以寧國縣城歸順。鮑公撫納之。因其衆收復廣德州城。公飭鮑超選留降衆二千人。其餘設法遣散。十六日。金陵賊大股撲營。公弟國荃擊退之。公咨覆總理衙門。力陳借印度兵助勦之爲害。宜設辭以謝之。二十二日。具摺奏稱洋人有另調印度兵來。秋間大舉之說。臣以此事函商左宗棠李鴻章二人。皆稱洋人未必果有其事。然既有所聞。宜由總理衙門。與在京公使。查詢確實。然後申大義以謝之。陳利害以勸之。如其不見聽。則須申明前議。進攻無助勦之師。克城無防守之卒。吾方以全力與粵匪相持。不宜再樹大敵。惟當以謙退忠告相

與不事猜疑。免生枝節。庶有忍有濟也。附片奏報寧國克復。及各路軍情。又片奏浙江失守。降賊之員林福祥劉齊昂米興朝請由左宗棠訊明正法。又片奏提督江長貴請假回籍葬親。所部各營暫令唐義訓兼轄。酌量遣散。以節餉需。又奏采訪忠義第七案一摺。附片奏陽湖休寧等縣紳士楊錫嘉汪念祖胡澤順等殉難情形。彙入第七案。分別請賜旌卹。是月。公次子紀鴻以縣試案首入學。七月初二日。馳摺奏金陵陸軍屢卻悍賊。陣亡總兵張勝祿請從優議卹。將弁劉永祥鄒蘭亭二員請卹。又奏鮑超一軍圍攻寧國。克復府城詳細情形。出力員弁開單請獎。陣亡將弁馬勝奎楚訓武等十二員名請卹。附片奏賊目洪容海投誠。酌籌招納。又具摺奏查明江西被害州縣。蠲免錢糧分數。附片奏請恩旨豁免江西各州縣。歷年攤捐之款。俾州縣無賠累之虞。而民間無科勒之苦。吏治可臻上理。又附奏奉諭旨。擇保西北各省藩臬人員一片。又請展緩江南江西三省軍政一片。初四日。查閱輪船機器。初六日。李公續宜聞訃丁憂。公兼署安徽巡撫印務。李公以所部成大吉蕭慶衍蔣凝學毛有銘等軍歸公調度。初十日。公馳摺奏安徽撫臣李續宜聞訃丁憂。請按照胡林翼丁憂之例。賞假數月。仍令回皖。署理撫篆。附片奏報近日軍情梗概。又奏采訪忠義第八案。又奏請展緩江南武闈鄉試。又片奏楊載福更名岳斌。夏秋之間。暑雨失時。疾疫大作。各路軍營。多染疾病。皖南諸軍爲最甚。死亡甚多。浙江大營次之。金陵大營亦染疫病。皆暫事歇息。未遑攻勦也。十七日。左公宗棠擊賊於油埠破之。袁公甲三告病卸任。奉旨授李續宜爲欽差大臣。督辦安徽全省軍務。二十一日。公具摺代李續宜奏陳請假回籍治喪。仍請仿胡林翼之例。又請袁甲三暫緩交卸督師之任。附片奏接奉寄諭。飭查軍情。奏報袁甲三李續宜駐紮之處。路近而較速。臣奏報往返。取道湖北河南。道梗而較遲。茲開呈前三次拜發摺片。以備查核。有無疎失之處。并陳明各路軍營疾病過多。未能進勦情形。袁公甲三委員押解已革鹽運使金安清等至安慶歸公訊辦。其李世忠全軍歸公節制調遣。李公續宜奏報丁憂之疏未入。接奉督師之旨。李公病已逾月矣。是月奉上諭。該撫現丁母憂。著即在軍營穿孝。改爲署理巡撫。毋庸賞假回籍。欽此。又奉上諭。欽差大臣科爾沁博多勒噶臺親王僧格林沁著統轄山東河南全省軍務。並調度直隸山西兩省防兵。所有勦匪事宜。即著會商欽差大臣李續宜妥爲籌辦。等因。欽此。又奉上諭。勝保著以欽差大臣督辦陝西軍務。欽此。於是多隆阿公一軍。有旨令公酌量調度江北裏下河一帶。鎮江馮子材一軍。皆有旨

令公統籌兼顧矣。李公鴻章克復青浦城。分軍會洋兵渡海入浙江境。收復餘姚縣。蔣公益體領湘勇五千人。由長沙啓行。取道江西以赴浙。八月初二日。出示諭鄉民捕蝗。初三日。李公續宜至安慶。苗沛霖退出壽州城。及正陽關。李公續宜派蔣凝學引軍入守壽州。蕭慶衍守霍邱縣。成大吉。毛有銘兩軍分守三河尖。及固始縣。總兵王載駟留守六安州城。而自扶病回省城。見公商奏。力請回籍。擒匪犯潁州境。各軍連擊破之。十二日。馳奏疊奉諭旨。分條覆陳一摺。其一。多隆阿一軍。援秦之局。中變回鄂。當駐紮南陽一帶。鄂豫秦三省交匯之處。爲游擊之師。其一。裏下河之防。請責成都興阿嚴密防堵。現商令楊岳斌親赴下游。察看布置。又擬趕造太湖水師戰船。防勦蘇松。騰出黃翼升水軍。專防淮揚。以符原議。其一。李世忠軍衆五六萬人。據有城池。自爲風氣。擅准鹽釐金之厚利。勢難繩以法律。且其盤退賊股。功未可沒。擬姑循其舊。不設機心。不禁遏其利。不拒絕其求。但不甚資其力。亦不輕調其兵。暗銷其予智自雄之氣。將來或不至於決裂。其一。李鴻章不能離滬。移駐鎮江。應責成馮子材耐苦堅守。不作出勦之計。凡四條。附片奏稱。曾國荃鮑超左宗棠各營。皆因患病者多。未能攻勦。李續宜患病未痊。繼以衰毀。肌肉全瘦。若不令離營回籍。恐難速痊。是以該撫自奏陳情。未便勸阻。又奏籌辦廣德州受降事宜一摺。洪容海降衆數萬。但令選留三千人。編立五營。餘皆資遣回籍。請給洪容海游擊虛銜。其部下頭目等。請分別給予頂戴。附片奏豫省派員招募湘勇一節。請停止。以節糜費。又片請旨飭江西循照前案。按月撥解漕折銀四萬兩。協濟徽寧餉需。又奏采訪忠義第九案。附奏烈婦焦王氏等彙案請旌一片。李公續宜陳情疏入。奉旨賞假百日。回籍假滿。仍出督師。以唐訓方署理安徽巡撫。袁公甲三仍留督防臨淮。廣德州降衆叛亂。洪容海率其黨一萬人。自拔奔回寧國。二十九日。公馳奏遵旨查覆湖北撫臣嚴樹森被參各款一摺。附奏遵旨查覆江蘇巡撫薛煥被參各款一片。又因何桂清逮訊時。呈出司道公稟。請退守蘇州一節。奉旨飭將薛煥查文經等查明參辦。公具摺奏稱督撫權重。由來已久。司道以下。承迎風旨。不敢違拒。若此類者。無庸深究。疆吏以城守爲大節。不當以僚屬一言爲進止。大臣以心跡定罪狀。不必以公稟有無爲權衡。附片奏廣德州降衆復叛。現籌辦情形。賊之大股。將併竄皖南。而鮑超張運蘭朱品隆等軍疾疫大作。張運桂已病故。左宗棠軍病者過半。曾國荃金陵營中染病者。亦逾萬數。深恐羸卒不足以當強寇。皆由臣以非材。妄竊高位。上千鬼神之譴。莫救厄運之災。中夜以思。

不勝焦灼。公每日以吏事軍事餉事文事分條分時以次清理。定爲日課。是月賊犯上海。李公鳩章力戰。破賊於七寶街。洋兵克慈谿縣。浙江官軍收復處州府。左公宗棠擊賊於龍游縣。大破之。閏八月初四日。定江西釐局章程。是時釐金收數漸減。公札飭各卡局委員比較每月收數。以增減爲優劣。十一日。葬桐城儒士方東樹戴鈞衡蘇厚子等六人。皆因亂未葬者。并爲立石。以表其墓。十二日。馳摺奏唐訓方暫署皖撫。仍應駐紮臨淮。接統袁甲三一軍。使楚皖官軍聯爲一氣。附片奏陳大江以南。疾疫盛行。寧國境內最甚。金陵徽州衢州次之。水師及上海蕪湖各軍。亦皆厲疫繁興。死亡相繼。鮑超一軍死者數千。其猛將如黃慶伍華瀚等。先後物故。鮑超張運蘭楊岳斌皆染病甚重。皖南道姚體備營務處甘晉則一病不起。天降大戾。近世罕聞。惡耗頻來。心膽俱碎。若被賊匪撲犯。戰守俱無把握。甚至欲逃走以待再振而不可得。臣自度薄德菲材。不足以挽厄運而支危局。請旨簡派在京親信大臣。馳赴江南。分重大之責任。挽艱難之氣數。庶幾補救於萬一。臣斷不敢稍存推諉。致誤戎機。奉上諭。朝廷信用楚軍。以曾國藩忠勇發於至誠。推心置腹。倚以挽救東南全局。自諸軍進逼金陵。逆匪老巢已成阱檻。惟以艱難時會。誠不易得。疊經寄諭。總以毋徒求效旦夕。惟當立足不敗之地。以俟可乘之機。矧茲疾疫繁興。各軍將士疫病之餘。詎忍重加督責。該大臣惟宜愈矢忠誠。拊循加意。使軍心益固。沴氣潛除。各營病疫將士。其各傳旨。優加存問。本應明降旨慰勞。誠以事關軍務。或恐人心疑懼。奸宄從而生心。賊人轉益張其兇鋒。我國家深仁厚澤。二百餘年。當此艱危時勢。又益以疾疫流行。將士摧折。深慮驟土氣而長寇氛。此無可如何之事。非該大臣一人之咎。意者朝廷政事。多所闕失。足以上干天和。惟當齋心默禱。以祈全消沴戾。我君臣當痛自刻責。實力寬心。勉圖覆救之方。爲民請命。以冀天心轉移。事機就至。天災流行。必無偏及。各營將士。既當其厄。賊中亦豈能獨無傳染。該大臣鬱憤之餘。未遑探詢。刻下在京。固無可簡派之人。環顧中外。才力氣量如曾國藩者。一時亦實難其選。該大臣素嘗學問。時勢艱難。尤當任以毅力。矢以小心。仍不容一息稍懈也。欽此。公接奉此旨。讀之泣下。十七日。專差奏皖南加廣學額中額一摺。請獎徽州捐生一摺。報銷淮北課鹽一摺。二十日。蘇州賊大股援金陵。圍撲官軍營盤。賊結壘二百餘座。日夜環攻。弟國荃力戰禦之。鮑公超軍挫於新河莊。賊犯寧國府。鮑公入城拒守。二十三日。李公續宜啓行回籍。唐公訓方到任。二十四日。拜發萬壽賀摺。二十七日。馳摺奏陳皖北一帶。楚軍軍

薄不能分撥。李續宜所部將領五人。才位相將。難相統馭。並陳明苗沛霖詭譎多端。不易言撫。惟赦其罪而不貸其力。猶不失爲中策。附片奏報金陵寧國兩處軍營。被賊大股撲犯。將領士卒。皆爲病所苦。防守尙無把握。總由微臣德薄位尊。莫挽厄運之故。憂惶無已。又片奏臣軍前調黑龍江馬隊三百餘員名。隨同轉戰。屢有功績。因土水不宜。抱病者多。應資遣回旗。以資休息。是月。蔣公益禮軍至浙江。克復壽昌縣城。九月初一日。安徽藩司馬新貽奉旨暫統臨淮官軍。初六日。寧國縣城失守。十二日。公馳奏彙報各路軍情一摺。兩花臺營壘。賊以大股百道環攻。此金陵之可慮也。寧國之賊。欲由間道上犯江西。此寧國之可慮也。小丹陽之賊。由東壩拖過戰船。時圖出江。衝斷江中糧路。此水師之可慮也。河南捻匪竄擾鄂境。有取道皖北。回援金陵之說。而皖北各城空虛。深恐逆蹤闖入。此皖北之可慮也。現在調派各軍。移緩就急。力圖挽救。惟皖北地廣兵單。現調提督成大吉一軍。由三河尖馳赴英霍。相機防勦。仍請敕下多隆阿迅速東還。駐軍舒桐。兼顧皖鄂兩省。大局幸甚。附片奏報寧國縣城失守。徽州旌德兩城。首當其衝。唐義訓守徽州。朱品隆守旌德。兩處兵力皆單。未知能堅守否。又片奏江西省釐務。數月以來。解數寥寥。藩司李桓總辦糧臺。兼管釐局。總理不善。已添委甘肅臬司劉于濬訪察商情。署鹽道孫長絨專司月報。整頓積弊。臣統軍過多。欠餉太久。徒受攬江右利權之名。究無濟蘇皖飢軍之實。不能不力圖補救之法。又片奏查明巢湖水師營官黃國堯於咸豐八年。在廬郡陣亡情形。請從優議卹。時賊船過東壩者。分布固城南漪諸湖。欲衝出大江。楊公岳斌力疾扼守金柱關。公派陸軍數營。往助防守。金陵之賊。環雨花臺官軍營盤。日夜猛攻。挾西洋開花礮。自空中擊下。呼聲動地。公弟國荃督軍苦守不退。面受槍子傷。血流交頤。仍裹劍巡營。以安衆心。公弟貞幹駐營江干。力戰以通餽運。大營軍火。賴以接濟。與賊相持兼旬。初五日。擊賊破之。十二日。擊賊又破之。攻撲之勢稍衰。都興阿公派兵千八百人。渡江助守。公念湘軍疾疫之餘。繼以大股逼犯。恐局勢決裂。日夕旁皇。寢不安席者數旬。而江西協餉多掣肘。公益憂之。十四日。公作三字箴。其清箴字曰。「名利兩淡。寡欲清心。一介不苟。鬼伏神欽。」慎字箴曰。「戰戰兢兢。死而後已。行有不得。反求諸己。」勤字箴曰。「手眼俱到。心力交瘁。困知勉行。夜以繼日。」公言此十二語。當守以終身。遇大憂患。大拂逆之時。庶以此免於尤悔耳。十八日。水陸軍合擊賊於金柱關。大破之。二十一日。連擊破之。燬賊船幾盡。金陵之賊。開地道。用火藥轟官軍壘壁。公弟

國荃力戰拒破之。令軍士於營內掘隧以迎之。賊不得逞。李世忠攻賊於九嶽州。稟請分兵援金陵。公批札止之。二十七日。馳奏彙報軍情一摺。金陵寧國蕪湖金柱關戰守大概。并陳明調度各軍。有與前奏不符者。視乎各路緩急之形。又奏采訪忠義第十案。附片奏宿州二郎山練總馬維敏喬元功結寨禦賊。爲賊攻陷。殉難者二千餘人。請照陣亡例。賜卹建祠。以褒忠節。又奏績溪縣孝烈婦胡程氏請旌一片。是月。李公鴻章克嘉定縣城。賊復犯青浦。李公大破賊於四江口。滬防肅清。賊攻鎮江。馮子材破賊於湯岡。多隆阿公督師入陝西。十月初五日。公弟國荃擊賊大破之。俘斬數萬。自閏月二十日以後。賊三十餘萬。圍撲營盤。百計攻轟。公弟國荃苦守四十六日。至是大捷。賊乃解圍竄江北。十一日。唐公訓方啓行赴臨淮關。袁公甲三回籍。十二日。公馳摺奏水陸官軍迭獲勝仗。力保蕪湖金柱關要隘。賊舟存留無幾。江介肅清。陣亡副將郭明鼈。請照提督例議卹。將弁洪得勝。王明元。請卹。又摺奏毛有銘一軍。在潁州西路。迭破捻圩。毀其老巢。仍回駐皖豫邊境。奏片附報金陵撲營之賊解退。蕪湖等處地方穩固。前奏可慮者四端。今三患稍舒。所慮專在寧國一路。若能支持一月。新募之勇漸集。或能力遏凶氛。是日又具摺奏保鮑超一軍。疊克青陽石埭等四城。出力員弁。開單請獎。又奏保曾國荃一軍。疊克太平蕪湖等各城隘。出力員弁。開單請獎。附片奏稱案保所開之員。有隨後病故者。不及查核扣除。俾逝者得獎。榮以飾終。生者亦觀感而圖報矣。鮑公超軍在寧國府。賊擾灣址。斷其糧路。公派陸軍。由繁昌南陵護陸運以接濟之。賊攻旌德縣。公咨商左公宗棠調所部王文瑞一軍援旌德。十七日。賊大股攻撲九嶽洲。李世忠之營旋渡江北。竄十八日。張公運蘭離營至安慶。見公。公令其買舟回籍養病。其所部老湘營。以總兵易開俊劉松山分領之。朱品隆等軍破賊於旌德。十九日。賊解圍去。湘軍在壽州正陽防守者。時爲苗練所殺害。僧王督師河南。奏請撫苗以勦捻。苗帥霖上書僧王。極詆楚軍之失。公察苗帥霖有意挑釁。恐其阻壞大局也。又因皖北兵單。賊方北竄。調蔣凝學一軍移營而南。毛有銘蕭慶衍等軍。皆移駐廬州之境。以避苗練。卽以防皖境也。二十七日。馳摺奏縷陳金陵官軍苦守四十六日。力戰解圍情形。道員劉連捷等七十三員。開單請獎。陣亡副將倪桂等二百七員名。開單請卹。附片奏金陵援賊雖退。傷亡將卒太多。寧國旌德兩城。同時吃緊。自金陵以至徽州。地段太長。賊股太衆。皖北十餘城。毫無準備。實恐潰敗決裂。盡隳前功。仍請簡派大臣會辦諸務。稍分臣之責任。又片奏湘勇駐防壽州正

陽關。與苗練逼處太近。挑釁構怨。無有已時。刻下皖北正苦無調防之兵。擬撤出蔣凝學一軍。並抽撥霍邱防兵。調防廬州巢縣一帶。以遂苗練之私。以成僧格林沁急欲滅捻之志。是日又具摺奏保張運蘭朱品隆唐義訓戰守徽州軍中出力員弁。開單請獎。附片奏張運蘭因病回籍。請旨將易開俊劉松山二員。授總兵實缺。以資鈐束。又奏請展緩三省查閱營伍之期一摺。賊之竄江北者。攻和州。陷含山縣。二十八日。陷巢縣。公迺札留新募淮勇之張樹聲吳長慶等軍。暫緩赴滬。分守無爲州及廬江縣。調霍邱之湘軍。駐防舒城。公弟國荃派軍回守西梁山。尋又派軍紮東梁山。廣德州賊竄。陷績溪縣。是月。浙東官軍。會洋兵收復上虞嵞縣新昌三城。江忠濬補授安徽布政使。十一月初一日。賊陷和州。初二日。唐義訓王文瑞收復績溪縣。初三日。旌德之賊。竄擾太平黟縣之境。直趨祁門。初四日。賊圍涇縣。易開俊引軍入城守禦。卻之。初七日。祁門縣失守。初八日。奉上諭。江蘇布政使曾國荃著賞給江綢黃馬褂料一件。小卷江綢袍料一件。白玉喜字翎管一枝。白玉柄小刀一把。曾貞幹著加恩。以知府用。欽此。初十日。唐義訓王文瑞收復祁門縣城。賊回竄石埭。十二日。公馳奏彙報軍情一摺。江北含山巢縣和州失守。調度防勤。并陳明寧國各軍戰守情形。績溪旌德太平黟縣賊蹤。奏稱秋冬以來。羣盜如毛。南北環逼。前奏請多隆阿移師東勤。今則秦人方痛深水火。何敢瀆請。惟飭貴州提督江忠義統率所部赴皖防勤。大局幸甚。附片奏報祁門失守。又片奏撤回蔣凝學一軍。分防潁州霍邱兩處。調毛有銘蕭慶衍兩軍。移駐舒城。以防賊上竄。是日又具摺奏保水師疊克沿江城隘。出力員弁。開單請獎。又摺奏浙江省城失守時潰走之副將陳步高等。訊明定擬。十八日。公弟靖毅公貞幹卒於軍。是日奉到以知府用之旨。公出城巡視鹽河。委弁勇修濠牆一百八十六丈。核定公程。十九日。水師破賊於三汊河。二十日。鮑超聞訃丁憂。公以寧國軍情緊急。批令在營穿孝。二十一日。公出城巡視城壕。二十二日。聞靖毅公之卒。公哭之慟。派弁赴金陵迎護其喪。二十七日。馳奏奉欽諭旨。分條覆陳一摺。其一毛有銘蕭慶衍之軍。由舒城拔營。取道巢湖之南。進攻運漕鎮。其一李世忠軍於九泖洲。此次賊竄北岸。該提督亦屢接戰。有所斬擒。惟賊股大衆未能堵截。其一曾貞幹已於十八日病故。由臣德薄。殃及手足。其蕪湖要地。留防兵力尙厚。其一洋將白齊文奉調赴援金陵。該將遷延不進。且毫無紀律。應由李鴻章將其懲辦。其一查曾賊李秀成蹤跡。其一催李續宜請銷假回營六條。又奏旌德涇縣解圍。績溪縣祁門克復一摺。奏保

王文瑞王開琳等五員陣亡。總兵胡太旂參將劉永勝游擊張仁興請卹。附片奏寧國一帶軍勢漸穩。鮑超丁母憂。請毋庸開缺。改爲署理。又摺奏結金安清汪耀奎參案。又奏采訪忠義第十一案。附片奏定遠縣總練陳鼎滯等殉難請卹。賊自金陵解退後。其一股復由東壩拖過戰船。以圖出江。公所派水陸防軍。破之於護駕墩。燬賊船二百餘號。鮑公超擊賊於馬頭鎮楊柳鋪。大破之。是月。左公宗棠克復嚴州府城。李公鴻章克復常熟縣城。多隆阿公奉旨授欽差大臣。接受關防。勝保革職逮問。十二月初五日。石埭賊竄陷青陽縣。朱品隆棄旌德不守。移勦青陽。初九日。靖毅公靈柩過安慶。公出迎。撫棺慟哭。入城受弔。初十日。水師擊三汊河賊壘。破之。蕭慶衍等會水師克運漕鎮。公調蔣凝學一軍。移駐舒城。十二日。具摺奏遵旨籌派水師將弁兵勇。演習輪船火器。奏保總兵蔡國祥堪以統轄。參將盛永清等七員。堪以分領。又申明楚軍水勇。難以出洋。輪船配用楚勇。須堅守前議。但用之於江面。又摺奏賊由九洲分股上犯。李世忠一軍堵戰。獲勝情形。請救下山西巡撫。將應解月餉。迅解該軍。以資接濟。陣亡副將程自有汪德喜知縣胡學詩請卹。附片奏報各路軍情。又片奏調道員隋藏珠回營當差。是日。又具摺奏保李續宜所部成大吉蕭慶衍等軍。援勦潁州霍邱出力員弁。開單請獎。又摺奏夏秋以來。厲疫繁興。將士官吏。嬰疾而殞命者。殆以萬計。其中功績卓著者。九十六員名。彙案開單請卹。張運桂黃慶伍華瀚沈寶成周成南五員。功績尤多。請從祀湖南昭忠祠。附片奏伍華瀚之父文生伍宏鑑。於咸豐四年。在寧鄉陣亡。請卹。十三日。奉到上諭。會國藩一門忠義。不避艱險。兄弟均在行間。爲國宣勞。深爲嘉悅。不料會貞幹遽爾病故。覽奏曷勝悼惜。等因。欽此。又奉上諭。會貞幹自赴江南軍營。屢著戰功。朝廷早欲擢用。因會國藩再三懇辭。擬俟江寧克復後。從優獎勵。茲以力疾奮戰。積勞病故。悼惜殊深。雖未經會國藩奏請給卹。而會貞幹係效力疆場。戰功卓著之員。着卽追贈按察使。卽照按察使軍營立功後病故例議卹。以示優異。欽此。十六日。公作季弟墓志一篇。二十日。靖毅公靈柩登舟回湘。公行遣奠禮。毛有銘一軍。進勦巢縣芙蓉嶺小挫。宣城縣屬之金寶圩。爲賊所攻陷。殺掠甚慘。其練衆及難民之脫出者。公給銀米以賑之。編立營伍。安置於蕪湖縣。凡數千人。二十一日。公弟國荃擊賊於谷里村。六郎橋破之。二十二日。蕭慶衍擊賊於銅城關。連破之。二十三日。青陽之賊。竄回石埭。二十四日。具摺代弟國荃貞幹奏謝天恩。二十五日。朱品隆軍收復青陽縣城。二十七日。覆奏欽奉諭旨。併案條陳一摺。其一

壽州撤回湘軍以後。苗練尙無據城以叛之迹。正宜推誠相待。無容派兵戍守。使反側者無以自安。其一李世忠驕亢任性。目前無甚扞格。將來或須示以檢制。其一楊岳斌軍守金柱關。以防東壩賊船。彭玉麟駐守裕溪口。以防巢湖賊股。戰爭方急。不能移劄下游江面。其一洋人用兵。其長處在械器精銳。步武整齊。其短處在口糧太重。若使官軍學習其法。恐未得其長。而先圖增餉。其一金陵賊勢方強。未易言撫。至其自拔來歸。當禁約軍士。不得妄加殺戮。以導向化之路。凡五條。附片奏報水師攻三汊河。陸軍克運漕鎮。及金陵官軍勝仗。皖南各路軍情。又奏保湖南東征籌餉局出力官紳。開單請獎一摺。附片奏保江西補用道黃冕。湖南署藩司惲世臨。主持東征餉事。尤爲出力。請旨優獎。是月賊又由東壩拖過戰船。以窺蕪湖。於是賊船過東壩者。前後三起。是歲石逆擒匪。糾合大股。迭犯湖北之西北境。官文公調楚軍擊退。全楚肅清。駱公秉章劉公蓉調派湘軍。大破賊首石達開於絳州之境。江公忠義勦賊於湖南廣西之境。毛公鴻賓檄調回湘。募楚勇萬人以援皖。都統富明阿幫辦江北軍務。吳公棠署漕運總督。

〔癸亥〕同治二年公五十三歲。正月。公在安慶。初二日。接奉年終賞福字荷包錢鏢食物等項。再加賞壽字一張。賊大股圍攻涇縣。易開俊等守禦卻之。初五日。鮑公超馳援涇縣。初六日。擊賊大破之。初七日。賊解圍去。鮑公追擊破之。十二日。馳摺奏克復運漕鎮。進勦蕪縣銅城閘。接仗情形。陣亡總兵彭星占。請優卹。將弁胡得勝。劉義勝。陳東祥。謝齊。偁。呂鴻榜。李春生。請卹。附片奏報青陽收復。涇縣大捷。并搜獲僞文。蘇省大股有再犯江北。上窺皖楚之說。又具摺奏謝弟貞幹。贈卹恩。附片奏保葉兆蘭。委署皖南道缺。二十七日。馳摺詳報鮑超一軍。破賊於馬頭鎮。楊柳鋪。進援涇縣。大捷解圍。陣亡參將羅國才等六十七員。弁。開單請卹。附片奏易開俊等保守涇縣情形。陣亡參將倪昌明等五十一員。弁。開單請卹。又片奏寧國金寶圩被賊攻破。蕪湖金柱關防守。難以鬆勁。九洲洲江面有賊船趕渡。臣當駛赴金陵。察看前敵。是日。又代奏江南提督李世昌。自請褫職。立功以贖勝保之罪。一摺。二十八日。公由安慶登舟啓行。二十九日。泊池州登岸。攬視池州形勢。是月。左公宗棠克復金華。紹興兩府城。湯溪龍游蘭谿永康武義浦江桐廬各縣。浙東肅清。二月初一日。賊犯金柱關。水陸官軍擊破之。賊逼近寧國府城。劉松山守禦卻之。鮑公超克西河賊壘。擊賊大破之。初二日。擊賊連破之。梅嶺馬家園小淮窰麒麟山等處賊壘。

盡平。寧國近城百里之地肅清。初三日。賊撲九泂州。李世忠營盤先陷。賊渡江攻陷浦口城。公舟泊蕪湖。彭公玉麟來見公。初四日。公登岸按視蕪湖城守。行泊金柱關。楊公岳斌見公。初五日。公舟泊大勝關。楊公岳斌從。水師攻克灣沚賊壘。初六日。公登陸駐雨花臺大營。與公弟國荃按行各壘。傳見各將弁慰勞之。十一日。公還舟次。十二日。馳奏查閱沿江各軍。現抵金陵。恭報近日軍情一摺。十五日。奏謝年終恩賞一摺。年終密考一摺。學政加考一片。公坐舢板船。探視九泂州賊壘。回舟泝江按視三汊河營壘。石埭之賊。大股竄青陽。鮑公超引軍援剿。賊由建德竄擾江西彭澤鄱陽之境。太平縣賊竄入徽州境。擾及黟縣祁門。十五日。攻撲休寧縣城。又有浙江於潛昌化一股。亦竄入徽境。郡城戒嚴。左公宗棠派劉典一軍援徽州。十六日。公舟泊烏江。按視楊公岳斌水師老營扼守之處。賊大股撲犯金柱關。官軍水陸合擊。大破之於查家灣。賊乃卻退。渡江之賊。陷江浦縣城。十八日。公舟泊金柱關。入小河。巡視水陸各營。十九日。行視東西梁山防軍營盤。舟泊裕溪口。二十一日。換小舟入自裕溪口。按視運漕鎮無爲州軍營。二十三日。由神塘河出大江。回舟次。二十七日。舟次大通鎮。馳奏由金陵回皖。沿途查閱恭報近日軍情一摺。附片奏陳臣巡閱諸軍。詳觀賊勢。攬南北之形勝。察天人之徵應。竊以爲可懼者數端。可喜者亦數端。江岸難民。避居江心洲渚之上。死亡枕籍。蘇浙之田。多未耕種。賊無所掠食。壹意圖竄江西。窺皖浙已復之土。恐其變爲流賊。更難收拾。李世忠心跡難信。皆可懼之端也。金陵之賊。糧源已竭。賊居不耕之地。其勢必窮。無能久之理。東南要隘。多爲我有。水陸將軍頗能和衷。百姓仰戴皇仁。淪肌浹髓。久困水火之中。不聞怨咨之語。此皆可喜之端也。附片奏新授安徽臬司萬啓琛請暫緩入都陛見。又具摺彙報水陸各軍陣亡傷亡病故員弁一百八十九名。開單請卹。附片奏前祁門縣知縣唐治。咸豐四年在任死節。請建祠祁門。又奏采訪忠義第十二案。附片奏舒城練總章斌殉難請卹。并該團勇婦等百四十七人。二十八日。公回至安慶。公舟往來江中。見洲渚之上。皆難民所聚。編葦葦茅以爲廬。一不戒於火。延燒數里。相率露處。呼號求救之聲。至不忍聞。公以賊蹤蹂躪各處。無可安置之地。因札善後局委員議賑卹之。是月。僧王擒捻酋張落行斬之。劉公長佑由兩廣總督調任直隸總督。航海以北。達於畿疆。三月初二日。賊自江浦上犯。圍毛有銘劉連捷兩軍於石澗埠。公弟國荃派遣員彭毓橘等領軍三千餘人。上援無爲州。沈公葆楨調派江西各軍。扼守景德鎮樂平縣等處。防勦徽池竄賊。派委

同知王沐領軍進援徽州。初八日。公急調鮑超一軍。渡江而北。援石澗埠。初十日。蕪湖水陸各軍。克黃池賊壘。十一日。悉收內河要隘。毀賊舟。殄盡。賊遁走金寶圩。溧水丹陽一帶。金柱關防務解嚴。劉典王文瑞王沐會擊賊於徽州休寧境。大破之。十二日。馳摺奏鮑超一軍。大獲勝仗。攻克寧國近城諸要隘。陣亡參將李芳菲等二十六員。弁。開單請卹。又摺奏賊渡九伏洲。李世忠營盤。及浦口江浦兩城失陷。請將李世忠革職。不准留營。并自請交部嚴議。附片鈔呈李世忠咨文二道。并稱李世忠前此曾立功績。此次力竭戰敗。亦足以雪物議。謂其通賊之誣。恐其懷疑生怨。激成他變。仍求明降諭旨。示以寬大。毋庸革職。仍准留營。獎其前功。責其後效。則思出於朝廷。而怨歸於臣等。彼必感激圖報。不生疑貳。又片報皖南皖北近日軍情。奏稱江之南岸。徽州與江西同警。江之北岸。下游與上游同警。調度無方。實深憂灼。又奏保王吉彭楚漢周惠堂譚勝達四員。堪勝水師總兵之任一摺。疏入。奉上諭。李世忠著加恩撤去幫辦軍務。免其革職。以示薄懲。欽此。十七日。肅慶衍彭毓橘毛有銘劉連捷合擊賊於石澗埠。大破之。劉典王文瑞王沐克黟縣城。十八日。苗沛霖復叛。引其黨圍攻壽州。知州毛維翼堅守。十九日。賊大股圍攻廬江縣。二十一日。賊圍攻舒城縣。蔣凝學禦卻之。二十二日。朱品隆攻石埭之賊破之。髮捻大股。由湖北下竄。圍攻桐城縣。提督周寬世禦卻之。賊竄孔城鎮。合併大股竄六安州。二十四日。賊圍六安州。二十五日。劉典擊賊於徽州破之。徽境肅清。賊悉竄歸浙江。江西之賊。擾及浮梁。沈公葆楨調回王沐一軍。勦之。二十七日。馳摺詳報蕪湖金柱關水陸各軍。累月苦戰情形。陣亡游擊姜固國等三十六員。弁。開單請卹。附片奏報皖南江西皖北湖北賊勢軍情。該逆蓄謀甚狡。無非欲掣動官軍之勢。以解金陵之圍。苗練叛迹大露。事變迭生。恐慣何極。又摺奏揀調良員留皖補用。并請本科新進士。即用知縣一班。多發數員來皖。以資差委。附片奏保代理無爲州知州穆其琛堅忍鎮定。保守危城。厥功甚偉。請即補該州實缺。又奏采訪忠義第十三案。是月。李公鴻章克太倉州城。公弟國荃奉旨補授浙江巡撫。左公宗棠奉旨升授閩浙總督。兼署浙江巡撫。萬啓琛授江蘇藩司。馬新貽授安徽臬司。郭嵩燾授兩淮運司。李公鴻章奏陳公弟貞幹戰績。奉到上諭。曾貞幹著加恩照二品例議卹。并准其予諡。於本籍及死事地方。建立專祠。仍宣付史館。特予立傳。以彰忠懇。欽此。四月。公調鮑超劉連捷等軍。援六安。初二日。賊解圍東竄。鮑公引軍追擊之。初七日。鮑公超等陸軍彭公玉麟等水師。會克東關賊壘。初十日。克

銅城關。十二日。馳摺奏石澗。畢廬江。桐城。舒城。六安州。先後解圍。情形。隨摺奏保劉連捷。毛有銘等六員。陣亡。參將黃仁親等十一員。弁請卹。附片報近日軍情。奏稱徽郡防兵單薄。是臣布置最疏之處。賊之竄鄱陽者。逼近浮梁。江西之門戶可慮。皖北之賊。悉數東趨。并未西犯鄂疆。卽屬大局之幸。現檄鮑超等進兵追擊。檄調蔣凝學。毛有銘。成大吉等。會師壽州。共討苗黨。是日。又具摺奏江楚各省本准鹽引地。被鄰私侵佔日久。非一蹴所能規復。察核現在情形。暫難改辦官運。又片奏在籍侍講呂錦文。在寧國辦理團防捐輸。被參各款。查明覆奏。又奏采訪忠義第十四案。時都統富明阿駐軍江北。派委知府杜文瀾試辦官運准鹽。行銷於楚岸。十八日。易開俊擊賊於涇縣。破之。朱品隆擊賊於青陽。破之。二十二日。具摺奏謝天恩。臣弟國荃補浙江巡撫。兄弟均當大任。受恩愈重。報稱愈難。請開浙撫一缺。以藩司效力行閒。附奏新授江蘇藩司萬啓琛。呈請開缺一。又弟貞幹奉旨加銜。議卹。予諡建祠。專奏謝天恩。一摺。鮑公超等軍。克復巢縣城。公派李榕一軍。渡江而南。援池州。二十三日。克建德縣城。二十四日。鮑公超等軍。克含山縣城。進克和州城。皖北之賊全退。二十七日。馳摺奏水陸官軍。會克東關銅城關兩隘。陣亡勇弁彭勝華。會彩雲。胡德雲。石大和。請卹。附片奏報軍情。稱兵事遲鈍。半由餉需奇絀。鮑超。毛有銘兩軍。均有餉匱逃散之事。臣治軍九年。不敢輕上請餉之奏。不欲以危詞上煩聖聽。又不欲以苦語。渙散軍心。茲因有勇丁逃潰之案。不得不據實密陳。請於九江洋稅項下。月撥銀三萬兩。以濟皖餉。并請特派大員來南。稍分臣之責任。是日。又具摺奏保雨花台解圍案內出力員弁。開單請獎。附片奏新授雲南迤東道黃冕。現辦東征籌餉局務。請緩赴任。并擬調該道來營。面商淮鹽事例。與運使郭嵩燾會籌鹺政。又片奏鳳臺縣知縣蔡鏐。被苗練戕害。請卹。公之初任兩江也。奏撥江西漕折銀兩。以供徽寧防軍之餉。至是。沈公葆楨奏留供江西本省防軍。經戶部議准。公既失此鉅款。於是籌餉之請。詞氣迫切。而請簡大臣。以分責任之疏。已三上矣。公弟國荃破雨花臺賊壘。及金陵南門外石壘。共十座。皆堅壘也。調彭毓橘一軍。已回金陵大營。壽州知州毛維翼固守州城。兵少糧盡。堅守不懈。毛有銘。蔣凝學兩軍赴援。營於九里溝。阻於捻匪。未能進。皖南之地。經亂最久。人相食者數月。公聞之。愀然自咎。常曰。一亂世而當大任。人生之至不幸也。一。是月。李公鴻章克崑山縣城。駱公秉章擒賊。曾石達開斬之。粵逆自永安州起事。始封之五僞王者。至是盡斃矣。五月初三日。易開俊擊賊於涇縣。破之。初五日。江北之

賊由九洲渡江而南。公調成大吉周寬世兩軍進壽州。調李朝斌復水師趕赴上海。騰出黃翼升水軍。派江入淮。以爲臨淮官軍之助。初七日。李榕軍援勦湖口縣。初十日。李朝斌水師東下浦口。扼截渡江之賊。賊大半不能渡。楊公岳斌以水師入浦口。收復江浦縣城。鮑公超劉連捷等陸軍沿江追勦。與水師夾擊。賊之未渡者。殲焉。伏尸數萬。江北肅清。十二日。馳摺奏報金陵官軍攻克雨花臺僞城。及聚寶門外諸石壘。隨摺奏保總兵李臣典晏澧週等八員。又奏報水陸會克巢縣含山和州三城。隨摺奏保成發翎彭毓橘蕭慶衍等十員。陣亡參將陳邦榮等十二員弁請卹。附片奏報皖南江西軍情。壽州危急。調派水陸官軍援勦。勢恐不及。十三日。公弟國荃楊公岳斌彭公玉麟水陸會克下關草駝夾燕子磯賊壘。李朝斌成發翎劉連捷等軍。攻九洲賊壘。力戰大破之。殺賊二萬人。弁勇傷亡者亦二千人。十五日。攻克九洲洲。江面賊踪淨盡。鮑公超等陸軍渡江。會攻金陵。公自奉肅清江面之旨。敕造舟師。至是十載。全功乃竟。長江上下。一律肅清。公由安慶發銀一萬兩。犒賞是役將卒。蕪湖陸軍吳坤修等擊賊破之。進收金寶圩。易開俊劉松山擊賊於涇縣破之。十八日。公弟國荃攻長干橋賊壘破之。二十三日。朱品隆擊賊於青陽連破之。二十六日。劉典王文瑞會江西官軍擊賊於陶溪渡破之。景德鎮鄱陽縣肅清。賊併歸湖口。二十七日。馳摺奏水陸各軍會克江浦浦口草駝夾燕子磯諸城壘。力破九洲洲一關。江面一律肅清。隨摺奏保及總兵喻俊明丁泗濱等二十六員。陣亡副將鄒桂芳胡俊友請卹。附片奏報皖南江西及壽州軍情。金陵城大賊衆。合圍不易。必須嚴斷接濟賊糧之船。請敕下總理衙門。照會西洋各國。不得於金陵城外停泊輪船。又摺奏鮑超一軍。克寧國府與涇縣西河勝仗出力員弁。三案併保。開單請獎。又摺奏保毛有銘一軍。迭破潁西捻圩。會克運漕鎮出力員弁。開單請獎。附片舉劾江西釐局委員。江公忠義領楚勇至江西。由九江渡軍進勦湖口。是月。公與李公鴻章會奏請旨。核減蘇州松江兩府太倉州存糧。六月初二日。奉到上諭。曾國藩奏爲伊弟國荃懇辭巡撫恩命。並曾國荃奏懇收回成命。以開缺藩司。專辦軍務各一摺。該大臣等受寵若驚。固辭恩命。洵屬至誠。而朝廷懋賞懋官。權衡悉當。現在軍事方亟。時局孔艱。凡在臣工。正宜勉效忠。共期宏濟。該大臣惟嘗督率曾國荃忠誠報國。以副委任。正不必瀆辭朝命也。欽此。公子紀澤來安慶省公。江西官軍韓進春挫於洋塘湖口。賊勢復張。江公忠義與李榕軍力擊之。賊稍戢。鮑公超攻鍾山賊壘破之。回駐江干。軍人多病。未能進勦。

初四日。苗練陷壽州。知州毛公惟翼死之。成大吉駐守三河尖。周寬世毛有銘等退守六安州境。十二日。馳摺奏金陵圍師布置情形。壽州失陷。現圖補救之法。知州毛維翼亮節孤忠。請旨追贈道員。從優議卹。臣調度各軍。顧此失彼。請交部嚴加議處。道員蔣凝學提督成大吉赴救不力。請撤去升銜勇號。以示懲儆。又具摺奏請裁南洋通商大臣一缺。交各省督撫兼理華商交涉事件。附片奏委員採買口外戰馬二千四百匹。請救兵部查驗免稅放行。十六日。石埭賊竄陷黟縣。十八日。劉公典等軍收復黟縣。賊退歸石埭。十九日。江公忠義與李榕軍擊賊於堅山破之。二十二日。專摺奏采訪忠義第十五案。附片奏歙縣殉難紳士程枚功請卹。并其家屬十人。二十七日。馳奏彙報各路軍情一摺。金陵城下。暫難合圍。皖南江西濱江濱湖。一片逆氛。苗逆既破壽州。圍攻蒙城益急。鞭長莫及。徒深憂灼。附片奏馬新貽遠在蒙城。勢方危急。其安徽臬司印務。委萬啓琛暫行署理。是月。李公鴻章克吳江縣城。毛公鴻賓升授兩廣總督。奏調張運蘭募勇赴粵。七月初三日。江公忠義等軍攻賊於湖口之文橋。克之。賊濱江下竄。江西全境肅清。郭公嵩憲奉旨賞三品頂戴。署廣東巡撫。李榕補授浙江鹽運使司。初八日。公弟國荃克印子山賊壘。十二日。馳奏彙報各路軍情一摺。其一羣賊援救金陵。則蘇常等處。或有可乘之機。其一張運蘭奉調入粵。原部老湘營。現分守寧國府涇縣兩城最要之地。未可掣動。應令該臬司另募新勇。其一太平石埭之賊。踰嶺竄入黟縣。王文瑞一戰克之。勦辦極速。其一江忠義李榕兩軍。勦平湖口之賊。即令由皖南進取東壩。其一李世忠一軍。近頗愧悟。斂抑。其與苗逆積怨甚深。若坦然相處。當不至別生枝節。其一周寬世蔣凝學成大吉毛有銘各軍。防守要害。難以掣動。此外實無勁旅可援蒙城。凡六條。附片奏黃翼升水師赴援臨淮。應令李朝斌接署江南提督印務。又片奏陝西巡撫英傑奏請籌撥陝省餉鹽一案。現在苗逆叛亂。淮河梗阻。鹽無可行之道。請無庸置議。又奏采訪忠義第十六案。歙縣殉難紳士汪士勳請卹。并其家屬。十七日。吳公坤修擊賊於雙斗門。破之。二十日。賊由江西下竄者。大股圍攻青陽縣。朱品隆力疾督軍苦守。二十七日。馳摺奏報湖口各軍。疊挫賊鋒。會克文橋賊巢。羣賊遁走。陣亡將弁張儀卿等十三名請卹。附片奏報金陵蕪湖青陽軍情。及淮甸水陸布置情形。又具摺奏保蕪湖金柱關水陸防守。攻克灣沚黃池出力員弁。開單請獎。附片奏江西茶商。照辦落地稅。又奏參廬江知縣吳燮和革職一摺。三十日。公弟國荃攻上方橋賊壘克之。是月李公鴻章攻克太湖賊營。進

軍蘇州。袁端敏公甲三卒於家。公編錄訓詁小記雅訓雜記。每日記錄數則。以爲常課。八月十一日。易開俊劉松山擊賊於涇縣破之。十二日。馳奏疊奉諭旨。覆陳一摺。奏稱。近淮諸軍扼要防守。難以調動。皖南各軍。援勦方亟。不能調赴淮上。李世忠一軍。調以勦苗。亦不可恃。俟皖南軍勢稍鬆。當另籌勁旅。馳往臨淮會勦。附片奏查獲武職周瑞知縣賈遠城勾通苗逆。請革職訊辦。公弟國荃攻江東橋賊壘克之。十八日。賊襲攻寧國府。劉松山自涇縣回援破之。公調鮑超一軍。由金陵上援青陽。二十四日。易開俊擊賊於涇縣破之。二十七日。馳摺奏報金陵陸軍攻克上方橋江東橋諸堅壘。一律毀平。附片奏報青陽涇縣等處軍情。目下皖南羣盜如毛。幾與去年冬月相似。壽州苗黨凶燄復熾。周寬世成大吉蔣凝學毛有銘等勢均力敵。不相統屬。李續宜病勢日深。暫難東下。深恐軍志不齊。貽誤大局。請旨飭降調道員金國琛馳赴皖北軍營。綜理周寬世等四軍營務處。必能調護聯絡。無誤散之虞。又片奏上年奏派委員經理廣東釐金。仍應調回各原省當差。候補知縣丁日昌等。調回皖營。仍請酌予保獎。朱品隆苦守青陽縣城。凡三十八日。江公忠義一軍。所部道員席寶田一軍。李榕一軍。先後赴援。擊賊大破之。殺賊萬人。賊解去。併歸石埭太平一帶。自江面梗阻以來。湖南北借食川鹽粵鹽。江西借食浙鹽。兩淮引地皆失。至是江西肅清。公乃咨謀於諳悉鹽務之委員杜文瀾等。議復舊日引地。先行試辦官運淮鹽。行銷於江西一岸。核定西岸票鹽章程。招商領運。是月。李公鴻章分軍克江陰縣城。左公宗棠克富陽縣城。調劉典王文瑞引軍回浙。進攻杭州。唐公訓方奉旨總辦皖北各軍。劉公蓉授陝西巡撫。九月初八日。易開俊擊賊於涇縣破之。十二日。馳摺奏朱品隆苦守青陽。援師大捷。立解城圍。陣亡將弁李殿華許和山等十六員。弁請卹。江忠義李榕朱品隆席寶田等開單保獎。附片奏報蒙城文報漸通。可期解圍。劉典回浙。徽州防兵單弱。鮑超軍至南陵。進規東壩。江忠義等分兵以攻石埭太平之賊。但使皖南各股悉數驅除。則軍勢順矣。十九日。公弟國荃分軍克博望鎮賊壘。盡平之。二十二日。具摺奏陳京倉需米甚殷。遵照部議。悉心妥籌。并詳陳近年事勢。不得仍拘成例。擬將漕運鹽引二大政。變通辦理。附片奏請將道員黃冕留於蘇皖。經理漕政鹽務。又片報皖鄂軍情。維時黃冕至安慶見公。稟請於皖省設立米鹽互市一局。招湖南米商運米至皖。由皖設法運至上海。以達於天津。招兩淮鹽商運鹽至皖。與楚中米商交易而退。是爲鹽漕二政變通之法。既而不果行。二十四日。公弟國荃攻克上方門高橋門土

山方山七甕橋等賊壘。凡二十餘座。二十五日。進克中和橋賊壘。二十七日。馳摺奏報寧國涇縣防軍迭獲勝仗。陣亡勇弁鄧光武雷國英請卹。又摺奏訊結已革總兵黃彬被參一案。公弟國荃克秣陵關僞城。於是金陵西南東南兩面往來之路已斷。官軍漸已合圍。是月奉到文宗御製詩文集。二十八日。專摺奏謝天恩。石埭賊目古隆賢率衆投誠官軍。收復石埭太平二城。易開俊收復旌德縣城。彭公玉麟水師克水陽新河莊等賊壘。二十九日。歐陽夫人率眷屬到署。是月。擒匪竄擾湖北德安蕪黃之境。官文公調成大吉石青吉兩軍赴鄂援剿。十月初一日。彭公玉麟水師克滄溪長樂鎮賊壘。初二日。收復高淳縣城。初三日。易開俊收復寧國縣。蔣凝學成大吉收復。頴上縣。初六日。公弟國荃攻金陵城東賊卡五處。賊壘二十餘座。悉破平之。初七日。鮑公超會水師克東壩。十二日。馳摺奏金陵陸師疊克東南沿河八隘。並復秣陵關僞城。漸成合圍之局。又摺奏賊衆就撫。收復石埭太平旌德三城。請將降人古隆賢賞給虛銜頂戴。附片奏報淮上軍情。皖南水陸官軍。攻克東壩。得此要隘。皖南可冀肅清。金陵蘇州攻勦之事。較有把握。又片奏查明石埭太平旌德寧國四縣。前後失陷原委。又摺奏保金陵一軍。迭克城隘。出力員弁六案。併保開單請獎。鮑公超軍克建平縣。收復溧水縣。派營官宋國永。招撫廣德州賊未下。江公忠義引軍回駐江西饒州境。十五日。公弟國荃領蕭慶衍等軍扼紮孝陵衛。僧王軍至淮北。苗沛霖衆潰走死。蒙城解圍。練黨瓦解。唐公訓方收復淮南各城邑。公核定楚岸皖岸粟鹽章程。刊發委員。招商辦運。二十七日。馳摺奏水陸官軍勦撫兼施。疊復水陽東壩等要隘。高淳溧水寧國建平四縣。現派鮑超扼守東壩。調各軍分守城隘。請將就撫之張勝祿等三人。賞給虛銜頂戴。附片報提督王明山丁憂回籍。是日。又具摺密陳彭玉麟戰績。并奏報金陵大營將領李臣典等四員。請補提鎮實缺。皖南經亂。凋殘特甚。收復後。公亟派員散賑貧民。每縣籌銀數千兩。採買耕牛籽種。頒給鄉農。民大感悅。流亡漸復。是月。李公鴻章克復蘇州省城。公奉旨交部從優議敘。李勇毅公續宜卒於家。江忠濬調四川布政使。十一月初五日。金陵官軍治地道轟城。未克。十二日。具摺彙奏李世忠一軍。迭破苗逆各圩。會克懷遠縣。請開復革職處分。附片奏報金陵城東百餘里內。一律肅清。賊之糧路已斷。長淮一帶。頴上正陽壽州下蔡均已收復。又摺奏保肅清皖北水陸出力員弁四案。併保開單請獎。又代奏提督楊岳斌。請回籍養親一摺。又具摺奏保員外郎范泰亨。御史周學濬。知府陳濬孫衣言。同知李鴻裔。知縣鄧瑤涂。

宗籟黎庶昌訓導向師棟九員皆學行修飭可備任使是日奉到上諭兵部侍郎彭玉麟著加恩賞穿黃馬褂以示優獎欽此從公奏也十三日金陵城賊出撲營公弟國荃擊破之十六日賊於城外修築營壘又擊破之賊大股犯建平溧水二城官軍守禦卻之公日課於晡後披閱詩古文詞讀誦經子一卷時讀孟子書分四條編記一曰性道至言二曰廉節大防三曰抗心高望四曰切己反求二十七日具摺彙奏水陸陣亡傷亡在營病故員弁凡八百四十三員名開單請卹周萬倬會正明二員請從祀湖南昭忠祠又摺奏安徽撫臣李續宜病故錄其臨終遺書呈覽以明忠憤悱惻之忱附片奏報賊酋李秀成自蘇州逸出已入金陵官軍攻城獲勝二次并調派各軍嚴防江西邊境又奏采訪忠義第十七案附片奏定遠縣人陳鼎需合族殉難男婦七十六人彙請分別旌卹二十八日接見安慶所屬各邑新入學生員七百餘名是月李公鴻章克無錫縣城分軍入浙江境克平湖嘉善海鹽等縣十二月初二日建多寶倉積貯穀米核定斂散章程初十日核定皖南開墾荒田章程十二日馳奏疊奉諭旨分條覆陳一摺其一查明李世忠在壽州下蔡與提督陳國瑞爭功搆釁之案其一查明蔣凝學收復正陽關時與副將康錦文兵勇開礮誤傷之案其一賊之大股分屯梅渚意在奪關上竄鮑超力扼東壩暫不能進取以合金陵之圍其一周寬世軍調回安慶防守毛有銘軍移駐皖南作游擊之師成大吉石清吉兩軍現赴鄂省或能撥赴陝西應由官文調度凡四條又摺奏保江西肅清青陽解圍在事出力員弁彙單請獎附片奏陳明李世忠近日軍情賊之大股圍犯江西已飛咨左宗棠沈葆楨併力扼守以保上游完善之區金陵賊氣尙固一併奏陳近日軍情賊之大股圍犯江西已飛咨左宗棠沈葆楨併力扼守以保上游完善之區金陵賊氣尙固一時恐難速克又摺奏保攻克九洑洲肅清江面水師出力員弁開單請獎附片奏總兵喻吉三請加提督銜簡授實缺又摺奏訊明周瑞賈連城通苗一案查無實據應請無庸置議是月江誠恪公忠義卒於軍唐公訓方經

僧王奏參奉旨以藩司降補喬公松年補授安徽巡撫

〔甲子〕同治三年公五十四歲正月公在安慶初六日賊由寧國縣上竄陷績溪縣初九日唐義訓引軍收復績溪追賊於歙縣南境破之賊竄遂安開化之境勢趨江西十二日奏規復淮南鹽務一摺奏稱江路肅清運道暢行無阻所有楚西各岸力圖整理而籌辦之難有二大端一則鄰私浸灌太久積重難返不能驟禁一則釐卡設

立太多。諸軍仰食。不能概裁。按今日時勢。仿昔年成法。惟有疏銷輕本保價杜私四者。實力講求行之。以漸期於課餉兩有裨益。附片奏報近日軍情。金陵城賊爲負隅死守之謀。其一股由寧國竄績溪。意在衝過徽州。直上江西。又摺奏訊結貪鄙營私之將弁張祿等。請革職永不敘用。時蘇浙田荒未耕已久。官軍攻勦收復大半。賊飢無所得食。乃突竄徽浙之交。就食於江西。十七日。賊大股竄績溪。與遂安股匪分擾婺源玉山。遂竄廣豐鉛山一帶。廣饒撫建皆爲戒嚴。二十一日。公弟國荃攻克鍾山石壘。僞號天保城。遂調派各軍分扼太平門神策門城圍乃合。二十七日。馳摺奏賊陷績溪。旋經收復。毛有銘一軍由安慶渡江。計可抵徽。沈葆楨所派席寶田韓進春兩軍亦不到防。飭各軍扼要防堵。力保江西藩籬。附片奏江寧藩司萬啓琛應赴江北。督辦糧臺。安徽臬司英翰駐蒙宿一帶。襄辦勦捻。請催馬新貽赴藩司任。委何璟署臬司一缺。附片奏陳李世忠近日情形。已交出五河縣城。撤遣所部弁勇。發給餉鹽。資以回籍。不至再有滋擾。又片奏江楚米價翔貴。本屆湖南漕米。請仍解折色到部。就近採辦。以歸簡易。二十八日。專奏恭謝年終恩賞一摺。年終密考一摺。學政聲名一片。是月。李公鴻章克宜興縣城。左公宗棠克桐鄉縣城。都與阿公奉旨移防綏遠城。詔公揀派得力之員。接統其軍。河南髮捻股匪。竄擾湖北之境。二月初三日。核定江寧七屬揚州儀徵等處鹽務章程。初九日。席寶田收復金谿縣城。十二日。馳摺奏金陵官軍攻克鍾山僞城。遂合城圍。賊之外援將絕。糧米無多。唯是圍師不滿五萬。分布九十餘里。而賊衆數十萬。深有窮寇奔突之虞。附片奏浙境股匪。覓食偷生。銳意上竄。絕不返顧。勢將蔓延江西腹地。窺伺撫建兩郡。溧陽老巢。新爲蘇軍所破。其黨歸併湖州。目上湖州賊數極多。若竄江西。毫無阻隔。防兵單薄。勢實可虞。又片奏臣所部各軍。添募益多。將材益少。類皆樸謹自守之員。實乏統率一路之選。其都與阿所部一軍。請特簡大員接統。其水師紅單船等。卽由臣兼轄。酌量裁撤。以節糜費。十五日。喬公松年至安慶。見公。接授巡撫關防。出防臨淮。賊退出廣德州城。併入湖州。鮑公超進軍攻句容。江西之賊。竄擾撫建各屬邑。十八日。席寶田破賊於建昌城外。十九日。李世忠委其部將王廷瑞陳自明二員。到安慶稟請交出各城。遣散所部。以三月爲期。公獎勵而遣之。二十七日。具摺奏籌議江蘇安徽等省綠營額兵。經亂之後。散亡殆盡。已潰之卒。不准收伍。孱弱之兵。卽予裁撤。弁目出缺。停緩敘補。統俟軍事大定。乃復舊制。庶幾兵歸實用。餉不虛糜。又摺奏湖北防務正殷。提督江長貴請飭赴本任。

附片奏金陵城賊放出老弱婦女萬餘人。爲節省米糧之計。湖州羣匪鬻集。皆思上犯江西。以覓生路。江西撫建股匪人數實衆。請飭下閩粵兩湖。一體嚴防。免致變成流寇。又煩兵力。江忠義舊部。交江忠朝統帶。又片遵旨提訊江西知縣石昌猷一案。委派刑部郎中孫尙絨會審。又片奏保道員忠廉署理兩淮鹽運使。堪以勝任。又片奏李世忠呈請刻期遣散滁州等處兵勇。酌留千餘人。交總兵陳自明統帶。又與沈公葆楨會奏查參江西釐金委員萬永熙革職。是月。李公鴻章分軍克溧陽縣城。又克浙江嘉興府城。程忠烈公學啓受傷。旋卒於蘇州。程公初陷賊中。投誠後。經公弟國荃拔擢立功。蘇省之復。戰功爲多。左公宗棠攻克杭州省城。餘杭縣城賊。併入湖州。踞守不下。都興阿公領馬隊北上。富明阿公署江寧將軍。接辦揚州防務。派軍渡江。會馮子材之軍。進攻丹陽。三月初五日。鮑公超攻破三岔賊卡。初七日。克句容縣城。初九日。克寶堰賊壘五座。周寬世軍中營官楊復成。侵吞軍餉。公親提訊得實。於軍前斬之。江西賊勢日衆。沈公葆楨奏請截留江西釐金。專充本省之餉。戶部議准。公接戶部咨文。深憂之。十二日。馳摺奏江西牙釐。仍應歸臣處經收。以竟金陵將蕺之功。附片奏報軍情。金陵城賊堅守不下。句容克復。賊之外援將盡。江西之賊。擾犯南豐新城廣昌之境。又摺奏結水師巡江釀命一案。又奏采訪忠義第十八案。十三日。浙江之賊。續竄徽州。唐義訓毛有銘擊賊小挫。十四日。賊撲徽州城。官軍擊卻之。十五日。奉到上諭。協辦大學士兩江總督曾國藩督軍勦賊。節制東南數省。盡心區畫。地方以次削平。舉賢任能。克資羣力。著交部從優議敘。欽此。是歲京察行省督撫。奉優敘之旨者。曰官文。公曰駱公秉章。曰左公宗棠。曰李公鴻章。凡五人。十七日。唐義訓毛有銘兩軍。擊賊於楊村。官軍大挫。賊勢日熾。大股竄婺源。入江西境。公調朱品隆軍。馳援徽州。調鮑超軍回東壩。調周寬世金國琛兩軍。渡江進駐饒州之境。廿日。鮑公超收復金壇縣城。公既上江西牙釐一疏。詞氣抗厲。於是沈公葆楨亦奏請開缺。詔慰留之。戶部議以江西牙釐之半。撥歸金陵皖南大營。以其半留供本省之餉。公以是時金陵未克。江西流寇復盛。統軍甚多。需餉甚鉅。既恐餉匱。以致軍事決裂。又以握兵符。掌利權。爲時所忌。遂有功遂身退之志矣。二十五日。馳摺奏鮑超一軍。克句容縣。生擒二酋。毀五賊壘。隨摺奏保總兵馮標譚勝達唐仁廉等二十員。陣亡知府田芬參將陽茂泰等六員。請卹。附片奏徽州軍敗。遍地賊氛。前隊已竄江西。續至者絡繹不絕。金陵圍師。責成曾國荃經理。儻堅城幸克。卽由曾國荃彭玉麟楊岳斌三銜馳奏。大

概以慰聖懷。陝西漢中髮捻各匪。竄犯鄂豫之境。圖解金陵之圍。江面上下。皆宜籌防。又片奏身患嘔吐眩暈之證。請假一月。在營調理。又片奏降補藩司唐訓方請假回籍省墓。又片奏浙江鹽運使李榕暫緩赴任。留營勦賊。又奏楊復成正法一摺。二十七日。專摺奏謝京察優敘恩。是日奉到寄諭。總理衙門奏撥輪船經費。改解京師一欸。爲銀五十萬兩有奇。先行撥解金陵軍營。以資散放。二十八日。核定淮北票鹽章程。是月。左公宗棠克武康德清石門三縣城。江西官軍克新城縣城。賊竄入福建邊境。陝西髮逆合捻匪竄湖北。成大吉擊賊於樊城破之。賊竄河南境。西安將軍忠勇公多隆阿卒於盤屋營次。四月初三日。設立書局。定刊書章程。江南浙江自宋以來。爲文學之邦。士紳家多藏書。其鏤板甚精緻。經兵燹後。書籍蕩然。公招徠剞劂之工。在安慶設局。以次刊刻經史各種。延請績學之士。汪士鐸莫友芝劉毓松張文虎等。分任校勘。初九日。彭公玉麟過安慶見公。旋赴九江防守。十二日。馳奏徽州防軍挫失。未能遏賊西竄。自請交部嚴加議處。唐義訓毛有銘分別革降。陣亡將弁金茂榮李祖祥等十三員名請卹。又摺奏鮑超一軍。克復金壇。隨摺奏保游擊張遇春一員。陣亡將弁鮑昌齡宋連陞王正禮請卹。又摺奏江北一律肅清。提督李世忠遣散部衆。次第交出全椒天長來安滁州六合五城。呈請開缺。回籍葬親。懇恩准予開缺回籍。保全令名。所遺江南提督一缺。懇迅賜簡放。以重職守。附片奏接准戶部文稱湖北湖南四川江西廣東江蘇每月協供臣營之餉。爲數甚鉅。查核湖南一省。除東征局半釐外。無有奏定協解之欸。去夏奏撥江西洋稅。旋即退還廣東釐金。係臣所最抱疚之端。然本年僅解過九萬兩。江蘇釐金。係臣職分應籌之餉。本年亦僅解過三萬兩。四川湖北兩省。則並無協解臣臺之欸。戶部所指六省供餉。不知以何處奏咨爲據。遂疑臣廣攬利權。收支巨款。臣以庸愚。謬當重任。局勢過大。頭緒太多。論兵則已成強弩之末。論餉則久爲無米之炊。萬一竭蹶顛覆。亦何能當此重咎。懇恩飭將皖北軍餉。責成喬松年吳棠富明阿共籌之。其蕭慶衍毛有銘等數軍。原支鄂餉。請飭下官文嚴樹森一力供支。俾臣得少減謀餉憂灼之情。不勝大幸。又片奏報軍情。金陵一軍。開地道以攻城。傷亡弁勇近三千人。此時惟有嚴圍猛攻。力禁接濟之法。江西續竄入之賊。又將延擾腹地。髮捻巨股。突過隨棗。意在假道皖鄂。東援金陵。彭玉麟現赴上游。防扼江面。惟皖北兵單。空虛可慮。又片奏江西南康知縣石昌猷供詞支吾。請革職以憑嚴訊。十四日。丹陽之賊上竄。鮑公超截擊大破之。常州之賊。竄至徽州境。唐義

訓毛有銘金國琛截擊破之。餘匪竄江西。十九日奉上諭。曾國藩奏徽軍挫失。自請嚴議之處。著加恩寬免。欽此。又奉上諭。江南提督著李朝斌補授。江南水師提督著黃翼升補授。江南淮揚鎮總兵缺。著歐陽利見補授。欽此。二十七日。馳摺奏報。鮑超截擊丹陽之賊大勝。又奏蘇賊續竄徽州。官軍擊勦獲勝。擒斬解散。過其大半。附片奏稱。蘇浙羣賊。由徽上竄者。約分六起。第一起現踞江西之南豐。分竄福建汀州之境。第二起延擾於鉛山湖坊等處。第三起攻撲撫州。退踞許灣。第四起則爲徽軍所敗。入江境者人數無多。而廣德湖州各賊。尙有二起。圖犯徽境。併入江西。目下軍情。以江西爲最重。又摺奏請展緩江南本科鄉試。附片奏陳。臣於上月請假。現已期滿。病勢未能遽痊。惟湖北賊勢下竄。金陵圍師。江西羣賊。均在危疑震撼之際。已力疾強起。照常治事。是月。江西贛水以東。廣信撫州建昌寧都各屬。賊蹤遍擾。失陷十數城。江西官軍。浙江援軍。破賊於玉山。又破之於撫州城外。又破之於弋陽貴溪等處。而賊勢未衰。張公運蘭軍在廣東。奉旨飭赴福建。臬司任率勇至閩境防勦。李公鴻章克常州府城。揚州鎮江官軍。會克丹陽縣城。江蘇全境皆平。唯金陵未克。李公鴻章撥派劉銘傳等軍。進守句容東壩。公乃調鮑超一軍。循江而上。援勦江西。楊公岳斌奉旨督辦皖南江西軍務。劉公典幫辦軍務。李朝斌領太湖水師。攻湖州城外賊壘。破之。李公鴻章委員解到上海餉銀二十二萬兩。公以其十三萬兩。解付金陵大營。以五萬兩給付鮑超軍營。以四萬兩留安慶糧臺。賊之竄湖北者。人數極衆。護軍統領貞恪公舒保陣亡。僧王擊賊於隨州破之。逆首洪秀全於二十七日服毒自斃。李秀成立其子福瑱堅守金陵。祕不發喪。雖城中賊亦不知也。五月初六日。專摺恭謝天恩。寬免嚴議。鮑超軍由蕪湖拔營。上援江西。楊公岳斌領水師陸軍共萬人。援江西。初十日。來安慶見公。旋赴江西督勦。公派提督黃翼升接領水軍。扼攻金陵。十二日。馳摺奏浙江提督鮑超請假四箇月。回四川籍葬親。該軍將弁。即令楊岳斌統率以行。必可指揮如意。懇恩俯念鮑超苦戰功多。俾得成歸。望之禮。展烏私之誼。彌彰聖朝孝治之隆。附片奏報軍情。湖州廣德尙爲賊踞。江西省城戒嚴。調派水陸各軍。入省防守。鄂省髮捻下竄。距皖甚近。調李榕等軍。渡江北防。疏入。奉上諭。曾國藩奏帶兵大員。請假葬親一摺。已明降諭旨。命鮑超俟金陵攻克。江皖肅清。再行給假回籍。以遂孝思等因。欽此。十四日。奉到寄諭。令李鴻章會軍攻金陵。公即日具咨李公催之。十七日。鮑公超軍至九江。尋至南昌。與沈公葆楨商度防勦。所部一軍。由瑞州進勦。二十

二日。馳摺奏稱蘇常既克。本擬咨請李鴻章親來金陵會勦。前接李鴻章來文。言將士太勞。宜少休息。待湖州克後。再行撥兵助攻金陵等語。不知者。謂臣弟國荃貪獨得之美名。忌同列之分功。非臣兄弟區區報國之意。今幸欽奉寄諭。已恭錄具咨。加函催請。臣本欲前往金陵督勦。因皖中防勦喫緊。未可暫離。懇恩飭催李鴻章。速赴金陵。實爲至幸。二十七日。馳摺奏續奉諭旨。飛催李鴻章會勦金陵。前此奉撥輪船經費一項。已解到銀二十五萬兩。分撥各軍。轉瞬已罄。不敢謂籌餉之太少。而深悔募勇之太多。惴惴焉恐生他變。或誤大局。既望李鴻章統兵來助。尤望其攜餉以相遺也。并奏稱楊岳斌鮑超均赴江西。兵力極厚。改調周寬世一軍。令赴皖北。以防鄂省東竄之賊。擬令陳國瑞駐紮壽州。處淮南江北適中之地。爲游擊之師。仍當防守要區。嚴扼江面。以免掣動金陵全局。附片奏臣於前年。曾請添設長江水師提督。旋經部臣議准。此次欽奉諭旨。李朝斌補授江南提督。自係李世忠所遺之缺。黃翼升所補水師提督。當係長江新設之缺。應請敕部撰擬字樣。新鑄印信。頒發來南。以昭信守。又具摺奏保鮑超一軍。疊克東壩甸容金壇三案。出力員弁。彙單請獎。又奏報高淳溧水各城。水陸會攻克復。出力員弁。彙單請獎。二十八日。核定石昌猷案卷。江西道員周汝筠稟許石昌猷袒匪殺良一案。卷宗繁委。公親訊數次。委藩司馬新貽臬司何璟道員勒方琦。與奏委之郎中孫尙絨反覆研鞫。至是定案擬結。三十日。公弟國荃攻克龍膊子山陰堅壘。僞號地堡城。遂督軍日夜環攻。不少休息。是月。李公鴻章克浙江長興縣城。湖北擒匪竄擾英山霍山之境。楊公岳斌奉旨授陝甘總督。六月初八日。覆訊周汝筠石昌猷一案。十二日。馳摺奏稱。旬日以來。歷奉寄諭。殷殷指示。不外迅勦金陵及皖北江西兩路軍務。所有近日籌辦情形。分條詳覆。其一李鴻章平日任事最勇。進兵最速。此次會攻金陵。稍涉遲滯。蓋無避嫌之意。始有讓功之心。其一中外匪徒。仍有偷濟賊糧軍火之事。自合圍以來。搜查防範。何敢信其絕無疏漏。唯當諄飭各營。加意嚴防而已。其一髮捻東趨。竄入英山境內。調派江南岸各軍。馳赴皖北。目下不能速到。其一安慶人心震動。未可輕離。俟皖北稍安。卽當前赴金陵。會商勦辦。凡四條。十六日。金陵官軍治地道成。轟陷城垣二十餘丈。公弟國荃督領將弁。衝殺入城。圍攻僞宮城。卽日由驛八百里馳報金陵。克復大概情形。是夜攻克內城。搜殺三日。十九日。擒賊酋李秀成。洪仁達。賊黨死者十餘萬人。公聞捷後。喜極而悲者。良久乃已。二十三日。會銜由驛六百里。加緊馳奏。克復金陵全股悍賊。盡數殲滅。詳

細情形一摺。奏稱金陵一軍圍攻二載有奇。前後死於疾疫者萬餘人。死於戰陣者八九千人。令人悲淚。不堪回首。臣等忝竊兵符。遭逢際會。既慟我文宗不及目覩獻馘告成之日。又念生靈塗炭。爲時過久。惟當始終慎勉。掃蕩餘匪。以蘇子遺之困。而分宵旰之憂。此次應獎。應卹人員。另繕清單。籲懇恩施。二十四日。公由安慶登舟。由火輪船駛赴下游。泊於采石磯。二十五日。抵金陵大營。見諸將領慰勞之。親訊賊酋李秀成。札委員弁。訪求咸豐三年賊陷時殉難員紳遺骨。二十六日。奉到上諭。楊岳斌彭玉麟會國荃馳奏克復金陵大概情形一摺。逆首洪秀全等以數十萬逆衆。久踞金陵。負隅死守。會國荃等惟督兵圍攻。所部不滿五萬。兩載以來。將城外賊壘悉數掃盪。茲復以炎風烈日之中。傷亡枕藉之餘。併力猛攻。克拔堅城。非會國藩調度有方。會國荃及各將士踴躍用命。不能建此奇勳。披覽之餘。曷勝欣慰。此次立功諸臣。將僞城攻破。巨懸就擒。卽行渥沛恩施。同膺懋賞。欽此。二十七日。公巡視金陵城垣地道攻入之處。按行城外各軍營壘。二十八日。軍士得洪秀全逆屍。昇之江干。公親驗而焚之。二十九日。奉上諭。本日官文會國藩由六百里加緊紅旗奏捷。克復江寧省城一摺。覽奏之餘。實與天下臣民同深嘉悅。此次洪逆倡亂於粵西。於今十有五年。竊據江寧亦十二年。蹂躪十數省。淪陷數百城。卒能次第蕩平。殄除元惡。該領兵大臣等。櫛風沐雨。艱苦備嘗。允宜特沛殊恩。用酬勞勩。欽差大臣協辦大學士兩江總督會國藩。自咸豐三年。在湖南首倡團練。創立舟師。與塔齊布羅澤南等屢建殊功。保全湖南郡縣。克復武漢等城。肅清江西全境。東征以來。由宿松克潛山太湖。進駐祁門。疊復徽州郡縣。遂拔安慶省城。以爲根本。分檄水陸將士。規復下游州郡。茲幸大功告成。逆首誅鋤。實由該大臣籌策無遺。謀勇兼備。知人善任。調度得宜。會國藩著加恩賞加太子太保銜。錫封一等侯爵。世襲罔替。並賞戴雙眼花翎。浙江巡撫會國荃以諸生從戎。隨同會國藩勦賊數省。功績頗著。咸豐十年。由湘募勇。克復安慶省城。同治元二年。連克巢縣含山和州等處。率水陸各營。進逼金陵。駐紮雨花台。攻拔僞城。賊衆圍營。苦守數月。奮力擊退。本年五月。克鍾山石壘。遂合江寧之圍。督率將士鏖戰。開挖地道。躬冒矢石。半月之久。未經撤隊。克復全城。殄除首惡。實屬堅忍耐勞。公忠體國。會國荃著賞加太子少保銜。錫封一等伯爵。並賞戴雙眼花翎。等因。欽此。其同案奉旨錫封者。提督李臣典一等子爵。蕭孚泗一等男爵。均賞戴雙眼花翎。提督黃翼升張詩日等。總兵朱洪章熊登武等。按察使劉連捷等。凡百二十餘員。均奉旨獎敘。

其陣亡總兵郭鵬程王紹羲副將陳萬勝等十六員奉旨優卹。皆公前疏所請也。同日又奉上諭。粵逆久踞江寧。負隅抗拒。實爲從來未有之悍寇。此次水陸各軍。於溽暑炎蒸之際。猛力環攻。迅克堅城。悍黨悉除。渠魁就縛。非會國藩運籌決策。督率有方。會國荃等躬冒矢石。鼓勇先登。末由建此奇功。成乃丕績。朝廷嘉悅之懷。實難盡述。除會國藩等已加恩錫封外。其出力員弁兵勇。並著查明保奏。候旨施恩。發去銀牌四百面。著會國藩會國荃等擇其功績最著者。先行頒給。以勵戎行。欽此。同日又奉旨賞賚東南各路統兵大帥。及封疆大臣。普加異數。欽差大臣僧王官文公李鴻章楊公岳斌彭公玉麟駱公秉章鮑公超等。各有差。左公宗棠沈公葆楨等。有待也。是月左公宗棠克孝豐縣城。蕭公孚泗聞訃丁憂。七月初七日。閱視金陵城北僞城僞壘。及官軍所開地道之處。派委道員廳際雲知府李鴻裔會訊李秀成。令其自書供詞。前後凡四萬餘字。初二日。李忠壯公臣典卒於軍。金陵之克。以李公爲戰功之首。公弟國荃勸惜之。初四日。周視金陵城垣。委員修築。定議裁撤湘勇。設善後局。撫卹難民。鮑公超擊賊於撫州許灣。大破之。殺賊四萬人。賊大潰。初六日。公親訊賊供。誅李秀成洪仁達洪仁發三名。初七日。馳摺奏洪秀全李秀成二賊酋。分別處治。僞幼主洪福瑱查無實在下落。李秀成供詞。謹鈔送軍機處。以備查考。歷年以來。中外紛傳逆賊之富。金銀如海。乃克復老巢。而全無貨物。實出意料之外。目下籌辦善後事宜。需銀甚急。爲款甚鉅。如撫卹災民。修理城垣。駐防滿營。皆善後之大端。其餘百緒繁興。左支右絀。欣喜之餘。翻增焦灼。金陵之克。賊所造宮殿行館。皆爲官軍所燬。公乃於水西門內擇房屋稍完者。委員葺治。以爲衙署。幼逆洪福瑱遁走廣德。賊黨爭迎之。初十日。公設酒於城內。宴犒諸將領。十一日。鮑公超收復東鄉金谿兩縣城。十二日。江忠朝等克復崇仁宜黃兩縣城。江西東路賊勢稍衰。十三日。公札撤湘勇二萬五千人。留萬人防守金陵。留萬五千人。派委劉連捷朱洪章朱南桂等領之。以爲皖南北游擊之師。咨湖北湖南督撫。籌發撤勇欠餉。十六日。專摺奏謝天恩。錫封侯爵。并寶所獲僞金玉印三方。咨送軍機處。十七日。巡視江南貢院。委員修葺。出示曉諭士民復業。核定金陵房產章程。凡八條。二十日。馳摺奏福建陸路提督蕭孚泗聞訃丁憂。請開缺回籍。又摺奏一等子爵李臣典病故請卹。并將李臣典戰功。開列清單。錄呈御覽。請於江西之吉安府及安慶金陵建立專祠。附片奏李秀成業經正法。未及檻送京師。洪秀全戮尸焚化。未及傳首各省。又片奏保金陵各軍將領熊登武朱南桂張詩日。

伍維壽朱洪章皆有獨當一路之才。請次第簡放提督實缺。現守寧國之總兵劉松山足以獨當一面。亦後起之將材也。又片奏近歲以來。但見增勇。不見裁撤。無論食何省之餉。所吸者皆斯民之脂膏。所損者皆國家之元氣。前此賊氛方盛。不得已而增募。以救一時之急。今幸大局粗定。因與臣弟國荃商定。將金陵全軍裁撤其半。鎮江馮子材之兵。全行裁撤。揚州富明阿一軍。暫難遽撤。軍與日久。各有厭苦兵閒之意。但使欠餉有著。當不至別生枝節。并陳明會國荃克城之後。困憊病狀。姑在金陵調養。料理善後。臣即日回安慶。一次布置上游軍事。江西軍事得手。即由楊岳斌主稿會奏。公拜摺後。登舟上浙。二十五日。舟泊銅陵夾。咨廣東督撫。停止釐金。還歸本省經收。札委錢鼎銘丁日昌等辦上海捐輸。分撥松滬釐金。以濟軍餉。鮑公超軍克復南豐縣。續克新城縣。招降數萬人。賊黨南竄南贛寧都。三郡戒嚴。浸及閩粵之境矣。二十七日。李公鴻章左公宗棠會克湖州府城。二十八日。公舟抵安慶。二十九日。馳摺奏。廣東釐金一款。兩年以來。深資餽運。私衷耿耿。如負重笈。請旨飭下廣東督撫。截至本年八月止。毋庸再解。并請照一百二十萬兩之數。加廣該省鄉試文武永遠中額四名。以彰粵人急公之義。附片奏稱湘勇召募之初。選擇鄉里農民。有業者多。無根者少。但使欠餉有著。當可安靜回籍。昨奉諭旨。有挑補額兵一條。恐湖南之民。必不愿補三江綠營之額。臣以爲勇則遣回原籍。兵則另募土著。各返本而復始。庶經久而可行。至寄諭飭查洪福瑱實在下落。應俟查明續奏。又片奏補送李秀成供詞。又片奏報軍情。江西兵威大振。無須添派援軍。所慮者皖南之廣德。皖北之英霍。現在陳國瑞進勦麻城。英翰進紮商城。蔣凝學進紮英山。李榕調防桐城。布置尚密。但無大枝勁旅。痛加勦洗耳。是日具摺奏結周汝筠石昌猷一案。左公宗棠克安吉縣城。浙江全省皆平。李公鴻章派劉銘傳一軍。克復廣德州城。賊黨挾洪福瑱遁走寧國山中。是月。僧王由豫入楚。擊勦髮捻各匪破之。八月初一日。湖州廣德之賊。竄徽州南境。劉松山截擊破之。初三日。左公宗棠截擊賊於昌化淳安之境。大破之。斬賊目黃文金。初七日。唐義訓易開俊截擊賊於歙縣南境破之。初九日。易開俊擊賊大破之。十三日。馳奏欽奉諭旨。分條覆陳一摺。其一江寧省城賊踞最久。居民流亡尙未復業。委記名臬司黃潤昌趕緊興修貢院。庶冀士子雲集。商民亦可漸歸。其一駐防旗營。俟貢院工竣。以次修理。旗兵現存八百餘人。俟營房粗定。再議挑補足額。其一蘇皖兩省疆輿。跨越江淮。據御史陳廷經陳請變通畫江分省。臣以爲軍事吏事之興廢。

視疆吏之賢否。不必輕改成憲。其一楊岳斌應赴陝西新任。江西軍務。應令鮑超專顧北路。劉典席寶田王文瑞江忠朝等分勦南路。不必另派督辦大員。其一皖北喫緊。飛催劉連捷等渡江防勦。凡五條。附片奏委道員龐際雲署江寧鹽巡道缺。仍飭辦善後局。又具摺奏保克復金陵陸軍出力員弁。開單請獎。陣亡傷亡病故員弁五百一名。開單請卹。附片奏稱臣自任兩江督師。東征數年。奏保積至二十二案之多。軍務慳儉。未及按名註考。懇請敕部。將巨軍報案。均照原單。一體註冊。又附片密奏大功粗立。臣兄弟及前後文武各員。均叨竊殊恩異數。追思昔年患難與共之人。其存者。如李元度一員。獨抱向隅之感。其沒者。如江忠源何桂珍劉騰鵠畢金科四人。皆有私衷抱疚之端。謹略陳一二。懇請恩旨。十四日。易開後擊竄賊破之。十六日。唐義訓金國琛擊竄賊破之。餘匪挾供福瑣竄入江西廣信之境。浙江官軍追擊之。十七日。專摺進呈安徽全省地圖。並長江圖說。奏稱知府劉翰清縣丞方駿謨淹雅詳慎。臣派委該二員。細查詳繪。裝成全冊。恭呈御覽。賊圍撲英山縣。蔣凝學固守擊賊破之。劉連捷朱洪章朱南桂領湘勇萬餘人。渡江而北。公調派湘勇由桐城進勦英山。調派李榕王可陞何紹彩等軍八千人。由六安進援霍山。二十七日。馳摺代奏。臣弟國荃病勢日增。請開缺回籍調理。又摺奏湖州廣德敗賊。併犯歙南。官軍截勦屢勝。陣亡參將唐遠晏請卹。附片奏長江水師新定規模。應責成彭玉麟周歷巡察。區畫一切。其安慶善後事宜。札飭藩司馬新貽臬司何璟總兵喻吉三會同妥辦。又片奏報江西皖北軍情。調軍勦辦。并報定期起程。駐紮江寧舊治。又奏。截停淮北餉鹽。規復票鹽舊制一摺。是月。楊公岳斌赴贛州督師防勦。王文瑞克復粵都縣城。九月初一日。公由安慶登舟啓行赴金陵。初八日。舟抵金陵。黃公潤昌監修貢院工畢。初九日。公入城閱視貢院工程。初十日。入居署中。核定安徽全省丁漕徵收章程。是日奉到上諭。會國荃督兵數載。克復江寧省城。偉績豐功。朝廷甚資倚畀。第櫛風沐雨。辛苦備嘗。致病勢日見增劇。若不俯如所請。不足以示體卹。已明降諭旨。准會國荃開缺回籍。並發去人蔘六兩。以資調理。該撫其安心靜攝。善自保衛。一俟病就痊愈。即行來京。陛見。以備倚任。所有江寧善後事宜。即著會國藩馳往江寧。斟酌機宜。妥籌辦理。欽此。同日奉到上諭。浙江巡撫著馬新貽補授。英翰著補授安徽布政使。安徽按察使著何璟補授。欽此。十一日。馳摺奏江南貢院修建工竣。已通飭各屬。出示曉諭。定於十一月舉行鄉試。兩江人士。聞風鼓舞。流亡旋歸。商賈雲集。請旨簡放考官。附片奏札飭江

西藩司趕辦江南硃墨卷各一萬八千套。定期解赴金陵。又片奏札調藩司萬啓琛回駐江寧。運司忠廉由泰州移駐揚州。湖北髮捻大股。圍英山城。蔣凝學堅守賊退。其一股趨太湖。劉連捷等軍至太湖。賊均退回湖北蕪水羅田之境。公札調朱南桂朱洪章二軍駐宿松太湖。劉連捷一軍駐安慶。二十日。公弟國荃奉旨詣明孝陵致祭。江西浙江官軍會擊竄賊於廣信府境。大破之。洪福瑱遁走石城。江西東境肅清。二十五日。席寶田軍追擒幼逆洪福瑱。送南昌斬之。二十六日。設發審局。二十七日。馳摺奏報官軍驅賊出境。全皖肅清。隨摺奏保易開俊唐義訓劉松山金國琛四員。又具摺奏續保彭玉麟水軍。王可陞陸軍。青陽溧水高淳東壩各案出力員弁。開單請獎。又奏續保江忠義席寶田兩軍。青陽案內出力員弁。開單請獎。是日。又具摺奏稱安徽界連楚北。自楚師入境。疊復郡邑。按畝捐錢。支應兵差。百姓苦之。安慶克後。停止畝捐。改辦抵徵。現在札飭一律開辦。丁漕。所有從前收過抵徵項下。應專案作正報銷。二十八日。札派鄉試內外官員。是月。鮑公超擊賊於寧都州城外。大破之。州城解圍。賊潰竄閩粵境。江西全省皆平。左公宗棠奉旨錫封一等伯爵。鮑公超一等子爵。楊公岳斌由贛州回南昌省城。奏請回湘增募陸勇。赴甘肅勦辦。賊之竄廣東者。攻撲南雄州。其竄閩者。陷武平縣城。張忠毅公運蘭死之。賊遂逼擾汀州屬境。陷漳州府城而踞之。湖北髮捻大股。圍撲蘄水官軍營盤。石威毅公清吉陣亡。十月初一日。公弟國荃登舟回湘。公送之至采石磯乃還。初四日。公還署。初五日。專摺奏謝弟國荃開缺恩旨。又奏謝弟國華貞幹各加賞恩。初七日。考試督署書吏。李公鴻章委員解到上海協餉銀十七萬兩。支發江皖各路湘軍欠餉。公定議撤遣湘勇。什去八九。十二日。具摺代奏提督鮑超請假六箇月。馳回四川本籍。親營葬事。兼養傷病。令其部將宋國永婁雲慶分領霆營之衆。附片奏金陵遣撤勇丁。先後回籍。沿途安帖。并報皖鄂軍情。檄調劉連捷等軍。赴鄂授勦。調易開俊一軍。渡江而北。與李榕王可陞等爲後路策應之師。又奏采訪忠義第十九案。附片奏安慶通判達凌阿在壽州殉難請卹。蘇州從九品蔣映杓訓導梅振鏞請卹。并其家屬十一人。十三日。奉上諭。現在江寧已臻底平。軍務業經蒞事。卽著會國藩酌帶所部。前赴皖鄂交界。督兵勦賊。務期迅速前進。勿少延緩。李鴻章前赴江寧。暫署總督篆務。江蘇巡撫著吳棠暫行署理。欽此。十七日。李公鴻章到金陵見公。公與商裁退楚軍。進用淮勇。檄調劉銘傳李鴻章等。引淮軍渡江而北。上援皖鄂。十九日。奉上諭。會國藩奏提督鮑超遵奉前旨。請假葬親

一摺。已明降諭旨。賞假兩月。回籍經理葬事矣。現在甘肅軍務未戡。新疆回匪日益蔓延。非得勇略出羣如鮑超者。前往勦辦。恐難壁壘一新。著會國藩傳旨鮑超。令其俟假期一滿。即行由川起程。出關勦辦回匪。其舊部兵勇。及得力將弁。準其酌量奏調。隨帶同行。從前回疆用兵。楊遇春即係川省土著。立功邊域。彪炳旂常。鮑超務當督率諸軍。肅清西陲。威揚萬里。以與前賢後先輝映。該提督忠勇性成。接奉此旨。必即遵行。以副朝廷委任。欽此。二十二日。奏遵旨馳赴皖鄂交界。督兵勦賊一摺。奏稱。臣用兵十載。未嘗親臨前敵。自揣臨陣指揮。非其所長。此次擬仍駐紮安慶六安等處。派劉連捷等入鄂。聽候官文調遣。檄調淮勇兩軍。隨臣西上。更資得力。附片瀝陳才力竭蹶。難勝重任。楚軍出征過久。漸成強弩之末。不如淮勇之方銳。一俟皖鄂肅清。即請開各缺。調理病軀。仍當效力行間。料理經手事件。如軍餉之報銷。撤勇之欠餉。安置降將部衆。區畫長江水師營汛。皆分內應了之事也。又摺奏請於江寧省城。建立昭忠祠。彙祀湘軍陣亡病故將士。附片奏廣東江西釐金。全歸本省經收。唯留饒州景德鎮釐金之半。撥解祁門糧臺。以充皖南五軍之餉。二十五日。作修治金陵城垣缺口碑記一篇。立石於龍膊子山下。官軍攻入之處。二十七日。奏報淮南鹽課徵收第一案。是月。僧王軍擊賊大破之。官文公喬公松年調派各軍。防勦招撫數萬人。餘賊竄德安。廣東賊陷嘉應州城大埔縣城。與閩省汀漳之賊。延擾凡數百里。左公宗棠移駐衢州。調派劉典等軍。分道入閩進勦。欽命劉琨典試江南。以平步青副之。十一月初一日。委員擇地修建昭忠祠。靖毅公祠。設工程局委員。監督工役。次第修復學宮。及羣祀祠宇。初三日。交卸總督關防。初五日。奉到上諭。皖省一律肅清。楚境餘賊。由黃孝竄德安一帶。逆數無多。楚軍可敷勦辦。會國藩無庸前赴安慶。亦無須交卸督篆。仍駐紮金陵。妥籌調度。李鴻章現在入閩監臨。俟出關後。仍回江蘇巡撫本任。欽此。初六日。詣貢院迎主考官入闈。初八日。前總督陸公建瀛遺骸。改棺重斂。公出城弔而祭之。初十。作家訓四條。十七日。李公鴻章派弁送還總督關防。公接印回任。十八日。馳摺奏交卸督篆。遵旨仍回本任日期。奏稱鄂豫皖三省。均擒匪往來熟徑。劉連捷等軍。宜以黃州上巴河爲老營。派吳坤修料理營務。劉銘傳等宜以三河尖固始爲老營。派李鴻章料理營務。又摺奏續保克復金陵水陸各軍。隨營籌餉各員弁。彙單請獎。又片奏請敕部添鑄淮揚鎮總兵新印。頒發來營。又片奏國子監典籍錢繼文。前在金陵殉難請卹。二十二日。會考江南拔貢優貢。十二月初三日。馬公新貽過金陵。

見公旋赴浙江任。初六日。李公鴻章選蘇州。十三日。奏疊奉諭旨。分條覆陳一摺。其一前明孝陵勘估工程。目下無此鉅款。應稍緩籌辦。其一李秀成供詞。前有刪節之處。補鈔進呈。其一張國樞忠骸。訪求未得。其一江北糧臺。每月收銀不過五萬兩。酌解甘省及留供皖軍之數。其一池州知府范先謨調省察看。凡五條。附片奏保四品京堂胡大任。請旨簡用。又片奏雲南迤東道黃冕請開缺。又片奏知府范泰亨主事柯鉞。均在營績勞病故。請卹。是日又奏覆御史劉毓楠條陳准北鹽務一摺。附請展緩江南武鄉試一片。十五日。鄉試揭曉。公入闈鈴榜。取士二百七十三名。二十八日。奏疊奉諭旨。分條覆陳一摺。其一勤辦捻匪。宜用淮勇。人地相宜。淮軍所用火器。須由水路運送河南。以周家口爲都會。其一西路軍務。宜先清甘肅。次及關外。楚勇離甘太遠。不如川勇較近。宜用川北保寧龍安兩府之人。與甘肅風氣不甚相遠。臣處餉項奇絀。不能協濟鮑軍。其一楚勇必須多撤。金陵守兵。已裁去七千人。朱品隆唐義訓劉連捷等軍。應即先撤。庶騰出有用之餉。以濟西征之師。凡三條。附片奏覆陳何桂珍劉騰鴻畢金科三員忠績。請賜諡以表示來茲。是日又具摺奏請蠲免安徽州縣錢糧雜稅。并將各州縣克復年月。被擾輕重。分別開單呈覽。附片奏金壇溧陽丹陽宜興荆溪五縣。被賊蹂躪最甚。請豁免兩年錢漕。又片奏遞進江南鄉試題名錄。是冬捻匪由湖北襄陽竄擾河南之境。僧王督師追擊。連獲勝仗。而賊勢颯忽。不可制。福建之賊。踞漳州。左公宗棠督師入閩攻勦。

〔乙丑〕同治四年公五十五歲。正月。金陵昭忠祠成。初十日。公率僚屬致祭。十四日。具摺奏兩淮運使忠廉因病出缺。揀委道員李宗羲署理。請旨簡放。附片奏江南鄉試新中舉人。來江寧請咨者。隨時通融繕給咨文。以憑迅速起程會試。請救禮部查照。又片奏壽春鎮總兵易開俊調援皖北就近赴任。又奏采訪忠義第二十案。附片奏石埭縣訓導朱彥昇請卹。并其家屬二十人。二十日。設粥廠。令湘勇煮粥。以食饑民。二十一日。拜摺專奏恭謝年終恩賞。又奏循例密陳文武考語一摺。三省學政聲名一片。又奏采訪忠義第二十一案。二月初三日。作江忠烈公神道碑。初八日。通飭委員。糴買積穀以備荒。十四日。具摺奏易開俊劉松山兩軍。堅守寧國涇縣出力員弁。開單請獎。并陳明應保之案。久未奏保。自請交部議處。又彙案奏參藐法滋事之將弁江發雲等。請革職訊辦。又摺奏上年奉撥輪船經費銀五十一萬餘兩。全數解清。彙入軍餉案內報部。二十日。核定收養貧民章程。議挑補綠

營弁兵章程。二十三日。前雲貴總督潘忠毅公鐸之柩。自雲南還葬。過金陵。公遣弁護送回籍。二十七日。專摺奏營中欠餉。遵照部議新章。發給餉票。准照實銀報捐請獎。又奏酌度江寧現在情形。城外龍江關西新關兩處。暫緩開關徵稅。俟商民復業。再行奏復舊制。附片奏江安兩省武營遺缺。請通融借補。札委工程局員。修葺江南鍾山書院。尊經書院。是月奉上諭。上年江寧克復後。曾國荃因病陳請開缺回籍。當經降旨。令該撫病痊。即行來京。陛見。迄今已及半載。該撫病體。當可漸次就愈。朝廷以該撫功績昭著。且年力盛強。正可借資倚任。著曾國藩傳知曾國荃。如病已就痊。即行來京陛見。現當勤求治理。需才孔亟之時。該撫慎勿遽萌功成身退之志。以副期望。欽此。彭公玉麟奉旨署漕運總督。吳公棠署兩廣總督。李公翰章授湖南巡撫。李公鴻章派提督郭松林等軍。由海道赴福建廈門助剿漳州之賊。楊公岳斌募湘勇五千成軍。由長沙啓行。赴甘肅。公方議裁撤湖南東征釐局。於是楊公奏請改爲西征局。充甘肅軍餉。貴州巡撫張公亮基。亦請以東征局餉協解黔中。三月十五日。奏通籌滇黔大局一摺。奏稱。行軍之道不一。而進兵必有根本之地。籌餉必有責成之人。謀滇者當以蜀爲根本。即以餉事。責之四川總督。謀黔者當以湘爲根本。即以餉事。責之湖南巡撫。湘蜀兩省物力有限。倘任滇黔之餉。則甘肅之餉。應責之江浙等省。不敢有所推諉。又奏福建汀漳道彭毓橘因病未能赴任。請開缺。奏片附李世忠前後捐助軍餉銀十五萬九千餘兩。請併入河南捐款。爲將來加廣中額之地。又附片奏湖南設立東征局。當時實由黃冕主持。因此大物招議。上年金陵倖克。臣即議定期裁撤東征局。湘中商民人咸知之。今楊岳斌請改供西征之餉。滇黔各省。亦指請協解。臣既奏停江廣釐金。而於桑梓獨食其言。且令黃冕專受其謗。有甚不安於心者。謹先事瀝陳。俟四月間。即專摺奏請裁停東征局務。另由江南籌解甘餉。俾湘民沾高厚之恩。臣亦稍釋隱微之疚。又片奏稱新疆之地。大漠苦寒。艱險異常。鮑超威嚴有餘。恩信不足。倘出關以後。部曲離怨。必爲回衆所輕。一有挫失。全局震動。後人更視關外爲畏途矣。且甘肅未平。遠謀新疆。則後路之根本不穩。鮑超歷年苦戰。臣豈忍忘其大功而摘其小過。惟有仰懇聖慈。飭令鮑超隨同都興阿楊岳斌先清內地。再行出關。不宜輕於一發。不獨鮑超一軍爲然。自古有事塞外者。未有不慎於始謀者也。又片奏臣弟國荃病尙未痊愈。欽奉寄諭。已恭錄傳知。時有御史朱鎮奏參湖南兵勇在江南騷擾情形。請即遣散回籍。公於是札飭各軍。大加裁撤。在金陵者。僅存四營而

已。二十五日。具摺奏續保攻克金陵水師員弁。開單請獎。附片奏彭玉麟固辭署漕運總督之任。并陳明捻匪竄忽。恐南入江境。調張樹聲一軍駐清江浦。調劉銘傳周盛波兩軍。由六安移防徐宿。時彭公玉麟已專奏力辭新任。而捻匪竄山東境。蔓延曹州洛寧一帶。徐州清江皆防竄越。吳公棠亦以防務留清江。未赴兩廣之任。二十七日。公登舟出江。泊瓜洲。二十八日。登焦山。彭公玉麟從。二十九日。渡江登北固山。覽京口形勢。旋登山山回瓜洲。查閱鹽河工程。四月初一日。公抵揚州。運司李宗羲稟商鹽政釐務。設鹽棧於瓜洲之新河口。以利捆運。裁減江北釐卡。政定江北釐務章程。初三日。還金陵署。十五日。具摺奏黃翼升水師張樹聲淮軍。已到清江防所。劉銘傳周盛波日內當抵邳宿之境。又摺奏前漕督袁甲三先經奉旨於臨淮建立專祠。旋因案撤銷。請仍准建復。附片奏皖南鎮總兵唐義訓開缺。以總兵劉松山道員金國琛辦理徽寧防務。該二員蒙恩授甘肅鎮道實缺。并催令赴任。請暫留皖南。仍以劉松山調補皖南鎮實缺。又片奏新授安徽臬司李宗羲暫留兩淮之任。整理鹽務。二十日。核定瓜洲鹽棧章程。二十一日。接奉廷寄。書公爵加稱曰毅勇侯。鮑公超回川後。所部霆字營。分爲兩軍。其一總兵婁雲慶領之入閩。其一總兵宋國永亦領之赴蜀。將率以出關也。入閩之軍。在上杭縣大譁。回向江西索餉。江西藩司孫長絨急發銀六萬兩。迎解於軍前。衆稍定。入蜀一軍。行至湖北金口登岸。譁潰爲亂。竄陷咸寧縣。擾犯江西湖南邊境。李公瀚章調軍平之。公久慮霆營軍之有變。至是聞警。適是前疏所慮。爲之憮然。憂念不已。僧王追擊捻匪。至於山東。日馳百數十里不息。捻匪勢亦颯忽。即迭奉諭旨。以持重爲戒。公亦具密疏。請令僧邸一軍。稍休暇以養銳。疏未上也。二十四日。忠親王僧格林沁在曹州中伏陣亡。惟兗豫之間。賊勢益張。遠近人心爲之惶駭。二十五日。公接見洋人。議江南通商事宜。是月。公與李公鴻章會奏。遵旨核減蘇松等屬浮糧。一摺。鄭公敦謹奉旨授湖北巡撫。吳昌壽調河南巡撫。五月初一日。馳摺奏。疊奉諭旨。覆陳大略。其一鮑超霆營潰叛之故。固憚萬里長征之苦。實由積年欠餉之多。已飛咨鮑超迅赴鄂中。調停解散。檄調劉連捷等軍。南渡九江。咨彭玉麟調派水師。扼防江西。其一水師礮船。宜用於長江大川之中。若運河水窄岸高。斷難施展。高河與大江。船式迥殊。水性亦異。宜由山東河南撫臣另造舢舨。分防黃運兩河。則畿輔永無捻患。凡二條。附片奏稱金口霆營叛亂。容有別情。至婁雲慶一軍。在閩鼓譟。則係因饑生變。實無他故。臣不在江西。不能籌發欠餉。又明知霆營出關。

必將生變。不能及早奏請停調。至釀今日之禍。皆由臣區畫不善。恩信不孚。無可辭咎。容俟查明原委。自請嚴處。又代奏陝西臬司陳澍謝恩一摺。奏請應否陛見。初二日。奉到寄諭。令公出省。至淮徐一帶。督率水陸援軍。相機勦賊。初三日。公聞僧王陣亡之警。奉到上諭。欽差大臣協辦大學士兩江總督一等毅勇侯曾國藩著即前赴山東一帶。督兵勦賊。兩江總督著李鴻章暫行署理。江蘇巡撫著劉郁膏暫行護理。欽此。又奉上諭。曾國藩著即攜帶欽差大臣關防。統領所部各軍。星夜出省。前赴山東督勦等因。欽此。初五日。奉到寄諭一道。初七日。奉到寄諭二道。皆催公迅速啓程。初九日。馳摺奏遵旨前赴山東勦賊。歷陳萬難。迅速情形。金陵楚勇裁撤殆盡。僅存三千人。作爲護衛親兵。此外惟調劉松山寧國一軍。如楚勇不願遠征。臣亦不復相強。淮勇如劉銘傳等軍。人數尙少。不敷分撥。當酌帶將弁。另募徐州勇丁。以楚軍之規制。開齊充之風氣。期以數月訓練成軍。此其不能迅速者一也。捻匪積年擄掠。戰馬極多。馳驟平原。其鋒甚銳。臣不能強驅步兵。以當騎賊。亦擬在徐州添練馬隊。派員前赴古北口。採買戰馬。加以訓練。此其不能迅速者二也。扼賊北竄。惟恃黃河天險。若與辦黃河水師。亦須數月。乃能就緒。此其不能迅速者三也。直隸一省。宜另籌防兵。分守河岸。不宜令河南之兵。兼顧河北。僧格林沁勦辦此賊。一年以來。周歷湖北。安徽。河南。江蘇。山東五省。臣接辦此賊。斷不能兼顧五省。不特不能至湖北也。即齊豫蘇皖四省。亦不能處處兼顧。如以徐州爲老營。則山東祇能辦兗沂漕濟四郡。河南祇能辦歸陳兩郡。江蘇祇能辦淮徐海三郡。安徽祇能辦廬鳳潁泗四郡。此十三府州者。縱橫千里。捻匪出沒最熟之區。以此責臣督辦。而以其餘責成本省督撫。則汛地各有專屬。軍務漸有歸宿。此賊已成流寇。飄忽靡常。宜各練有定之兵。乃可制無定之賊。方今賢帥新隕。劇寇方張。臣不能速援山東。不能兼顧畿輔。爲謀迂緩。駭人聽聞。殆不免物議紛騰。交章責備。然籌思累日。計必出此。謹直陳芻蕘。以備採擇。附片奏稱精力日衰。不任艱鉅。更事愈久。心膽愈小。疏中所陳專力十三府州者。自問能言之而不能行之。懇恩另簡知兵大員。督辦北路軍務。稍寬臣之責任。臣仍當以閒散人員。效力行閒。又摺奏保張樹聲補徐海道缺。吳世熊補淮揚道缺。僧王沒後。將軍國瑞革職留營。接護其軍。并護欽差大臣關防。軍心不固。公亟調劉銘傳一軍。赴濟寧以助之。李公鴻章調派道員潘鼎新領淮勇五千人。由輪船航海赴天津。以衛畿輔。是日奉到上諭。欽差大臣協辦大學士兩江總督一等毅勇侯曾國藩現赴山東一帶督

師勦賊。所有直隸山東河南三省旗綠各營及地方文武官員均著歸會國藩節制調遣。如該地方文武不遵調度者。卽由該大臣指名嚴參。欽此。尋又奉督率親軍輕騎就道兼程北上之旨。於時公定計撤退湘軍。進用淮軍。酌留金陵湘勇四營。增募千人。凡六營。委道員羅麓森等領之。以爲親兵。隨同北征。其餘湘軍在江南者。全行撤退回籍。十三日。馳奏欽奉諭旨。謹陳籌辦情形。并請收回成命一摺。奏稱。潘鼎新一軍。由輪船馳赴天津。可以壯畿輔之威。可以補臣迂緩之過。目前局勢似可無虞。至於節制三省。臣實不能肩此鉅任。卽才力十倍於臣者。亦不必有節制三省之名。并稱河北宜責成直隸總督另籌防兵。不宜調南岸之師。往來渡黃。疲於奔命。各省巡撫亦宜另籌防兵。不可使勦擒之師。追逐千里。永無歸宿。反覆申明前疏之說。附片奏潘鼎新劉銘傳張樹聲周盛波等四軍。皆係淮勇。經李鴻章兄弟苦心訓練而成者。已調甘涼道李鶴章辦理行營營務處。請旨准開甘涼道缺。并令李鴻章之季弟李昭慶赴營差遣。又片奏鎮江揚州水陸防軍撤遣已竣。所有原設糧臺一併裁撤。另設報銷局。造冊報銷。又片奏咸豐三年江寧城陷。將軍祥厚等殉難。布政使祁宿藻先在圍城中積勞病故。已奉旨優卹。仍請將祁宿藻祀祀祥厚專祠。二十一日。公詣晉臣卞忠貞公祠。祠新葺成也。二十二日。李公鴻章至金陵。公交卸總督關防。二十三日。奉到上諭。會國藩懇辭節制三省之命。具見謙抑爲懷。不自滿假。該大臣更事既多。成效夙著。若非節制直東豫三省。恐呼應未能靈通。勿再固辭。欽此。二十四日。馳摺奏報交卸督篆。帶兵出省日期。并報擒匪回竄皖豫山東情形。漸鬆。當無渡河北犯之慮。又摺奏保肅清皖南出力員弁。開單請獎。附片奏本年二月。提督鮑超委員赴口外採辦戰馬八百匹。今鮑超出關之行。已因兵變而中止。應請赦下兵部。令此項馬匹。徑赴山東。解臣行營。俾資練習。又片奏裁撤湖南東征局。其湖南協甘之餉。由撫臣李瀚章酌籌協解。又具摺奏報淮南鹽課收數第二案。附片奏兩淮鹽課撥解京餉之銀五萬兩。請改解臣營。以應急需。又奏查得已故兩江總督陸建瀛遺骸。護送回籍。二十五日。公由金陵登舟。飭北征六營湘軍。卽日披隊啓行。其所撤遣各湘勇。委員押令悉數泝江西上。毋得停留。二十八日。公舟解纜渡江。彭公玉麟從。公與彭公核定長江水師章程。是月。唐義訓金國琛所部徽州防軍。索餉鼓譟。劉公長佑駐軍開州。督造防河戰船。左公宗棠克漳州府城。蘇省所派郭松林等軍。克漳浦縣城。福建全省皆平。賊竄廣東之境。劉公坤一奉旨授江西巡撫。閏五月初一日。公舟泊瓜洲。

初三日泊揚州。札委知府彭嘉玉辦理江寧糧臺。初八日抵清江浦。十一日馳摺奏擒匪南趨安徽。藩司英翰在雒河集被圍。調水師入洪澤湖。以達臨淮。調劉銘傳周盛波回援皖北。附片奏道員羅麓林委辦營務處。又片奏力辭節制三省。懇請收回成命。十二日。札委淮揚道吳世熊辦理轉運糧臺。維時捻酋四人曰張總愚曰任柱曰牛洪曰賴文光。賴逆則粵匪之黨也。四股匪徒數十萬。馬數萬匹。分合不常。往來颺忽。官軍追逐。或求一戰而不可得。甚或委棄軍火粟馬以資賊。大河以南。淮漢以北。蹂躪數千里。公既奏定專辦十三府州。扼要駐軍。不事馳逐。其用湘淮各軍火器餉需。由水道轉運。以江南爲根本。以清江爲樞紐。沂淮潁而上者。達於臨淮關周家口。沂運河而上者。達於徐州濟寧州。治軍轉餉之規。與前此北方官軍迥殊矣。札撤徐州鎮總兵詹啓綸一軍。遣散回籍。出示曉諭淮北民圩。嚴緝奸匪。二十日。劉松山軍到清江浦。二十一日。馳摺奏羣賊全萃皖境。英翰突出重圍以求援。壽春鎮總兵易開俊目疾增劇。擬親率湘軍赴臨淮駐紮。就近調度。派劉松山兼統易開俊之軍。臣初奏四省十三府州之地。安徽以臨淮爲老營。河南以周家口爲老營。江蘇以徐州爲老營。山東以濟寧爲老營。各駐重兵。多儲糧械。一處有急。三處往援。有首尾相應之象。無疲於奔命之虞。或可以速補遲。徐圖功效。至於目前諸將。劉銘傳潘鼎新均可獨當一面。張樹聲周盛波兩軍合當一面。劉松山易開俊合當一面。另派郎中李昭慶訓練馬隊。合以親王舊部。同爲游擊之師。又摺奏派委浙江運司李榕前赴濟寧承領國瑞交代事件。並迎提親王舊部軍馬。赴徐州調遣。飭潘鼎新一軍。移駐濟寧。會同李榕料理接管。附片奏欽奉寄諭。陳國瑞劉銘傳曾有互鬪之案。飭臣斟酌。妥爲調派。現在劉銘傳援勦皖北。應令陳國瑞暫駐河南境。不宜共事一處。以杜諸軍內訌之漸。又片奏總兵陳國瑞優劣事蹟。請旨飭歸河南巡撫節制調遣。是日前摺遞回。奉到上諭。曾國藩因節制三省。任大責重。復懇請收回成命。具見謙抑之忱。第賊氛猖獗。時事孔艱。事權不專。則一切調度事宜。深恐呼應不靈。該大臣惟當力任艱鉅。與三省督撫。和衷籌畫。將此股賊衆。剋期殄滅。彼時三省軍務既平。自可毋庸該督節制。既爲其實。毋避其名。萬不可稍存過慮之心。再有續請。欽此。二十二日。公由清江浦登舟換用淮船。二十六日。渡洪澤湖。二十八日。舟泊五河。馳摺奏皖境一片逆氛。非馬隊不足以制勝。請將寄諭。撥交河南之馬隊。一起凡四百九十六員名。調赴皖北助勦。附片申陳精力衰頹。軍勢單弱。尙未開總督兩江之缺。而更增節制三省之名。耿

取寸衷。如負重笈。懇收回成命。但責臣以會辦勦擒。自當通力合作。不敢稍分畛域。如不蒙俞允。更當累疏續陳。不辭嚴譴。二十九日。公舟抵臨淮關駐營。是月安徽雒河集解圍。賊竄河南許州境。湖北蔣凝學一軍奉調赴甘肅。行至襄陽譚潰。六月初六日。批總兵陳國瑞稟牘凡二千餘言。稱其所能。而歷數其過失。申明禁約。凡三條。一曰不擾民。二曰不私鬪。三曰不梗令。詞旨嚴切。陳國瑞覆稟。未能遵公約束也。初八日。喬公松年來見公。初十日。出示曉諭亳州蒙城宿州永城四屬民圩。分別良莠。擒送擒匪赴軍營者。重賞。并委員會同州縣嚴拏匪徒。就地懲辦。十二日。與喬公松年馳摺會奏援軍大捷。雒河解圍。附片專奏陳州府庫存銀二十萬兩。擬與江蘇安徽河南分撥各五萬兩。給付軍營。其李鴻章應得之餉。即就近撥發劉銘傳等軍月餉。十三日。公移駐陸營。時淮水盛漲。各營多移淮南岸以避水。公營在北岸。築堤以捍之。公弟國荃奉旨授山西巡撫。二十四日。奉到上諭。會國荃已簡授山西巡撫。會國藩當囑該撫勉圖報效。作速赴任。勿以病辭。欽此。是月。賊西竄南陽襄陝一帶。七月初八日。馳奏欽奉諭旨。覆陳一摺。奏稱。雒河解圍以後。賊分兩路西竄。檄調劉銘傳全軍。馳赴周家口。添調馬隊以助之。山東撥交馬隊二起。係曹南新挫之餘。人馬俱疲。必須在徐州大加整理。細觀賊情。已成流寇。若賊流而官兵與之俱流。則節節尾追。著著落後。臣堅持初議。以有定之兵。制無定之寇。令劉銘傳駐周家口。張樹聲駐徐州。劉松山駐臨淮。潘鼎新駐濟寧。賊至則迎頭擊之。請救下河南湖北督撫。於豫之鞏洛宛鄧楚之隨棗黃麻。各駐勁兵一枝。專重迎勦。不事尾追。庶幾漸有歸宿。且此賊有不甚似流寇者。蒙亳老巢田廬尙在。賊尙眷戀。既設法以遏其流。又擬查辦民圩。以清其源。謹將告示一道。鈔呈御覽。又摺奏徵休防軍。索餉譁謔。已飭查拏侵餉之營官。倡亂之勇丁。認真嚴辦。請將唐義訓金國琛交部議處。皖南道張鳳翥措置不善。先行撤任。并奏自請交部議處。附片奏委吳坤修署皖南道缺。又摺奏揚防凱撤。借用漕折銀兩。目前無款歸還。請旨敕部暫緩催提。又奏謝弟國荃授山西巡撫恩。并陳明近日病狀。未知現在是否痊愈。已恭錄諭旨。馳函家中。囑其勉圖報効。十五日。奉到上諭。會國藩身任統帥。責無旁貸。前經疊諭該大臣籌撥一軍。兼顧晉省。並令劉銘傳等軍。馳赴豫省北路。繞出賊前。防賊竄越秦晉之路。又令派撥馬隊。馳赴豫境助勦。復以賊出徐郡甚遠。令該大臣酌量前進駐紮。乃該大臣日久迄無奏報。於近來皖豫軍情及各路如何布置情形。均未陳奏。歷次所奉諭旨。亦未答覆。實屬疲玩因循。

若欲藉此獲咎。冀卸節制三省仔肩。何以仰副朝廷倚任之重。該大臣公忠體國之心。何忍出此等因。欽此。十八日。公渡淮。按視劉松山老湘營。廿三日。巡視鳳陽府城。行詣明陵。二十四日。馳奏欽奉諭旨。覆陳一摺。奏稱。周家口八面受敵。最爲扼要。劉銘傳將略較優。人數較多。故以周家口重任付之。至秦晉邊防五百餘里。實非該軍所能徧防。若令其西去。則無益於晉。而有損於豫。且湘淮各軍。不慣麵食。軍火礮械。執運維艱。今河南等省用兵。全不講求轉運。糧械缺乏。莫肯盡力。頃在臨淮檄委編修張錫嶸招募淮勇。專取能食麥麵雜糧之人。冀備他日征勦西北之用。至於節制三省之命。臣已三疏固辭。自念賦性顛愚。卽一省已難專任。然受恩深重。雖數省亦當通籌。計擒匪可到之處。約有八省。皇上飭臣兼顧晉省。已在節制三省之外。而外閒之責望尙不止此。臣何以堪此重任。又何能當此重咎。懇敕下九卿科道。八省督撫。會議勦擒事宜。各抒所見。恭請宸斷。定一不可改易之策。大局幸甚。至臣之不輕奏報。曾於同治元年。具奏陳明。迄今不改此度。若欲因此獲咎。以謝仔肩。則生平所志所學。斷不肯如此取巧。又摺奏徐州鎮總兵詹啓綸壽春鎮總兵易開俊均因病開缺。請旨簡放。以重職守。又摺奏總兵陳國瑞與已革總兵郭寶昌同爲親王軍翼長。曹南之役。未能救護主將。該總兵同罪異罰。補行糾參。請撤去幫辦軍務。革去黃馬褂。責令戴罪立功。以示薄懲。而觀後效。附片密陳前月給予陳國瑞批牘。及陳國瑞稟覆之詞。尙無誠心悔過之意。原牘均鈔送軍機處備查。又片奏保總兵董鳳高李祥和二員。請補徐州壽春兩缺。是日。公拜摺後。登舟啓行。赴徐州。二十六日。舟泊泗州。二十八日。登陸啓行。宿靈璧縣。三十日。宿宿州。是月。賊竄湖北境。公弟國荃具摺辭山西巡撫之命。陳湜入都調授山西臬司。專辦防務。得專摺奏事。八月初四日。公抵徐州府。初八日。專摺奏查明寧國府宣城縣金寶圩殉難紳民。彙案開單。請分別旌卹。十六日。出城點驗馬隊。閱視操練。十七日。馳摺奏移駐徐州。整理馬隊。計馬隊已到徐州者。前後四起。飭營務處李昭慶等。認真挑選。編立隊伍。配齊器械。換補馬匹。其老病殘廢者。概行遣撤回旗。并奏報擒匪回竄皖境。調派各軍赴潁州會勦。附片奏稱。此次實收到戰馬七百七十七匹。管解各官。異常勞瘁。應請獎敘。二十四日。按視張樹聲淮軍營壘。二十八日。閱淮軍操陣法。是月。迭奉寄諭。令公移駐許州。節制皖鄂豫三省軍務。居中調度。擒匪任柱牛洪賴文光由潁州陳州竄山東之曹州。張總愚一股。尙留屯南陽之境。九月初一日。馳摺奏劉銘傳一軍。迭獲勝仗。賊東竄曹州。趨重東路。

調徐州全軍。赴山東會勦。調臨淮軍。接防徐州。調周盛波移駐歸德。惟馬隊無多。久未辦成游擊之師。自問尙無破寇之術。附片奏金國琛所部勇丁開餉一案。尙未訊辦就緒。不能赴甘肅鞏秦階道之任。又片奏湖北軍務。請仍全歸官文節制調遣。初三日。核定馬勇營制營規。及馬步合隊章程。十五日。賊破辛家寨。徐州戒嚴。十九日。馳摺奏。接奉寄諭。欲令李鴻章親帶楊鼎勳等馳赴河洛。將豫西股匪撲滅。兼顧山陝門戶。而以吳棠署理兩江總督。李宗羲丁日昌遞署漕督蘇撫。飭臣函商。迅速覆奏。又奉寄諭。令鮑超馳赴河南。歸臣節制各等因。查近日賊勢東趨。距徐城不遠。當以全力專顧東路。已調郭松林楊鼎勳兩軍。防勦沂海一帶。若李鴻章視師河洛。別無可調之軍。以帶赴西路。近聞閩粵兵威大振。髮逆窮蹙。若令鮑超改赴河南。實爲有益於豫。至李宗羲丁日昌權領封圻。未免嫌其過驟。數年以來。皇上求才若渴。於疆臣保薦人員。破格超遷。外間疑爲非常之才。責備吹求。於是臺諫彈劾生風。并歸咎於原保之員。若令循資漸進。少爲迴翔。則該員不至見妬於同僚。而言路亦不至仇視乎疆吏。實有裨於中外和衷之道。且廟堂之黜陟賞罰。非閩外諸臣所宜干預。今以督撫要缺。諭令臣等往返函商。尤覺非宜。因不俟李鴻章吳棠商定。直抒管見。附片奏報賊勢南趨。有回雉河老巢之說。張總愚一股已近湖北之境。是時陝西巡撫劉公蓉。爲御史陳廷經所劾。疏詞激切。獲譴甚重云。是月張總愚竄湖北境。回竄河南。福建官軍進克廣東鎮平縣。賊踞嘉應州城。左公宗棠奉旨節制廣東江西各軍。出境督勦。三省官軍合圍嘉應州。鮑公超新募湘勇一軍。赴江廣會勦。十月初九日。按視李昭慶所部馬隊步隊。飭令訓練成軍。以出爲游擊之師。十一日。馳摺奏。徐州官軍擊賊獲勝。賊仍竄山東。潘鼎新破賊於豐縣。回駐濟寧。附片奏賊所以注重山東者。以運河東岸平衍富饒。不似河南之荒瘠。臣所以注重東路者。以山東北鄰畿輔。天下之根本也。南鄰江蘇。湘淮各軍之根本也。霜降以後。水落冰堅。河防尤急。請敕下直隸督臣嚴冬春之防。祇可增兵。斷難減戍。若賊回竄開封以西。當調大枝游擊之師。赴豫會勦。附片奏保吉林協領春壽營總穆隆阿開復處分。又奏四川訓導唐煥章留營差遣。是時張總愚股匪。由郟縣禹州東竄開封之境。任柱牛洪賴文光等股。由曹州西竄。與張總愚合股擾犯襄城舞陽。勢趨鄂境。三十日。馳摺奏擒匪西竄。周盛波在寧陵擊賊獲勝。劉銘傳在扶溝擊賊獲勝。現在賊勢謀擾湖北。檄飭徐州馬步各軍。分駐周家口。騰出劉銘傳一軍。爲游擊之師。不復拘泥十三府州之說。隨賊所向。跟踪

追勦。李昭慶所領萬人。俟鞍馬齊備。卽令馳赴河南。縱橫追勦。附片奏資遣吉林黑龍江察哈爾應撤官兵九百員名。起程回旗。參領三棟阿等病故請卹。又奏邸軍辦捐委員。前廣東臬司齡椿病故請卹。又片奏預籌鮑超一軍進兵之路。須以襄陽爲老營。由湖北糧臺。照料銀米軍火。是月。公讀左氏傳。記錄分類事目。十一月初七日。核定長江水師永遠章程及營制營規等。閱兩旬核畢。徐州銅山沛縣之境。有微山湖。洄出地一區。咸豐四五年間。山東曹州之民。因河水泛溢。避水南徙。佔居其地。其後來者益多。至數萬人。佔田浸廣。地方官因爲按畝徵稅充餉。號曰湖團。與沛縣居民屢有爭訟械鬪之案。捻匪東竄之時。與湖團相勾引。沛民詣公行轅控訴。公批飭嚴拏通捻之團民。訊明懲治。委員赴山東察看團民原籍之地。設法資遣回籍。二十七日。馳摺奏稱。捻匪全數西竄。本擬進駐周家口。因李昭慶一軍。鞍馬未齊。未能前進。又因銅沛湖團一案。與勦捻之事。大有關係。俟料理安插有緒。卽當赴豫督勦。并奏粵中賊氛尙熾。悍黨數萬。竄陷嘉應州。鮑超已由贛州進勦。暫難改調赴豫。又摺奏訊明徽州鬧餉一案。分別擬結。并將兩軍十七營。全行遣撤回籍。附片奏前皖南道張鳳翥病故請卹。水師營官提督成發翔病故請卹。是月。張總愚竄湖北襄陽邊境。任柱牛洪等股。由光固竄安徽潁州邊境。旋竄入鄂。十二月初二日。湖北成大吉軍在麻城潰叛。捻匪乘之。江漢以北賊氛肆擾。蔓延數百里。十三日。按視張錫嶸淮北新營。詳定長江水師營制事宜。二十五日。公子紀澤自金陵來營省視。二十八日。馳摺奏。兩路捻黨。全萃湖北。又有叛勇之變。檄調劉銘傳率軍援楚。又奏會議長江水師營制事宜。凡水師事宜三十條。營制二十四條。又摺奏遵旨查明河南巡撫吳昌壽總兵張曜等被參各款。又奏遵旨密查山東巡撫閻敬銘藩司丁寶楨被參各款。附片密奏稱山東河南居四戰之地。閻敬銘吳昌壽二人。軍務均非所長。而情形各自不同。謹鈔錄河南紳士原稟呈覽。是月。公批結沛縣湖團各案。將安分之唐團趙團等六團。留住徐州。通捻之王團刁團等。勒限撤歸本籍。出示曉諭。土客各民安業。湖北襄樊之賊。張總愚一股。回竄南陽。是歲鄭公敦謹調戶部侍郎。李公鶴年授湖北巡撫。張公樹聲授直隸臬司。均未赴任。張公所部樹字營淮勇。以其弟總兵張樹珊領之。

〔丙寅〕同治五年公五十六歲。正月。公在徐州營。初十日。專摺奏謝年終恩賞。派委劉松山率軍督遣王團刁團。回山東原籍。十四日。馳摺奏酌撥現防徐州之馬隊二起。共計九百餘人。馳赴奉天省城。勦捕馬賊。聽候文祥調

遣。附片奏調侍講學士謝秉璋來營襄辦軍務。又片奏報湖北軍情喫緊。張總愚折回河南。有東竄之意。湖團撤遣事竣。即調李昭慶軍馳赴周家口。又片奏知縣向師棟在營病故。請卹。廿八日。謝銘傳軍克湖北黃陂縣城。賊竄河南。是月。左公宗棠督諸軍克復嘉應州城。鮑公超追剿竄賊。至大樟嶺破之。招降二萬餘人。粵逆盡滅。東南底平。左公宗棠暫駐廣東境。籌辦善後。公弟國荃奉旨授湖北巡撫。李公鶴年調補河南巡撫。三十日。奉到上諭。刻下捻匪竄擾湖北邊境。防剿正當喫緊。曾國荃素嫻軍旅。朝廷爲地擇人。正資倚任。且由湘赴鄂。相去甚近。著曾國藩李瀚章即行知照該撫迅速馳赴新任。力圖報稱。不得稍存推諉之念。有負屬望。欽此。二月初八日。馳摺奏結湖團歷訟案。剖別是非。平情論斷。不分土民客民。但分孰良孰莠。王團刁團業已全數徙去。安靜回籍。酌定善後事宜。飭地方官次第經理。一曰酌給錢文。以卹已逐之團。二曰設立官長。以安留住之團。三曰撥還田畝。以平土民之心。并請將罵賊殉難之團紳唐守忠唐錫彤唐振海三名。優卹建坊。以爲草莽效忠者勸。又具摺奏謝天恩。已知照臣弟國荃招募舊部。迅赴新任。又摺奏浙江衢州鎮總兵朱品隆河南歸德鎮總兵朱南桂均請開缺。又奏保總兵唐殿魁徐麟二員。附片奏報視師山東起程日期。又片奏張樹聲經手營務。俟料檢完畢。即起程北上。赴直隸臬司任。又片奏陣亡總兵夏金標請卹。初九日。由徐州拔營啓行。十五日。宿鄆縣謁亞聖孟子廟。接見孟氏宗子孟廣均。是日馳摺奏報劉銘傳一軍援鄂。克復黃陂縣城。隨摺奏保劉銘傳及其營官唐殿魁劉盛藻等十九員。陣亡勇弁陳福祿張思聰李先道錢萬桂請卹。十六日。行次曲阜縣。謁至聖先師廟。見衍聖公孔祥珂。觀金絲堂彝器。謁復聖顏子廟。十七日。偕衍聖公孔祥珂出謁聖林。及述聖子思子墓。十八日。宿兗州府。十九日。至濟寧州。丁公寶楨護理山東巡撫。來濟寧見公。二十一日。閱視潘鼎新一軍操演。二十八日。巡視運河泗水形勢。是月。牛洪任柱賴文光由湖北竄河南汝寧。擾及潁州陳州境。張總愚一股竄山東曹州。三月初五日。馳摺奏報張總愚大股東竄。調潘鼎新全軍堵剿。李昭慶軍來山東會剿。調徐州楊鼎勳軍護衛孔林。任賴等股回竄皖豫之界。銳志東趨。劉銘傳周盛波合力勤辦。查捻逆西逼楚疆。東趨海岱。相去動三千里。馬步以數萬計。必須鮑超劉秉璋劉松山等多成數路游擊之師。乃足以布遠勢。臣現駐濟寧。就近調度。東事定後。再行赴豫。又摺奏遵調鮑超一軍北來勤捻。請飭江西月解七萬兩。湖北月解二萬兩。江蘇月解二萬五千兩。專供鮑超霆營之餉。

請飭左宗棠劉坤一將江閩各軍分別遣撤。次第銷兵。以靖民氣。臣自抵臨淮。察看皖豫等省行軍。每以柴草細故。兵民成仇。因令各營發價購買。不得妄取絲毫。鮑超所部。頗有騷擾之名。今籌定有著之款。於襄陽設糧臺。委員支應。俾得專精辦賊。且申明紀律。秋毫無犯。乃能軍民一氣。一以保全鮑超之令名。一以拊循河南之赤子。關係甚重。二十一日。馳摺奏彙報山東近日軍情。潘鼎新李昭慶兩軍勦賊勝負情形。任賴等逆。續竄曹州之境。張逆屯於濮范之境。一片賊氛。劉銘傳周盛波兩軍追賊均抵東境。現在調派各軍。嚴扼運河。劉松山軍來濟寧會勦。陣亡將弁劉洪盛裴兆宏二十八員名。請卹。又摺奏報劉銘傳張樹珊兩軍在皖豫之境。勦賊獲勝。陣亡將弁胡鳳喈劉得發請卹。附片奏東豫兩省車輛甚少。難於僱覓。派員前赴張家口採辦駱駝五百匹。來營應用。請飭部援照買馬成案。免稅放行。又附片瀝陳此股捻匪奔突六省。攻勦十年。久成流寇之證。中外論者。或輕此賊。以爲不足平。各路奏報。每多粉飾虛浮。或並無戰事。而開單請獎。臣受命勦賊。已滿十月。制寇之方。尙無把握。終夜以思。且憂且愧。願我皇上。弗輕視此賊。博儲將材。求爲可繼。稽核奏報。戒其勿欺。庶憑聖主朝乾夕惕之懷。以救中原火熱水深之危。又奏稱督師有年。損折將士甚多。凡當時未及奏報。漏未請卹之員弁。統計陣亡者一百四十四員名。傷亡七員名。病故者一百五員名。彙開清單。懇恩敕部分別議卹。以慰忠魂。是月。公弟國荃到湖北巡撫任。李公鶴年到河南巡撫任。捻匪由山東南竄淮徐之境。四月初三日。閻公敬銘來濟寧見公。初七日。馳摺奏報。捻匪自山東回竄。劉銘傳周盛波等軍追勦疊勝。并陳明潘鼎新一軍力戰。保全東境之功。山東官軍扼防運河之功。劉銘傳周盛波周盛傳竭力苦戰。冒險立功。容俟彙案請獎。附片奏賊勢南趨。劉松山回軍徐州。該處現有劉秉璋楊鼎勳等軍。尙爲聯絡。巨軍注重東路。不得不藉運河。以爲阻截之界。擬大加修浚。增堤置柵。以爲之防。拜摺後。與閻公敬銘登舟查勘運河。以至黃河。是日泊分水龍王廟。初九日。泊申家口。劉公長佑來舟次見公。十一日。渡河至張秋鎮。十二日。回舟次。十三日。登南岸。宿東平州。十五日。行抵泰安府。謁東嶽廟。十八日。登岱嶽。上至天柱峯。十九日。公回濟寧州。二十五日。馳摺奏捻匪張總愚牛洪一股。竄擾曹州徐州之交。任柱賴文光等一股。竄擾淮泗一帶。并陳湘淮各軍防勦情形。劉銘傳一軍。自去年臘月以來。馳驅四省。已飭該軍移赴濟寧。暫予休息。騰出潘鼎新軍。代爲游擊之師。附片奏查勘運河黃河布置防守情形。五月二十二日。馳摺彙奏劉秉璋

劉松山劉銘傳周盛波等軍。與賊接仗。獲勝情形。捻黨分股回竄。張總愚牛洪入豫。任柱賴文光入皖。飭潘鼎新周盛波爲一路。劉秉璋楊鼎勳爲一路。劉松山張詩日爲一路。分途馳擊。劉銘傳李昭慶兩軍分駐徐州濟寧。暫予休息。附片奏黃運兩河。應畫分汛地。歸直隸山東督撫派兵設防。又擬查閱運河南路。興工修築隄牆。是月。公錄樸目雜記。分小學修齊禮兵經濟詩文。凡六門。六月初七日。行至嘉祥縣。謁宗聖曾子廟。接見曾氏宗子曾廣蕭。公捐銀一千兩。以助祀產之資。初八日。出詣南武山宗聖林墓。初九日。回濟寧。十四日。馳摺奏捻匪西竄。官軍追勤情形。并稱中原平曠。四通八達。此勤彼竄。不能大加懲創。擬自周家口以下。扼守沙河。周家口以上。扼守賈魯河。自朱仙鎮以北。至黃河南岸。無水可扼。擬掘濠守之。調派水師及劉銘傳等軍分段扼防。咨商河南安徽兩撫。調兵分守。至羣賊南竄。不出南汝光固黃州六安等處。則鮑超一軍。劉秉璋楊鼎勳等之淮軍。劉松山張詩日之湘軍。足敷勤辦。臣擬拔營東下。閱勘運隄。卽由運入淮。逕赴周口。附片奏防河之舉。地段太長。派劉銘傳潘鼎新張樹珊扼守朱仙鎮以下四百里之地。力任其難。自朱仙鎮以上。專資河南兵力。已咨請李鶴年暫駐汴梁。調回各軍。先辦防務。主守而不主勤。誠恐李鶴年蒙頓兵不進之譏。設將來河防不成。臣願獨當其咎。不與李鶴年相干。十五日。由濟寧登舟。行閱運河所修隄牆。二十五日。舟泊宿遷。登岸駐營中。時豫皖大水。淮流盛漲。微山南陽等湖。與運河連成巨浸。公深以民間飢溺爲憂。是月。捻匪在河南合股。旣而張總愚牛洪西竄。劉松山張詩日截勤破之。任柱賴文光東竄。潘鼎新迎擊卻之。公弟國荃調派郭松林彭毓橘等軍防守德安隨州。鮑公超軍行抵湖北蕪黃之境。七月初四日。馳摺奏報查閱運河隄岸情形。任賴股匪回竄東路。前奏扼守沙河之策。難遽興辦。現令劉銘傳周盛波潘鼎新赴東路馳勤。惟淮南北大水。爲數十年所未有。旣自憶軍務毫無起色。又恐飢民失所。從賊偷生。則勤撫兩俱棘手。實深憂愧。初六日。由宿遷解纜。下泊楊莊。初七日。吳公棠來見公於舟次。運河隄決於高郵之清水潭二閘。浸與化東台鹽城等縣之境。初八日。公換船入淮。初十日。渡洪澤湖。泊盱眙。十五日。舟次王家圩。大風。舟幾覆。水師舢板船覆者八號。弁勇死者五人。公言生平經歷江湖風波之險。道光戊戌之秋。在襄河遇風。咸豐甲寅三月。在岳州水軍遇風。并此爲三度矣。十六日。抵臨淮登岸駐營。二十二日。巡閱張錫嶸淮勇營。二十三日。公病暑溼證。服藥閱數日乃愈。自是以後。遇有疾病。公恆持勿藥之說。蓋其視生死之際。已

脫然矣。二十八日。馳摺奏潘鼎新一軍。迎勦獲勝。任賴一股。竄至賈魯河以西。仍擬扼防賈魯河沙河。杜其回竄。附片奏船遇大風。委員知縣譚鼇舟覆。隕命請卹。又片奏報劉松山張詩日兩軍。在西華上蔡等處大捷。并自陳途中病狀。力疾西上。公拜摺後登舟行。泊懷遠縣。三十日。泊蒙城縣。是月。官文公奏請。以公弟國荃幫辦軍務。張總愚牛洪西竄南陽。劉松山與河南官軍宋慶等。追勦至新野鄧州南。召魯山之境。任柱賴文光竄襄城以南。八月初一日。公由蒙城換小舟。泝渦河而上。派親兵由陸路先赴周家口。令輜重各船。改道泝淮上潁。以赴周口。初二日。泊雉河集。初四日。行抵亳州。初六日。由亳州登陸起行。初八日。行至陳州府。詣袁端敏公祠。初九日。至周家口營。十二日。馳摺詳報劉松山張詩日勦賊勝仗。奏稱。近年捻逆縱橫。從未大受懲創。此次湘軍奮擊。凶燄頓衰。容查明彙案奏獎。附片奏患病未痊。請假一月。在營調理。又片奏任賴一股。久踞舞陽葉縣之交。有回竄東北之勢。張牛一股。亦聞有回竄之意。調派各軍堵勦。鮑超由汝寧北出迎勦。力扼東竄之路。劉銘傳等仍與修隄牆。防汛防守。以符初議。又附片奏臣向辦保案。極爲矜慎。金陵克復。續保六案。疊准部咨駁斥。查取考語申覆。自應遵部議辦理。惟原保各統領。散處各省。行查爲難。懇恩俯念將士立功之苦。敕部准照原奏清單註冊。以爲奮勇立功者勸。劉銘傳等軍。修築賈魯河隄牆工竣。李公鶴年調官軍六營於朱仙鎮以北。開濠置守。准軍復分衆助之。浮沙壅塞。難於挑濬。時捻逆全股。由許州北竄。十六日。逼近汴梁。全股衝濠東竄。疾趨山東。二十三日。馳摺奏擒匪東竄。河防無成。檄調劉銘傳潘鼎新等赴山東追勦。附片奏稱。勦捻年餘。仍無成效。憂愧無極。請旨飭令李鴻章帶兩江總督關防。出駐徐州。與山東撫臣會辦東路。湖北撫臣曾國荃攜帶關防。移駐南陽。與河南撫臣會辦西路。臣現駐周家口。居數省之中。庶可聯絡一氣。呼吸相通。又片奏稱。防守沙河賈魯河本係策之至拙者。惟以流寇難制。不得已而出此下策。此次擒匪東竄。出於豫軍汛地。或不免歸咎於撫臣李鶴年。謹縷陳持平之論。懇恩暫予免議。以期和衷共濟。爲將來同心設防之計。又片奏調浙江處州鎮總兵馬得順。帶所部馬隊。來豫勦捻。是日。又具摺奏擒逆以蒙亳老巢爲歸宿。莠民勾引。居則爲民。出則爲捻。若商賈之遠行。恬不爲怪。臣於上年選委各員。查辦民圩。擒斬著名積捻甚多。謹將蒙城亳州宿州阜陽四屬。已經正法之捻徒。彙單附呈。爲第一案。以後續獲。逐案彙奏。是月。擒匪竄撲運河。山東官軍堵禦卻之。回竄河南。左公宗棠調授陝甘總督。喬公松年調

陝西巡撫英翰公授安徽巡撫。九月初四日。李公鶴年來營見公。初六日。漕督張公之萬來營見公。十三日。馳摺詳報劉松山等在新野南陽等處。迎剿張牛逆股。迭次勝仗。奏稱劉松山等聞豫軍宋慶被圍。即日馳援。及解圍後。卽與宋慶聯絡一氣。同心苦戰。尤得師克在和之義。又摺奏劉銘傳潘鼎新兩軍。往來勦賊齊豫之境。迭獲勝仗。擒匪既不能逞志於東。必仍狂竄而西。檄令劉松山由扶溝迎勦。鮑超由南陽進軍。遮截西竄之路。附片奏請續假一月。在營調理。是日。又具摺奏彭玉麟所部水師報捐餉銀十萬兩。請加廣衛州府縣學額。附片奏彭玉麟報捐歷任應得養廉銀二萬餘兩。不敢仰邀議敘。十九日。彭公玉麟來營見公。是月。擒匪由山東竄河南。循河南岸至滎澤。決河隄。河南官軍堵塞之。擒復南竄。擒曾牛老洪死。張總愚西竄陝汝。遂入陝西商州境。任柱賴文光仍竄山東。疾趨濟縣。攻撲運河。山東官軍扼之。李公鴻章出視師於徐州。公弟國荃出視師於襄陽。具疏劾官文公。十月初九日。喬公松年來營見公。遂赴陝西任。十二日。英翰公來營見公。十三日。馳摺奏彙報軍情。賊分東西兩路。東路任賴逆股。劉銘傳潘鼎新等追勦。逆蹤盤旋於鉅鄆一帶。西路張總愚一股。已入陝西。鮑超軍馳至陝州。未及接仗。又摺詳報劉銘傳潘鼎新在鄆城等處追勦勝仗。又摺奏病難速痊。請開協辦大學士兩江總督之缺。並請另簡欽差大臣接辦軍務。自以散員留營效力。不主調度。附片奏陳勦擒無效。請將臣所得封爵。暫行註銷。以明自貶之義。又具摺續報水陸陣亡病故員弁。彙單請卹。又附片密陳山東撫臣閻敬銘藩司丁寶楨澄清吏治。講求軍務實際。請開復處分。又片奏李鴻章已帶印出省。黃翼升回駐江寧。藉資鎮撫。十五日。公子紀鴻來營省視。十九日。奉到寄諭一道。詞旨嚴切。催令速籌援軍。以赴陝洛。二十五日。奉到上諭。該大臣勦望夙著。積勞致病。自係實情。著再賞假一箇月。在營安心調理。欽差大臣關防。著李鴻章暫行署理。曾國藩俟調理就痊。卽行來京。陛見一次。以慰廬系。朝廷賞功之典。具有權衡。該大臣援古人自貶之義。請暫註銷封爵。著無庸議。欽此。三十日。任賴捻股由山東回竄陳州境。公行營戒嚴。調親軍出隊截勦。是月。公弟國荃出駐黃州。十一月初二日。馳摺奏報西路張逆。深入秦境。尙無回竄之說。調鮑超一軍進荆紫關。以援秦中。東路任賴一股。回竄河陽。飭劉松山迅赴汝州。遏其西竄之路。附奏奉旨覆陳一片。稱行軍太鈍。精力日衰。俟病體稍痊。入都陛見。自請辦捻不善之罪。又片奏楊鼎勳張錫嶸追勦任賴一股。擒蹤直奔沙河以南。劉松山仍由汝路進兵。以力保黃河。先顧山西。

爲主。初六日奉到上諭。曾國藩著回兩江總督本任。暫緩來京陛見。江蘇巡撫李鴻章著授爲欽差大臣。專辦剿匪事宜。欽此。十七日。馳摺奏酌籌西路軍務。鮑超一軍援秦。派委江蘇道員薛書常專辦霆營糧臺。採辦軍米。又摺奏交卸欽差大臣關防。賈送徐州。交李鴻章祇領。欽奉諭旨。飭臣竟回本任。臣自度病體。不能勝兩江總督之任。若離營回署。又恐不免畏難取巧之譏。請仍在軍營照料一切。維繫湘淮軍心。庶不乖古人盡瘁之義。附片奏刊用木質關防一顆。其文曰。「協辦大學士兩江總督一等侯行營關防。」又片奏任賴股匪奔擾信陽之南。將入鄂境。周盛波跟蹤追剿。現飭張樹珊拔隊追擊。劉銘傳軍疲勞太久。在周家口稍休。即行赴鄂。又檄調李慶昭全軍。由皖赴鄂。以收夾擊之效。又附密片奏保湘淮各軍將才。如道員劉盛藻總兵戴春林潘鼎立。提督章合才。均爲後起之選。前任大名道祝壇編修張錫嶸皆文員中出羣之才。略陳品概。以備採擇。十九日。委員賈送欽差大臣關防。赴徐州營。二十八日。奉到上諭。曾國藩請以散員。仍在軍營自效之處。具徵奮勉圖功。不避艱險之意。惟兩江總督責任綦重。湘淮軍餉。尤須曾國藩籌辦接濟。與前敵督軍。同爲朝廷倚賴。該督忠勤素著。且係朝廷特簡。正不必以避勞就逸爲嫌。致多顧慮。等因。欽此。是月。公弟國荃駐軍德安。湖廣總督官文公奉旨開缺。入都供職。欽差戶部侍郎譚公廷襄暫署總督。十二月初三日。馳摺奏欽奉諭旨。再陳下悃。仍請開兩江總督協辦大學士缺。附片奏任賴一股。竄擾孝感。鄂軍接仗獲勝。檄調劉秉璋與劉銘傳軍。合爲一路。探蹤追剿。又具摺保奏劉銘傳一軍。克復黃陂。并在濟寧雒河阜陽扶溝等處。戰功最偉。勞苦尤甚。五案併保。開單請獎。附片奏保吏部主事錢應溥在營效力。請加四品卿銜。十五日。奉到上諭。曾國藩當仰體朝廷之意。爲國家分憂。豈可稍涉疑慮。固執己見。著卽懷遵前旨。剋期回任。俾李鴻章得專意剿賊。迅奏膚功。等因。欽此。二十一日。馳摺奏遵旨回駐徐州。暫接兩江總督關防。臣病體未痊。仍懇另簡江督。而臣以散員效力行閒。至中外交涉事件。素未講求。請旨令兩淮運司丁日昌護理通商。欽差大臣關防。必能有裨時局。附片奏東路任賴一股。盤旋於六安之境。劉銘傳等追剿賊竄向鄂東一帶。西路薛逆渡過渭北。鮑超自請移師赴鄂。先剿東股。因檄令劉松山張錫嶸等。由潼關入秦。即在陝州設立糧臺。仍派薛書常管理。是日具摺奏江西南康縣查辦案內充公田產。分析辦竣。又奏保劉松山張詩日等軍。在西華上蔡新野等處大勝。彙案請獎。附片奏請酌提安徽丁漕。加該省兵勇之餉。又片奏前年

飭委運同銜容閱前往西洋採辦機器百數十種均交上海製造局收用該員不避艱阻請予獎勵以昭激勸又片奏參安徽渦陽縣知縣沈濂革職是月楚軍淮軍集於湖北之境凡七萬餘人會勦任柱賴文光一股郭松林軍挫於德安總兵張壯勇公樹珊陣亡賊益張陝西官軍挫潰張總愚逼近西安省城喬公松年到陝後亟檄劉松山一軍入援關中公辦理擒匪一載有餘初立駐兵四鎮之議次設守扼兩河之策皆未久而改變其在臨淮搜擒蒙亳匪徒以絕捻之根株在徐州辦結湖團巨案以除捻之勾引劉銘傳劉松山潘鼎新三軍大小數十戰賊衆縱橫颯忽之勢實因以少衰是冬張逆入秦任賴入楚中原稍得息肩矣而是歲言路劾公辦理不善者有御史朱鎮盧士杰朱學篤等疏皆奉寄諭抄發御史穆緝香阿奏督師日久無功請量加譴責一疏奉上諭年餘以來會國藩所派將領馳驅於山東豫楚皖等省不遺餘力殲賊亦頗不少雖未能遽蕪全功亦豈貽誤軍情者可比該御史所奏著毋庸議欽此是後又有御史阿凌阿劾公驕妄各款亦奉旨辨斥公念權位所在衆責所歸惕然不敢安焉

〔丁卯〕同治六年公五十七歲正月公在周家口營初六日起行赴徐州十三日過碭山境散錢二十六緡給飢民十五日公至徐州十九日接受兩江總督關防兩淮鹽政印信通商大臣關防與李公鴻章通籌西北大局二十一日馳摺奏報回駐徐州接篆日期附片奏賊在鄂中官軍有合圍之勢恐任賴一股續竄入秦鮑超一軍應留豫西攔截俟賊情定後再調赴秦又片奏彭玉麟報捐養廉銀兩奉旨查明子弟給予獎敘該侍郎力辭出於至誠懇如所請以遂其報效之誠二十九日奉到上諭會國藩既經接受兩江督篆所有察吏籌餉及地方應辦事宜均關緊要且金陵亦不可無勳望素著大員坐鎮著即回駐省城以資鎮攝該督公忠體國自當仰體朝廷倚畀之隆勉爲國家宣力一切軍情調度仍著李鴻章隨時咨商以資裨益欽此是月張公錫燦在陝西陣亡鮑公超回軍襄陽擊賊於楊家峯大破之追勦至豐樂河復大破之殺賊萬餘人任賴捻股竄河南境李公鴻章奉旨授湖廣總督李公瀚章調授江蘇巡撫暫署湖廣總督劉公琨授湖南巡撫二月初三日李公鴻章拔營赴河南督師仍駐周家口初八日專摺奏謝年終恩賞又奏報軍需欸目自咸豐三年起至金陵克復之日凡爲時閱十二年之久用欸至二千一百三十餘萬之多分爲四案開列簡明清單照例報銷附片奏動用安徽抵徵一項

比例請銷。又片奏江忠義席寶田二軍餉銀歸入江西彙總造報。又片奏補發湘軍欠餉。作爲第四案續報之款。又奏新授江蘇布政使丁日昌請暫緩陛見。十四日。馳摺奏疊奉諭旨。移駐金陵。恭報起程日期。又摺奏上年奉旨。發交臣營差委各員。道員鍾文總兵沈宏富提督何紹彩分別發往各路差遣。附片奏道員祝堽應仍交李鴻章隨營差遣。又片奏甘肅道員金國琛請開缺終養。又片奏陣亡編修張錫嶸請加恩其子。又奏陣亡總兵張樹珊請於周家口建立專祠。又摺奏彭玉麟水師營。鮑超霆軍。查辦滋事弁勇。十六日。由徐州啓行。至韓壯登舟。沿途查閱運河隄牆。二十二日。至清江浦。張公之萬來見公。二十三日。吳公廷棟來見公於舟次。方舟從公赴金陵。二十六日。查閱清水潭隄工。三十日。抵揚州。是月。任賴捻股東竄安徽境。回竄湖北東境。湘軍敗挫。彭忠壯公毓橋陣亡於黃州。劉松山軍入陝西擊張逆一股。連破之。三月初一日。公與官文公相見於舟次。初二日。查閱瓜州鹽棧。初六日。抵金陵還署。金陵之民焚香於道以迎公。初十日。按視新修江寧學宮工程。十五日。劉公珉舟過金陵見公。二十日。馳摺報奏回省日期。并陳鄂東之賊。向西北竄走。張逆在秦。與回逆合股。劉松山攻勦屢勝。尙有把握。附片奏酌撥軍餉。協解陝甘兩省。是月。鮑公超在襄陽傷病大作。公委員費藥餽問之。左公宗棠赴陝甘任。行至湖北。接受欽差大臣關防。丁公寶楨補授山東巡撫。四月初七日。馳奏提督鮑超傷疾甚劇。請調直隸署提督婁雲慶南來接統霆軍。附片奏回任以後。通計餉需數目。入不敷出。且有萬不容緩之事。須行籌款者。如製造輪船。購買機器。湘軍入秦。淮軍在楚。多未發足軍餉。長江北岸擬添陸軍。以爲防運河隄壩。險工林立。均屬刻不容緩。請旨將江海關洋稅。應解部之四成。酌留二成。以濟要需。十六日。專摺奏謝京察從優議敘恩。又奏遵照新章。甄別勞績州縣。開單附呈。江南苦旱。公出禱雨於甘露神寺。二十四日雨。是月。任賴捻股。由湖北竄河南南陽境。五月十六日。馳奏續查民圩。擒斬捻黨。開單奏結。嗣後歸地方官辦理。附片奏任賴逆股。自鄂省竄出。有東趨之勢。本年天氣亢旱。農田枯坼。人心皇皇。皆由臣德薄。累及斯民。憂愧無地。且運河水涸。東路軍情可慮。又聞張逆有回竄出關之意。又摺奏本年鄉試。依限舉行。并兼行乙卯科武鄉試。又片奏保員外郎王家璧請以五品京堂。遇缺題奏。公連日步出禱雨。十九日。公詣靈谷寺取水。二十日大雨。公籌銀四千兩。修復靈谷神祠。是月。任賴逆股由河南竄山東。越運河而東犯青州之境。奉到上諭。會國藩著補授大學士。仍留兩江總督之任。欽此。六月

初十日專摺奏謝天恩補授大學士。又摺奏鮑超傷病深重懇請回籍養病。附片奏賊已渡運東竄令黃翼升駐紮射陽湖爲裏下河之防。又片奏江寧建立昭忠祠其初專祀湘軍陸營將士請并祀水師員弁。又摺奏本年鄉試派學政鮑源深入闈監臨。又奏請展緩本年軍政。十八日專摺奏江南江北糧臺收支軍需各欸分案開單奏銷。是月任賴逆股東竄登萊之境。李公鴻章劉公長佑建議合四省兵力合堵運河就東境剿滅任賴一股河南湖北兩省兵力嚴扼潼關毋令東竄。就關中剿除張總愚一股。英翰公疏請合兵嚴守膠萊河。偪賊於海隅聚而殲之。七月二十九日馳奏霆營將領公稟不願隸軍雲慶部下請將鮑超全軍撤遣大半其餘令譚勝達等帶赴濟寧歸李鴻章調理并令婁雲慶另募新軍以備防剿。又奏遵旨籌撥直隸賑災一欸皖軍協餉一欸并陳現籌興復淮瀆使水歸故道以減淮揚水患於清江設立導淮局試辦挑濬。附鈔章程十六條咨送軍機處以備查核。附片奏籌撥本年大運銀兩解交織造衙門應用俟軍務平定再議添撥。是月任賴股匪回竄越濰河擾犯沂州境竄擾贛榆海州沐陽之境。八月接到總理衙門公文預籌換約事宜公飭屬吏悉心條議擇其善者具咨與函帶派員弁由滬入都呈覆請增修金陵昭忠祠祀江南殉難官紳。九月十八日具摺奏甄別府縣等官續奏采訪忠義第二十八案附片奏水營記名提督馮標病故請卹皖南殉難縣丞羅慶恩請卹烈婦程胡氏請旌。是月海州捻股回竄山東境。十月初五日公下闡典校武鄉試提督李朝斌會考。十九日試竣取中武舉一百五十七名。是月山東賊復竄贛榆劉公銘傳追剿破之陣斃捻首任柱公弟國荃開缺回籍。十一月初三日專摺奏報江南武闡鄉試事竣。初六日專摺奏江北糧臺捐造船礮用過銀數循例報銷。又奏徐州善後局報銷。又摺奏揚州虹橋鄉殉難紳民婦女請旌卹。巡檢陸旻請卹澄海營副將陶位中參將黃占魁出海捕盜遇害請卹。十五日馳摺奏遵旨預籌修約事宜。二十七日劉公銘傳擊賊於壽光瀾河大破之擒斬數萬人賊大潰賴文光遁走山東肅清。是月官文公署直隸總督。丁公日昌授江蘇巡撫。十二月初三日奏查明本年江北新漕徵解實數現在籌辦情形。又奏籌解明年協甘餉銀。又摺奏江寧省城自咸豐三年淪陷向榮和春等駐兵入載陣亡之文武將弁殉難之官紳士民尙未建祠崇祀實爲闕典湘軍昭忠祠地基寬敞因與僚屬議建三祠中爲湘軍陸營西爲湘軍水師東爲金陵官紳務使毅魄忠魂萃於一處其金陵官紳綜舉約有六端。一曰咸豐三年城陷殉難之員。二曰

向榮和春營中陣亡病故之員。三曰江寧七屬殉難之紳。四曰江南大營援勦他處殉難之員。五曰鎮江揚州兩軍陣亡病故之員。皆祔祀祠中。六曰滿漢婦女不屈而死者。別立貞烈祠祀之。懇飭令地方官一併致祭。實有裨於聖朝勸忠之道。附片奏霍邱縣殉難團紳李友張請卹。并其家屬五十一名。初十日揚州官軍擒捻首賴文光斬之。餘黨迸散。東南蕩平。二十二日奉上諭。大學士兩江總督一等毅勇侯曾國藩著加恩加賞一雲騎尉世職。欽此。是月張總愚捻股由陝西越黃河竄至山西境。東趨畿輔。是歲駱文忠公秉章奉旨以四川總督協辦大學士。尋卒於成都。李武壯公祥和在陝西宜川陣亡。

〔戊辰〕同治七年公五十八歲。正月初二日。接見西洋公使蒲安臣。十七日。專摺奏謝天恩。加賞世職。又摺奏謝年終恩賞。又奏年終密考學政聲名。又奏江蘇臬司李鴻裔請假。二十一日。定書局章程八條。又訓手民四條。委道員洪汝奎經理書局。汝奎漢陽劉公傳鑿之門人也。二十七日。核定長江水師未盡事宜。及水師補缺章程。是月張總愚捻股竄直隸境。擾犯保定河間天津各屬境。畿輔戒嚴。丁公寶楨督軍入援。駐固安。左公宗棠督軍追勦。駐天津。李公鴻章駐軍大名。李公鶴年英翰公皆引兵防河南北。二月十七日。劉公長佑過金陵見公。三月初五日。馳奏擬補長江水師各缺。并續陳未盡事宜十條。奏稱。衡州試辦水師之始。非有舊例可循。屢試屢變。漸推漸廣。今已奏定章程。著爲令典。不敢謂立法之盡善而無弊。所願數十年後。督撫提鎮。隨時損益。遇事詳求。冀將材輩出。歷久常新。此則臣等所禱祀以求者也。又摺奏總兵張詩日病故請卹。并准加恩予諡。奉旨予諡勤武。公又奏上年江北冬漕。併歸海運。詳議海運章程十條。開單附呈。附片報江北漕糧起運實數。又片奏籌解甘餉分數。又附片奏陸營武職大銜。借補小缺。請敕部核議准行。又片奏保總兵王可陞章合才易致中三員。皆足勝專閫之任。二十日。作靈谷龍神祠碑記。二十八日。歐陽夫人至署。四月初一日。江南苦雨。公出詣神祠祈晴。李公瀚章調任浙江巡撫。初四日。過金陵見公。初七日。奏結霆營上年在襄陽鬧餉一案。查辦營官哨官。審明定擬。又奏上海鐵廠製造火輪船。及廣東艇船。仍須酌改營制。略仿西洋之法。擬會同丁日昌履勘查閱。再將外海水師章程。核議具奏。二十日。調驗船廠所造八團舢板。二十四日。由金陵登舟啓行。公子紀澤從。二十六日。至揚州查運庫。二十九日。登金山觀蘇文忠公玉帶。爲詩紀之。旋登焦山。是月。直隸捻匪竄運河以東。分擾及山東東昌武定。

各屬境。時河北水漲。軍官因扼運河以困之。閏四月初一日。公舟泊丹陽。初二日泊常州。初三日泊蘇州省城。留五日。初八日出巡。闕李朝斌大湖水師。遂行赴上海。丁公日昌從。途次奉到上諭。會國藩著授爲武英殿大學士。欽此。初十日。行至上海。駐鐵廠。查閱輪船洋礮工程。洋領事官白來尼等來見公。十四日。會奏撥解直隸軍餉。並彙陳近年協撥陝甘軍餉情形。又奏酌提制錢三十萬串。由輪船解運天津。請照銀價。劃抵京餉。附片奏上海舊存輪船兩號。不能行駛外洋。適有福建華福輪船來滬。卽令改調前赴天津。以備巡防之用。公專奏遵旨派員馳赴合肥。催令劉銘傳銷假。迅赴直隸山東軍營。并瀝陳勦捻之師。謀勇以劉銘傳爲最。而勞苦疲乏。亦惟銘軍獨甚。念本年畿輔之警。若非去歲先滅任賴一股。大局不堪設想。懇於寄諭中。獎其勲謀。而慰其勞苦。則天語一字之褒。勝於巨等函牘萬萬矣。是日公拜摺後。登舟查閱吳淞口狼山福山各營。十五日。由輪船回金陵署。五月初八日。專摺奏謝天恩。附片奏提督黃翼升總兵歐陽利見所領水師。已赴濟寧。並查看山東河防提督劉松山添募湘勇。飭湖南鹽局撥銀二萬兩。以利進行。六月十八日。專摺奏江北水災賑濟銀數。造冊報銷。又奏李鴻章病狀。請開缺調理。又摺奏總兵葦雲慶撤營事竣。請開缺回籍養親。附片奏保總兵譚勝達王衍慶二員。又摺奏采訪忠義第二十九案。附片奏已故總兵張運桂請祀張運蘭專祠。又奏常州殉難紳民史承簡等。合族一百一十名。請於郡城建史氏忠節專祠。全椒縣知縣孟煊在任殉難。請建專祠。是月劉公銘傳赴直隸。時湘淮各軍將領。萃於三輔。詔都與阿出視師於天津。七月彭公玉麟經理長江水師事竣。奏請開兵部侍郎之缺。補行守制。奉旨允之。官軍會勦捻匪。破平之。張總愚走死直隸。山東肅清。李公鴻章以湖廣總督協辦大學士。劉公銘傳封一等男爵。封疆將領。承恩賞各有差。初十日。奉上諭。會國藩籌辦淮軍後路軍火。俾李鴻章等克竟全功。著交部從優議敘。欽此。揚州民與天主教堂鬪。公委藩司李宗羲運司李元華上海道應寶時提案會訊。二十二日。專摺奏前次有密疏一件。未能慎密。自請交部議處。又摺奏東西捻股。一律肅清。湘淮各軍。亟應趕緊裁撤。以節餉需。而蘇民困。謹預籌經費。爲撤勇之用。又摺奏查明運河水誌情形。又摺奏查報陣亡傷亡病故員弁。彙單請卹。附片奏河工道員潘鴻燾請卹。又摺奏江寧府屬查出熟田。試辦抵徵。廿七日。奉到上諭。會國藩著調補直隸總督。兩江總督著馬新貽調補。欽此。八月初六日。專摺奏謝天恩。一爲交部優敘。一爲調任直隸。籲懇陛見。附片瀝陳

丁憂兩次。均未克在家終制。從公十年。未得一展墳墓。瞻望松楸。難安夢寐。又稱勦擒無功。本疚心之事。而回任以後。不克勤於其職。公事多所廢弛。皆臣抱歉之端。俟到京時。剴切具奏。十一日。作江寧昭忠祠碑記。十三日。上海船廠造火輪船第一號成。駛至金陵。公登船試行。至采石磯。命名曰恬吉。取四海波恬。公務安吉之意。批發揚州教堂一案。具咨文呈報總理衙門。是月李公鴻章奏凱撤勦捻官軍。惟留劉銘傳一軍。駐紮畿南之張秋鎮。又奏籌款修葺孔林。湘勇劉公松山軍從左。公宗棠入奏勦辦回逆。九月初二日。奏報恬吉輪船工竣。并陳明上海機器廠籌辦情形。附片奏金陵善後局經用之款。請免造冊報銷。又片奏內江水師糧臺委員。船廠委員。彙案請獎。初十日。酌定湖北撤勇一案。十七日。核定外海水師章程。丁公日昌至金陵。會議揚州教堂一案。二十日。馬公新貽到金陵。二十六日。交卸關防印信。二十八日。公弟國潢來署。相見甚歡。大被同宿。縱談家鄉瑣事。以爲笑樂。又自書箴言六條贈之。是月公與漕督河督。會奏榮工漫水。漸入洪湖。會籌堵禦一摺。十月初五日。具摺奏報交卸日期。遵旨會商公事。暫緩啓程。又具摺奏請禁止川私行楚。收回淮南引地。以復舊制。而整離綱。附片奏劉松山一軍。由江南協餉。請改道湖北襄陽轉解入秦。並稱臣交卸之際。應將經手事件。略爲結束。又摺奏原任廣西巡撫鄒鳴鶴在金陵殉節。請從優加卹。並准予諡。以彰忠節。又奏水師營副將柳壽田病故請卹。二十六日。李公鴻章赴湖廣任。過金陵見公。十一月初三日。專奏湘軍第五案軍需款目。造冊報銷一摺。奏稱。從事軍營。辦理報銷。中外吏胥。互相勾結。以爲利藪。此次臣嚴飭屬員。認定實用實銷四字。不准設法騰挪。不准曲爲彌縫。臣治軍十餘年。所用皆召募之勇。與昔年專用經制弁兵者。情形迥異。其有與部例不符之處。請敕部曲爲鑒諒。臣初無絲毫意見。欲與部臣違抗也。是摺奉旨著照所請。該部知道。欽此。是日又具摺奏酌辦江蘇海外洋裏河水師事宜十四條。請敕下李鴻章馬新貽丁日昌各抒所見。妥爲核議。並求部臣詳核。不厭駁詰。以期利多弊少。臣不敢因係初議之人。稍涉迴護。又摺奏江楚用兵太久。武職保舉太多。惟借補小缺一途。可以安置撤遣之將弁。謹將江南近年考試武舉章程六條。錄呈御覽。又摺奏江淮等屬。歷年墊應兵差。添設台站。頭緒紛繁。州縣交界。永無結算之期。實有妨於吏治。臣任兩江最久。惟此爲經手未完之件。現擬設法清釐。准仿照糧臺之例。開單報銷。仍按據金陵未克以前。及既克以後年分。分別辦理。附片奏補發湘軍欠餉。歸案報銷。又片奏臣未交卸之事。兩

次接准造辦處來文。俱稱移會兩淮監督。查兩淮祇有鹽政。并無監督之官。造辦處係內務府司員。與部院司官。體制相同。行文督撫。應用堂官之印。請旨敕下該衙門。嗣後遇有傳辦要件。統歸內務府大臣行文。不宜逕由造辦處移會。以符定制。而杜弊端。又片奏報經手事竣。起程北上日期。初四日。公由金陵登舟起行。金陵士民焚香酌酒以餞送者。填咽街巷。於時歐陽夫人患效喘甚劇。公長子紀澤留金陵侍疾。次子紀鴻從行。初八日。泊揚州。公弟國潢從公於揚州。乃別回湘。十三日。抵清江浦。十七日。由清江啓行。江寧將軍魁玉公出都赴任。謁公於途次。二十日。彭公玉麟從公於郟城境。乃別回南。三十日。渡黃河。宿齊河縣。丁公寶楨來見公。十二月初四日。行抵直隸境。公在途次。每日按輿圖。稽查山川原委。尤詳考畿輔水利。隨時延訪官紳賢否。證以輿論而密記之。十三日。入都門。寓東安門外賢良寺。十四日。昧爽趨朝。見軍機大臣於朝房。召見於養心殿。奏對數十語。賜紫禁城騎馬。退朝謁恭親王於邸第。及軍機大臣文祥公等。十五日。遞摺奏謝天恩。召見。奏對十餘語。十六日。又召見。奏對語尤詳。移時乃出。時在廷諸臣。想望豐采。朝退之際。千官屬目焉。十八日。至內閣上任。接見侍讀中書各員。旋至翰林院上任。接見講讀學士以下各員。謁至聖廟及先儒韓文公祠。十九日。公訪塔忠武公宅。登堂見其母。厚餽之。二十日。移寓城南法源寺。二十四日。至內閣。集議通商事宜。凡三日。二十八日。會奏議覆修約事宜一摺。二十九日。遞摺奏謝年終恩賞。

〔己巳〕同治八年公五十九歲。正月初一日。早朝捧慶賀表。從駕詣長信門行禮。天明皇上升殿受賀。公與朱公鳳標上階展表。太常寺司員宣讀表文畢。公與內廷諸臣行禮而退。初二日。始爲無慢室日記。條記密事。初五日。公訪倭仁公宅。因偕至內閣。醇郡王與大學士會議。奏陳機務六條。公手藁數千字。移時而成。初七日。趨朝奏事。初九日。至琉璃廠書肆。縱觀書籍。十五日。趨詣保和殿。侍賜宴藩王。十六日。賜宴廷臣於乾清宮。內監引入。皇上升座。倭仁公領滿大學士尙書西向坐。公領漢大學士尙書東向坐。樂三闋。乃宴。倭仁公起奉爵御座。皇上遍賜大臣爵。樂三闋。乃出。謝恩。頒珍貴物。十七日。具摺請訓。又遞摺奏略陳直隸應辦事宜。請酌調人才。以資差委。酌撥銀兩。以濟要需。直隸最大之政。在於練兵飭吏。次則河工。請留劉銘傳一軍。長作拱衛之師。再練萬人。使成勁旅。則畿輔不患空虛。民間疾苦。由於積獄太多。差徭太重。屬僚玩上虐民。當以嚴法重懲之。永定滹沱二河。常爲

民患亦宜大加疏濬。請敕下江蘇督撫。每月撥解銀三萬兩。稍資周辦。并開單奏調道員錢鼎銘。陳鼐。知府李興銳。知州游智。開趙烈。文知縣方宗誠。金吳。瀾及員外郎陳蘭。彬八員。召見。奏對數十語。皆疏中事也。退朝謁恭親王邸第。二十日出都。二十一日。巡視永定河堤工。二十七日。行抵保定府。二月初二日。接受直隸總督關防。長蘆鹽政印信。初八日。拜發到任接印日期一摺。附片奏試辦永定河工。請敕戶部借撥銀兩。趕修要工。初九日。送官文公入都。十三日。札飭永定河道及河工委員。擇日興工。十六日。閱直隸選練六軍。操演陣法。時直隸營伍疲弱。劉公長佑爲總督時。邊部議於綠營弁兵中。挑選數千人。酌加練餉。至是已五年矣。十八日。作清訟事宜一編。爲四柱冊。通飭各州縣官。刻期清結積案。以爲課程。二十三日。具摺奏查明州縣積潦大窪地畝。分別豁減糧賦。又奏糧臺循案報銷一摺。三月初五日。刊發直隸清訟事宜十條。核定限期。功過章程十四條。初九日。三口通商大臣崇厚公來見。十四日。劉公坤一入都。過保定見公。直隸臬司張樹聲調山西臬司。新授臬司史念祖。詔公察看。十六日。摺奏直隸訟案最多。積壓未辦。臬司張樹聲情形較熟。清釐甫有端緒。請暫留本任。并鈔呈清訟事宜十條。又摺奏舉劾屬員。以飭吏治。又奏報上年搶修永定等河。用過銀數。二十八日。丁公日昌入都。過保定見公。史念祖到省。公派委綜理發審局。四月初一日。專摺奏報查勘永定河工合龍出省日期。是日啓行。初六日。驗收河工。初八日。回署。十四日。奏報勘工回省日期。又奏直隸采訪節義第三案。十七日。粵南使臣黎峻等。過境見公。二十日。公子紀澤奉歐陽夫人到署。二十八日。郭公柏蔭入都。過保定見公。五月初四日。專摺奏劉松山軍在陝西宜君綏德兩處。有潰變之案。實因軍士久役思歸所致。該軍勤辦得力。銳氣未滅。未可遽議撤遣。初十日。楊公昌濬入都。過保定見公。二十一日。具摺奏稱近日內外臣工章奏。多主練兵。不主養勇。當此全境救平。自不宜留勇隊於近畿。然目前練軍。實無化弱爲強之法。當參用東南募勇之意。仍須戶部籌撥的餉。然後營務漸有起色。又摺奏永定河工合龍。請開復河員處分。附片奏報提用長蘆復價銀兩。以濟河工。并擬酌加歲修領款。二十二日。李公宗羲入都。過保定見公。二十三日。永定河復決口。六月初六日。作客座示僚屬箴言四條。定以每日傳見州縣二員。十一日。奏遵照部議。裁撤長蘆總商。以杜把持之弊。又摺奏永定河水暴漲。道廳各員搶護新工。竟於他處漫溢。請分別參辦。并自請交部議處。又奏提督朱南桂譚國泰病故。請卹。奏調瓊州總兵彭楚漢來直隸差委。

是月作李忠武公勇毅公神道碑銘二篇。七月初一日。奏永定河漫口搶堵。未能合龍。擬緩期秋後。將挑濬中泓。疏濬下口二事。認真籌辦。初四日。作勸學篇。示直隸士子。二十一日。奏酌議直隸山西河南三省毗連州縣會哨章程。二十四日。鄭公敦謹自山西入都。過保定見公。八月初六日。續查奏屬員。據實舉劾。二十七日。奏接准部咨。再行酌議練軍事宜一摺。奏請調南方戰將。以練北方新兵。擬於古北口增練千人。提督傅振邦領之。正定府增練千人。總兵譚勝達領之。保定府增練千人。以彭楚漢領之。附片奏劉銘傳一軍。護衛京畿。未可遽撤。該提督開缺回籍。其部將劉盛藻代領其軍。尙能勝任。毋庸另派統領之員。又片奏保道員蔣春元。署永定河道。九月初四日。作湘鄉昭忠祠碑記。初六日。奏采訪節義第四案。十二日。核定直隸練軍章程。委知府李興銳。查訪長蘆鹽務。二十一日。具摺奏試辦永定河挑濬中泓下口二法。核定工程。擬請停止攤捐。發給現銀。使廳汎無所藉口。以作兵弁夫役之氣。附片請撥長蘆運庫銀兩。以濟河工之用。二十三日。作唐確慎公墓志銘。十月初八日。作羅忠節公神道碑。初十日。奏啓行出省。勘河堤工。十二日。抵固安。巡視工程。驗收合龍。十三日。奏報勘工出省日期。並報循河勘驗下口。十七日。登舟順流而下。至天津府查勘鹽政。校閱洋槍及洋礮等隊。二十日。由天津啓行。二十三日。回署。十一月初一日。奏酌議長蘆鹽政十條。又摺奏查明州縣災歉情形。分別蠲緩。以抒民力。大順廣一帶。尤苦旱。恐須預籌賑濟。附片查工回省日期。又奏采訪節義第五案。十九日。具摺奏蘆綱億累日甚。宜減輕成本。以蘇商困。而保頽綱。酌議五條。又摺奏永定河漫口合龍。暨疏濬中泓下口。均屬穩固深通。請開復河員處分。又具摺奏遵旨察看臬司史念祖。請酌調刑名稍簡之省分。乃爲相宜。是月作王考星岡府君墓表。十二月十四日。奏銘軍將領劉克仁。劉盛瑞病故。請卹。二十四日。奏查明畿南各屬災歉較重。擬於來春。以貸爲賑。請於天津存儲項下。撥制錢十萬串。解至大名。預備散放。附片奏升任臬司錢鼎銘。請暫留大名道任。督辦賑貸。又摺奏濬沱河。改道北流。已閱兩年。亟應設法修治。謹陳大概情形。請敕部核議。是歲公壹意清釐獄訟。遇重大之案。則親自鞠訊。每月數次。統計專摺奏結重案。及京控發交之件。前後凡五十餘疏。不能悉紀。公自到任以後。定以每日分時。清釐案牘。接見賓僚。吟覽經史詩古文。以爲日課。每月以暇時爲文一二篇。計成碑銘序記之屬。凡十餘篇。

〔庚午〕同治九年公六十歲。正月十六日。專摺奏年終密考。又奏永定河工撥借運庫銀兩。請於應解京餉項內。

照數扣還。二十四日。核直隸練軍馬隊章程。委陳蘭彬前往大名。助辦賑貸。是月劉忠壯公松山在甘肅攻勦回逆於金積堡陣亡。其兄子錦棠接領其軍。二月初二日。專摺奏謝年終恩賞。又奏直隸清理積獄。舊案陸續完竣。新案辦理就緒。計審結並註銷之案。四萬一千餘起。多年塵牘。爲之一清。請將勤奮之員。酌予獎勵。又奏州縣留支銀兩。請免提解四成俾地方官有辦公之資。以爲振興吏治之助。又報直隸州縣。應付摺差款項。酌議報銷。二十一日。專摺奏謝京察從優議敘恩。又奏湘淮各軍。勦捻軍需第一案報銷。附片報洋鎗洋礮教練勇糧款目。附案請銷。又具摺奏提督劉松山宣力最久。忠勇邁倫。力攻回寨。受傷殞命。謹臚陳事蹟。請宣付史館。并於本籍建立專祠。三月初五日。出城詣劉孝子墓。及楊忠愍公祠。初十日。奏直隸留防兵勇。收支餉項。截數報銷。二十九日。奏報永定河凌汛安瀾一摺。又奏覆核部駁保案一摺。又奏采訪節義第六案。公自入春以來。屢患目光昏蒙。而治公牘。覽書史。未嘗少息。至是驗知右目已失明。於是閉目靜坐之時爲多。是月公子紀澤入都。赴廕生試。四月十一日。改定練軍馬隊步隊營制。十六日。奏試辦練軍。酌定營制。較照湘勇准勇軍營舊章。參酌增損。次第推行。又以官馬不如私馬。亦欲仿募勇章程。自養營馬。以冀練成勁騎。附抄呈步隊營制十條。馬隊營制六條。附片奏籌議口北三廳防務。是日公眩暈。病作甚劇。旬日漸平。二十一日。奏陳病狀。請假一月調理。二十五日。公子紀澤試竣。吏部帶領引見。奉旨以員外郎分部行走。簽分戶部陝西司。五月初八日。專摺奏謝子紀澤受員外郎恩。二十二日。奏病尙未痊。續假一月。又摺奏畿南賑貸。辦理事竣。各地方官賠累已甚。請免報銷。以示體恤。又摺奏保永定河工出力員弁。開單請獎。又奏采訪節義第七案。廿五日。奉上諭。會國藩著前赴天津。查辦事件。欽此。同日奉上諭。崇厚奏津郡民人。與天主教起衅。現在設法彈壓。請派大員來津查辦一摺。會國藩病尙未痊。本日已再行賞假一月。惟此案關係緊要。會國藩精神如可支持。著前赴天津。與崇厚會商辦理。匪徒拐迷人口。挖眼剖心。實屬罪無可逭。既據稱供牽連教堂之人。如查有實據。自應與洋人指證明確。將匪犯按律懲辦。以除地方之害。至百姓聚衆。將該領事毆死。並焚燬教堂。拆毀仁慈堂等處。此風亦不可長。著將爲首滋事之人。查拏懲辦。俾昭公允。地方官如有辦理未協之處。亦應一併查明。毋稍迴護。會國藩務當體察情形。迅速持平辦理。以順輿情。而維大局。原摺著鈔給閱看。欽此。先是天津境內屢有迷拐幼孩之案。并有剖心挖眼之謠。署天津知府張光藻擒

獲拐匪張拴郭拐二名嚴辦。旋有民團肇獲匪徒武蘭珍供出法國教堂之王三授以迷藥。由是津民與教民屢有爭鬪之事。三口通商大臣崇厚約法國領事官豐大業來署。提犯人對質。於時誘言四起。人情洶洶。豐大業在崇厚署中施放洋槍。崇厚亟起避之。豐大業忿而走出。遇天津縣知縣劉傑。復用洋槍擊傷其家丁。津民見之者。遂毆斃豐大業。燒燬教堂等處。洋人及本地從教之民。男婦死者數十名口。此五月二十三日事也。二十七日。奉上諭。崇厚奏津郡民教起衅爭毆。自請治罪。并請將該地方官分別嚴議革職一摺。崇厚周家勳張光藻劉傑著先行交部分別議處。仍著會國藩於抵津後。確切查明。嚴參具奏。至迷拐人口匪徒。及爲首滋事之人犯。均着嚴拿懲辦。並會同崇厚澈底根究。秉公辦理。毋稍徇徇。欽此。二十九日。公覆陳一摺。奏稱。據天津鎮道來稟。武蘭珍所供之王三。業經弋獲。必須訊取確供。武蘭珍是否果爲王三所使。王三是否果爲教堂所養。挖眼剖心之說。是否憑空謠傳。抑係確有證據。此兩者爲案中最要之關鍵。從此兩層悉心研鞫。力求平允。乃可服中外之心。諭旨飭臣前往。仍垂詢臣病。臣之目疾。係根本之病。將來必須開缺調理。不敢以病軀久居要職。至眩暈新得之病。現已十愈其八。臣不敢因病推諉。稍可支持。即當前往。一面先派道員博多宏武等。迅速赴津。會同天津道府詳訊辦理。六月初一日。奉上諭。會國藩奏所稱案中最要關鍵等語。可謂切中事理。要言不煩。日內如可支持。即著前赴天津。會同崇厚悉心商辦。欽此。崇厚駐天津近十年。調停於民教之間。人頗譏之。事變之後。崇公出示解散。有嚴禁聚衆滋事之語。由是怨聲載道。崇公尋奉旨充出使法國大臣。其三口通商大臣。以大理卿成林署理。初四日。公將啓行。書遺教一紙。其略云。「余自咸豐三年募勇之初。自誓效命疆場。今年老病軀。危難之際。斷不肯吝於一死。自以負其初心。」初六日。由保定啓行。宿高陽縣。初七日。宿任邱縣。具摺奏報起程日期。并稱與崇厚往返函商。擬先將俄國誤傷之三人。及英美兩國之講堂。速爲料理。不與法國一併議結。以免歧混。初八日。奉上諭。此案起衅之由。因迷拐幼孩而起。總以有無確據爲最要關鍵。必須切實根究。曲直既明。方可另籌辦法。至洋人傷斃多名。若不將倡首滋事人犯懲辦。此事亦難了結。會國藩擬將俄國人命。英美講堂。先行結議。所見甚是。欽此。初十日。公至天津。津郡民團。舊有水火會名目。人數甚衆。怨崇厚公之護教。咸望公至。必力反崇公之爲。公奉命之初。凡諸公條陳此事者。或欲藉津人義憤之衆。以驅逐洋人。或欲聯合俄英各國之交。以專攻法國。或欲參

劫崇厚。以伸士民之氣。或欲調集兵勇。以爲應敵之師。公意在堅保和局。不與洋人構衅。以致啓兵端。其函致崇公。則稱有禍同當。有謗同分之語。既至津郡。出示曉諭士民。仍不獎其義憤。且亦有嚴戒滋事之語。由是津人以怨崇公者。怨公矣。公初至時。出令放告。投訴牒者數百人。查訊挖眼剖心。並無事實。而拐匪一案。牽到教堂之王三安三等。皆市井無賴。供詞反覆狡展。不能定案。公亦令委員暫予緩訊。以爲洋人轉圜之地。但飭緝拏天津滋事之民。由是都門士大夫中。譏議紛然起矣。十一日。接到法國洋官照會一件。係都中洋人。由總理衙門轉遞來津。詞氣尙順。十二日。英國洋人來見。十三日。美國洋人來見。十四日。內閣學士宋晉奏和局固宜保全。民心未可稍失。請布置海口防兵。兼婉諭各國。以爲解散約從之策。奉旨令公酌量辦理。據實奏聞。十六日。公咨覆總理衙門。爲洋人力辦挖眼剖心之誣。十八日。專摺奏報永定河南岸五工漫口。自請議處。并請河員處分。十九日。法國洋官羅淑亞來見。二十一日。崇厚來言洋人將大興波瀾。有以府縣官議抵之說。公峻詞拒之。二十二日。洋官羅淑亞復來。詞氣凶悍。又來照會一件。有請軍府縣官及提督陳國瑞抵命之語。二十三日。公將現在查辦情形。照復洋人。并駁詰之。是日遂與崇厚公會奏。奏稱。王三雖經供認授藥武蘭珍。然且時供時翻。仁慈堂查出男女。無不被拐情事。至挖眼剖心。則全係謠傳。毫無實據。此等謠傳。不特天津有之。各省皆然。以理決之。必無是事。至津民所以生憤者。則亦有故。教堂終年局閉。莫能窺測。其可疑者一。中國人民。至仁慈堂治病。恆久留不出。其可疑者二。仁慈堂死人。有洗尸封眼之事。其可疑者三。仁慈堂所醫病人。雖親屬在內。不得相見。其可疑者四。堂中掩埋死人。有一棺而兩三尸者。其可疑者五。百姓積此五疑。衆怒遂不可遏。仰懇明降諭旨。通飭各省。俾知謠傳之說。多係虛誣。以雪洋人之冤。以解士民之惑。現在將天津道府縣三員。均撤任聽候查辦。又奏委丁壽昌署天津道。馬繩武署天津府。蕭世本署天津縣。又附片奏稱。洋人照會。挾制多端。請將知府張光藻。知縣劉傑二員革職。交刑部治罪。陳國瑞現在京城。請交總理衙門。就近查辦。公雅意不欲加罪於府縣。是日乃免徇崇厚之請。會奏此疏。拜發之後。公意痛悔之。病勢漸劇。二十四日。奉到上諭。有人奏風聞津郡百姓焚燬教堂之日。由教堂起有人眼人心等物。呈交崇厚收執。該大臣於奏報時。並未提及。且聞現已消滅等語。所奏是否實有其事。著會國藩確切查明。等因。欽此。又奉上諭。崇厚已派出使法國。自應及早起行。著會國藩體察情形。如崇厚此時可以交卸。

卽着來京陛見。以便卽日起程。通商大臣事務。著會國藩暫時接辦。俟成林到時。卽行交卸。欽此。二十五日。接洋人照會一件。仍執前說。二十六日。公照復洋人。仍駁詰之。是日奉到上諭。會國藩崇厚奏查明天津滋事大概情形。另片奏請將天津府縣革職治罪等語。已均照所請。明降諭旨宣示矣。此次陳奏各節。固爲消弭衅端。委曲求全起見。惟洋人詭譎性成。得步進步。若事事遂其所求。將來何所底止。是欲弭衅而仍不免起衅也。欽此。公前疏力辨洋人之誣。又陳五可疑之端。意在持平立論。內閣鈔發奏稿。文理不全。都人士見之。謂公偏護洋人。遂以詆崇公者詆公矣。實問之書。日數至。公惟自引咎。不欲以自明也。崇厚公每日一來行館。力主府縣議抵之說。公方在病中。置不答。崇厚乃馳奏法國勢將決裂。會國藩病勢甚重。請由京另派重臣。來津辦理。二十八日。公覆陳諭旨垂詢之件。奏稱焚燬教堂之日。衆目昭彰。若有人眼人心等物。豈崇厚一人所能消滅。其爲譎傳。已不待辨。至迷拐人口一節。實難保其必無。臣前奏請明諭。力辨洋人之誣。而於迷拐一節。言之不實不盡。誠恐有礙和局。現在焚燬各處。已委員與修。王三安三該使堅索。已經釋放。查峯凶犯一節。已飭新任道府。率獲九名。拷訊黨羽。惟羅淑亞欲將三人議抵。實難再允所求。府縣本無大過。送交刑部。已屬情輕法重。彼若不擬搆衅。則我所斷不能允者。當可徐徐自轉。彼若立意決裂。雖百請百從。仍難保其無事。崇厚與洋人交涉已久。應請留津會辦。暫緩來京。又奏稱。中國目前之力。實難遽起兵端。惟有委曲求全之法。諭旨所示。弭衅仍以啓衅。確中事理。且佩且悚。外國論強弱。不論是非。若中國有備。和議或稍易定。現今銘軍全隊。披赴滄州一帶。稍資防禦。臣自帶兵以來。早矢効命疆場之志。今事雖急。病雖深。此心毫無畏顧。不肯因外國要挾。盡變常度。抑臣更有請者。時事雖極艱難。謀畫必須決斷。伏見道光庚子以後。辦理夷務。失在朝和夕戰。無一定之至計。遂使外患漸深。不可收拾。皇上登極以來。外國盛強如故。惟賴守定和議。絕無改更。用能中外相安。十年無事。津郡此案。愚民憤激生變。初非臣僚有意挑衅。倘卽從此動兵。則今年卽能倖勝。明年彼必復來。天津卽可支持。沿海勢難盡備。朝廷昭示大信。不開兵端。實天下生民之福。惟當時時設備。以爲立國之本。二者不可偏廢。臣以無備之故。辦理過柔。寸心抱疚。而區區愚慮。不敢不略陳所見。是日接奉寄諭。亦云張光藻劉傑交部治罪。已屬過當。若在津正法。萬難允准等因。二十九日。奉到上諭。據崇厚奏稱會國藩觸發舊疾。病勢甚重。朝廷實深廬系。此案關係頗大。該督抱忿甚劇。恐照料

或有未周。已諭令丁日昌星速赴津。幫同辦理。又以丁日昌航海前來。須在旬日以外。先派毛昶熙前赴天津會辦。惟該國兵船業已到津。意在開衅。不可不預爲防範。已諭令李鴻章帶兵馳赴畿疆。候旨調派等因。欽此。又奉上諭。會國藩奏遵旨覆陳一摺。另片所陳。善全和局。以爲保民之道。豫備不虞。以爲立國之本。甚屬曲中事理。卽著該督堅持定見。悉心經理。用全大局。欽此。七月初五日。毛昶熙至天津。隨帶侍講吳元炳刑部員外郎劉錫鴻總理衙門章京陳欽暉祖貽四員。公一見。皆歎異。以爲難得之才。初七日。奏報永定河南岸五工。續漫成口。再請議處。英國洋官威妥瑪來天津。毛昶熙約洋官會議。既集。陳欽按理抗辯。侃侃而談。洋人不能詰。羅淑亞猶執前說。徑行回京。崇厚亦奏疏自請入都陛見。初九日。公與毛公會奏羅淑亞回京緣由。請中外一體堅持定見。并將連日在津會議問答情形。咨報總理衙門。又奏請將福建船局購辦京米。截留二萬石。存儲津郡。以備李鴻章軍營及劉銘傳全軍之用。時李公鴻章督軍至潼關。馳摺奏稱洋人照會內稱。天津府縣幫同行兇。主使動手等語。所聞得自何人。所查得有何據。必須將府縣如何幫同主使證據交出。由中外大員會同提集。當堂質訊。乃可以成信讞。而服衆心。如果該府縣等有實在重情。亦不能曲爲寬貸。十二日。奉上諭。羅淑亞無理要挾。所請府縣抵償一節。萬無允准之理。已傳諭錢鼎銘將張光藻等解赴天津。并令會國藩等取具該府縣等親供。以期迅速了結。欽此。十三日。奉上諭。崇厚著卽來京。三口通商大臣著毛昶熙暫行署理。欽此。丁日昌奉旨啓行北上。馳摺奏稱。自古以來。局外之議論。不諒局中之艱難。然一唱百和。亦足以熒聽而撓大計。卒之事勢決裂。國家受無窮之累。而局外不與其禍。反得力持清議之名。臣每讀書至此。不禁痛哭流涕。現在事機緊急。守備則萬不可缺。至於或戰或和。應由宸衷獨斷。不可爲衆論所播。又稱。百姓紛紛聚衆。地方官不能認真彈壓。過誤似亦不輕。十六日。奉上諭。該使臣非理之求。斷難遷就。而於近情之請。必當趕緊辦理。以示誠信。此時如將下手滋事之犯。按律懲辦。則洋人自不至節外生枝。再歸咎於府縣等因。欽此。十九日。公奏奉諭旨。檄催劉銘傳赴直隸統帶銘軍。並陳明江面水師。與洋面不同。彭玉麟楊岳斌在籍情形。因及捍禦外侮。徐圖自強之法。二十日。奉上諭。軍機大臣呈遞直隸按察使錢鼎銘稟函。不勝詫異。張光藻劉傑以奉旨治罪人員。卽使患病屬實。亦應在天津聽候查辦。乃該革員等一赴順德。一赴密雲。捏病遠避。尙復成何事體。朝廷令該革員赴津。實曲示保全之意。乃皆不

能體會。置身事外。曾國藩率行給假他出。實屬不知緩急等因。欽此。二十三日。奉上諭。近來內外臣工。往往遇事機緊急。徒事張皇。迨禍患略平。則又泄沓成風。爲目前苟安之計。即使創立戰守章程。而在事諸臣。奉行不力。有名無實。遂使朝廷深謀遠慮。均屬具文。似此因循成習。何時可冀自強。何時可平外患。宵旰焦憂。無時或釋。欽此。二十五日。劉傑到案。丁公日昌到天津。即日懸賞勒限緝拏兇犯。二十六日。奉上諭。該督到津後。統籌全局。次第辦理。其中委曲求全。萬不得已之苦衷。在稍達事理者。自無不諒。刻下府縣一層。堅持定見。當可就我範圍。如能將爲首滋事。及下手之人。嚴拏務獲。訊取確供。按律議抵。大局似可羸定。欽此。二十七日。張光藻到案。三十日。公與毛公會奏。已革天津府縣到津日期一摺。奏稱該員自六月十六日撤任。即行請假。臣見其本無大過。故允其所請。其後奉到諭旨。即飛檄催提。目下均已到案。頃接總理衙門來信云。有法國照會。言及該府縣主使證據。現飭同文館繙譯。應俟譯文寄津。按照所指情節。逐一質訊。再行取具親供。錄送核辦。至查拏凶犯。現已獲三十七名。仍嚴飭盡數弋獲。從嚴懲辦。以杜外患。八月初二日。總理衙門奏天津一案。與洋人照會來往辯論情形一摺。諭旨鈔寄。令公迅速緝兇。詳訊嚴辦。催取府縣親供。及早結案。兩江總督馬端敏公新貽猝遇行刺。因傷出缺。初四日。奉上諭。曾國藩著調補兩江總督。直隸總督著李鴻章調補。欽此。初七日。公具摺恭謝天恩。并奏稱前在假期之內。馳赴天津。實因天津事情重大。不敢推諉。臣目病甚重。往來文件。難以細閱。幕僚擬稿。難以核改。江南庶政殷繁。若以病軀承乏。貽誤必多。目下津案未結。仍當暫留會辦。一俟奏結以後。即請開缺。安心調理。又特奏保刑部郎中陳欽在總理衙門當差多年。於中外交涉情形。洞悉本末。頃來天津。與洋人評論。其辨才足以折服強悍。其誠心足以感動彼族。請以署理天津府知府。必收折衝禦侮之效。又奏江南月協直隸省餉銀。截數報銷。三口通商大臣成林到任。初九日。陳欽劉錫鴻丁壽昌等會訊府縣親供。十一日。公與毛公昶熙丁公日昌覆訊該府縣親供。十二日。奉到上諭。曾國藩奏瀝陳病目情形。請另簡賢能。畀以兩江重任一摺。兩江事務殷繁。職任綦重。曾國藩以老成宿望。前在兩江多年。情形熟悉。措置咸宜。現雖目疾未痊。但能坐鎮其間。諸事自可就理。所請另簡賢能之員。著毋庸議。仍著俟津案擬結。即著前赴兩江總督之任。毋再固辭。欽此。十四日。奏呈府縣親供。請交部核議。并稱拏獲滋事兇犯八十餘名。俟訊明再行會奏。十七日。毛公昶熙回京師。十八日。奉上諭。此案

爲日已久。若不趕緊辦結。必致易生枝節。著李鴻章馳赴天津。會同督飭承審各員。認真研鞫。及早擬結。欽此。二十三日。公具摺奏陳審明天津案內第一批人犯。分別定擬。又奏咨送覆訊府縣供詞。并陳明該員解送刑部。恐難定限。又奏稱辦理遲延。自請交部嚴加譴處。是日。劉公銘傳至天津。二十五日。李公鴻章至天津。二十七日。陳國瑞到案。二十八日。并已革天津府縣解部起程日期。呈鈔附陳國瑞供詞。附片奏稱府縣本無大過。張光藻尤著循聲。臣之初意。豈肯加以重咎。過聽浮議。舉措失宜。遽將府縣奏交刑部。此疏朝上。夕已悔憾無及。外間物議紛紛不平。此次該革員等入獄。誠恐洋人執臣原奏。欲得而甘心。則臣之負疚愈深。請敕刑部細核供詞。從輕定議。以平天下吏民之情。臣亦稍釋隱憾。并申陳各省民教滋事實情。籌議預杜後患之法。二十九日。奏開缺臬司史念祖請授以實缺。并陳軍營保舉記名人員。現經部議新章。保至藩臬者。必先補道員。仍乞聖慈存記。每年於部章之外。特簡實缺數人。實振厲人才之道。又奏天津道周家勳開缺。請以陳欽補授天津道缺。又代奏提督劉銘傳恭謝恩賞一摺。九月初一日。奉上諭。陳國瑞所遞親供。既與津案並無干涉。毋庸再令總理衙門刑部覈辦。欽此。初三日。丁公日昌回江蘇任。初六日。公交卸關防印信。具摺奏報卸篆日期。又摺奏報閩省採辦京米十萬石。全數驗收。附片奏調前台灣道吳大廷隨至江南。綜理輪船操練事宜。刑部奏已革天津府縣二員。擬發往軍臺効力。十一日。奉上諭。張光藻劉傑均著從重改發黑龍江効力贖罪。以示懲警。欽此。是案刑部奏結。照例從重定擬。諭旨又以該員私往順德密雲逗留藐玩。再行從重也。是日奉上諭。經此次嚴辦之後。各直省地方。務當曉諭居民。安分守法。毋任再滋事端。遇有中外交涉事件。並須按照條約。持平妥辦。總期中外商民彼此相安。以靖地方。欽此。十三日。奏續訊天津案內第二批人犯。分別定擬。附片奏署天津道丁壽昌攝篆已久。情形熟悉。措置裕如。請即補授天津道缺。并稱已保臬司劉盛藻與丁壽昌分領銘軍。皆司道中難得之才。亦請簡放道員實缺。公以本年壽六十。奉旨賜壽。由軍機處咨到。交御書勛高柱石匾額一面。御書福壽字各一方。梵銅像一尊。紫檀嵌玉如意一柄。蟒袍一件。吉綢十件。線縐十件。十六日。專摺奏謝天恩。又具摺奏遵旨赴任。懇請陛見。奏稱。臣前承乏江南。初無治狀。荷蒙獎勵。慚感交并。欲勉從後命。則病軀難供驅策。必致隕越貽羞。欲自遂初衷。則聖恩已極優容。何敢再三瀆請。揆諸古人鞠躬盡瘁之義。一息尙存。不敢稍耽安逸。附片奏刑部主事陳蘭彬有任重致

遠之志。不避艱險。仍擬帶至江南。講求防海製器操練輪船之事。又奏前次奏結人犯內。有穆巴一名。查無行兇實據。請予開釋。另將續獲范永一名。歸案正法。以示慎重人命之意。二十三日。由天津啓行入都。公子紀澤奉歐陽夫人并眷口。由運河南旋。公子紀澤從入都。二十五日。入都門。二十六日。早朝召見於養心殿。奏對十數語。二十七日。又召見。奏對十數語。十月初一日。奉派入坤寧宮喫肉。初三日。張光藻劉傑來見。初六日。軍機大臣傳旨。催公赴江南任。初九日。遞摺請訓。傳宣召見。奏對十數語。初十日。朝賀萬壽聖節。十一日。公六十初度日。湖廣同鄉官設宴於會館。以爲公壽。十五日。啓行出都。十八日。次雄縣。藩司錢公鼎銘來見公。二十六日。抵濟寧州。登舟與眷口船相維南行。閏十月十三日。抵清江浦。十六日。泊揚州。查勘瓜洲鹽棧。二十日。行抵金陵。借寓巡道署。二十二日。接受關防印信。十一月初一日。專摺奏報接印日期。初三日。作家訓日課四條。一曰慎獨則心安。二曰主敬則身強。三曰求仁則人悅。四曰習勞則神欽。江蘇巡撫丁公日昌丁母憂開缺。張公之萬奉旨授江蘇巡撫。十一日。公奏派應寶時署江蘇藩司。并暫護巡撫印務。十七日。奉到上諭。曾國藩著充辦理通商事務大臣。欽此。二十二日。丁公日昌扶柩回粵。舟過金陵。公往弔於舟次。十二月初二日。專奏本年輪應查閱營伍。請展緩於明年舉行。又奏丹陽金壇兩縣。本年仍辦抵徵。又奏揚軍廳堤工報銷。十六日。奏籌撥湖南陝甘軍餉。分別起解。以資接濟。馬端敏公被戕後。兇犯張文祥即時擒獲。詔派漕督張之萬與將軍魁玉會訊。都下言官。累疏奏請推究主謀。欽命刑部尙書鄭敦謹前往金陵查訊。二十九日。鄭公抵金陵。

〔辛未〕同治十年公六十一歲。正月初三日。核江蘇水師續議章程。十二日。具摺奏欽奉諭旨。籌議海防江防事宜。

宜一摺。附片奏預籌日本通商條約章程。又摺奏陳河運艱難情形。請旨飭各督撫通籌運道全局。爲可久之規。附奏到任未久。請展緩文武密考一案。二十九日。公與鄭公敦謹奏結張文祥行刺一案。仍照魁玉張之萬原擬罪名定擬。附片覆奏犯供。實無主使別情。二月初二日。專摺奏謝年終恩賞。又摺奏湘淮各軍勦捻軍需報銷第二案。又摺奏接到部議。覆陳淮南鹽引。礙難增價情形。附片請停止場商內河鹽釐。十五日。監視張文祥正法。二十四日。具摺奏詳議河運章程。又奏已故督臣馬新貽請於本籍建祠。附報張文祥正法日期。是月安徽建平縣境。有土匪起。尋捕平之。歐陽夫人病疫。踰月乃愈。三月初六日。張公之萬來見公。十九日。專摺奏報南永州寶慶

二府引地。未便改運粵鹽。并陳明楚省引地。被川鹽侵佔太甚。請飭部核議。又續奏采訪忠義第四十三案。四月十四日。作江寧府學碑記。十六日。專摺奏年終密考學政聲名。又摺奏江寧府屬田地科則。仍未查清。仍辦抵徵。李世忠陳國瑞在揚州舟中鬪毆。江岸商民大譁。公派委瓜洲鎮總兵吳家榜候補道袁保慶查訊。是月。大學士文端公倭仁卒於位。五月初一日。李公瀚章出都。過金陵見公。十一日。具摺奏結李世忠陳國瑞尋仇鬪毆一案。請將提督李世忠即行革職。勒令回籍。交地方官嚴加管束。提督陳國瑞以都司降補。勒令速回原籍。不准在揚州逗留。二十日。作湖南文徵序。六月初二日。公攜酒就飲吳公廷棟之宅。吳公就寓金陵五年。居宅甚隘。年八十歲。足病不能行步。終日端坐一室。校書不輟。公每月必一再過訪。談論移時。公前官京師時。相與講學之友。巋然獨存矣。初八日。泛舟城北元武湖。回入秦淮。見商民稍復業。爲之欣然。時奉到文宗聖訓全部。十三日。專摺謝恩。又代遞在籍前任總督張亮基遺摺。又奏采訪忠義第四十四案。二十五日。作台州墓表。七月初三日。公與李公鴻章會奏派委刑部主事陳蘭彬江蘇同知容閱選聰穎子弟。前赴泰西各國肄習技藝。從前斌椿志剛孫家穀等。奉命游歷海外。親見各國軍政船政。皆視爲身心性命之學。中國當師做其意。精通其法。查照美國新立和約。擬先赴美國學習。計其程途。由東北太平洋乘坐輪船。徑達美國。月餘可到。已飭陳蘭彬容閱二員。酌議章程。所需經費。請飭下江海關。於洋稅項下。按年指撥。勿使缺乏。并請飭下總理衙門。將該員所議章程酌核。八月初一日。專摺奏湘淮各軍勦捻軍需報銷尾案。十二日。赴校場大閱江寧省城督標兵四營。綠營選練新兵五營。留防湘勇二營。十三日。登舟出省大閱。十九日。至揚州校閱鹽捕二營。洋鎗礮隊二營。騎兵泰州泰興三江興化等五營。留防淮勇二營。二十一日。專摺奏報查閱營伍日期。二十八日。至清江浦閱清河漕標七營。淮揚鎮標九營。選練新兵一營。九月初三日。登陸啓行赴徐州。初八日。至徐州。閱徐州鎮標中軍營。城守營。蕭縣營。選練新兵二營。淮勇一營。十五日。回清江舟次。十九日。泊金山寺。二十日。舟入丹陽。閱鎮江營松北營松南營。二十二日。至常州。閱常州營孟河營靖江營。二十六日。至常熟縣閱狼山福山鎮標二營。水師四營。登福山以望洋面。二十七日。詣周虞仲墓。先賢子游墓。二十八日。至蘇州省城。閱撫標兵三營。太湖二營。淮勇二營。十月初六日。至松江府閱提標八營。選練新兵二營。洋鎗隊三營。初七日。至上海查閱鐵廠輪船各式機器。洋領事官來見。十一日。至吳淞口。

關吳崧川沙南匯等八營。外海艇船六營。內洋八團。舳板五營。并關輪船新陣鐵廠。造成輪船四號。曰恬吉。曰威靖。曰操江。曰測海。皆公所命名也。十三日。乘威靖船。且操且行。十五日。改登測海船。回金陵署。十一月初一日。專摺奏查閱營伍事竣。開單舉劾各營員弁。又奏遵籌協濟畿輔賑米。擬由江南撥解銀兩赴津。以便糴貨。又奏運河堤工報銷。初十日。奏報奧斯馬加國在滬換約事竣。金陵新修督署成。二十二日。移入署。二十九日。奏查明李世忠在籍情形。又奏派大員前赴安徽查辦天長縣令馮至沂自盡一案。十二月初八日。核定江蘇水師續議事宜。十六日。何公璟調任江蘇巡撫。過金陵見公。二十二日。奏江蘇水師續議章程二十一條。又奏采訪忠義第四十五案。附片密保江寧鹽巡道孫衣言可備藩臬之選。公右目失明已兩年。見者咸以靜息爲勸。而公昕夕孜孜。未嘗倦怠。身體有不適。恆守勿藥之戒。視生死之際。彌覺怡然無累。生平以宋儒禮義爲主。而於訓詁詞章二途。亦研精覃思。不遺餘力。處功名之際。則師老莊之謙抑。持身型家。則尚禹墨之儉勤。是歲爲詩凡數首。爲文十餘篇。其自書日記。尤多痛自刻責之語。

〔壬申〕同治十一年公六十二歲。正月初二日。公訪吳公廷棟宅。暢談學業。語及邱鈔倭文端公遺疏。交口稱之。謂倘非自撰。不能抒寫其心中所欲言。因語昔年故交零落殆盡。黯然而別。十四日。值宣宗忌辰。公言道光三十年。供職禮部。聞遺命立太子之信。即時馳赴淀園。恭遞如意。途次聞升遐確耗。倉黃悲痛。今忽忽已二十三年。不堪回首。言已恹然。二十三日。病肝風動。右足麻木。良久乃復。自上年間。定以每日讀資治通鑑。隨筆錄其大事。以備遺忘。是日已至二百二十卷。因病輟筆。猶取宋元學案理學宗傳等書。披覽大意。自謂身心一日不能閒也。前河道總督蘇公廷魁亦蚤歲都門講學之友也。二十六日。公聞蘇公將過金陵。出城迎之。又病風動。舌蹇不能語。遂回署。旋愈。二十八日。蘇公廷魁至。見公。是日與李公瀚章會。奏准鹽運楚章程一摺。奏稱近年淮南銷引日疲。存鹽壅積。無術疏通。楚省引界。幾被川鹺佔盡。今欲於積重難返之後。挽回一二。暫分疆界。復圖規復。俟滇黔肅清以後。仍還淮引之舊。公自肅清江面以來。首整鹽政。判定章程。各岸設招商局。各省設督銷局。於瓜洲建總棧。商民稱便。八年之中。徵收課銀。凡二千萬兩有奇。公之在軍中也。公牘私函。皆親治之。不以假人。晚年多令幕友擬稿。公自核改而已。右目失明後。其最要者。猶不假人也。是月作劉忠壯公墓志。屬草稿三百餘字。遂成絕筆。其

日記自咸豐八年六月起。至於易簀之日。猶書前一日日記。未嘗閒也。二月初二日。公方閱案牘。握筆而病作。遂止。病旋已。初四日午後。公乃散步。署西花園。子紀澤從。公連呼足麻。扶掖回書房。端坐三刻乃薨。是日戌時也。金陵微雨。天色陰慘。忽火光燭城中。江寧上元兩縣令驚出救火。卒無所見。見有紅光圓如鏡面。出天西南隅。良久漸微。江南士民巷哭。事聞。上震悼。輟朝三日。奉上諭。大學士兩江總督曾國藩學問純粹。器識深宏。秉性忠誠。持躬清正。由翰林蒙宣宗成皇帝特達之知。洊升卿貳。咸豐年間。創立楚軍。勦辦粵匪。轉戰數省。疊著勲勞。文宗顯皇帝。優加擢用。補授兩江總督。命爲欽差大臣。督辦軍務。朕御極後。簡任綸扉。深資倚任。東南底定。厥功最多。江寧之捷。特加恩賞給一等毅勇侯。世襲罔替。並賞戴雙眼花翎。歷任兼圻。於地方利病。盡心籌畫。老成碩望。實爲股肱心膂之臣。方冀克享遐齡。長承恩眷。茲聞溘逝。震悼良深。曾國藩著追贈太傅。照大學士例賜卹。賞銀三千兩治喪。由江寧藩庫給發。賜祭一壇。派穆騰阿前往致祭。加恩予諡文正。入祀京師昭忠祠賢良祠。並於湖南原籍。江寧省城。建立專祠。其生平政蹟事實。宣付史館。任內一切處分。悉予開復。應得卹典。該衙門察例具奏。靈柩回籍時。著沿途地方官。妥爲照料。其一等侯爵。卽著伊子曾紀澤承襲。毋庸帶領引見。其餘子孫幾人。著何璟查明具奏。俟朕施恩。用示篤念忠良至意。欽此。何公環奉旨署兩江總督。馳奏臚陳勲績一摺。何公旋至江寧。哭殯受篆。馳奏查明子孫。詳晰覆陳一摺。李公瀚章英瀚公先後具疏臚陳事蹟。四月廿八日。奉上諭。據何璟英翰李瀚章先後臚陳曾國藩歷年勲績。英瀚李瀚章並請於安徽湖北省城。建立專祠。又據何璟遵查該故督子孫。詳晰覆報。披覽之餘。彌增悼惜。曾國藩器識過人。盡瘁報國。當湘鄂江皖軍務棘手之際。倡練水師。矢志滅賊。雖屢經困厄。堅忍卓絕。曾不少渝。卒能萬衆一心。削平遠寇。功成之後。實畏小心。始終罔懈。其薦拔賢才。如恐不及。尤得以人事君之義。忠誠克效。功德在民。允宜疊沛恩施。以彰忠藎。曾國藩著於安徽湖北省城。建立專祠。此外立功省分。並准其一併建祠。伊次子附貢生曾紀鴻伊孫曾廣鈞均著賞給舉人。准其一體會試。曾廣鏞著賞給員外郎。曾廣鏞著賞給主事。均俟及歲時。分部學習行走。何璟英翰李瀚章摺三件。均著宣付史館。用示旌念勲臣。有加無已至意。欽此。公弟國潢聞訃。自長沙馳至金陵。臨喪率公子紀澤紀鴻扶柩回籍。五月二十日。公之喪抵長沙省城。六月十四日。出殯於南門外金盆嶺之陽。劉公坤一尋奏請於江西省城建祠。奉旨允准。其明年二月。

李公鴻章奏天津郡紳士沈兆溥等聯名稟請。建已故督臣專祠。以資報饗一摺。奉旨著照所請。該部知道。欽此。公之爲學。其大綱宗。略見於所作王船山遺書序。而備見於聖哲畫像記。自登第以還。於學無所不窺。九經而外。諸子百氏之書。靡不規得要領。其於莊子史記漢書資治通鑑明史文獻通攷五禮通考數種。尤篤好不厭。治之三反。平生爲詩古文辭。雅不欲存藁。應手散佚。公子紀澤等料檢手澤。門人李鴻裔黎庶昌等。爲蒐輯於知故之家。凡得詩四卷。文十二卷。其存官署者。批諭奏章。凡百二十卷。政蹟批牘二十四卷。書札六十卷。其存家中者。日記三十四卷。尺牘五十卷。家書二十八卷。皆公親手蹟也。在京師時。著有茶餘偶談若干卷。久佚。又爲曾氏家訓長編。其成者。朱子小學一卷。冠禮長編一卷。歷朝大事紀數卷。藩部表一卷。鈔輯鹽漕河工水利賦役成案各若干卷。餘則臚列序目。未有成編。選錄十八家詩鈔三十卷。出都以後。治軍臨官。不廢書史。著有孟子四類編左氏分類事目禮記章句校評樸目雜記周官雅訓雜記各若干卷。選錄經史百家雜鈔分十一類。爲二十六卷。又爲古文簡本二卷。鳴原堂論文二卷。晚年衰病。猶日從事於經史。爲論語言仁類記一卷。易象類記一卷。通鑑大事記未成書。又選錄古詩之得閒逸意者。自陶淵明至陸放翁六家爲六家詩鈔。亦未克成書。門人王定安輯錄公所爲經史評註。爲師訓彙記若干卷。又掇公平生言行。爲求闕齋弟子記四十卷。同治十三年八月十三日。歐陽夫人薨。十一月初五日。公子紀澤等改葬公於善化縣湘西平塘伏龍山之陽。乾山巽向爲塋。奉夫人樞合葬。黎庶昌爲編年譜。記公行事。迺書其後曰。「年譜非古也。近世刊刻前賢專集。乃必爲年譜一編。以攷訂其所作詩文之先後歲月。蓋本孟子誦詩讀書。論世知人之意。固無傷於稽古之雅。國朝阿文成公年譜累數百卷。可謂至多。其所紀載。則奏案與其政蹟爲詳。吾師曾文正公蓋世忠勳。薄海宗仰。身沒之日。知與不知。得公楮墨者。莫不私什襲以珍之。公鏤板以傳之。所在風行。爭以先覩爲快。竊恐數十載後。流風漸遠。見聞異辭。而於當日事蹟原委。或無資以質證。亦門人故吏之責也。不揣固陋。按據近年所親記。彙紀其大略。自道光中葉以還。天地干戈。廟堂咨傲。二十有餘年。人才之進退。寇亂之始末。洵時事得失之林。龜鑑所在。而我公所以樹聲建績。光輔中興者。或籌議稍迂。而成功甚奇。或發端至難。而取效甚速。或任人立事。爲衆聽所駭怪。而徐服其精。或爲國忘軀。受萬口之詆訾。而所全實大。凡若此類。不敢忽焉。官牆美富。何敢妄云窺見。惟後世讀公書者。諒亦有取於此云。」

仿古字版

會文正公文集

世界書局印行

會文正公集重編序

清代二百七十年。以古文名家者凡十數。而以桐城之方望溪姚姬傳。陽湖之惲子居爲尤著。望溪委曲詳盡。惟未能免時文氣。姬傳簡潔矣。而苦於才薄而韻促。子居力能自振。因胎息周秦之故。致不免有破碎之譏。是三子者。固已雄視一代矣。然不能無缺憾焉。嘉道以後。則以仁和龔定盦。湘鄉曾滌生爲巨擘。龔氏天才特絕。又有學以輔之。文則老莊史漢。以及釋氏之楞嚴華嚴。無不鎔冶於一爐。惜乎年命短促。未底於大成也。會氏初從事乎桐城。後乃自樹一幟。其法度謹嚴。足方軌於方姚。而雄邁之氣則過之。洵乎清代古文之殿。且亦爲清代古文之冠矣。惟譏姬傳錄古文存贈序。熙甫集中多無謂之壽序。所言固已當已。然於己集。則贈序壽序。仍纍纍滿幅。豈所謂能言者固未必能行耶。此之失言。吾人不能不爲會氏諱也。會氏以功業文章。彪炳一世。又享高壽。故人多誦習其文。其集刊本甚夥。而文則參差多寡不一。愛讀會氏文者。不能無遺憾。此編彙集衆本。重加編次。分上下二編。上編爲文。共一百五十四篇。下編爲詩。計三百首。於會氏之作。略具於是矣。會氏堅苦卓絕。百折不撓。卒能成其功業。今日讀其文。猶想見其爲人。而當茲國難叢集之日。讀是編者。有志之士。尤

足以自鏡焉。是爲序。

中華民國二十四年十二月十日。紹興王緇塵識於海上粹廬。

曾文正公文集目錄

順性命之理論	一	經史百家簡編序	一八
君子慎獨論	二	鳴原堂論文序	一九
烹阿封卽墨論	三	王船山遺書序	二〇
原才	四	衡陽彭氏譜序	二一
召誨	五	日慎齋詩草序	二三
五箴并序	六	國朝先正事略序	二四
立志箴	六	重刻茗柯文編序	二六
居敬箴	六	湖南文徵序	二七
主靜箴	七	雲槩山人詩序代季師作	二九
謹言箴	七	錢選制藝序	三一
有恆箴	七	鈔朱子小學書後	三一
紀氏嘉言序	七	書歸震川文集後	三三
武會試錄序	九	書扁鵲倉公傳	三四
錢港肱先生制藝序	一〇	書學案小識後	三四
黃仙嶠前輩詩序	一一	書王雁汀前輩勃海圖說後	三六
謝子湘文集序	一二	書周忠介公手札後	三七
朱慎甫遺書序	一三	書儀禮釋官後	三八
歐陽生文集序	一四	經史百家雜鈔題語	三九
孫芝房侍講芻論序	一七	大澗山房詩題語	四〇

孟子要略跋跋……………四〇

跋衍聖公孔恭愨公墓志銘刻本……………四二

復許孝廉振禕書……………四二

復李觀察鴻裔書……………四三

與朱大學孔揚書……………四七

復陳太守寶箴書……………四七

加復黎刺史庶昌書……………五〇

致劉孟容書……………五一

答劉孟容書……………五四

復劉孟容書……………五七

答吳廣文敏樹書……………六一

送郭筠仙南歸序……………六二

送謝吉人之官江左序……………六三

送周荇農南歸序……………六五

送陳岱雲出守吉安序……………六七

送唐先生南歸序……………六八

送江小帆同年視學湖北序……………七〇

送劉君椒雲南歸序……………七二

易問齋之母壽詩序……………七三

陳岱雲太守爲母生日讌集賓僚詩序……………七五

唐鏡海先生七十生日同人寄懷詩序……………七六

朱心垣先生五十六壽序……………七七

田崑圃先生六十壽序……………七九

朱玉馨先生七十三壽序……………八一

王翰城刺史五十壽序……………八三

王蔭之之母壽序……………八四

江小帆之母壽序……………八五

何傅巖先生七十壽序……………八七

郭璧齋先生六十壽序……………八九

金殿珊先生六十壽序……………九一

黃矩卿師之父母壽序……………九二

文小南之父七十生日壽詩序……………九四

何母廖夫人八十生日詩序……………九五

黎樾喬之兄六十壽序……………九七

曹頴生侍御之繼母七十壽序……………九九

楊母張孺人七十壽序……………一〇〇

曹西垣同年之父母壽序……………一〇二

王靜菴同年之母七十壽序……………一〇三

孫鼎菴先生六十壽序……………一〇四

江岷樵之父母壽序……………一〇六

陳仲鸞同年之父母七十壽序……………一〇七

季仙九師五十壽序……………一〇九

求闕齋記	·····	一一一
新甯縣增修城垣記	·····	一一三
槐陰書屋圖記	·····	一一四
養晦堂記	·····	一一六
湘鄉縣賓興堂記	·····	一一七
聖哲畫像記	·····	一一九
畢君殉難碑記	·····	一二四
林君殉難碑記	·····	一二六
湖口縣楚軍水師昭忠祠記	·····	一二八
何君殉難碑記	·····	一二九
箴言書院記	·····	一三一
修治金陵城垣缺口碑記	·····	一三三
靈谷龍神廟碑記	·····	一三三
金陵軍營官軍昭忠祠記	·····	一三四
金陵湘軍陸師昭忠祠記	·····	一三七
金陵楚軍水師昭忠祠記	·····	一四〇
湘鄉昭忠祠記	·····	一四二
江甯府學記	·····	一四四
補侍講缺呈請謝恩狀癸卯八月初四日	·····	一四六
討粵匪檄	·····	一四七
祭韓公祠文	·····	一四九

祭湯海秋文	·····	一五一
歲暮設奠告王考文	·····	一五二
正月八日王考生辰告文	·····	一五二
丁卯四月求降雨澤告辭	·····	一五三
廣東嘉應州知州劉君事狀	·····	一五三
書何母陳恭人事	·····	一五六
漢陽劉君家傳	·····	一五八
葛寅軒先生家傳	·····	一五九
歐陽氏姑婦節孝家傳	·····	一六二
湖北按察使趙君神道碑銘	·····	一六四
江忠烈公神道碑銘	·····	一六六
羅忠節公神道碑銘	·····	一六九
李忠武公神道碑銘	·····	一七三
李勇毅公神道碑銘	·····	一七六
隨州李君墓表	·····	一七九
錢塘丁烈婦墓表	·····	一八〇
桃源縣學教諭孫君墓表	·····	一八一
武昌張府君墓表	·····	一八四
翰林院庶吉士遵義府學教授莫君墓表	·····	一八五
鄧湘皋先生墓表	·····	一八七
戶部員外郎彭君墓表	·····	一九〇

大界墓表.....一九二

台洲墓表.....一九五

海甯州訓導錢君墓表.....一九七

新甯劉君墓碑銘.....一九九

母弟溫甫哀詞.....二〇一

吳君墓志銘.....二〇四

彭母曾孺人墓志銘.....二〇六

余安人墓志銘.....二〇七

陳岱雲妻易安人墓志銘.....二〇八

新化鄒君墓志銘.....二一〇

單縣典史張君墓志銘.....二一一

前海甯州知州長沙李君母黃宜人墓志銘.....二一二

適朱氏妹墓志.....二一三

滿妹碑誌.....二一四

荆門州學正郭君墓銘.....二一五

善化夏母楊宜人墓志銘.....二一五

祖四世元吉公墓銘.....二一七

國子監學正漢陽劉君墓志銘.....二一八

錢塘戴府君墓志.....二一九

崇仁謝君墓志銘.....二二一

劉母譚孺人墓志銘.....二二二

湘陰郭府君墓志銘.....二二三

誥封光祿大夫曾府君墓志.....二二五

劉君季霞墓志銘.....二二八

季弟事恆墓志銘.....二三〇

閩浙總督季公墓志銘.....二三二

仁和邵君墓志銘.....二三五

張君樹程墓志銘.....二三七

苗先麓墓志銘.....二三八

唐確慎公墓志銘.....二四一

歐陽府君墓志銘.....二四三

翰林院侍讀學士丁君墓志銘.....二四五

郭依永墓志銘.....二四七

羅君伯宜墓志銘.....二四九

甯津龐君墓志銘.....二五一

遵義黎君墓志銘.....二五三

劉忠壯公墓志銘.....二五四

會文正文集

順性命之理論

嘗謂性不虛懸。麗乎吾身而有宰。命非外鑠。原乎太極以成名。是故皇降之衷。有物斯以有則。聖賢之學。惟危惕以惟微。蓋自乾坤奠定以來。立天之道。曰陰與陽。靜專動直之妙。皆性命所彌綸。立地之道。曰柔與剛。靜翕動闢之機。悉性命所默運。是故其在人也。絪縕化醇。必無以解乎造物之吹噓。真與精相凝。而性卽寓於肢體之中。含生負氣。必有以得乎乾道之變化。理與氣相麗。而命實宰乎賦畀之始。以身之所具言。則有視聽言動。卽有肅乂哲謀。其必以肅乂哲謀爲範者。性也。其所以主宰乎五事者。命也。以身之所接言。則有君臣父子。卽有仁敬孝慈。其必以仁敬孝慈爲則者。性也。其所以綱維乎五倫者。命也。此其中有理焉。亦期於順焉而已矣。請申論之。性渾淪而難名。按之曰理。則仁義禮智德之賴乎擴充者。在吾心。已有條不紊也。命於穆而不已。求之於理。則元亨利貞誠之貫乎通復者。在吾心。且時出不窮也。有條不紊。則踐形無虧。可以盡己性。卽可以盡

人物之性。此順乎理者之率其自然也。時出不窮。則泛應曲當。有以立吾命。卽有以立萬物之命。此順乎理者之還其本然也。彼夫持矯揉之說者。譬杞柳以爲桮棬。不知性命。必致戕賊仁義。是理以逆施而不順矣。高虛無之見者。若浮萍遇於江湖。空談性命。不復求諸形色。是理以恫恍而不順矣。惟察之以精。私意不自蔽。私欲不自撓。惺惺常存。斯隨時見其順焉。守之以一。以不貳自惕。以不已自循。慄慄惟懼。斯終身無不順焉。此聖人盡性立命之極。亦卽中人復性知命之功也夫。

君子慎獨論

嘗謂獨也者。君子與小人共焉者也。小人以其爲獨而生一念之妄。積妄生肆。而欺人之事成。君子懷其爲獨而生一念之誠。積誠爲慎。而自慊之功密。其閒離合幾微之端。可得而論矣。蓋大學自格致以後。前言往行。旣資其擴充。日用細故。亦深其閱歷。心之際乎事者。已能剖晰乎公私。心之麗於理者。又足精研其得失。則夫善之當爲。不善之宜去。早晝然其灼見矣。而彼小人者。乃不能實有所見而行其所知。於是一善當前。幸人之莫我察也。則趨焉而不決。一不善當前。幸人之莫或伺也。則去之而不力。幽獨之中。情僞斯出。所謂欺也。惟夫君子者。懼一善之不力。則冥冥者有墮行。一不善之不去。則涓涓者無已時。屋漏而懷如帝天。方寸而堅如金石。

獨知之地。慎之又慎。此聖經之要領而後賢所切究者也。自世儒以格致爲外求。而專力於知善知惡。則慎獨之旨晦。自世儒以獨體爲內照。而反昧乎卽事卽理。則慎獨之旨愈晦。要之明宜先乎誠。非格致則慎亦失當。心必麗於實。非事物則獨將失守。此入德之方。不可不辨者也。

烹阿封卽墨論

夫人君者。不能徧知天下事。則不能不委任賢大夫。大夫之賢否。又不能徧知。則不能不信諸左右。然而左右之所譽。或未必遂爲蓋臣。左右之所毀。或未必遂非良吏。是則耳目不可寄於人。予奪尤須操於上也。昔者齊威王嘗因左右之言而烹阿大夫。封卽墨大夫矣。其事可略而論也。自古庸臣在位。其才苴事則不足。固寵則有餘。易譏覆餗。詩廣鵲梁。言不稱也。彼既自慙素餐。而又重以貪鄙。則不得不媚事君之左右。左右亦樂其附己也。而從而譽之。譽之日久。君心亦移而位日固。而政日非。己則自矜。人必效尤。此阿大夫之所爲可烹者也。若夫賢臣在職。往往有介介之節。無赫赫之名。不立異以徇物。不違道以干時。招之而不來。麾之而不去。在君側者。雖欲極譽之。而有所不得。其或不合。則不免毀之。毀之而聽。甚者削黜。輕者督責。於賢臣無損也。其不聽。君之明也。社稷之福也。於賢臣無益也。然而賢臣之因毀而罷者常也。賢臣之必不阿事左右以求取容者又

常也。此卽墨大夫之所爲可封者也。夫惟聖人賞一人而天下勸。刑一人而天下懲。固不廢左右之言而昧兼聽之聰。亦不盡信左右之言而失獨照之明。夫是以刑賞悉歸於忠厚。而用舍一本於公明也夫。

原才

風俗之厚薄。奚自乎。自乎一二人之心之所嚮而已。民之生庸弱者。戢戢皆是也。有一二賢且智者。則衆人君之而受命焉。尤智者。所君尤衆焉。此一二人者之心向義。則衆人與之赴義。一二人者之心向利。則衆人與之赴利。衆人所趨。勢之所歸。雖有大力。莫之敢逆。故曰。撓萬物者莫疾乎風。風俗之於人之心。始乎微而終乎不可禦者也。先王之治天下。使賢者皆當路在勢。其風民也。皆以義。故道一而俗同。世教既衰。所謂一二人者。不盡在位。彼其心之所嚮。勢不能不騰爲口說。而播爲聲氣。而衆人者。勢不能不聽命。而蒸爲習尙。於是乎徒黨蔚起。而一時之人才出焉。有以仁義倡者。其徒黨亦死仁義而不顧。有以功利倡者。其徒黨亦死功利而不返。水流溼。火就燥。無感不讐。所從來久矣。今之君子之在勢者。輒曰。天下無才。彼自尸於高明之地。不克以己之所嚮。轉移習俗。而陶鑄一世之人。而翻謝曰。無才。謂之不誣可乎。否也。十室之邑。有好義之士。其智足以移十人者。必能拔十人中之尤者而材之。其智足以移百人者。必能拔百人中

之尤者而材之。然則轉移習俗。而陶鑄一世之人。非特處高明之地者然也。凡一命以上。皆與有責焉者也。有國家者。得吾說而存之。則將慎擇與共天位之人。士大夫得吾說而存之。則將惴惴乎謹其心之所嚮。恐一不當而壞風俗。而賊人才。循是爲之。數十年之後。萬有一收其效者乎。非所逆睹已。

召誨

賢與不肖之等。奚判乎。視乎改過之勇怯。以爲差而已矣。日月有食。星有離次。其在於人。言有尤。行有悔。雖聖者不免。改過什於人者。賢亦什於人。改過伯於人者。賢亦伯於人。尤賢者。尤光明焉。尤不肖者。怙終焉而已。人之生氣。質不甚相遠也。習而之善。既君子矣。其有過。則其友直諫以匡之。又有友焉。巽言以挽之。退有撻。進有旌。其相率而上達也。奚禦焉。習而之不善。既小人矣。其有過。則多方文之。爲之友者。疏之。則心非而面諛。戚之。則依阿苟同。憚於以正傷恩。其相率而下達也。奚禦焉。茲賢者所以愈賢。而不肖者愈不肖也。吾之友有某君者。繇余曰。子與某相好不終。是子之失德。子盍慎諸。又有某君。繇余曰。聞子之試於有司。則嘗以私干人。是大不可。二子者之言。卒聞之。若不遜於吾志。徐而繹之。彼無求而進逆耳之言。誠敬我也。既又自省吾之過。其大者視此。或倍蓰。而其多或不可枚數。

二子者。蓋舉一隅也。人苦不自知耳。先王之道不明。士大夫相與爲一切。苟且之行。往往陷於大戾。而僚友無出片言相質確者。而其人自視恬然。可幸無過。且以仲尼之賢。猶待學易以寡過。而今曰無過。欺人乎。自欺乎。自知有過。而因護一時之失。展轉蓋藏。至蹈滔天之姦而不悔。斯則小人之不可近者已。爲人友而隱忍和同。長人之惡。是又諧臣媚子之亞也。書曰。有言逆於女心。必求諸道。有言遜於女志。必求諸非道。余故筆之於冊。以備觀省。且示吾友。能爲逆心之言者。

五箴并序

少不自立。荏苒遂泊。今茲蓋古人學成之年。而吾碌碌尙如斯也。不其戚矣。繼是以往。人事日紛。德慧日損。下流之赴。抑又可知。夫疢疾所以益智。逸豫所以亡身。僕以中才而履安順。將欲刻苦而自振拔。諒哉。其難之歟。作五箴以自創云。

立志箴

煌煌先哲。彼不猶人。藐焉小子。亦父母之身。聰明福祿。予我者厚哉。棄天而佚。是及凶災。積悔累千。其終也已。往者不可追。請從今始。荷道以躬。與之以言。一息尙存。永矢弗諼。

居敬箴

天地定位。二五胚胎。鼎焉作配。實曰三才。儼恪齋明。以凝女命。女之不莊。伐生戕性。誰人可慢。何事可弛。弛事者無成。慢人者反爾。縱彼不反。亦長吾驕。人則下女。天罰昭昭。

主靜箴

齋宿日觀。天雞一鳴。萬籟俱息。但聞鐘聲。後有毒蛇。前有猛虎。神定不懼。雖敢予侮。豈伊避人。日對三軍。我慮則一。彼紛不紛。馳騫半生。曾不自主。今其老矣。殆擾擾以終古。

謹言箴

巧語悅人。自擾其身。閑言送日。亦攬女神。解人不誇。誇者不解。道聽塗說。智笑愚駭。駭者終明。謂女賈欺。笑者鄙女。雖矢猶疑。尤悔既叢。銘以自攻。銘而復蹈。嗟女既耄。

有恆箴

自吾識字。百歷及茲。二十有八載。則一無知。曩者所忻。閱時而鄙。故者既拋。新者旋徙。德業之不常。日爲物遷。爾之再食。會未聞或愆。黍黍之增。久乃盈斗。天君司命。敢告馬走。

紀氏嘉言序

士之修德砥行。求安於心而已。無欲而爲善。無畏而不爲不善者。此聖賢

之徒。中有所得而不惑者也。自中智以下。不自能完其性之分。大抵不勸
 不趨。不懲不改。聖人者因而導之。以禍福之故。如此則吉。不如此則凶咎。
 使賢者由勉以幾安。愚者懼罰而寡罪。故易稱餘慶餘殃。書戒惠逆影響。
 先王所以利民。其術至已。自秦氏以力征得天下。踵其後者。率小役大。弱
 銅疆。疆橫之氣充塞。而聖哲與奸宄同流。轉於氣數之中。或且理不勝氣。
 善者不必福。而不善者不必抵於禍。於是浮屠氏者。乃乘其閒而爲輪迴
 因果之說。其說雖積惡之人。立悔則有莫大之善。其不悛者。雖死而有莫
 酷之刑。民樂懺悔之易。而痛其不經見之慘虐。故懼而改行。十四五焉。今
 夫水無不下也。而趵突泉激而上升。火無不然也。而鹽井遇物不焚。燭至
 則滅。彼其變也。戾氣感而祥降。順氣感而災生。亦其變也。君子之言福善
 禍淫。猶稱水下火然也。道其常者而已。常者既立。雖有百變。不足以窮吾
 之說。是故從乎天下之通理言之。則吾儒之言不敝。而浮屠爲妄。從乎後
 世之事變。人心言之。則浮屠警世之功。與吾儒略同。亦未可厚貶。而概以
 不然屏之者也。河間紀文達公。博覽彊識。百家之書。靡不辨其原而竟其
 歸。所著閱微草堂筆記五種。考獻徵文。搜神志怪。衆態畢具。其大旨歸於
 勸善懲惡。崇中國聖人流傳之至論。亦不廢佛氏之說。取愚民易入者。委
 曲剖晰。以聳其聽。海以內。幾家置一編矣。宛平徐春泉大令。好之尤篤。擇

其彌精而足以警世者。別錄一帙。名曰紀氏嘉言。其無關於勸懲者。則皆闌而不入。梓人畢役。以授國藩讀焉。世風日漓。無欲而爲善。無畏而不爲不善者。不可得已。苟有術焉。可以驅民於醇樸。而稍遏其無等之欲。豈非士大夫有世教之責者事哉。今余盜食天祿。會不能絲毫補救於斯世斯民。觀徐君之汲汲於此。其使余增愧也。

武會試錄序

道光二十有七年。秋九月。武會試外圍既畢事。兵部臣以內場考官。請上命臣國藩。偕臣王慶雲司其事。伏念臣楚南下士。至陋極愚。仰荷聖慈。逾格由翰林游陟卿陪。負乘之占。夙夜兢惕。復膺簡命。承乏於茲。益用廩廩。如不克勝。謹偕臣慶雲。悉心核閱。取士如額。恭繕試錄。進呈御覽。臣例得颺言簡端。臣聞宋臣張舜民之言曰。自古守邊選將。未必專以攻戰爲事。要在精神折衝而已。臣嘗深繹其言。若廉藺在趙。強秦不敢加兵。魏尚守雲中。匈奴不敢南牧。及夫衛霍。三代之徒。亦威稜四際。所在立功。彼其名將之精神。足以震懾萬里之外。而人主之求將。亦以精神感而召之。所謂戰勝廟堂者也。自唐宋以後。招致將才。不可必得。乃按圖而索驥。於是有武舉之科。有武學之額。有賜及第出身之目。宋慶皇閒。定武舉以策爲去留。弓馬爲高下。祿利之途一開。爪牙之士。稍稍驥首。元明以來。循是不廢。

然上以名求下之人。因襲是名而巧弋之。其以弓馬得者。不過挽彊引重。市井之麤材。而以策試中者。亦皆記錄章句。瑣瑣無用之學。故論者謂人才之興。不盡由於科目。理固然也。我朝定鼎以來。威燁無外。自虎賁宿衛。入旗禁旅。往往有熊羆不二心之臣。肩比而鱗萃。而各行省山澤猛士。又羅之以科舉。所以儲采干城之選。至周且當。顧循行既久。向之所謂市井挽彊。記錄無用者。多亦儻乎其中。而臣之所職。又惟校此。默寫孫吳之數行。無由觀其內志外體。與其進退翔舞之節。而欲使韜鈴之材之必入於此。不遺於彼。臣誠不敢以自信。獨念聖天子神武震爍。臣等憑藉寵光。亦足增長剛氣。而以精神與多士相感召。庶幾廉藺魏尚之輩。或出於此。區區之忱。不勝至願。傳曰。同明相照。同氣相求。雖不能必。志之而已。

錢港獻先生制藝序

自吾有知識以來。見鄉之老成夙學。篤於文律者。恆困頓無以自拔。或終身不得當於行省有司之試。而其所教之子若弟。往往分沾餘技。飛騰速化以去。及吾來京師。究詢四方魁桀特達之士。其先世多亦不遇。始謂不閱不亨。不誦不信。理則然矣。既深求其故。抑匪直爾也。制藝試士既久。陳篇舊句。盜襲相仍。有司者無以發覆而鉤奇。則巧爲命題以困之。乖割乎經文。鈔析乎片語。由是爲文者。有鉤聯之法。有補斡之方。有仰逼俯侵之

患名目既繁。科條日密。雖過百人之智。窮十年之力。猶不能洞悉其窾郤。及其徹於心而調於手。而齒已日長。少時英光銳氣。稍稍衰減矣。而子若弟之濡染焉者。自其未冠。已別開簡易於纖仄曲徑之中。使其才得以自騁。故前者難而因者易。勢固爲之也。予與烏程錢君崙仙同舉進士。同出江陰季公之門。官詞曹也。同居於僧舍。使蜀中也。先後同持文柄。閱出其尊甫港肱先生遺藁示予。又知兩家庭訓。所歷之艱苦曲折。同者十得八九。而不合者蓋寡焉。予之蒙陋於家大人之學。百不承一。卽崙仙文鳴一時。視先生之孤詣覃思。要亦不無少遜焉。故敘先生之文而發其例於此。庶使有衡文之責者。知所措意也夫。

黃仙嶠前輩詩序

古之君子。所以自拔於人人者。豈有他哉。亦其器識有不可量度而已矣。試之以富貴貧賤。而漫焉不加喜戚。臨之以大憂大辱。而不易其常器之謂也。智足以析天下之微芒。明足以破一隅之固識。之謂也。器與識及之矣。而施諸事業有不逮。君子不深譏焉。器識之不及。而求小成於事業。未矣。事業之不及。而求有當於語言文字。抑又未矣。故語言文字者。古之君子所偶一涉焉。而不齒諸有亡者也。昔者嘗怪杜甫氏。以彼其志量。而勞一世以事詩篇。追章琢句。篤老而不休。何其不自重惜若此。及觀昌黎韓

氏稱之。則曰流落人間者。太山一豪芒。而蘇氏亦曰。此老詩外。大有事在。吾乃知杜氏之文字。蘊於胸而未發者。殆十倍於世之所傳。而器識之深遠。其可敬慕。又十倍於文字也。今之君子。秋豪之榮華。而以爲喜。秋豪之摧挫。而以爲慍。舉一而遺二。見寸而昧尺。器識之不講。事業之不問。獨沾沾以從事於所謂詩者。興且而綴一字。抵莫而不安。毀齒而鉤研聲病。頭童而不息。以咿嚶蹇淺之語。而視爲鐘彝不朽之盛業。亦見其惑已。松滋黃仙嶠先生。質直而洞豁。泊然聲利之外。觀察於滇南。吏剔其奸。民宣其隱。於古人所謂器識事業者。亦既近而有之。閒以其餘。發爲詩章。又能棄故攬新。約言豐義。而先生曾不以自鳴。退然若無以與於古者。人之度量相越。爲閔爲隘。爲謙爲盈。不可一二計也。國藩既受而卒讀。因爲擇其尤善者得若干首。俾錄而存之。世有終其身以治詩自名。而志趣或未廣者。觀先生此編。亦將內慙而有以自擴也夫。

謝子湘文集序

嗚呼。士生今世。欲有所撰述。以庶幾古作者之義。豈不難哉。自束髮受書。則有事舉子帖括之業。有司者割截聖人之經語。以試其能。偏全虛實。斷續鉤聯之際。銖有律。黍有程。而又雜試以詩賦經義策論。其爲品目。固已不勝其繁矣。而一二才桀之士。既挾羣藝以應有司之求。又別進慕乎古。

之能文者。以降其兼勝無已之心。於是乎目欲弁視。耳欲四聽。傲精而費日。終不能達於古人之庭者。比比而是也。古之爲文者。其神專有所之。無有俗說靡言。肴其意趣。自有明以來。制義家之治古文。往往取左氏。司馬遷。班固。韓愈之書。繩以舉業之法。爲之點。爲之圓。圍以賞異之。爲之乙。爲之鐵。圍以識別之。爲之評。注以顯之。讀者囿於其中。不復知點圍評乙之外。別有所謂屬文之法也者。雖勤劇一世。猶不能以自拔。故僕嘗謂末世學古之士。一厄於試藝之繁多。再厄於俗本評點之書。此天下之公患也。將不然哉。將不然哉。南豐謝君子湘。與予同歲舉於鄉。又同登於禮部。其羣藝見采於有司者。固已躔絕與人人異。自君之生。予嘗見聞而內敬之矣。既歿。而其弟出君所爲古文示予。又知其志之可敬也。蓋以流俗之墮於所謂一再厄者。而以君之所得較之。其爲踰越。可勝量哉。於是爲序而歸之。因道其通患。以慨夫末世承學之難焉。

朱慎甫遺書序

瀏陽朱君文焯所爲書。曰易圖正旨者一卷。曰五子見心錄者二卷。曰從學雜記一卷。文集一卷。嘉道之際。學者承乾隆季年之流風。襲爲一種破碎之學。辨物析名。梳文櫛字。刺經典一二字。解說或至數千萬言。繁稱雜引。遊衍而不得所歸。張己伐物。專抵古人之隙。或取孔孟書中心性仁義

之文。一切變更故訓而別創一義。羣流和附。堅不可易。有宋諸儒。周程張朱之書。爲世大詭。閒有涉於其說者。則舉世相與笑譏唾辱。以爲彼博聞之不能。亦逃之性理空虛之域。以自蓋其鄙陋不肖者而已矣。朱君自弱冠志學。則已棄舉子業。而惟有宋五子之求。斷絕衆源。歸命於一。自六經之奧。百氏雜家有有用之言。無不究索其終。折衷於五子。家貧。負母渡湖。招徒授學。取其入以爲養。養則獨腴。身有饑色。或勸以稍易其途。從事於時世。所謂辨物梳文。擲字之學者。足以傾賊耳目。植朋廣譽。君笑曰。吾於科目。且棄而背之矣。其又屑覬彼邪。卒以不顧。日抱遺訓。以自鑄其躬。繩過無小。克敬以裕。閻然至死而不悔。嗚呼。君之於學。其可謂篤志而不牽於衆好者矣。惜其多有放佚。如大易粹言。春秋本義。三傳備說諸篇。今都不可見。其僅存者。又或闕殘。難令完整。其易圖正旨。推闡九圖之義。與德清胡渭寶應王懋竑氏之論不合。山居僻左。不及盡睹。當世通人成說。小有歧異。未爲類也。予旣受讀終篇。因頗爲論定。以詒鄉人。知觀感焉。

歐陽生文集序

乾隆之末。桐城姚姬傳先生鼎。善爲古文辭。慕效其鄉先輩方望溪侍郎之所爲。而受法於劉君大槐。及其世父編修君範。三子旣通儒碩望。姚先生治其術益精。歷城周永年書昌。爲之語曰。天下之文章。其在桐城乎。由

是學者。多歸嚮桐城。號桐城派。猶前世所稱江西詩派者也。姚先生晚而主鍾山書院講席。門下箸籍者。上元有管同異之。梅會亮伯言。桐城有方東樹植之。姚瑩石甫四人者。稱爲高第弟子。各以所得傳授徒友。往往不絕。在桐城者。有戴鈞衡存莊。事植之久。尤精力過絕人。自以爲守其邑先正之法。禮之後進。義無所讓也。其不列弟子籍。同時服膺。有新城魯仕驥絮非。宜興吳德旋仲倫。絮非之甥。爲陳用光碩士。碩士既師其舅。又親受業姚先生之門。鄉人化之。多好文章。碩士之羣從。有陳學受藝叔。陳溥廣敷。而南豐又有吳嘉賓子序。皆承絮非之風。私淑於姚先生。由是江西建昌。有桐城之學。仲倫與永福呂璜。月滄交友。月滄之鄉人。有臨桂朱琦。伯韓。龍啓瑞。翰臣。馬平。王錫。振定。甫。皆步趨吳氏。呂氏。而益求廣其術於梅伯言。由是桐城宗派。流衍於廣西矣。昔者。國藩嘗怪姚先生典試湖南。而吾鄉出其門者。未聞相從以學文爲事。旣而得巴陵吳敏樹南屏。稱述其術。篤好而不厭。而武陵楊彝珍性農。善化孫鼎臣芝房。湘陰郭嵩燾伯琛。激浦舒燾伯魯。亦以姚氏文家正軌。違此則又何求。最後得湘潭歐陽生。生吾友歐陽兆熊小岑之子。而受法於巴陵吳君。湘陰郭君。亦師事新城二陳。其漸染者多。其志趨嗜好。舉天下之美。無以易乎桐城姚氏者也。當乾隆中葉。海內魁儒畸士。崇尚鴻博。繁稱旁證。考核一字。累數千言。不能

休別立職志。名曰漢學。深摯有宋諸子義理之說。以爲不足復存。其爲文尤蕪雜寡要。姚先生獨排衆議。以爲義理考据詞章。三者不可偏廢。必義理爲質。而後文有所附。考据有所歸。一編之內。惟此尤兢兢。當時孤立無助。傳之五六十年。近世學子。稍稍誦其文。承用其說。道之廢興。亦各有時。其命也歟哉。自洪楊倡亂。東南荼毒。鍾山石城。昔時姚先生撰杖都講之所。今爲犬羊窟宅。深固而不可拔。桐城淪爲異域。既克而復失。戴鈞衡全家殉難。身亦歐血死矣。余來建昌。問新城南豐兵燹之餘。百物蕩盡。田荒不治。蓬蒿沒人。一二文士。轉徙無所。而廣西用兵九載。羣盜猶洶洶。驟不可爬梳。龍君翰臣又物故。獨吾鄉少安二三君子。尙得優游文學。曲折以求。合桐城之轍。而舒燾前卒。歐陽生亦以瘵死。老者牽於人事。或遭亂不得竟其學。少者或中道夭殂。四方多故。求如姚先生之聰明早達。太平壽考。從容以躋於古之作者。卒不可得。然則業之成否。又得謂之非命也耶。歐陽生名勳。字子和。沒於咸豐五年三月。年二十有幾。其文若詩。清瀟喜往復。亦時有亂離之慨。莊周云。逃空虛者。聞人足音。蹵然而喜。而况昆弟親戚之警效其側者乎。余之不聞桐城諸老之警效也久矣。觀生之爲。則豈直足音而已。故爲之序。以塞小岑之悲。亦以見文章與世變相因。俾後之人。得以考覽焉。

孫芝房侍講芻論序

咸豐九年三月。善化孫芝房侍講鼎臣。以書抵余建昌軍中。寄所爲芻論。屬爲裁定。凡二十五篇。曰論治者六。論鹽者三。論漕者三。論幣者二。論兵者三。通論唐以來大政者七。論明賦餉者一。其首章追溯今日之亂源。深咎近世漢學家言。用私意分別門戶。其語絕痛。明年四月。復得芝房書。則疾革告別之詞。而芝房以三月死矣。旣爲位而哭。且以書告仁和邵君懿辰。於是爲敘諸簡首。而歸諸其孤。蓋古之學者。無所謂經世之術也。學禮焉而已。周禮一經。自體國經野。以至酒漿塵市。巫卜繕臺。天鳥蠱蟲。各有專官。察及纖悉。吾讀杜元凱春秋釋例。歎邱明之發凡。仲尼之權衡萬變。大率秉周之舊典。故曰。周禮盡在魯矣。自司馬氏作史。猥以禮書與封禪平準竝列。班范而下。相沿不察。唐杜佑纂通典。言禮者居其泰半。始得先王經世之遺意。有宋張子朱子。益崇闡之。聖清膺命。巨儒輩出。顧亭林氏著書。以扶植禮教爲己任。江慎修氏纂禮書綱目。洪纖畢舉。而秦樹澧氏遂修五禮通考。自天文地理軍政官制。都萃其中。旁綜九流。細破無內。國藩私獨宗之。惜其食貨稍缺。嘗欲集鹽漕賦稅國用之經。別爲一編。傳於秦書之次。非徒廣己於不可畔岸之域。先聖制禮之體之無所不賅。固如是也。以世之多故。握槩之不可以苟。未及事事而齒髮固已衰矣。往者漢

陽劉傳瑩。某雲實究心漢學者之說。而疾其單辭碎義。輕侷宋賢。聞嘗語余。學以反求諸心而已。泛博胡爲。至有事於身。與家與國。則當一一詳核焉。而求其是。考諸室而市可行。驗諸獨而衆可從。又曰。禮非考据不明。學非心得不成。國藩則大韙之。以爲知言者徒也。未幾。某雲卽世。臨絕。爲先令處分後事。壹秉古禮。國藩旣銘其墓。又爲家傳。羸道漢學得失主客之宜。藏諸劉氏之祔。君子之言也。平則致和。激則召爭。辭氣之輕重。積久則移易世風。黨仇訟爭而不知所止。曩者良知之說。誠非無蔽。必謂其釀晚明之禍。則少過矣。近者漢學之說。誠非無蔽。必謂其致粵賊之亂。則少過矣。芻論所考諸大政。蓋與顧氏江氏秦氏之指爲近。彼數子者。固漢學家所奉以爲歸者也。而芝房首篇譏之已甚。其果有剖及毫釐千里者耶。抑將憤夫一二鉅人長德。曲學阿世。激極而一鳴耶。芝房之志大而銳進也。與某雲同。其卒也。寄書抵余。以告永訣。亦與某雲同。其自芻論外。別有詩十卷。文十一卷。河防紀略四卷。著書之多。與某雲異。而其博觀而慎取。則同。其嫉夫以漢學標揭也。亦同。而立言少異。余故稍附評論。以明不忍死友之義。亦以見二子者之不竟其志。非僅余之私痛也。

經史百家簡編序

自六籍燔於秦火。漢世掇拾殘遺。徵諸儒能通其讀者。支分節解。於是

章句之學。劉向父子。勘書祕閣。刊正脫誤。稽合同異。於是有校讐之學。梁世劉勰鍾嶸之徒。品藻詩文。褒貶前哲。其後或以丹黃識別高下。於是有評點之學。三者皆文人所有事也。前明以四書經藝取士。我朝因之。科場有勾股點句之例。蓋猶古者章句之遺意。試官評定甲乙。用硃墨旌別其旁。名曰圈點。後人不察。輒仿其法。以塗抹古書。大圈密點。狼籍行閒。故章句者。古人治經之盛業也。而今專以施之時文。圈點者。科場時文之陋習也。而今反以施之古書。未流之遷變。何可勝道。惟校讐之學。我朝獨爲卓絕。乾嘉間巨儒輩出。講求音聲故訓。校勘疑誤。冰解的破。度越前世矣。咸豐十年。余選經史百家之文。都爲一集。又擇其尤者。四十八首。錄爲簡本。以詒余弟沅甫。沅甫重寫一冊。請余勘定。乃稍以己意。分別節次。句絕而章乙之。閒亦釐正其謬誤。評隲其精華。雅與鄭並奏。而得與失參見。將使一家昆弟子姪。啓發證明。不復要塗人而強同也。

鳴原堂論文序

常棣爲燕兄弟之詩。小宛爲兄弟相戒以免禍之詩。而皆以春令起興。蓋春令之性最急。其用情最切。故常棣以喻急難之誼。而小宛以喻征邁努力之忱。余久困兵閒。溫甫沅浦兩弟之從軍。其初皆因急難而來。沅浦堅忍果摯。遂成大功。余用是獲免於戾。因與沅弟。常以暇逸相誠。期於夙興

夜寐無忝所生。爰取兩詩。春令之旨。名其堂曰鳴原堂云。

王船山遺書序

王船山先生遺書。同治四年十月刻竣。凡三百二十二卷。國藩校閱者。禮記章句四十九卷。張子正蒙注九卷。讀通鑑論三十卷。宋論十五卷。四書易詩春秋諸經稗疏考異十四卷。訂正譌脫百七十餘事。軍中紓暇。不克細紬全編。乃爲序曰。昔仲尼好語求仁。而雅言執禮。孟氏亦仁義並稱。蓋聖王所以平物我之情。而息天下之爭。內之莫大於仁。外之莫急於禮。自孔孟在時。老莊已鄙棄禮教。楊墨之指不同。而同於賊仁。厥後衆流歧出。載籍焚燒。微言中絕。人紀紊焉。漢儒撥拾遺經。小戴氏乃作記。以存禮於什一。又千餘年。宋儒遠承墜緒。橫渠張氏乃作正蒙。以討論爲仁之方。船山先生注正蒙數萬言。注禮記數十萬言。幽以究民物之同原。顯以綱維萬事。弭世亂於未形。其於古昔明體達用。盈科後進之旨。往往近之。先生名夫之字而農。以崇禎十五年舉於鄉。目覩是時朝政。刻覈無親。而士大夫又馳騫聲氣。東林復社之徒。樹黨伐仇。頽俗日敝。故其書中黜申韓之術。嫉朋黨之風。長言三歎。而未有已。既一仕桂藩。爲行人司。知事終不可爲。乃匿迹永郴衡邵之間。終老於湘西之石船山。聖清大定。訪求隱逸。鴻博之士。次第登進。雖顧亭林李二曲輩之艱貞徵聘。尙不絕於廬。獨先生

深閼固藏。邈焉無與。平生痛詆黨人標榜之習。不欲身隱而文著。來反唇之訕笑。用是其身長。遜其名寂寂。其學亦竟不顯於世。荒山敝榻。終歲孳孳。以求所謂育物之仁。經邦之禮。窮探極論。千變而不離其宗。曠百世不見知。而無所於悔。先生沒後。巨儒迭興。或攻良知捷獲之說。或辨易圖之鑿。或詳考名物訓詁音韻。正詩集傳之疏。或修補三禮時享之儀。號爲卓絕。先生皆已發之於前。與後賢若合符契。雖其著述太繁。醇駁互見。然固可謂博文約禮。命世獨立之君子已。道光十九年。先生裔孫世全。始刊刻百五十卷。新化鄧顯鶴。湘臬。實主其事。湘潭歐陽兆熊。曉晴。贊成之。咸豐四年。寇犯湘潭。板毀於火。同治初元。吾弟國荃。乃謀重刻。而增益百七十二卷。仍以歐陽君董其役。南匯張文虎。嘯山。儀徵劉毓崧。伯山等。分任校讐。比局於安慶。葺事於金陵。先生之書。於是麤備。後之學者。有能秉心敬恕。綜貫本末。將亦不釋乎此也。

衡陽彭氏譜序

吾少時讀家譜。會子十五世孫據。以關內侯。避王莽之亂。南遷爲南州諸會之祖。私怪據事蹟。不見於他書。舊譜於何取徵。後讀歐陽文忠公集。見其答會子固書。亦以關內侯據爲疑。引史例以諷之。乃知吾會氏本據爲始遷之祖。相沿且千歲。由來舊矣。歐陽公譜牒之學。號爲精密。然其所著

唐宰相世系表。於巨族既推其本源。出於某帝某王。又歷敘漢世名賢。如琅邪王氏。已稱出周靈王子晉之後。而又敘王吉王駿之系。蘭陵蕭氏。已稱出帝嚳之後。而又敘蕭何望之之系。相承不絕。如屈伸指而數庭樹。略無參稽猶豫之辭。公嘗譏司馬遷不能闕疑。後人又譏歐陽氏不善闕疑。所謂目能見千里而不能自見其睫也。君子慎度身世。信諸心則蒙大難。決大計而不懼。未信諸心。則雖坦途而不肯輕試。其於臨文。亦若是焉可耳。衡陽彭雪琴侍郎。以諸生從戎。十有三載。肅清長江。克名城以百計。殫巨勳於金陵。當其提挈飢軍。出入鋒鏑。誓不與此賊同戴三光。天下稱爲烈士。及夫勳勞日著。朝廷授爲安徽巡撫。授爲漕運總督。皆屢疏固辭不拜。退然若漆雕之內不自信。卒不輕於一試。又何慎也。同治四五年間。東南大定。侍郎與其宗長老。修訂彭氏家譜。彭氏本貫江西之泰和。至明世有曰聲揚者。始遷於衡。其後入傳。曰步南者。肇修譜牒。我朝康熙中再修之。道光十三年。侍郎之考贈光祿君三修之。及是四次修纂。族之材俊子弟。奮迹師中。積功累伐。珥貂相望。簪紱雲興。皆著於錄。彭氏日益光大矣。其系表斷自聲揚公。凡前世達人。暨同姓異望之顯者。別爲一編。不與本宗相淆。蓋凜凜乎闕疑之誼云。國藩之先世。亦自江西遷居衡陽。至明季更遷湘鄉。而祠廟今尙在衡。與彭氏擊柝相聞。墟煙相接。曩者不揆愚陋。

嘗慨然欲重訂家譜。述其可知者而差其可疑者。區爲別錄。不求盡合於歐會大儒。但求慊於吾心。久困兵閒。未遑執簡。感侍郎急於先務。故爲之序以答其請。因抒余之夙懷。

日慎齋詩草序

李生春甫。余癸卯典試蜀中所得士也。時生方少貌玉立。文似韓慕廬。脩然塵壒之表。心賞之。勛以讀書希古而別。而生侍老親疾。累年不應禮部試。丁未爲百韻詩貽余。余賦詩報之曰。不見李生今四載。我有情懷浩如海。又曰。汝曹報國好身手。似我蹉跎已老醜。思之。抑勛之也。庚戌春正月。生入都來見。遂成進士。官翰林。余大喜。王子夏散館改官刑部。余重惜之。生愜愜不自得。余持節江西。生以詩送行。有惘然若失意。旣聞。以同知之任滇中。會天下多故。久不得生消息。不數年。聞生官知府。奉使徵餉。遇賊不屈死矣。余大慟。淚如雨下。其門人韓西舫孝廉。以生滇中詩集。並毀於賊。搜羅散佚。得十之五。由吳春海太史寄余屬爲序。余何言。烏虜。天賦生以穎異之資。復予生以清華之選。其待生不可謂不厚。乃乍予之而乍奪之。使之鬱伊無懣激。而爲一官萬里之行。夫以生之才。中外皆可自效。使天益其年。以富其學。其建樹當可想見。卽其詩之所詣。當不僅若此。然死者。人所不免。犯敵捐軀。與老死牖下。其輕重固自有別。而絕不意生之死。

之慘毒如是。且並其詩殉之。亦零落無存。而僅僅掇拾於風霜兵燹之餘也。悲夫。回憶癸卯識生後。以詩倡醜。而今已矣。莊叟曰。身非女有。此天地之委形也。生既浩然長往矣。何有於身後之名。然則余爲生悲。並悲及生之詩。亦達士之所笑也。雖然。莊論達矣。而亦未盡也。如生忠魂英魄。歷劫不化。當如睢陽爲厲。以殺賊。非泯泯以沒者。况夫朝廷恤之。門人思之。有增秩之文。有延世之賞。有遺集之刻。以永其傳。均有身盡而我。不與之俱盡者在。生亦可以含笑九京也夫。

國朝先正事略序

余嘗以大清達人傑士。超越古初。而紀述闕如。用爲歎憾。道光之末。聞嘉興錢衍石給事儀吉。仿明焦竑獻徵錄。爲國朝徵獻錄。因屬給事從子應溥。寫其目錄。得將相大臣循良忠節儒林文苑等凡八百餘人。積二三百卷。借名人之碑傳。存名人之事蹟。自別京師。久從征役。而此目錄冊者。不可復睹。同治初。又得鄆陵蘇源生文集。具述其師錢給事於徵獻錄之外。復節錄名臣爲先正事略。於是知錢氏頗有造述。不僅鈔纂諸家之文矣。又二年。而得吾鄉李元度次青所著先正事略。命名乃適與錢氏相合。前此二百餘年。未有成書。近三十年中。錢氏編摩於汴水。次青成業於湖湘。斯足徵通儒意趣之同。抑地下達人傑士。其靈爽不可終闕也。自古英哲

非常之君。往往得人鼎盛。若漢之武帝。唐之文皇。宋之仁宗。元之世宗。明之孝宗。其時皆異材教起。俊彥雲屯。焜耀簡編。然考其流風所被。率不過數十年而止。惟周之文王。暨我聖祖仁皇帝。乃閱數百載而風流未沫。周自后稷十五世。集大成於文王。而成康以洎東周。多士濟濟。皆若秉文王之德。我朝六祖一宗。集大成於康熙。而雍乾以後。英賢輩出。皆若沐聖祖之教。此在愚氓亦似知之。其所以然者。雖大智莫能名也。聖祖嘗自言年十七八時。讀書過勞。至於咯血而不肯少休。老耄而手不釋卷。臨摹名家手卷。多至萬餘。寫寺廟扁榜。多至千餘。蓋雖寒峻。不能方其專。北征度漠。南巡治河。雖卒役不能踰其勞。祈雨禱疾。步行天壇。弁醢醬。齧鹽而不御。年逾六十。猶扶病而力行之。凡前聖所稱至德純行。殆無一而不備。上而天象。地輿。厯算。音樂。考禮。行師。刑律。農政。下至射。御。醫。藥。奇門。壬遁。滿蒙。西域。外洋之文書字母。殆無一而不通。且無一不創立新法。別啓津途。後來高才絕藝。終莫能出其範圍。然則雍乾嘉道累葉之才。雖謂皆聖祖教育而成。誰曰不然。今上皇帝嗣位。大統中興。雖去康熙益遠矣。而將帥之乘運會。立勳名者。多出一時章句之儒。則亦未始非聖祖餘澤。陶冶於無窮也。如次青者。蓋亦章句之儒。從事戎行。咸豐甲寅乙卯之際。與國藩患難相依。備嘗艱險。厥後自領一隊。轉戰數年。軍每失利。輒以公義糾劾罷。

職論者或咎國藩執法過當。亦頗咎次青在軍。偏好文學。奪治兵之日力。有如莊生所譏。挾策而亡羊者。久之。中外大臣。數薦次青。緩急可倚。國藩亦草疏密陳。李元度下筆千言。兼人之才。臣昔彈劾太嚴。至今內疚。惟朝廷量予褻省。當時雖爲吏議所格。天子終右之。起家復任黔南軍事。師比有功。超拜雲南按察使。而是書亦於黔中告成。聖祖有言曰。學貴初。有決定不移之志。中有勇猛精進之心。未有堅貞永固之力。次青提兵四省。屢蹶仍振。所謂貞固者非邪。發憤著書。鴻編立就。亦云勇猛矣。願益以貞固之道持之。尋訪錢氏遺書。參訂修補。矜練歲年。慎褒貶於錙銖。酌羣言而取衷。終成聖清鉅典。上躋周家雅頌。誓誥之林。不尤足壯矣哉。

重刻茗柯文編序

武進張大令式會。將重刻其曾祖王父臬聞先生茗柯文集。而以寫本示余。屬爲之序。蓋文章之變多矣。高才者好異不已。往往造爲瑰瑋奇麗之辭。倣效漢人賦頌。繁聲僻字。號爲復古。會無才力。氣勢以驅使之。有若附贅懸疣。施膠漆於深衣之上。但覺其不類耳。敘述朋舊。狀其事蹟。動稱卓絕。若合古來名德至行。備於一身。譬之畫師寫真。衆美畢具。偉則偉矣。而於其所圖之人。固不肖也。吾嘗執此以衡近世之文。能免於二者之譏。實解蹈之者多矣。臬聞先生編次七十家賦。評量殿最。不失銖黍。自爲賦亦

恢闕絕麗。至其他文。則空明澄澈。不復以博奧自高。平生師友。多超特不世之才。而下筆稱述。適如其量。若帝天神鬼之監臨。褒譏不敢少盜。何其慎歟。自考據家之道既昌。說經者專宗漢儒。厭薄宋世義理心性等語。甚者詆毀洛閩。披索疵瑕。枝之莧而忘其本。流之逐而遺其源。臨文則繁徵博引。考一字。辨一物。累數千萬言不能休。名曰漢學。前者自矜創獲。後者附和偏說。而不知返。君子病之。先生求陰陽消息於易。虞氏求前聖制作於禮。鄭氏辨說文之諧聲。剖晰毫芒。固亦循漢學之軌轍。而虛衷研究。絕無陵駕先賢之意。萌於至隱。文辭溫潤。亦無考證辨駁之風。盡取古人之長。而退然若無一長可恃。意其蘊蓄者厚。遏而蔽之。能焉而不伐。斂焉而愈光。殆天下之神勇。古之所謂大雅者歟。張氏之先兩世。賢母撫孤課讀。一日不能再食。舉家習爲故常。孝友艱苦。遠近歎慕。自粵賊縱橫。東南糜爛。常潤等郡。室廬蕩然。張氏之窮約。殆有甚於疇昔。書籍刻板。皆摧燒不復可詰矣。余昔讀張氏諸書。既欽其篤行。茲重覽茗柯文編。樂其復顯於世也。乃忘其陋而序之。

湖南文徵序

吾友湘潭羅君研生。以所編纂湖南文徵百九十卷示余。而屬爲序其端。國藩陋甚。齒又益衰。奚足以語文事。竊聞古之文。初無所謂法也。易書詩

儀禮春秋諸經。其體勢聲色。會無一字相襲。卽周秦諸子。亦各自成體。持此衡彼。畫然若金玉與卉木之不同類。是烏有所謂法者。後人本不能文。強取古人所造而摹擬之。於是有所謂法者。若其不俟摹擬。人心各具自然之文。約有二端。曰理。曰情。二者。人人之所固有。就吾所知之理而筆諸書。而傳諸世。稱吾愛惡悲愉之情。而綴辭以達之。若剖肺腑而陳簡策。斯皆自然之文。性情敦厚者。類能爲之。而淺深工拙。則相去千百千萬。而未始有極。自羣經而外。百家著述。率有偏勝。以理勝者。多闡幽造極之語。而其弊或激宕失中。以情勝者。多悱惻感人之言。而其弊常豐縛而寡實。自東漢至隋。文人秀士。大抵義不孤行。辭多儷語。卽議大政。考大禮。亦每綴以排比之句。閒以婀娜之聲。歷唐代而不改。雖韓李銳志復古。而不能革舉世駢體之風。此皆習於情韻者類也。宋興既久。歐陽會王之徒。崇奉韓公。以爲不遷之宗。適會其時。大儒迭起。相與上探鄒魯。研討微言。羣士慕效。類皆法韓氏之氣體。以闡明性道。自元明至聖朝。康雍之閒。風會略同。非是不足與於斯文之末。此皆習於義理者類也。乾隆以來。鴻生碩彥。稍厭舊聞。別啓涂軌。遠搜漢儒之學。因有所謂考據之文。一字之音訓。一物之制度。辨論動至數千言。曩所稱義理之文。淡遠簡樸者。或屏棄之。以爲空疏不足道。此又習俗趨嚮之一變已。湖南之爲邦。北枕大

江。南薄五嶺。西接黔蜀。羣苗所萃。蓋亦山國荒僻之亞。然周之末。屈原出於其間。離騷諸篇。爲後世言情韻者所祖。逮乎宋世。周子復生於斯。作太極圖說通書。爲後世言義理者所祖。兩賢者。皆前無師承。創立高文。上與詩經周易同風。下而百代逸才。舉莫能越其範圍。而沅湖湘後進。沾被流風者乎。茲編所錄。精於理者蓋十之六。善言情者約十之四。而駢體亦頗有甄采。不言法而法未始或紊。惟考據之文。蒐集極少。前哲之倡導不宏。後世之欣慕亦寡。研生之學。稽說文以究達詁。箋禹貢以晰地志。固亦深明考據家之說。而論文但崇體要。不尙繁稱博引。取其長而不彌其偏。其猶君子慎於擇術之道歟。

雲槩山人詩序代季師作

自韓愈氏有言。懽愉之詞難工。窮苦之音易好。歐陽公效之。亦稱詩必窮而後工。後之論者。大率祖述其說。以謂宮音和溫。難於聳聽。商音悽厲。易以感人。故盛世之巨公。其詩歌往往不及衰世之孤臣逐客。而廟堂卿相。例不能與窮巷憔悴專一之士。角文藝之短長。數十年來。人人相與。持是說而不變。所從來久已。芝昌嘗究觀詩教之終始。竊獨以爲未必然也。鄭氏所撰三百篇譜。大氏成周盛時。賢人有位之作爲多。東遷以降。王迹既熄。詩亦替矣。西漢蘇李。東漢班張。號爲能詩。亦當兩京全盛之日。李唐之

世。詞人百輩。累迹而興。然世所稱爲四唐者。雖愚者亦知有初盛而貶中晚。蓋聲音之道。與政相通。國家鼎盛之日。太和充塞。庶物恬愉。故文人之氣盈而聲亦上騰。反是則其氣歛而聲亦從而下殺。達者之氣盈矣。而志能斂而之內。則其聲可以薄無際而感鬼神。窮者之氣既歛而志不克。劃然而自申。則甕牖窮老而不得一篇之工。亦常有之。然則謂盛世之詩。不敵衰季。卿相不敵窮巷之士。是二者。殆皆未爲篤論已。吾師長白宮保相國光。輔聖主二十餘年。智深而量遠。果決而閒定。暇日以所爲詩二冊見示。芝昌受而讀之。簡肅清夷。不名一能。篇帙不繁。而行役之作。屢從之章。生平政蹟。略備於斯。抑有詩史之遺意。其於六朝唐宋諸家。若合衆金以融一冶。而鑄爲重器。觀者但知器之良。而忘其所采。爲誰氏之金也。於時皇清承平。已二百祀。重熙累洽。遐邇禔安。歧行喙息之倫。莫不茹仁踐義。時會可謂極隆。而吾師入總百揆。出領三輔。門生故吏。吐哺延接。天憲出內。曹司白事。手批口答。日以百計。而乃從容揮斥。時從事於吟咏。若行所無事者。才分之優絀。什百千萬。如此其遠也。觀吾師所際之時。與夫詩之所詣。而後知曩之宗韓歐之說者。亦所謂察其一。未睹其二者哉。讀既竟。因附陳微義。識於簡端。用質知言者焉。道光二十有七年九月某日。門人季芝昌謹序。

錢選制藝序

乘椎輪於金根玉輅之旁。夫人以爲陋矣。服草衣卉服於袞冕繡裳之朝。夫人以爲悖矣。甚哉時之不可已也。泥橇而山樛。夏葛而冬裘。適時則貴。失時則捐。昔馮唐終身不遇。而曰文帝好老而臣尙少。武帝好少而臣已老。豈曰非材。如不遇時何。矧夫習制藝以弋取科名。而有不附聲比貌。求合時宜者乎。雖然。趨時之道。豈一端哉。天下之事。其始蓋有一二巧者。標新領異。以賊羣聽。其次則能者慕效之。又其次則拙者剽竊之。慕而效之。是謂風氣。剽而竊之。是謂流弊。不數十年。而昔之新且異者。將厭棄矣。則又有巧者移易之。又數十年。而亦厭棄矣。人情賤同而思異。物窮則變。自古然也。故善趨時者。貴先時。不貴後時。場屋之文。何獨不然。國家以制藝取士。二百年來。爲體屢遷。乾隆嘉慶之際。學者研鍊經義。負聲振采。醴郁葩華。道光初年。稍患文勝。詞豐而義寡。梘蠟其外而塗泥其中者。往往而有。於是。有志者。慨然思以易之。刊其支蔓。矯以清真。當其始出。若撥霧而見山。厭肥膩而飲太羹也。而今已二十年矣。諺曰。城中好高髻。四方高一尺。城中好廣眉。四方成半額。自往者標爲清真之目。近乃頗事佻巧。拋棄詩書。或一挑半剔。以爲顯。排句疊調。以爲勁。抑之無實。揚之無聲。所謂歷久而厭棄者。其不然乎。所謂物窮則變者。其將在茲乎。善趨時者。當以此。

時振翔翔之骨。發鏗訇之響。鎔經史而鑄偉詞。揆以好異之人情。驗以將變之風氣。吾知其必有合也。僕不敏。嘗欲采近科墨。彙爲一帙。以爲趨時者先聲之道。人事滋劇。卒鮮休暇。同年錢君崙仙。頃出茲編見示。揀新汰弊。先得我心。苟有能者慕效。則風氣從此移易。錢君其巧者與。抑吾又有說焉。風氣者。必變者也。而規矩者。不變者也。今夫斲木爲輿。軫方以象地。蓋圓以象天。可規可萬。可水可縣。可量可權。而後出而合轍。深衣之制。袂圓以應規。曲袷如矩以應方。兼以應直應平。而後非奇袤之服。制藝之有規矩。先輩蓋詳言之。錢君此選。奇正濃淡。不名一能。要其引繩削墨。其有悖於前人之程式者鮮矣。苟舍是而別求先時之巧。是猶行遠者有說輻之占。製錦者之不得要領也。將可乎哉。

鈔朱子小學書後

右小學三卷。世傳朱子輯。觀朱子癸卯與劉子澄書。則是編子澄所詮次也。其義例不無可訾。然古聖立教之意。蒙養之規。差具於是。蓋先生之治人。尤重於品節。其自能言以後。凡夫灑掃應對飲食衣服。無不示以儀則。因其本而利道。節其性而不使縱。規矩方圓之至也。既已固其筋骸。劑其血氣。則禮樂之器。蓋由之矣。特未知焉耳。十五而入太學。乃進之以格物。行之而著焉。習矣而察焉。因其已明而擴焉。故達也。班固藝文志所載小

學類皆訓詁文字之書。後代史氏率仍其義。幼儀之繁闕焉不講。三代以下。舍佔畢之外。乃別無所謂學。則訓詁文字要矣。若揆古者三物之教。則訓詁文字者亦猶其次焉者乎。仲尼曰。行有餘力。則以學文。繪事後素。不其然哉。余故錄此編於進德門之首。使舅弟子姓。知幼儀之爲重。而所謂訓詁文字。別錄之居業門中。童子知識未楛。言有刑。動有法。而蹈非彝者鮮矣。是編舊分內外。內編尙有稽古一卷。外編嘉言善行二卷。采掇頗賤近。亦不錄云。

書歸震川文集後

近世綴文之士。頗稱述熙甫。以爲可繼曾南豐。王半山之爲之。自我觀之。不同日而語矣。或又與方苞氏並舉。抑非其倫也。蓋古之知道者。不妄加毀譽於人。非特好直也。內之無以立誠。外之不足以信後世。君子恥焉。自周詩有崧高烝民諸篇。漢有河梁之詠。沿及六朝。錢別之詩。動累卷帙。於是有所爲之序者。昌黎韓氏爲此體特繁。至或無詩而徒有序。駢拇枝指。於義爲已侈矣。熙甫則不必錢別而贈人以序。有所謂賀序者。謝序者。壽序者。此何說也。又彼所爲。抑揚吞吐。情韻不匱者。苟裁之以義。或皆可以不陳。浮芥舟以縱送於蹶滂之水。不復憶天下有曰海濤者也。神乎味乎。徒詞費耳。然當時頗崇茁軋之習。假齊梁之雕琢。號爲力追周秦者。往往而

有。熙甫一切棄去。不事塗飾而選言有序。不刻畫而足以昭物情。與古作者合符。而後來者取則焉。不可謂不智已。人能宏道。無如命何。藉熙甫早置身高明之地。聞見廣而情志闊。得師友以輔翼所詣。固不竟此哉。

書扁鵲倉公傳

司馬遷敘述扁鵲倉公。具詳病者主名。及診脈之法。藥齊之宜。繁稱數十事。累牘不休。余嘗求之。非有義也。周官醫師。食醫。疾醫。瘍醫。獸醫之屬。隸於冢宰。魯陽伏陰。節宣補救。亦宰世者之所有事。爲良醫立傳。無所不可。要以略著大指。明小道之不可廢。與日者龜策諸傳相附。擴一二事以爲類足矣。繁稱奚爲者。夫執技以事上。名一能以濟人。此小人之事也。大人者。德足以育物。智足以役衆。彼誠有所擇。不宜於此津津也。若遷實通方術而藉以自矜其多能。斯又淺者徒也。

書學案小識後

唐先生撰輯國朝學案。命國藩校字付梓。既畢役。乃謹書其後曰。天生斯民。予以健順五常之性。豈以自淑而已。將使育民淑世而彌縫天地之缺憾。其於天下之物。無所不當究。二儀之奠。日月星辰之紀。氓庶之生成。鬼神之情狀。草木鳥獸之咸若。灑掃應對進退之瑣。皆吾性分之所有事。故曰。萬物皆備於我人者。天地之心也。聖人者。其智足以周知庶物。其才能

時措而咸宜。然不敢縱心以自用。必求權度而絜之。以舜之濬哲。猶且好問好察。周公思有不合。則夜以繼日。孔子。聖之盛也。而有事乎好古敏求。顏淵。孟子之賢。亦曰博文。曰集義。蓋欲完吾性分之一源。則當明凡物萬殊之等。欲悉萬殊之等。則莫若卽物而窮理。卽物窮理云者。古昔賢聖共由之軌。非朱子一家之創解也。自陸象山氏以本心爲訓。而明之餘姚王氏。乃頗遙承其緒。其說主於良知。謂吾心自有天。則不當支離而求諸事物。夫天則誠是也。目巧所至。不繼之以規矩準繩。遂可據乎。且以舜。周公。孔子。顏。孟之知如彼。而猶好問好察。夜以繼日。好古敏求。博文而集義之勤如此。况以中人之質。而重物欲之累。而謂念念不過乎。則其能無少誣耶。自是以後。沿其流者百輩。間有豪傑之士。思有以救其偏。變一說則生一蔽。高景逸。顧涇陽氏之學。以靜坐爲主。所重仍在知覺。此變而蔽者也。近世乾嘉之間。諸儒務爲浩博。惠定宇。戴東原之流。鉤研詁訓。本河間獻王實事求是之旨。薄宋賢爲空疏。夫所謂事者非物乎。是者非理乎。實事求是。非卽朱子所稱卽物窮理者乎。名目自高。詆毀日月。亦變而蔽者也。別有顏習齋。李恕谷氏之學。忍嗜欲。苦筋骨。力勤於見迹。等於許行之並耕。病宋賢爲無用。又一蔽也。由前之蔽。排王氏而不塞其源。是五十步笑百步之類矣。由後之二蔽。矯王氏而過於正。是因噎廢食之類矣。我朝崇

儒一道。正學翕興。平湖陸子。桐鄉張子。闢說辭而反經。確乎其不可拔。陸桴亭。顧亭林之徒。博大精微。體用兼賅。其他鉅公碩學。項領相望。二百年來。大小醇疵。區以別矣。唐先生於是輯爲此編。大率居敬而不偏於靜。格物而不病於瑣。力行而不迫於隘。三者交修。采擇名言。略依此例。其或守王氏之故轍。與變王氏而鄰於前三者之蔽。則皆釐而剔之。豈好辯哉。去古日遠。百家各以其意自鳴。是丹非素。無術相勝。雖其尤近理者。亦不能饜人人心。而無異辭。道不同。不相爲謀。則亦已矣。若其有嗜於此而取途焉。則且多其識。去其矜。無以聞道自標。無以方隅自囿。不爲口耳之求。而求自得焉。是則君子者已。是唐先生與人爲善之志也。

書王雁汀前輩勃海圖說後

書孔氏疏云。堯時青州。當越海而有遼東。杜氏通典云。青州之界。越海分遼東。樂浪。三韓之地。西抵遼水。而胡氏渭曰。漢武所開樂浪。元菟二郡。乃古嵎夷之地。嵎夷。羲和所宅。朝鮮。箕子所封。皆應在青州域內。不僅遼東而已。據此數說。則禹時青州。踰海而兼營州之地。理若可信。齊召南氏所謂勢固自然者也。前明遼東都指揮使。隸於山東布政司。明初遼東土子。尙附山東鄉試。厥後以渡海之艱。改附順天。而遼東各州衛。隸於山東。則終明之世不改。蓋亦猶上古之青州。兼轄營州云爾。我朝定宅燕京。與明

代同。而遼左爲陪都重地。則與前明之二州二十五衛。視同羈縻者。輕重迥別。故勃海之襟帶。旅順之門戶。視前世尤加慎焉。雁汀先生之意。欲於隍城石島之間。駐水師將領一員。登州。金州。南北兼巡。內以防盜匪之狙伏。外以懾夷人之闖入。可謂謀慮老成。操之有要者已。道光二十九年。御史趙東昕。建登州設立水師之議。宣宗成皇帝下其事。令兵部軍機處會議。當事者以迹近更張。格而不行。國藩時承乏兵部。頗知旅順要隘。宜別置嚴鎮。而不知康熙年間。有嵩祝請登州水師。巡哨金州。鐵山之說。亦遂附和。未遑他議。今觀先生圖說所載實錄各條。知國家機務尤大者。列聖廟謨。皆已籌及之。苟能推行而變通。則收功不可紀極也。故述前說以互證。亦以志余不學之恥焉。

書周忠介公手札後

往余讀史忠正公集。見其乙酉四月十九日遺書五通。又廿一日絕筆一紙。其言至深痛。不可終讀。蓋視楊忠愍公獄中家書。猶或過之。乾隆四十二年。我高宗皇帝。命摹勒史公絕筆於揚州梅花嶺祠壁。而楊公手書。亦於邇歲。摹刻於京師松筠菴祠中。忠臣志士。或鬱屈於一時。其精光終將大顯於世。不可得而闕也。門人潘生伯寅。頃以周忠介公被逮時手札視余。乃與前楊後史。若出一轍。雖號爲三仁。殆無愧色。世多疑明代誅鋤搢

紳而怪後來氣節之盛。以爲養士實厚使然。余謂氣節者亦一二賢臣倡之。漸乃成爲風會。不盡關國家養士之薄厚也。當忠介吳中就逮之時。其駢首殉難之五人者。顏佩韋等皆市人。周文元則輿隸耳。彼豈嘗邀朝廷一日之參養。而且慷慨赴義如彼。况乎士大夫有綱常風教之責者哉。

書儀禮釋官後

侍郎胡君季臨重刻其會祖王父樸齋先生所箸儀禮釋官。寄示國藩。屬爲識於簡端。余嘗從皇清經解中得讀此書。麤識崖略。先生治禮崇信鄭氏。而於鄭說之歧誤者。亦不苟爲附和。如燕禮宜以膳宰爲主人。而辨注釋爲宰夫者之非。司宮卽周禮之宮人。而指注比於小宰者之失。左右正卽僕從之官。若書之左右攜僕。詩之膳夫左右。而證注中稱樂正。僕人正者之謬。特性士有私臣而歎。注謂士無臣者之疏。其說旣允矣。至於曲證旁通。往往卽一事而洞見本原。先王之制禮也。因人之愛而爲之文飾。以達其仁。因人之敬而立之等威。以昭其義。雖百變而不越此兩端。先生以爲士喪旣夕二篇所言。甸人。管人。夏祝。商祝。冢人。卜人。隸人。遂匠之屬。皆公家之臣。來執事者也。又以爲諸侯之官其爵。必降等於天子。聖人別嫌明微之意。寓乎其閒。使周之諸侯。遵而守之。何至有僭越而置六卿稱縣公者。由前之說。則臣下之喪。君旣臨其小斂。又遣官助其百役。有若家人

骨肉。愴惻纏綿。由後之說。則侯國之百職庶司。不敢毫髮僭擬於天王。恩誼之篤如彼。名分之嚴若此。此皆禮之精意。祖仁本義。又非僅考核詳審而已。儀禮一經。前明以來。幾成絕學。我朝鉅儒輩出。精詣鴻編。迭相映蔚。而徽州一郡尤盛。自婺源江氏永。崛起爲禮經大師。而同邑汪氏紱。休甯戴氏震。亦皆博洽。爲世所宗。其後歙縣金氏榜。凌氏廷堪。竝有纂述。無慙前修。先生世居績溪。與諸儒地相比。時相接。其入國史儒林傳。列於江氏。汪氏之次。而哲孫培暈。又能紹其家學。著儀禮正義。薈萃羣言。衷於至當。徽州爲朱子父母之邦。典章文物。固宜非他郡所敢望。而胡氏世傳禮教。故家文獻。縣延無替。亦足使篤古之士。低徊而興慕也。

經史百家雜鈔題語

姚姬傳氏之纂古文辭。分爲十三類。余稍更易爲十一類。曰論箸。曰詞賦。曰序跋。曰詔令。曰奏議。曰書牘。曰哀祭。曰傳誌。曰雜記。九者。余與姚氏同焉者也。曰贈序。姚氏所有而余無焉者也。曰敘記。曰典志。余所有而姚氏無焉者也。曰頌贊。曰箴銘。姚氏所有余以附入詞賦之下編。曰碑誌。姚氏所有。余以附入傳誌之下編。論次微有異同。大體不甚相遠。後之君子。以參觀焉。

村塾古文。有選左傳者。識者或譏之。近世一二知文之士。纂錄古文。不復

上及六經。以云尊經也。然溯古文所以立名之始。乃由屏棄六朝駢儷之文。而返之於三代兩漢。今舍經而降以相求。是猶言孝者。敬其父祖而忘其高曾。言忠者曰。我家臣耳。焉敢知國。將可乎哉。余鈔纂此編。每類必以六經冠其端。涓涓之水。以海爲歸。無所於讓也。姚姬傳氏撰次古文。不載史傳。其說以爲史多。不可勝錄也。然吾觀其奏議類中。錄漢書至三十八首。詔令類中。錄漢書三十四首。果能屏諸史而不錄乎。余今所論次。采輯史傳稍多。命之曰經史百家雜鈔云。

大潛山房詩題語

山谷學杜公七律。專以單行之氣。運於偶句之中。東坡學太白。則以長古之氣。運於律句之中。樊川七律。亦有一種單行票姚之氣。余嘗謂小杜蘇黃皆豪士。而有俠客之風者。省三所爲七律。亦往往以單行之氣。差於牧之爲近。蓋得之天事者多。若能就斯塗而益闢之。參以山谷之倔強。而去其生澀。雖不足以悅時目。然固詩中不可不歷之境也。省三用兵。亦能橫厲捷出。不主故常。二十從戎。三十而擁疆寄。聲施爛然。爲時名將。惟所向有功。未遭挫折。蔑視此虜之意多。臨事而懼之念少。若加以悚惕戒慎。豪俠而具斂退氣象。尤可貴耳。余覽其詩卷既畢。因題數語以勸勉之。

孟子要略敘跋

朱子所編孟子要略。自來志藝文者。皆不著於錄。朱子經義考。亦稱未見。寶應王白田氏。爲朱子年譜。謂此書久亡佚矣。吾亡友漢陽劉芑雲傳瑩。始於金仁山孟子集注考證內搜出。復還此書之舊。王氏勤一生以治朱子之業。號爲精核無倫。而不知要略一書。具載金氏書中。卽四庫館中諸臣。於金氏集注考證。爲提要數百言。亦未嘗道及此書。蓋耳目所及。百密而不免一疏。事之常也。觀金氏所記。則朱子當日編輯要略。別爲注解。與集注閒有異同。金氏於人皆有所不忍。章云要略注尙是舊說。桃應問曰。章云要略注文微不同。今散失既久。不可復覩。芑雲僅能排比次第。屬國藩校刻。以顯於世。抑猶未完之本與。然如許叔重五經異義。余隱文尊孟辨之類。皆湮晦數百年矣。一旦於他書中刺取。掇零拾墜。遂復故物。則此書之出。安知不更有人焉。蒐得原注以補今日之闕乎。天下甚大。來者無窮。必有能篤耆朱子之書。罔羅以彌遺恨者。是吾芑雲地下之靈。禱祀以求之者也。

孟子之書。自漢唐以來。不列於學官。陸氏經典釋文。亦不之及。而司馬光晁說之之倫。更相疑詆。至二程子始表章之。而朱子遂定爲四書。既薈萃諸家之說。爲孟子精義。又采其尤者。爲集注七卷。又剖晰異同。爲或問十四卷。用力亦已勤矣。而茲又簡擇爲要略五卷。好之如此其篤也。蓋深造自得。則夫泳於心而味於口者。左右而逢其原。參伍錯綜。而各具條理。雖

以國藩之蒙陋讀之。亦但見其首尾完具。而不復知銜決顛倒之爲病。則其犁然而當於人人之心可知已。國藩既承亡友劉君遺令。爲之排定付刻。因頗仿近思錄之例。疏明分卷之大指。俾讀者一覽而得焉。大賢之旨趣。誠知非末學所可幸中。獨未知於吾亡友之意。合邪否邪。死者不可復生。徒使予茫然四顧而傷心也夫。會國藩又識。

跋衍聖公孔恭愨公墓志銘刻本

漢碑載乙瑛、韓勅、史晨數人者。有功於孔林甚鉅。而史君二碑。既載其請祠之章。又敘其饗禮之盛。其補牆垣、治瀆井、種梓守冢諸績。至屢書不一書。功亦夥矣。此碑載恭愨公本以聖人之胃。而其有功孔林。又百倍於前哲。若更得善篆隸者。大書重刻。異世流傳。豈僅與史君輩比烈哉。

復許孝廉振禕書

去冬接奉惠書。久未裁復。頃又辱手簡。伏審侍闈曼福。簞著日精。至以爲慰。此間軍事。自徽甯失後。局勢過促。地小無舞袖之方。夢中無伸足之處。十二月。曾軍敗挫。建、東、都、鄱、浮、彭、六邑同失。祁門老營。孤懸被困。幸左、鮑將黃逆擊退。甫慶更生。僞侍王李世賢一股。又陷樂平、景鎮。斷我後路。塞我糧源。現已檄左、鮑兩軍。夾擊景鎮。而老營抽兵。力攻徽州。若二者能一處得手。庶米糧可通。不使三萬軍士。盡陷重險之中。撫建股匪。深入腹地。

本擬檄鮑公由省城援剿。因景鎮之變。不能不先援老營。聞樟樹已失。不知瑞臨得保無恙否。珂鄉罹水火久矣。劫數猶未滿耶。來示詢及古文之法。僕本無所解。近更荒淺。不復厝意。古文者。韓退之氏。厭棄魏晉六朝駢儷之文。而返之於六經兩漢。從而名焉者也。名號雖殊。而其積字而爲句。積句而爲段。而爲篇。則天下之凡名爲文者。一也。國藩以爲欲著字之古。宜研究爾雅說文。小學訓詁之書。故嘗好觀近人王氏段氏之說。欲造句之古。宜倣效漢書文選。而後可砭俗而裁僞。欲分段之古。宜熟讀班馬韓歐之作。審其行氣之短長。自然之節奏。欲謀篇之古。則羣經諸子。以至近世名家。莫不各有匠心。各具章法。如人之有肢體。室之有結構。衣之有要領。大抵以力去陳言。戛戛獨造爲始事。以聲調鏗鏘。色蘊不盡爲終事。僕學無師承。冥行臆斷。所辛苦而僅得之者。如是而已。自頃羣賊逼處。無日不在危機駭浪之中。偶一展卷。都無意緒。不足仰報故人。勉惜分陰。以光絕業。瞻企不盡。

復李觀察鴻裔書

接初三日手書。藉審台候。綏愉醇修日密。公餘讀書。日有常課。欣慰無已。承詢虛實。譬喻異詁等門。屬以破格相告。若鄙人有所祕惜也者。僕雖無狀。亦何敢稍懷吝心。特以年近六十。學問之事。一無所成。未言而先自愧。

報。昔在京師。讀王懷祖段茂堂諸書。亦嘗研究古文家用字之法。來函所詢三門虛實者。實字而虛用。虛字而實用也。何以謂之實字虛用。如春風風人。夏雨雨人。上風雨實字也。下風雨則當作養字解。是虛用矣。解衣衣我。推食食我。上衣食實字也。下衣食則當作惠字解。是虛用矣。春朝朝日。秋夕夕月。上朝夕實字也。下朝夕則當作祭字解。是虛用矣。入其門無人門焉者。入其閨無人閨焉者。上門閨實字也。下門閨則當作守字解。是虛用矣。後人或以實者作本音讀。虛者破作他音讀。若風讀如諷。雨讀如籲。衣讀如裔。食讀如嗣之類。古人會無是也。何以謂之虛字實用。如步。行也。虛字也。然管子之六尺爲步。韓文之步有新船。輿地之瓜步邀笛步。詩經之國步天步。則實用矣。薄。迫也。虛字也。然因其叢密而林曰林薄。因其不厚而簾曰帷薄。以及爾雅之屋上薄。莊子之高門懸薄。則實用矣。覆。敗也。虛字也。然左傳設伏以敗人之兵。其伏兵卽名曰覆。如鄭突爲三覆以待之。韓穿帥七覆於敖前。是虛字而實用矣。從。順也。虛字也。然左傳於位次有定者。其次序卽名曰從。如荀伯不復從。豎牛亂大從。是虛字而實用矣。然此猶就虛字之本義而引伸之也。亦有與本義全不相涉。而借此字以名彼物者。如收。斂也。虛字也。而車之輪名曰收。賢。長也。虛字也。而車轂之大穿名曰賢。畏。懼也。虛字也。而弓之淵名曰畏。峻。高也。虛字也。而弓之拄

弦處名曰峻。此又器物命名。虛字實用之別爲一類也。至用字有譬喻之法。後世須數句而喻意始明。古人祇一字而喻意已明。如駿良馬也。因其良而美之。故爾雅駿訓爲大馬。行必疾。故駿又訓爲速。商頌之下國駿龐。周頌之駿發爾私。是取大之義爲喻也。武成之侯衛駿奔。管子之弟子駿作。是取速之義爲喻也。臄牛百葉也。或作毗。或作毗。音義並同。牛百葉重疊而體厚。故爾雅毛傳。皆訓爲厚。節南山之天子是毗。采芣之福祿臄之。是取厚之義爲喻也。宿夜止也。止則有留義。又有久義。子路之無宿諾。孟子之不宿怨。是取留之義爲喻也。史記之宿將宿儒。是取久之義爲喻也。渴欲飲也。欲之則有切望之義。又有急就之義。鄭箋雲漢詩曰。渴雨之甚。石苞檄吳書曰。渴賞之士。是取切望之義爲喻也。公羊傳曰。渴葬。是取急就之義爲喻也。至於異詁云者。則無論何書。處處有之。大抵人所共知。則爲常語。人所罕聞。則爲異詁。昔郭景純注爾雅。近世王伯申著經傳釋詞。於衆所易曉者。皆指爲常語。而不甚置論。惟難曉者。則深究而詳辨之。如淫訓爲淫亂。此常語。人所共知也。然如詩之既有淫威。則淫訓爲大。左傳之淫刑以逞。則淫訓爲濫。書之淫舍牯牛馬。左之淫芻蕘者。則淫當訓爲縱。莊子之淫文章。淫於性。則淫字又當訓爲贅。皆異詁也。黨訓鄉黨。此常語。人所共知也。然說文云。黨。不鮮也。黨字从黑。則色不鮮。乃是本義。方言

又云。黨。智也。郭注以爲解寤之貌。鄉射禮侯黨。鄭注以爲黨。旁也。左傳何黨之乎。杜注以爲黨所也。皆異詁也。展。訓爲舒展。此常語也。卽說文訓展爲轉。爾雅訓展爲誠。亦常語。人所共知也。然儀禮有司展羣幣。則展訓爲陳。周禮展其功緒。則展訓爲錄。旅獒時庸展親。則展當訓爲存省。周禮之展犧牲。展鍾。展樂器。則展又當訓爲察驗。皆異詁也。此國藩講求故訓。分立三門之微意也。古人用字。不主故常。初無定例。要之各有精意。運乎其間。且如高平曰阜。大道曰路。土之高者曰冢。曰墳。皆實字也。然以其有高廣之意。故爾雅毛傳於此四字。均訓爲大。四牡孔阜。爾穀既阜。火烈具阜。阜成兆民。其用阜字。俱有盛大之意。王者之門曰路。門寢曰路。寢車曰路車。馬曰路馬。其用路字。俱有正大之意。長子曰冢子。長婦曰冢婦。天官曰冢宰。友邦曰冢君。其用冢字。俱有重大之意。小雅之牂羊墳首。司烜之共墳燭。其用墳字。俱有肥大之意。至三墳五典。則高大矣。凡此等類。謂之實字。虛用也可。謂之譬喻也可。卽謂之異詁也。亦可。閣下現讀通鑑。司馬公本精於小學。胡身之亦博極羣書。卽就通鑑異詁之字。偶一抄記。或他人視爲常語。而己心以爲異。則且抄之。或明日視爲常語。而今日以爲異。亦姑抄之。久之。多識雅訓。不特譬喻虛實二門可通。卽其他各門。亦可觸類而貫澈矣。

與朱太學孔揚書

來函具悉。所論轉注。謂戴氏專以訓詁解轉注。義有未盡。誠爲確論。至謂會意之老。形聲之考。焯然已知。而疑許氏合此二字爲轉注者。爲失之贅。則竊以爲不可。許君固非絕無可議者。惟指考老爲轉注。則在不可議之列。尊意履本訓踐。其所爲踐之具者爲轉注。是以虛用者爲本訓。實用者爲轉注。凡古今文字。何字不可虛實兩用。如屨字以實用者爲本訓。而羽獵賦之屨般首。則虛用矣。鳥字以實用者爲本訓。而魯頌之松栢有鳥。則虛用矣。推之衣巾冠帶。皆實字也。而孟子之衣褐。周禮之巾車。史記之冠玉。月令之帶弓。則虛用矣。宮室門戶。皆實字也。而爾雅之大山宮小山。左傳之復室其子。公羊之無人門焉者。漢書之王嘉戶殿門。則虛用矣。將循履字之例。概以虛者爲本義。實者爲轉注乎。抑有時以虛者命爲轉注乎。曩常譏戴段二家。以一部爾雅。全目爲轉注。以五百四十部首。全目爲轉注。以爲何必六書。祇此一書足矣。今來函所述庭訓。其病殆亦近之。不佞竊不自揆。謬立一說。篤守許氏考老之愜。以謂老者。會意字也。考者。轉注字也。部首之可指數者。如犛部。鬣部。鬣部。畫部。眉部。犇部。筋部。稽部。橐部。癆部。重部。老部。履部。歛部。鹽部。弦部。西部。皆轉注之部也。凡形聲之字。大抵以左體爲母。以右體之得聲者爲子。而母字從無省畫者。凡轉注之字。大抵

以會意之字爲母。亦以得聲者爲子。而母字從無不省畫者。省畫則母字之形不全。何以知子之所自來。惟好學深思。精心研究。則形雖不全。意可相受。如老字雖省去匕字。而可知耄耄等字之意。從老而來。履字雖省去舟文。而可知屨屐等字之意。從履而來。橐字雖省去豕字。而可知囊橐等字之意。從橐而來。寤字雖省去夢字。而可知寤寐等字之意。從寤而來。推之聲、爨、畫、眉、等部。莫不皆然。其曰建類一首者。母字之形模尙具也。其曰同意相受者。母字之畫省而意存也。抑又有進者。轉注之字。其部首固多會意者矣。亦有不盡然者。如鹽從鹵。監聲。形聲字也。而所屬鹽鹵等字。仍不害其爲轉注之字。歛從欠。會聲。形聲字也。而所屬之歛。仍不害其爲轉注之字。至於酉者。象形字也。本不得目爲轉注之部。特以酉字之才。不足以統所屬之字。似應別立酒部。而於醞、釀、醕、醋、醇、醱、醲等字。增曰從酒省。昱聲。從酒省。襄聲。從酒省。壽聲。昔聲。享聲。离聲。云云。乃與全書義例相合。蓋此等字。本不僅胚胎於酉字。實由酒字貫注而來。斯又許君所未指爲轉注。而不害其爲轉注者也。此說蓄諸鄙心。歷有歲年。閒語朋輩。疑信參半。以生平於小學。致力甚淺。不敢有所造述。因來函陳義頗堅。輒復貢其膚末。以相質證。

復陳太守寶箴書

四月二十七日接惠書。并寄大文一册。知台從去歲北行。以途中染疾。就醫歷下。正月之杪。乃達京師。是時鄙人適已出都。未及相見。爲悵閣下志節嶙峋。器識宏達。又能虛懷取善。兼攬衆長。來書所稱。自吳侍郎以下。若涂君張君方君。皆時賢之卓然能自立者。鄙人器能竄薄。謬蒙崇獎。非所敢承。前以久點高位。頗思避位讓賢。保全晚節。赴闕以後。欲布斯懷而未。能得其方。亦遂不復陳請。又盛引古義。力言不可遽萌退志。今已承乏此間。進止殊不自由。第恐精力日頹。無補艱危。祇速謗耳。大著粗讀一過。駿快激昂。有陳同甫葉水心諸人之風。僕昔備官朝列。亦嘗好觀古人之文章。竊以自唐以後。善學韓者。莫如王介甫氏。而近世知言君子。惟桐城方氏姚氏。所得尤多。因就數家之作。而考其風旨。私立禁約。以爲有必不可犯者。而後其法嚴。而道始尊。大抵剽竊前言。句摹字擬。是爲戒律之首。稱人之善。依於庸德。不宜褒揚。盜量。動稱奇行異徵。鄰於小說誕妄者之所爲。貶人之惡。又加愼焉。一篇之內。端緒不宜繁多。譬如萬山旁薄。必有主峯。龍袞九章。但挈一領。否則首尾銜決。陳義蕪雜。茲足戒也。識度會不異人。或乃競爲僻字澀句。以駭庸衆。斷自然之元氣。斯又才士之所同蔽。戒律之所必嚴。明茲數者。持守勿失。然後下筆造次。皆有法度。乃可專精以理吾之氣。熟讀而強探。長吟而反覆。使其氣若翔翥於虛無之表。其辭跌

宕俊邁而不可以方物。蓋論其本。則持戒律之說。詞愈簡而道愈進。論其末。則抗吾氣以與古人之氣相翕。有欲求太簡而不得者。兼營乎本末。斟酌乎繁間。此自昔志士之所爲。畢生乾乾。而吾輩所當勉焉者也。國藩粗識塗徑。所作絕少。在軍日久。舊業益荒。忽忽衰老。百無一成。既承切問。略舉所見。以資參證。別示種煙之弊。及李編修書膏腴地畝。舍五稼而種罌粟。不惟民病艱食。亦人心風俗之憂。直隸土壤瘠薄。聞種此者尙少。若果漸染此習。自應通飭嚴禁。但非年豐民樂。生聚教訓。亦未易以文告爭耳。

加復黎刺史庶昌書

正封函間。又接二月十六日手書。汲汲以修名不立。志事無成爲懼。有屈正。則陶士行之風。良堪敬仰。至以建樹無聞。遽用皇皇。殊太早計。三十三歲。甫及壯年。古來如顏子立德。周郎立功。賈生立言。均在少壯。然千古會有幾人。其餘賢哲代興。樹立宏達。大抵皆在四十以後耳。以仲尼之聖而不惑。亦待四十。今來示以惑之滋甚。急思祛疑。似聞道更思早於魯叟。斯可謂大惑也。三史通鑑。次第卒業。爲學之大基已立。若能精進不懈。博覽而約守。資深而居安。終有灑然自得。渙然冰釋之日。殆非他人所能共喻。至於朝夕升斗之謀。則丁中丞道出此間。當一與之熟商。此等亦有命運。大囊之說。頗省記否。國藩又啓。

致劉孟容書

去歲辱惠書。所以講明學術者。甚正甚詳。而於僕多寬假之詞。意欲誘而進之。且使具述爲學大指。良厚良厚。蓋僕早不自立。自庚子以來。稍事學問。涉獵於前明本朝諸大儒之書。而不克辨其得失。聞此間有工爲古文詩者。就而審之。乃桐城姚郎中鼐之緒論。其言誠有可取。於是取司馬遷。班固。杜甫。韓愈。歐陽修。曾鞏。王安石。及方苞之作。悉心而讀之。其他六代之能詩者。及李。杜。蘇。軾。黃。庭。堅。之徒。亦皆泛其流而究其歸。然後知古之知道者。未有不明於文字者也。能文而不能知道者。或有矣。烏有知道而不知文字者乎。古聖觀天地之文。獸迹鳥跡而作書契。於是乎有文。文與文相生而爲字。字與字相續而成句。句與句相續而成篇。口所不能達者。文字能曲傳之。故文字者。所以代口而傳之千百世者也。伏羲能深知經緯三才之道。而畫卦以著之。文王周公。恐人之不能明也。於是立文字以彰之。孔子又作十翼。定諸經以闡顯之。而道之散列於萬事萬物者。亦略盡於文字中矣。所貴乎聖人者。謂其立行與萬事萬物相交錯。而曲當乎道。其文字可以教後世也。吾儒所賴以學聖賢者。亦藉此文字以考古聖之行。以究其用心之所在。然則此句與句續。字與字續者。古聖之精神語笑。胥寓於此。差若毫釐。謬以千里。詞氣之緩急。韻味之厚薄。屬文者一不慎。

則規模立變。讀書者一不慎。則鹵莽無知。故國藩竊謂今日欲明先王之
道。不得不以精研文字爲要務。上古盛時。聖君賢相。承繼熙洽。道德之精。
淪於骨髓。而學問之意。達於閭巷。是以其時。雖置兔之野人。漢陽之游女。
皆含性貞嫻吟詠。若伊萊。周召。凡伯。仲山甫之倫。其道足文工。又不待言。
降及春秋。王澤衰竭。道固將廢。文亦殆殊已。故孔子覩獲麟。曰。吾道窮矣。
畏匡。曰。斯文將喪。於是慨然發憤。修訂六籍。昭百王之法戒。垂千世而不
刊。心至苦。事至盛也。仲尼既歿。徒人分布。轉相流衍。厥後聰明魁傑之士。
或有識解譔著。大抵孔氏之苗裔。其文之醇駁。一視乎見道之多寡。以爲
差。見道尤多者。文尤醇焉。孟軻是也。次多者。醇次焉。見少者。文駁焉。尤少
者。尤駁焉。自荀揚莊列。屈賈而下。次第等差。略可指數。夫所謂見道多寡
之分數。何也。曰。深也。博也。昔者孔子贊易以明天道。作春秋以衷人事之
至當。可謂深矣。孔子之門有四科。子路知兵。冉求富國。問禮於柱史。論樂
於魯伶。九流之說。皆悉其源。可謂博矣。深則能研萬事微芒之幾。博則能
究萬物之情狀而不窮於用。後之見道不及孔氏者。其深有差焉。其博有
差焉。能深且博而屬文。復不失古聖之誼者。孟氏而下。唯周子之通書。張
子之正蒙。醇厚正大。邈焉寡儔。許鄭亦能深博。而訓詁之文。或失則碎。程
朱亦且深博。而指示之語。或失則隘。其他若杜佑。鄭樵。馬貴與。王應麟之

徒能博而不能深。則文流於蔓矣。游揚金許。薛胡之儔。能深而不能博。則文傷於易矣。由是有漢學宋學之分。斷斷相角。非一朝矣。僕窃不自揆。謬欲兼取二者之長。見道既深且博。而爲文復臻於無累。區區之心。不勝奢願。譬若以蚊而負山。盲人而行萬里也。亦可哂已。蓋上者仰企於通書正蒙。其次則篤耆司馬遷韓愈之書。謂二子誠亦深博。而頗窺古人屬文之法。今論者不究二子之識解。輒謂遷之書憤懣不平。愈之書傲兀自喜。而足下或不深察。亦偶同於世人之說。是猶觀盤詰之聾牙。而謂尙書不可讀。觀鄭衛之淫亂。而謂全詩可刪。其毋乃漫於一概而未之細推也乎。孟子曰。君子所性。雖大行不加焉。雖窮居不損焉。僕則謂君子所性。雖破萬卷不加焉。雖一字不識無損焉。離書籍而言道。則仁義忠信。及躬皆備。堯舜。孔孟非有餘。愚夫愚婦非不足。初不關乎文字也。離書籍而言道。則道猶人心所載之理也。文字猶人身之血氣也。血氣誠不可以名理矣。然舍血氣。則性情亦胡以附麗乎。今世雕蟲小夫。既溺于聲律。續藻之末。而稍知道者。又謂讀聖賢書。當明其道。不當究其文字。是猶論觀人者。當觀其心所載之理。不當觀其耳目言動血氣之末也。不亦誣乎。知舍血氣無以見心理。則知舍文字。無以窺聖人之道矣。周濂溪氏稱文以載道。而以虛車譏俗儒。夫虛車誠不可無。車又可以行遠乎。孔孟歿而道至今存者。賴

有此行遠之車也。吾輩今日苟有所見。而欲爲行遠之計。又可不早具堅車乎哉。故凡僕之鄙願。苟於道有所見。不特見之。必實體行之。不特身行之。必求以文字傳之後世。雖曰不逮。志則如斯。其于百家之著述。皆就其文字以校其見道之多寡。剖其銖兩而殿最焉。於漢宋二家。搆訟之端。皆不能左袒。以附一闕。於諸儒崇道貶文之說。尤不敢雷同而苟隨。極知狂謬。爲有道君子所深屏。然默而不宣。其文過彌甚。聊因足下之引誘。而一陳涯略。伏惟憫其愚而繩其愆。幸甚幸甚。

答劉孟容書

孟容足下。二年三辱書。一不報答。雖槁木之無情。亦不翫置若此。性本懶怠。然或施於人人。豈謂施諸吾子。每一伸紙。以爲足下意中欲聞不肖之言。不當如是已也。輒復置焉。日月在上。唯足下鑒之。伏承信道力學。又能明辨王氏之非。甚盛甚盛。蓋天下之道。非兩不立。是以立天之道。曰陰與陽。立地之道。曰柔與剛。立人之道。曰仁與義。乾坤毀則無以見易。仁義不明。則亦無所謂道者。傳曰。天地溫厚之氣。始於東北而盛於東南。此天地之盛德氣也。此天地之仁氣也。天地巖凝之氣。始於西南而盛於西北。此天地之尊嚴氣也。此天地之義氣也。斯二氣者。自其後而言之。因仁以育物。則慶賞之事起。因義以正物。則刑罰之事起。中則治。偏則亂。自其初而

言之。太和絪縕流行而不息。人也。物也。聖人也。常人也。始所得者鈞耳。人得其全。物得其偏。聖人者。既得其全。而其氣質又最清且厚。而其習又無毫髮累。于是曲踐乎所謂仁義者。夫是之謂盡性也。推而放之。凡民而準。推而放之。庶物而準。夫是之謂盡人性。盡物性也。常人者。雖得其全。而氣質拘之。習染蔽之。好不當則賊仁。惡不當則賊義。賊者日盛。本性日微。蓋學問之事。自此興也。學者何。復性而已矣。所以學者何。格物誠意而已矣。格物則剖仁義之差等而縷晰之。誠意則舉好惡之當於仁義者而力卒之。茲其所以難也。吾之身。與萬物之生。其理本同一源。乃若其分。則紛然而殊矣。親親與民殊。仁民與物殊。鄉鄰與同室殊。親有殺。賢有等。或相倍蓰。或相什伯。或相千萬。如此其不齊也。不知其分而妄施焉。過乎仁。其流爲墨。過乎義。其流爲楊。生於心。害於政。其極皆可以亂天下。不至率獸食人不止。故凡格物之事。所爲委曲繁重者。剖判其不齊之分焉爾。朱子曰。人心之靈。莫不有知。此言好惡之良知也。曰。天下之物。莫不有理。惟於理有未窮。故其知有不盡。此言吾心之知有限。萬物之分無窮。不究乎至殊之分。無以洞乎至一之理也。今王氏之說曰。致良知而已。則是任心之明而遂曲當乎萬物之分。果可信乎。冠履不同位。鳳凰鴟鴞不同棲。物所自具之分殊也。瞽瞍殺人。臯陶執之。舜負之。鯀堙洪水。舜殛之。禹郊之。物與

我相際之分殊也。仁義之異施。卽物而區之也。今乃以卽物窮理爲支離。則是吾心虛懸。一成之知於此。與凡物了不相涉。而謂皆當乎物之分。又可信乎。朱子曰。知爲善以去惡。則當實用其力。務決去而求必得之。此言仁義之分既明。則當畢吾好惡。以旣其事故也。今王氏之說曰。卽知卽行。格致卽誠意工夫。則是任心之明。別無所謂實行。心苟明矣。不必屑屑於外之迹。而迹雖不仁不義。亦無損於心之明。是何其簡捷而易從也。循是說而不辨。幾何不胥天下而浮屠之趨哉。堯舜禹湯文武周公孔子之學。豈有他與。卽物求道而已。物無窮。則分殊者無極。而格焉者無已時。一息而不格。則仁有所不熟。而義有所不精。彼數聖人者。惟息息格物。而又以好色惡臭者竟之。乃其所以聖也。不如是。吾未見其聖也。自大賢以下。知有精粗。行有實不實。而賢否以次區焉。國藩不肖。亦謬欲從事於此。凡倫類之酬酢。庶務之磨礱。雖不克衷之於仁。將必求所謂藹然者焉。雖不克裁之於義。將必求所謂秩然者焉。日往月來。業不加修。意言意行。尤悔叢集。求付一物之當其分而不可得。蓋陷溺者深矣。自維此生。縱能窮萬一之理。亦不過窺鑽奇零。無由底於逢原之域。然終不敢棄此。而他求捷徑。謂靈心一覺。立地成聖也。下愚之人。甘守下愚已耳。智有所不照。行有所不慊。故常餒焉。不敢取彼說者廓清而力排之。愚者多柔。理有固然。今足下

崛起僻壤。迺能求先王之道。開學術之藪。甚盛甚盛。此真國藩所禱祀以求者也。此間有太常唐先生。博聞而約守。矜嚴而樂易。近著國朝學案一書。崇二陸二張之歸。闢陽儒陰陰釋之說。可爲深切著明。狂瀾砥柱。又有比部六安吳君廷尉。蒙古倭君。皆實求朱子之指而力踐之。國藩既從數君子後。與聞未論。而淺鄙之資。兼嗜華藻。篤好司馬遷。班固。杜甫。韓愈。王安石之文章。日夜以誦之。不厭也。故凡僕之所志。其大者。蓋欲行仁義於天下。使凡物各得其分。其小者。則欲寡過於身。行道於妻子。立不悖之言。以垂教於宗族鄉黨。其有所成與。以此畢吾生焉。其無所成與。以此畢吾生焉。辱知最厚。輒一吐不悖之言。非敢執塗人而斷斷不休如此也。

復劉子孟蓉書

十二月初。接八月二十六日惠書。及繹禮堂記。敬承與居康勝。勤學不倦。所居疑在蓬島之間。置身若在周秦以前。非泊然寡營。觀物深窈。翫希聲而友前哲。殆未足語於此。研究三禮。洞澈先王經世宰物之本。達於義理之原。遂欲有所撰述。以覺後世之昏昏。甚盛甚盛。欽企何窮。國藩亦嘗粗涉禮經之藩。官事繁冗。莫竟其業。所以沮滯而不達者。約有數端。蓋禮莫重於祭。祭莫大於郊廟。而郊祀裸獻之節。宗廟時享之儀。久失其傳。雖經後儒殷勤修補。而疎漏不完。較之特性少牢饋食兩篇。詳略迥殊。無由窺

見天子諸侯大祭。森嚴之典。軍禮既居五禮之一。吾意必有專篇細目。如
戚元敬氏所紀各號令者。使伍兩卒旅。有等而不干。坐作進退。率循而不
越。今十七篇獨無軍禮。而江氏永。秦氏蕙田所輯。乃僅以兵制。田獵。車戰。
舟師。馬政等類當之。使先王行軍之禮。無緒可尋。國之大事。在祀與戎。而
古禮殘闕若此。則其他雖可詳考。又奚足以經綸萬物。前哲化民成俗之
道。禮樂並重。而國子之教。樂爲專精。樂之至者。能使鳳儀獸舞。後聖千載。
聞之忘味。欲窺聖神制作。豈能置聲樂於不講。國藩於律呂樂舞。茫無所
解。而秣算之學。有關於製器審音者。亦終身未及問津。老鈍無聞。用爲深
恥。夫不明古樂。終不能研窮古禮。國藩之私憾也。郊廟祭儀及軍禮等殘
缺無徵。千古之公憾也。是皆用以自沮而不達者也。所貴乎賢豪。非直博
稽成憲而已。亦將因其所值之時。所居之俗。而創立規制。化裁通變。使不
失乎三代制禮之意。來書所謂苟協於中。何必古人。是也。然時俗亦有未
易變者。古者祭祀必有主婦。聘饗亦及夫人。誠以在宮雍雍。在廟肅肅。妃
匹有篤恭之德。乃足以奉神靈而理萬化。所謂有關雝麟趾之精意。而後
可行周官之法度也。自陽侯殺繆侯。而大饗廢夫人之禮。後世若以主婦
承祭。則驚世駭俗。譏爲異域。然全行變革。則又與采蘋采蘋諸詩之精義
相悖。古之宮室。與後世異。議禮之家。必欲強後代之儀節。就古人之室制。

如明史載品官冠禮。幾與儀禮悉合。不知曰東房西墉曰房。內戶東曰址。明世固無此官室也。然稍師儀禮之法。則堂庭淺陋。必有齟齬而難行者。誠得好學深思之士。不泥古法。亦不輕徇俗好。索之幽深。而成之易簡。將犁然有當於人心。國藩於昏喪祭三禮。亦頗思損益。鍊水書儀。紫陽家禮。簞訂一編。以爲宗族鄉黨行習之本。守官少暇。不克斟酌時俗之中。卒未能從容爲之。斯亦自沮而不達之一端也。閣下山居靜篤。將爲禮經發微。及或問等書。何不先取此三禮。撰著鴻篇。使品官庶士。可以通行。用今日冠服拜跪之常。而悉符古昔仁義等殺之精。倘亦淑世者所有事乎。來書又以文章欲追歐陽公輩。而與之並。而願有大於此者。將決然而棄去。抑兩利而俱存。就鄙人而卜取舍。國藩竊維道與文之輕重紛紜。無有定說久矣。朱子讀唐志。謂歐陽公但知政事與禮樂。不可不合而爲一。而不知道德與文章。尤不可分而爲二。其譏韓歐裂道與文以爲兩物。措辭甚峻。而歐陽公送徐無黨序。亦以修之於身。施之於事。見之於言。分爲三途。夫其云修之身者。卽叔孫豹所謂立德也。施之事見之言者。卽豹所謂立功立言也。歐公之言。蓋深慕立德之徒。而鄙功與言爲不足貴。且謂勤一世以盡心於文字者。皆爲可悲。與朱子譏韓公先文後道。譏永嘉之學。偏重事功。蓋未嘗不先後同符。朱子作讀唐志時。豈忘歐公送徐無黨之說。奚

病之若是哉。國藩之愚。以爲事功之成否。人力居其三。天命居其七。苟爲無命。雖大聖畢生皇皇而無濟於世。文章之成否。學問居其三。天質居其七。秉質之清濁厚薄。亦命也。前世好文之士。不可億計。成者百一。傳者千一。彼各有命焉。孔子以斯文之將喪。歸之天命。又因公伯寮而謂道之行廢由命。孟子亦以聖人之於天道。歸之於命。然則文之興衰。道之能行能明。皆有命焉。存乎其間。命也者。彼蒼尸之。吾之所無如何者也。學也者。人心主之。吾之所能自勉者也。自周公而下。惟孔孟道與文俱至。吾輩又法孔孟。固將取其道與文而并學之。其或體道而文不昌。或能文而道不凝。則視乎性之所近。苟秉質誠不足。與言文。則已閣下。既自度可躋古人。何爲舍此而他求哉。若謂專務道德。文將不期而自工。斯或上哲有然。恐未必果爲篤論也。僕昔亦有意於作者之林。悠悠歲月。從不操筆爲文。去年偶作羅忠節李忠武兄弟諸碑。則心如廢井。冗蔓無似。乃知暮年衰退。才益不足。副其所見矣。少壯眞當努力。光陰邁往。悔其可追。姻丈於上年六月改葬。行述未蒙寄到。若果爲銘章。必不足稱盛意。南屏亦已衰頽。其游衡疑之說。果踐約否。筠仙修通志之議。事甚浩博。未易卒業。近又喪其愛子。憂懷何以自遣。寒門已嫁四女。三家未生子。郭氏女生子而早寡。感愴無涯。內人失明之後。諸病叢集。醫藥相尋。冢婦亦多病。次兒於元日得舉。

一子。差爲忻慰。賤軀粗適。惟目光日蒙於花鏡之上。又加一花。看字尙如隔煙霧。直隸終年亢旱。去秋未種菽麥。今歲夏收失望。疆吏對此。如坐鍼毡。公私子子。都無好懷。南望故鄉。恨不得屏棄百事。從閣下一豁襟抱也。略布近狀。不宣。

覆吳廣文敏樹書

三月初旬。奉復一函。諒已達覽。旋接上年臘月惠書。并大著詩文全集各五十部。就審履祺。康勝。無任企仰。大集古文。敬讀一過。視昔年僅見零篇斷幅者。尤爲卓絕。大抵節節頓挫。不矜奇辭奧句。而字字若履危石而下。落紙乃遲重絕倫。其閒適之文。清曠自怡。蕭然物外。如說釣。雜說。程日新傳。屠禹甸序之類。若翔翔於雲表。俯視而有至樂。國藩嘗好讀陶公。及章白。蘇。陸。閒適之詩。觀其博攬物態。逸趣橫生。栩栩焉神愉而體輕。令人欲棄百事而從之遊。而惜古文家少此恬適之一種。獨柳子厚山水記。破空而遊。弁物我而納諸大適之域。非他家所可及。今乃於尊集數數邁之。故編中雖兼衆長。而僕視此等尤高也。與歐陽篠岑書中。論及桐城文派。不右劉姚。至比姚氏於呂居仁。譏評得無少過。劉氏誠非有過絕輩流之詣。姚氏則深造自得。詞旨淵雅。其文爲世所稱誦者。如莊子章義序。禮箋序。復張君書。復蔣松如書。與孔撝約論禘祭書。贈撝約假歸序。贈錢獻之序。

朱竹君傳。儀鄭堂記。南園詩存序。縣莊文集序等篇。皆義精而詞俊。夔絕塵表。其不厭人意者。惜少雄直之氣。驅邁之勢。姚氏固有偏於陰柔之說。又嘗自謝爲才弱矣。其論文亦多詣極之語。國史稱其有古人所未嘗言。鼎獨扶其微而發其蘊。惟亟稱海峯。不免阿於私好。要之方氏而後。惜抱固當爲百年正宗。未可與海峯同類而并薄之也。淺謬之見。惟希裁正。

送郭筠仙南歸序

凡物之驟爲之而遽成焉者。其器小也。物之一覽而易盡者。其中無有也。郭君筠仙。與余友九年矣。卽之也溫。挹之常不盡。道光甲辰乙巳。兩試於禮部。留京師。主於余。促膝而語者。四百餘日。乃得盡窺其藏。甚哉。人不易知也。將別。於是爲道其深。附於回路贈言之義。而以吾之忠効焉。蓋天之生材。或相千萬。要於成器以適世用而已。材之小者。視尤小者則優矣。苟尤小者。琢之成器。而小者不利於用。則君子取其尤小者焉。材之大者。視尤大者則絀矣。苟尤大者不利於用。而大者琢之成器。則君子取其大者焉。天賦大始。人作成物。傳曰。人不天不因。天不人不成。不極擴充。追琢之能。雖有周公之才。終棄而已矣。余所友天下賢士。或以德稱。或以藝顯。類有以自成者。而若筠仙。躬絕異之姿。退然深貶。語其德。若無可名。學古人之文章。入焉既深。而此外猶若鉅鎔而不安。其無所成者。與匠石斲方寸。

之木斤之削之。不移瞬而成物矣。及乎裁徑尺之材以爲榱桷。不閱日而成矣。及至伐連抱之榱桷。爲天子營總章太室之梁棟。經旬累月而不得成焉。其器瘡大。就之瘡艱。淺者欲以一概律之。難矣。且所號爲賢者。謂其絕拘攣之見。曠觀於廣大之區。而不以尺寸繩人者也。若夫逢世之技。智足以與時物相發。力足以與機勢相會。此則衆人之所共覩者矣。君子則不然。赴勢甚鉞。取道甚迂。德不苟成。業不苟名。艱勤錯迕。遲久而後進。銖而積。寸而累。既其純熟。則聖人之徒。其力造焉而無扞格。則亦不失於令名。造之不力。歧出無範。雖有瓌質。終亦無用。孟子曰。五穀不熟。不如萑稗。誠哉斯言也。筠仙勸哉。去其所謂扞格者。以蘄至於純熟。則幾矣。人亦病不爲耳。若夫自揣既熟。而或不達於時軌。是則非余之所敢知也。

送謝吉人之官江左序

吾湘鄉當乾隆時。人才殷盛。鄧筆山爲雲南布政使。羅九峯爲禮部侍郎。而謝薌泉先生爲御史。三人者。皆起家翰林。而御史君名震天下。是時和珅柄國。聲張勢厲。家奴乘高車。橫行都市。無所憚。御史君巡城遇焉。捽之出而鞭之。火其車於衢。世所稱燒車御史者也。其後二十餘年。御史君之子果堂。以河南縣令卓薦召見。上從容問曰。汝卽燒車御史之子乎。不數月。遷四川知府。又十餘年。而謝吉人邦鑑。復以進士出爲江南縣令。吉人。

御史君之孫。而知府君之弟之子也。將之官。其常所酬酢者。或爲詩送之。吉人乃索予爲序。而乞言以糾其不逮。於是拜手告曰。子今長人矣。四封之內。尊無與二。堂上頤指。堂下趨者百人。所識窮乏。仰而待命。設館以延賓友。貌敬而情離。卽有不善。彼所謂趨者。待命者。貌敬者。或知之而不諫。或諫焉而不力。吾以其身巍然。處於衆人之上。而聰明識量。又誠越而倍之。前有唯。後有諾。於是予聖自雄之習。囂然起矣。而左右之人。又多其術以餌我。內之傲者曰勝。外之欺者曰衆。茲其所以舛也。昔者宓子賤治單父。孔子曰。子何施而衆悅。對曰。此地民有賢於不齊者五人。不齊事之而稟度焉。皆教不齊所以治人之道。孔子歎曰。其大者。乃於此乎有矣。魯使樂正子爲政。孟子曰。好善優於天下。東漢龐參爲漢陽太守。先候隱居任棠。棠不與言。但以薤一大本。水一盂。置戶屏前。抱兒孫伏戶下。參會其意。曰。水者。欲吾清也。拔大本薤。欲吾擊彊宗也。抱兒當戶。欲吾開門恤孤也。故古人之學。莫大乎求賢以自輔。小智之夫。矜己而貶物。以爲衆人卑卑。無足益我。夫不反求諸己。而一切掩他人之長而蔑視之。何其易與。詩曰。國雖靡止。或聖或否。民雖靡臙。或哲或謀。或肅或乂。謂求賢而終不能得者。非篤論也。今震澤宰左君青峙。吾相鄉之賢者也。任俠而不矜。諳事而不計利害。子往試求之。必有所以益子者。友仁以彌德。利器以善事。既以

上繩祖武。又以紹諸鄉先輩之徽。無棄爾輔。負于爾輻。青峙。子之輔也。抑吾聞江南爲仕宦鱗萃之邦。或因青峙而得盡交其賢士大夫。是尤余所望也。

送周苻農南歸序

天地之數。以奇而生。以偶而成。一則生兩。兩則還歸於一。一奇一偶。互爲其用。是以無息焉。物無獨。必有對。太極生兩儀。倍之爲四象。重之爲八卦。此一生兩之說也。兩之所該。分而爲三。殺而爲萬。萬則幾於息矣。物不可以終息。故還歸於一。天地絪縕。萬物化醇。男女構精。萬物化生。此兩而致於一之說也。一者陽之變。兩者陰之化。故曰一奇一偶者。天地之用也。文字之道。何獨不然。六籍尙已。自漢以來。爲文者莫善於司馬遷。遷之文。其積句也皆奇。而義必相輔。氣不孤伸。彼有偶焉者存焉。其他善者。班固則毗於用偶。韓愈則毗於用奇。蔡邕。范蔚宗以下。如潘陸沈任等比者。皆師班氏者也。茅坤所稱八家。皆師韓氏者也。傳相祖述。源遠而流益分。判然若白黑之不類。於是刺議互興。尊丹者非素。而六朝隋唐以來駢偶之文。亦已久王。而將厭。宋代諸子。乃承其敝。而倡爲韓氏之文。而蘇氏遂稱曰。文起八代之衰。非直其才之足以相勝。物窮則變。理固然也。豪傑之士。所見類不甚遠。韓氏有言。孔子必用墨子。墨子必用孔子。不相用。不足爲孔

墨由是言之。彼其於班氏相師而不相非明矣。耳食者不察。遂附此而抹撥一切。又其言多根大經。頗爲知道者所取。故古文之名獨尊。而駢偶之文。乃屏而不得與於其列。數百千年。無敢易其說者。所從來遠矣。國家承平奕攢。列聖修禮右文。碩學鴻儒。往往多有。康熙雍正之間。魏禧。汪琬。姜宸英。方苞之屬。號爲古文專家。而方氏最爲無類。純皇帝武功文德。壹邁古初。徵鴻博以考藝。開四庫館以招延賢儔。天下翕然。爲浩博稽核之學。薄先輩之空言。爲文務閎麗。胡天游。邵齊燾。孔廣森。洪亮吉之徒。蔚然四起。是時郎中姚鼐。息影金陵。私淑方氏。如碩果之不食。可謂自得者也。沿及今日。方姚之流風。稍稍興起。求如天游齊燾輩閎麗之文。闐然無復有存者矣。聞者。吾鄉人凌君玉垣。孫君鼎臣。周君壽昌。乃頗從事於此。而周君爲之尤可喜。其才雅贍有餘地。而奇趣迭生。蓋幾於能者。夫適王都者。或道晉。或道齊。要於達而已。司馬遷。文家之王都也。如周君之所道。進而不已。則且達於班氏而不爲韓氏所非。又不已。則王都矣。周君以道光乙巳成進士。選翰林院庶吉士。值皇太后萬壽。天子大孝。錫類臣下。得榮其親。將奉誥命以歸覲。出所爲文示余。余乃略述文家原委。明奇偶互用之道。假贈言之義。以爲同志者勸。嗟乎。區區而以文字相討論。是則余之陋。而不賢者識小之類也。

送陳岱雲出守吉安序

道光二十五年十一月日長至。翰林編修茶陵陳君。奉命出守吉安。明日入謝。上曰。禮官章上。汝妻與請旌表有諸。卽頓首敬謝。臣源充妻。蒙恩旌表孝行。其可旌奈何。則隱約情事。具對十一。上嘉歎。所以尉敕良厚。陳君出。涕泣告人。天子乃能省源充家事。源充何以報。先是陳君嘗大病。妻易安人。傾死力營救。最後刲臂和藥飲君。君病瘳而安人遽疾。又數月而生子。子生彌月而安人卒。余昔銘其墓。所稱憂勞積劇。焉可支者也。既歸喪。陳君之母語其親戚曰。是善事我。又有功陳氏先祖。語鄉人亦如之。鄉人上其行有司。以達於禮官。禮官章上。不數日而陳君有吉安之命。於是陳君益不自克。且曰。吾有君親殊恩。妻又貫我死。吾負三不報。其何以酬。向人輒吁歎日夜。噉然內疚。亡何將出國門。國藩乃進而稱曰。子之方寸幾矣。抑未知所持也。夫忠孝者。每事而迹之。則日不勝。要惟行吾心之不得已者斯可矣。民之初。蓋有不忍於其所生。先王制爲事親之禮。溫清而定省。疾則嘗藥。諫則號泣。因人之情而爲文達之。其於事君也亦然。父母者育我。天者先父母而生我。君者後天而成我者也。有不忍忘本於父母者。而後愛身以及子姓。有不忍忘本於天者。而後愛吾君以及人民庶物。故入而供弟子之職。出而力王家。勤民事。非直好爲觀美。內有所激發。不得

已而爲之者也。先王之教既熄。人不能自道於道。乃始慕名號而從事其中。則漠無所動。脩糲以養親。而非必中有所愛。蹴踏以覲君。而非必中有所敬。及其居官。朝令曰編保甲。夕令曰興水利。復常平。擇名號尤美者而張之。漫不省其所以然。外之標識如彼。內而隳壞如此。故名目者。所以喪人之良心而墮凡事也。仲尼曰。人而不仁。如禮何。言本心既亡。不堪以文爲塗附之也。賢者思以易之。獨宜求諸心之不得已者耳。盜賊公行。不得已而立保甲。旱澇饑饉。不得已而興水利。常平行之不合。不得已而思亟。思亟問。必盡善而後已。鏗而不舍。靡物不斷。古有刳臂療病而立應者。彼迫於無可如何。其神固已深入金石矣。今或浮慕奇行。而以號於衆曰。吾將效刳肉故事。要名之念熾於中。責效之情流於外。則臨事必不爲。爲之且不應。然則子欲上不負君親。下不媿令妻。可以知所從事矣。吾辱相知重。他無可言者。至離合之故。則別繫以詩。

送唐先生南歸序

古者道一化行。自卿大夫之弟子。與凡民之秀。皆上之人。置師以教之。於鄉有州長黨正之儔。於國有師氏保氏。天子既兼君師之任。其所擇大抵皆道藝兩優。教尊而禮嚴。弟子握衣趨隅。進退必慎。內以有所憚而生其敬。外緝業以興其材。故曰師道立而善人多。此之謂也。周衰。教澤不下流。

仲尼干諸侯不見用。退而講學於洙泗之間。從之遊者如市。師門之盛。振古無儔。然自是人倫之中。別有所謂先生徒衆者。非長民者所得與聞矣。仲尼既沒。徒人分布四方。轉相流衍。吾家宗聖公傳之子思孟子。號爲正宗。其他或離道而專趨於藝。商瞿授易於馭臂子弓。五傳而爲漢之田何。子夏之詩。五傳而至孫卿。其後爲魯申培。左氏受春秋。八傳而至張蒼。是以兩漢經生。各有淵源。源遠流歧。所得漸纖。道亦少裂焉。有宋程子朱子出。紹孔氏之絕學。門徒之繁。擬於鄒魯。反之躬行實踐。以究羣經要旨。博求萬物之理。以尊聞而行知。數百千人。粲乎彬彬。故言藝則漢師爲勤。言道則宋師爲大。其說允矣。元明及我朝之初。流風未墜。每一先生出。則有徒黨景附。雖不必束脩自上。亦循循隅坐。應唯敬對。若金。許。辭。胡。陸。稼。書。張念芝之儔。論乎其德。則闐然。諷乎其言。則犁然而當理。考乎其從遊之徒。則踐規蹈矩。儀型鄉國。蓋先王之教澤。得以僅僅不斬。頑夫有所忌而發其廉恥者。未始非諸先生講學。與羣從附和之力也。詩曰。風雨如晦。雞鳴不已。誠珍之也。今之世。自鄉試禮部試舉主而外。無復所謂師者。間有一二高才之士。鉤稽故訓。動稱漢京。聞老成倡爲義理之學者。則罵譏唾侮。後生欲從事於此。進無師友之援。退犯萬衆之嘲。亦遂卻焉。吾鄉善化唐先生。三十而志洛閩之學。特立獨行。詬譏而不悔。歲庚子。以方伯內召。

爲太常卿。吾黨之士三數人者。日就而考德問業。雖以國藩之不才。亦且爲義理所薰蒸。而確然知大閑之不可踰。未知於古之求益者何如。然以視夫世之貌敬舉主。與厭薄老成。而沾沾一得自矜者。吾知免矣。丙午二月。先生致仕得請。將歸老於湖湘之間。故作師說一首。以識年來嚮道之由。且以告吾鄉之人。苟有志於強立。未有不嚴於事長之禮。而可以成德者也。

送江小帆同年視學湖北序

今天下郡縣牧民之吏。大抵以刑強齊之耳。任蚩蚩者自爲喙息。喜怒一不顧問。至其犯法。小者桎梏。大者棄市。豪強者漏網。弱者糜爛。苟以掩耳目而止。原國家所以立法之意。豈爾爾哉。蓋亦欲守土者。日教民以孝弟仁義之經。不率而後刑之。其率教而有文者。則以進於學。使者而登之庠序。既登之矣。則以授於校官。而常飭之。故古者。飲射讀法。在今日則守令之職。而今之學政也者。不過因文藝以別羣士之優劣。因士之優劣以知守令教民之勤惰。故巡撫者。天子所使。以察守土者養民之善與否也。學政者。天子所使。以察守土者教民之善與否也。承平既久。法意寢失。郡縣有司。不知三物爲何事。而教民之任。獨以責之學政。與校官。而所謂校官者。類多衰疾晚暮之徒。其祿不足自贍。往往與學官弟子。爭錐刀之末。不

特不克助宣教化。或轉鈔言以蔽學政之耳目。彼學政者。孤懸客寄於一行省之中。守土者皆貌敬而神拒之。日憊精於文字。而角機智於千百詭弊之場。而欲以餘力教民以仁義孝弟之經。其不亦難矣哉。然則如之何而可。弊之除也。先其甚者。利之興也。先其易者其可矣。自功利之說。中於膏肓。學者求速化之方。束髮而做精於制藝。窮老而不休。六經至不能舉其篇目。何有於他書。今欲稍返積習。莫若使之姑置制藝。而從事經史。獎一二博通之士。以風其餘。於覆名扁試之外。別求旁搜廣采之術。凡郡縣莫不有書院。大率廩給其才者。而絀其不能者。名曰膏火。所以濟學校之不及也。學政下車之始。則牒各縣令曰。明年吾視某縣學。當以某經試士。能背誦否。某史試士。能言否。其爲我播告偏隅。咸使知之。牒校官曰。吾按臨之始。每縣當選諸生廿人說書。有不至。惟女罰。及其按郡。招諸生來前。果使背誦某經。說某史某卷。大指能誦說者。予以書院之廩資。尤能者倍之。三之。尤能者。牒送省會之書院。亦倍其廩資。其不能者。廩生削其餼。附生懲辱之。每縣試以三四人。則餘者懼矣。自六經外。如史漢莊騷說文水經文選。宋五子及杜韓歐蘇會王專集之屬。每縣使習一部焉。歲試使習者。科試則易之。覆名試以制藝。以彰朝廷之公令。面試說書。以鳴使者之私好。二者竝行而不悖。皆善矣。則拔而貢之成均。使彼邦之人。曉然知吾

好博通之才。庶幾由文以溯本。舉一以勸百。然後孝弟仁義之教。可以漸而興也。乘傳所經之地。有書院焉。則入而詔諸生。以大義。彼邦有搢紳多聞者。則禮而薦之。爲郡縣書院之長。於是其亦可以樹之風聲矣。同年友江君小帆之視湖北學也。所以講求職思者甚備。余乃別思一搜采之術。無啓弊之竇。而有補教之旌者。於是以彋彋之說進焉。

送劉君椒雲南歸序

聖人之異於衆人者。安在乎。耳目口鼻。心知百體。皆得其職而已矣。天之生夫人也。耳職聽。而目職視。口體職言動。心職思。非所聽而濫焉。非所視而淫焉。於官爲不法。可以視窮者。而吾弗能盡焉。可以聽達者。而吾弗能盡焉。於官爲不稱。其於口體心思也亦然。不稱者才絀。不法者知而奸之。罪又甚焉。聖人者。不軌不耳。不度不目。其自一室之米鹽。推而極於天下之大。鬼神之幽。離於人倫。殺於萬事。凡視聽所宜晰。無不晰。凡言動所宜審。無不審。凡心思所宜條理。無不條。而理之。使夫一身得職。而天地萬物各安其分。以位以育。以效吾之官司。所謂踐形者也。周公之所以爲周公。孔子之所以爲孔子。其不以此也哉。今之君子之爲學者。吾惑焉。耳無眞受。衆耳之所傾。亦傾之。目無眞悅。衆目之所往。亦往之。奸視而回聽。言不道而動不端。無過而非焉者。曹好所在。而不之趨焉。則不相賓。異矣。爲考

據之說者曰。古之人。古之人。如此則幾。彼則否。爲詞章之說者曰。古之人。古之人。如此則幾。彼則否。起一強有力者之手口。羣數十百人蟻而附之。朝記而暮誦。課迹而責音。竭己之耳目心思。以承奉人之意氣。會不數紀。風會一變。蕩然漸滅。又將有他說者出。爲羣意氣之所會。則又焦神悴力而趨之。鈞是五官百骸也。不踐聖人之形而逐衆人之好。疲一世以奔命於庸夫之毀譽。竟死而不悔。可謂大愚不靈者也。漢陽劉君椒雲。湛深而敦厚。非其視不視。非其聽不聽。內志外體。一準於法矣。而所以擴充官骸之用。又將推極知識。博綜百氏。以求竟乎其量。余猶懼其做身心以役於衆好也。於其別也。書是以貞之。然余固亦頗涉前二說者之流。而奔命於衆好之場者。又因以自砭焉。

易問齋之母壽詩序

古者以言相贈處。至六朝唐人。朋知分隔。爲餞送詩。動累卷帙。於是別爲序以冠其端。昌黎韓氏。爲此體尤繁。閒或無詩而徒有序。於義爲已乖矣。元明以來。始有所謂壽序者。夫人之生。飢食而渴飲。積日而成年。苟不已。必且增至六十七十。又不已。則至大耋期頤。彼特累日較多耳。非有絕特不可幾之理也。胡序之云。而爲此體者。又率稱功頌德。累牘不休。無書而名曰序。無故而諛人以言。是皆文體之詭。不可不辨也。道光乙巳六月。爲

易柳恭人七十誕辰。嗣君閻齋郎中。徵求士大夫之詩。至數十篇。而屬余爲序其簡端。問齋其能辯文體者矣。余讀諸君詩。知恭人事。贈君□□先生。豈非所謂代有終者哉。初先生以長且賢。理家事無劇易。必躬佔畢之業。稍棄矣。恭人來歸。一代任焉。米鹽凌雜。不復關白。先生由是得專精舉子業。嘉慶戊午舉於鄉。戊辰遂成進士。蓋內顧無憂。壹志以底於成。恭人之力也。先生官陝西。恭人以舅姑春秋高。留侍養。不隨之官所。既而太夫人就養秦中。恭人又留治家務。既而先生移官山東。恭人仍留里居。計先生宦遊三十餘年。而恭人僅一入秦。再之山東之鄉。不過三年耳。婦人類以從官爲榮。鄉里齷齪。不足自適。一旦朱幘翟茀。稱爲命婦。入則鼎食。出則武夫前呼。侍女如雲。此常情所最稱意。恭人恬然不以爲榮。獨習勞居僻鄉。爲先生經畫家政。敗衲做革。儲以待用。甘糲糲以自菲。歲時親戚承問無缺。藥餌餘糧。全活貧弱下戶。躬操作以率先子婦。此其識有過人者。以視擁象輿。以命婦自炫。頤使侍婢。俯仰如神者。其賢否當有辨也。詩人之祝女子曰。無非無儀。易此。而以才能自詡。則於道爲悖矣。如恭人者。所事不出閨闈。所行不越庸德。獨其相夫以發名成業。而不慕從官之榮。此有人所難能。而其他蓋可知矣。余故揭其大者。著於篇。若其稱述懿行。頌禱繁祉。則諸君之詩實詳。故不及云。

陳岱雲太守爲母生日讌集賓僚詩序

易曰。雷出地奮。先王以作樂崇德。蓋古者雖有艱大阨塞。聖人窮力畢精。削除荒顛。人心夷悅。而後作樂以宣幽滯。譬若春雷奮發。而秋冬之沈痼。蔽塞於地中。固已久矣。故曰。患難所以開聖。憂勞所以興國。古之通義也。至夫賢達之起。卿大夫之家。莫不以然。其初類有非常之撼頓。顛蹶戰兢。僅而得全。疢疾生其德術。荼蘼堅其筋骨。是故安而思危。樂而不荒。如彼其自克也。豈偶然哉。茶陵陳岱雲太守。成童而喪父。事無巨細。壹操於母。劉太恭人家。故微也。又多奇閔。藥醫不絕於室。期功之喪。不絕於門。櫛無縷。盜無儲者。數數然也。方太守就傳於外。天盛寒。家惟二衾。一實以棉。一單衾耳。太恭人不忍子以篋凍爲人所詬。強以棉衾予太守。而自以單衾擁二幼子。太守不忍母寒而已。獨溫。則虛衾而終不御。太恭人亦終不以酷窮。而令子廢學。居無何。太守以進士通籍爲翰林。而家之艱於謀食如故。而太恭人之勤約自刻亦如故。道光二十四五年。天子以海氛初靖。亟思振興吏治。以修內。而擢外特簡近臣以守要郡。乙巳仲冬。太守用是有吉安之命。明年。量移廣信。於是祿入稍豐。寢寢怡裕矣。其年十一月。爲太恭人六十生日。太守開閣觴客。韻以絲竹。本省之僚屬。所部之士民。與他邦之客游茲土者。凡若干人。爲詩歌上壽者。凡若干篇。乃書抵京師。屬國

藩序之。夫陽不可盈。樂不可極。故禮主靜而樂主反。勝則流矣。太守思前者慈母支持之艱。與今者天子簡用之重。將必有穆然深念者。是則承歡之大者歟。

唐鏡海先生七十生日同人寄懷詩序

善化唐太常先生。以道光丙午致仕還湘。明年年七十矣。五月七日。寔初度之辰。六安吳君廷棟。始爲寄懷詩。略寓詩人戩穀俾臧之義。既而師宗竇君堉。及某君某君皆踵爲之。凡得詩若干首。大抵惜繼見之不可常。頌長者之多祉。先生之姊子黃君兆麟。與其弟倬。命國藩爲之序。竊嘗觀古之君子。其載德而荷道者。必有人焉。帥而掖之。而後後者有所階而進。必有人焉。輔而翼之。而後前者有所託而傳。水非水而不續。人非人而不承。蓋桐鄉張考夫先生之興。則有凌淪安。何商隱。沈石長諸子爲之附。太倉陸道威先生之起。則有盛聖傳。陳確菴。江蘗園諸子爲之與。二先生之爲道。至寂寞也。而諸子者。相從於太羹元音之際。殆於邈世不見。稱而無怨。彼各有其志爾。唐先生之內召爲太常卿也。以道光庚子。僦屋於內城之西南。分聽事四之一。爲讀書之室。裒得周尺之步。廣半步耳。自國藩之修候。或月一至。或再三至。未嘗不見先生手一編。危坐其中。它人見者亦然。此所謂寂寞者非邪。民之情。好聲利而惡澹泊。淺者趨死祿仕。深者博文

多藝。獵取浮譽。亦足以降其好勝之私。先生爲外吏二十年。蕭然無資積以自存。既當世之所謂迂闊。而其爲學也。又惟自治其身心之急。或不沾沾於文藝之短長。以故士之驚才技而競聲稱者。亦罕過而勤焉。而吳寶諸君子。獨相尋於澹泊。究道而考德。夙參而莫造。既其違離。而作爲詩歌以抒懷想。斯豈曩者淩淪安何商隱。及沈盛陳江之疇邪。何其篤也。自明代以來。年齒至五十以上。則人多爲詩以祝之。諛媚殆於亡等。又有所謂壽序者。余昔書歸有光文集。已痛詆其陋。其他則又不足譏。今諸君子既舍聲利而別有所尙。而其爲詩。又約旨斂辭。頌無溢量。豈不本末並茂。不與人人同科者哉。於是畢讀而序之。世有達於文體之君子。庶終覽焉。

朱心垣先生五十六壽序

於余爲兄弟行。結交最少。久而彌摯者。屈指無幾人也。則有若朱嘯山富春。於余爲父執。又早器余。余愛慕而不敢侮者。亦無幾人也。則有若姻伯心垣先生嘯山。爲先生冢嗣。其交余也。先生實令之也。先是先生與家嚴君同學。互相掖重。兩家世好。既篤重之以婚姻。故余知先生特詳。前歲丙申。先生年五十。嘯山謀稱觴。乞余以言侑爵。先生曰。是何爲者。傳曰。恆言不稱老。今吾方託堂上之蔭。將不以禮處我乎。抑以諛詞誣我乎。且古者下壽六十。今吾猶未也。固請不獲。又數年。嘯山舉於鄉。偕余北上。從容謂

曰。吾父所以固辭頌禱者。善則歸親。義不得專也。今吾欲勾子文。爲寒門作家慶圖。使吾父上有以承祖父母懽。下有以自娛。而卽以爲吾父壽可乎。余曰。可。昔董召南隱居孝義。昌黎韓子。爲詩紀其事。姚氏三瑞堂。世以孝稱。東坡亦作詩美之。今君欲以娛重闈者。娛其親。是孝子等而上之之義也。賢哉。吾不能以詩壽先生。請觀陳君家天倫之樂。以娛先生之志。今夫科名宦達。豈以寵身。亦借以顯揚之資也。先生以第一人補弟子員。再躡場屋。遂棄舉業。其天懷恬淡。視青紫不值一映耳。乃其督課子姪。則銳意進取。惟恐後時。討論史事。旁及制藝書學。皆得竅郤而勛以法度。在先生。豈徒欲弋取時榮哉。不過欲博膝下之懽。使老人聞之曰。阿孫才。今試已列前茅矣。阿孫能。可以與賢書選矣。因而鼓舞後進。怡然忘老。此其可娛者一也。君家田園。足以自給。先生周視原野物土之宜。稻粱之外。雜蒔嘉蔬。種秫二頃。穫以釀酒。名曰延齡。殺雞佐之。但以奉親。不以勸客。有餘則皮置焉。門外方塘。廣可百畝。旁置小艇。宜釣宜網。當春種魚。秋則取之。以強半供甘旨。其他則請所與子姓醉飽。波及羣下。其可娛者又一也。君家早歲頗有外侮。自先生綜家政。敬宗收族。袒免以下。一視同仁。閭里細民。強梗者鋤之。不肖者勸之。貧無告者周卹之。竭力之所勝而不德焉。比來一境恬然。曩時箕舌之怨。雀角之爭。皆以潛消。而高堂暮齒。亦得晏安。

無患。其可娛者又一也。抑聞之。夫妻好合。兄弟既翕。父母其順矣。先生早占炊曰。續以鸞膠。不聞有遇虐後母之事。非刑于之道乎。方鳳台先生之以計偕入都也。先生曰。予弟行役。不可以勞門閭之望。丈夫何憚萬里哉。乃杖策送弟北征。而衛以俱返。不賢而能之乎。邇年以來。弟姪能文者。先生爲之延師課讀。肄武者。爲之料量魚服竹閉之具。使之皆得成名。以故牀第之間。秩如也。昆弟翼翼如也。寢門之內。訢訢如也。此甚可娛者一也。又先生熟於形家之言。往爲大母卜佳城。備極勞瘁。終乃永臧。今腰腳尙健。暇則陟層嶺。披蒙茸。裹糧而從。一奚遊覽。既審。歸而告於堂上曰。某水某山。大人所經歷也。有佳兆。當貴至徹侯。某宅某田。大人所釣弋之所也。居之後必昌。因與指畫形勢。兼誦撼龍疑龍之經。而堂上亦傾聽不倦。或佯諾之。微笑其幻渺。此亦可娛之一端也。夫天倫之樂。豈有形哉。日用優游之地。行之而不著。習矣而不察。道路傳爲盛談。或油然而興感。而當境者行其心之所安。視爲固有。而不足怪。以先生之德之遇。凡所謂可以自娛。卽以娛親者。皆已自得之。而自忘之。不知此中真樂。雖三公不足以易也。卻老延年之道。有進於此者乎。嘯山歸述吾言。酌而祝焉可也。嘯山拜曰。善。遂書以爲之序。

田崑圃先生六十壽序

道光某年月。爲我年伯崑圃先生六十初度。其嗣君敬堂同年。句余以文爲壽。且曰。古者稱壽不必攬揆之辰。壽人以序。抑非古也。然震川歸氏望溪方氏嘗爲之。是或有道焉。余曰。然。壽序者。猶昔之贈序云爾。贈言之義。粗者論事。精者明道。旌其所已能。而蘄其所未至。是故稱人之善。而識小以遺鉅。不明也。盜而飾之。不信也。述先德而過其實。是不以君子之道。事其親者也。爲人友而不相勸以君子者。不忠也。今子所以壽親者。於意云何。敬堂曰。吾父固好質言。凡生平庸行。衆人所恆稱道者。不足爲君述。吾父早歲以課徒爲業。迄今幾四十年。嘗曰。塾師鹵莽塞責。誤人子弟不淺。吾不敢也。戊戌雨公幸成進士。選庶常。吾父書來戒。以初登仕版。勿輕干人。於戲。安得此有道之言乎。蓋自秦氏燔羣籍。教澤蕩然。漢武帝始立五經於學宮。使諸生各崇本師。置博士。舉明經。而聖言乃絕而復續。明太祖以制藝取士。竝立程朱之義。使天下翕然尊尙。而聖賢之精蘊。始照灼於幽明。二君者。蓋見夫學校之不可復。故定爲功令。使人以此爲祿利之徒。而陰以崇儒術而闡大義。由今言之。明聖道於煨燼之餘。而炳若日星。表宋儒之精理。使僻陋下土。皆得聞道者。不得不歸功於二君。然使人人以詩書爲干澤之具。援飾經術而蕩棄廉恥者。又未始非二君。有以啓之也。今世之士。自束髮受書。卽以干祿爲鵠。惴惴焉恐不媚悅於主司。得矣。又

挾其術以釣譽而徼福。祿利無盡境。則于人無窮期。下以此求。上以此應。學者以此學。教者以此教。所從來久矣。百步之矢。視其所發。差若毫釐。謬以千里。振古君子多塗。未有不自不干人始者也。小人亦多塗。未有不自于人始者也。今先生之誠子。首在不輕于人。則平日之立教。所謂不誤人子弟者。概可知矣。出處取與之間。士大夫或置焉不講。而鄉里老師耆儒。往往以教其家。繩其門徒。吾父課徒山中。亦有年所。每戒小子。輒曰。儉約者不求人。與先生辭旨略同。而吾黨郭君雨三。亦得父訓以成名。當交相慤勉。力求所以自立者。以圖無忝所生。不然。先生不欲誤人子弟。而吾輩一離膝下。乃反自誤其身。日愒月玩。委棄而不克自振。終且不免於干人也。吾言不足以重先生。而猶不敢諛詞欺吾友。是或爲先生之所許乎。敢以爲長者壽。

朱玉聲先生七十三壽序

天可補。海可填。南山可移。日月既往。不可復追。其過如駟。其去如矢。雖有大智神勇。莫可誰何。夸父之追。魯陽之揮戈。陶士行之惜陰。有以哉。有以哉。余與朱堯階以道光十年。論交於長沙。當時相見恨晚。會幾須臾。遂閱一終。一星終矣。前歲戊戌。余乞假旋里。值玉聲先生七十誕辰。堯階以壽親之文見屬。余忻然不辭。遷延未報。一諾三年。甚哉。光陰之遷流。如此其

足畏也。人固可自暇逸哉。以余玩愒時日。有言不踐。學問不加進。而堯階不務顯揚之實。徒欲以祝史微言娛親志。二者均非先生之所許也。何足以爲先生壽。雖然。吾與堯階交舊矣。不可不略抒固陋。表先生之闕修。以徵其所以延齡之由。以下將來無量之祐。以慰吾堯階。以勸吾堯階也。蓋先生則可謂不自暇逸者矣。先生少失怙。既冠。又失恃。家故貧。破屋數椽。兄弟謀析產。先生以其稍完者付諸昆。而指其隙地一弓自予。去之賈。不數年。致千金。已而散去。又如是。又散去。屢裕屢絀。晏如也。先生有嫂早寡。窮不能自存。乃爲之謀生計。撫孤兒。終節婦之世。無衣食慮。復出資爲之表其節。聞於有司。與其大母。并建總坊。尤慷慨好義。宗族中有不能自贍者。飲之必給。有沒不能終葬具者。周之必無缺禮。子姪有游惰無常職者。掖之培之。視其材。必俾有成。他如聯族譜。建支祠。治祖塋。置祭產。凡事關本原之大者。經之營之。有廢必舉。有初必終。故其所以屢絀者。人皆知之。爲其急公也。爲其義也。其所以屢裕者。人或不知。傳曰。民生在勤。勤則不匱。先生之所爲。常致充盈。綽綽有餘者。勤而已矣。不自暇逸而已矣。計自少壯以迨今日。拮据飄搖。幾無虛日。今夫天。恢恢大圓。終古磨旋。今夫山。終古常峙。海終古常流。其盛大而生物不測。由其不貳。不貳故不息。不息故久。夫人也。亦若是焉矣。守其樸者完其素。勞其力者貞而固。戶樞不敝。

磨鐵不蝕。胥是道也。以先生之不自暇逸。而得康強逢吉。又何疑乎。又何疑乎。余與堯階相友以心。相砥以道義。今堯階幸得啜菽飲水。承歡膝下。而余一官匏繫。既不能拾遺補闕。有絲毫裨益於時。又不能歸侍晨昏。又不得奉板輿以迎養。余自是有羈旅之感矣。風有陟岵之章。雅有四牡之什。皆以行役在外。睠懷門閭。孔子曰。父母之年。不可不知也。願吾堯階。佩玦管。調滑甘。愛光陰如拱璧。舞綵服如嬰兒。由是而後。先生樂孫曾之蕃昌。欣琴瑟之靜好。耄耋期頤。怡然忘老。則堯階庶不負讀書之志。不忝於盛德大業耳。君子進德修業。欲及時也。時乎時乎。事親者。可或忽乎。此所以勸堯階以慰堯階。而卽以爲先生壽者爾。

王翰城刺史五十壽序

古無生日之禮。顏氏家訓稱江南風俗。是日有供頓聲樂。蓋此禮始於齊梁之間。後世自貴逮賤。無不崇飾開筵稱壽。習以爲典。癸卯夏。王君翰城將出牧冀甯。卽於是秋五十壽辰。同人或謀祝之。翰城曰。非古也。其友人會國藩亦曰。非古也。雖然。子將別矣。不可無以贈。子蓋古者四十而仕。五十服官政。服政云者。爲大夫以長人。布政得自專也。古者建官無冗。立法無繁。故任人靡不專。而事靡不理。後世天下之事。萃於六曹。六曹之屬。無慮千計。法令日密。吏胥便之。每事至吏。以意討例。官則睨吏意以行。吏頤

使則官可之。吏目止則官否之。屬官所左。卿長亦左之。事無定見。惟衆之隨。故近日服官得專政者。內惟樞府。外惟牧令。樞府數人。或意見各歧。則得專者。尤莫如牧令也。牧令朝行一政。朝及於民。福民則我實福之也。殃民則我實殃之也。然牧令或不賢。往往不自爲政。上則伺大府之喜怒。下則時胥徒之向背。雖欲自專而有所不能。翰城讀書四十餘年。今以服政之日。爲天子之刺史。吾知其能自專矣。夫爲刺史而得自專。而不爲大府與胥徒箝制者。豈徒然哉。其殆必有所以矣。翰城勉乎哉。他日聞有供頓聲樂。躋堂而稱壽者。必天子所付託刺史之百姓也。子行矣。吾以是贈。卽以爲祝焉。

王蔭之之母壽序

壽序。非古也。明歸太僕數鄙之。而數爲之。以爲崑山之俗。張此尤盛。閭巷之士。狃於習而不求其說。立言者。雖知其事微薄。而不忍拒孝養者之請。牽率以從事。宜也。當是時。吾同年王君蔭之。以其母黃太安人之壽。屬予爲序。云。蔭之知言者也。不宜循世俗故事以娛其親。仲尼曰。麻冕。禮也。今也純。儉。吾從衆。積習染人。甚於丹青久矣。雖爲父母者。亦皆以生日爲慶。以文字道其生平爲祥。人子因而順之。不亦可乎。先是贈君琴雅先生之棄養。蔭之與其仲氏皆未冠。季尙毀齒耳。內而饘粥零雜。外而官租私逋。

皆太安人。推畫之。贈君以諾名。鄉里宿負。故無券主者。以是弛責。太安人曰。夫子信者也。是固然無疑。立貨別業。盡償之。贈君疾革。命曰。雖飢寒。毋令吾兒廢學。家故微也。又歲經水潦。益流落。太安人力支之。卒不令諸子遷業。初服舅姑之服。繼服夫之服。哀毀至矣。皆節以禮。喪女子者四。喪子婦者五。悲傷之餘。亦以禮裁之。蓋蔭之之爲余述者如此。易曰。地道無成。而代有終。方贈君。顧命諄諄。豈必後嗣果自成立。今蔭之通籍。爲天子近臣。文章爾雅。率諸弟子。姓爲醇樸之學。所謂代終非邪。國家以大器儲詞臣。不殺之以吏事。使之優游成德。以養公輔之望。至深厚也。以國藩之不肖。謬廁斯任。無足言矣。如蔭之者。要當博觀約守。仔肩天下。而後無忝是職。不然。彼太安人時。時稱贈君之未命。以相申傲者。豈徒在祿仕通顯也哉。歐陽公之母。常述父訓以教子。卒爲有宋名臣。彼何人也。吾何畏彼哉。蔭之誠能日進不怠。太安人當益顧之適志。怡然忘老矣。余承蔭之之命。終不敢以世俗之義爲長者誦也。於是爲道其大焉者。

江小帆之母壽序

古者設科有目。如漢曰賢良方正。曰直言極諫。曰軍謀宏遠。曰淳厚質直。唐曰秀才。曰明經。曰進士。曰明法。曰明字。曰明算。若此者。不一其稱。惟人主之所欲。而因時命名。所謂目也。明初盡革前制。取士止進士一科。則有

科而無目矣。既成進士。天子親策於廷。臨軒唱第。分甲授職。一甲止三人。曰狀元。榜眼。探花。制所定也。士大夫稱爲鼎甲云。進取之途既隘。天下魁傑瑰瑋之士。莫不甘心於專科。搃腕以求所謂鼎甲者。而巴蜀滇黔西南萬里。或數百年而不得一人。蓋其難也。慈父母之於子。總角則祝之。而令子順孫。承歡堂上。亦無先於此者。至於今五百年矣。同年友江君小帆。故吾楚楚人也。徙居四川之大竹。道光戊戌。以第三人及第。四川之鼎甲。自小帆始。而小帆退然貶抑。矍矍不足。問之曰。母教也。余曰。何如。則盡述太安人之賢。及贈君春湖先生之德。而再誦焉。且曰。吾母今年六十矣。吾子爛古文義法。其爲我銓次太安人懿行。略仿今世之壽敘。而益以箴言勸余。使吾母懽慰。而吾亦奉以爲事親之則可乎。余曰。可。蓋江氏之自楚而蜀。家微矣。贈君之與昆弟析居。僅受田三畝耳。而折償宿負者略半。贈君力貧績學。授讀鄉里。稍佐饗飧。太安人時蔬藝菽。以精潔羞舅姑。而以其惡者自御。小帆兒時。嘗隨太安人鋤豆於北原。拾木棉於西澗之陂。每語及此。未嘗不太息祿養之已晚也。嘉慶庚申辛酉之間。四川遭教匪之亂。鄉鄰依堡砦以居。賊來恃堡爲固。賊去還家事耕作。太安人提挈子女。裹糗糧。與贈君奔竄於風雨谿谷之中。其事尤艱阻。卒以無恐。小帆既官編修。太安人就養京師。而贈君道卒長安。哀毀之餘。毫髮盡禮。與前服舅姑。

之服略同。計太安人數十年中。困於貧。厄於兵。顛沛於喪事。而亦以勞矣。傳所謂動心忍性。生於憂患。其不信然邪。士大夫由科第通籍。大抵先人茹其辛。而後人食其報。如小帆之撥取巍科。三持文衡。以詞賦受聖主特達之知。豈可不知其所自邪。自古舉士之法。未有三百年不變者。帝不沿樂。王不襲禮。物窮則易。固其理也。經義取士。亦已久矣。議者多謂帖括道卑。難收得人之效。小帆勉旃。益務通經達用。使天下後世。謂偉人某某者。未嘗不出制義之科也。既以塞辨者之口。又有以慰高堂無窮之望。事親之則。不當如是乎。太安人聞之。其必不訾吾言矣。遂書以爲壽。

何傳巖先生七十壽序

國藩讀詩至常棣之篇而歎曰。旨哉。仁人之言也。朋友平居宴樂。有急則掉臂不顧。兄弟天性也。非至不仁。可以手足而胡越乎。同年友何君丹谿。官編修。其兄璜谿。官武昌同知。兄弟相敬愛。至篤無已。他日余謂丹谿曰。子之親。未耄也。二君者。皆不迎養。於義謂何。則告曰。吾大父母之棄養。吾父七齡耳。實依兩世父以生。世父長曰晴瀾。次曰雲巖。吾父曰傳巖。事兩兄維虔。謀必咨。出必告。有財必歸之。有疾侍藥必躬。至以身禱。雲巖世父下世。事寡嫂尤恭。今吾父母之不肯就養官所。徒以長兄寡嫂在耳。余聞之悚然。當吾世而猶有巖於弟道如此者乎。又二年。而所謂長兄寡嫂者。

相繼逝。璜谿執期之喪既除。因卓薦入見天子。遂乞假南歸。躬迎二親。養於武昌官舍。又明年丙午春。爲傳巖先生及張太恭人七十誕辰。同年生謀所以壽者。屬余爲頌禱之言。丹谿曰。子毋效世俗人。世俗所爲壽序。至陋而非古。子但略述吾親實行。使吾昆弟子姓有所法而向善。而吾親亦將顧而忘老足矣。勿虛諛也。余曰。子之親云何。曰。吾父年十八。補縣學生。嘉慶癸酉。以選拔貢入成均。凡試於鄉。十六役不得售。異時苗匪寇鄰縣。世父率鄉勇出堵賊。吾父守城。書檄調遣。胥出一手。事平。縣令暨監司適主鄉試。聞事。欲因以私報。力謝之。教人以立品敦倫爲先。前後從遊千餘人。課徒所得餘金。則盡刊印世所傳感應篇註案者。以勸愚民。吾母以不逮事舅姑爲恨。事夫之兄如嚴上。事姒婦如姑。蓋體吾父友恭之誠如此。古者大功同財。自秦人子壯出分。後世沿以爲俗。兄弟有視如塗人者矣。而爲之婦者。伺其夫之旨而加刻焉。片語之隙。荆棘叢生。累世不能泯其嫌。夫一木之枝。或榮或悴。常也。而常人之情。睹他人之榮。則以爲分隔。於己無與。睹兄弟之榮。以其切近。則相妬。相妬則爭。而榮者之視悴者。漠然而疏。望望焉。若將浼己。蓋三物之教不行。而俗之儉也久矣。先生以次子嗣仲兄後。顧不冒隨二子之官終。不令己獨榮而兄與寡嫂獨落莫。此其足以激薄俗爲何如。而其用心之仁厚。豈有極哉。余爲揭其大者。俾璜谿

兄弟守此無怠。則先生與太恭人所以娛老者。或亦在此。卽以爲長者壽可也。

郭璧齋先生六十壽序

莊子曰。木以不材自全。雁以材自保。我其處材不材之間乎。旨哉斯言。可以壽世矣。雖然。抑有未盡也。此其中有天焉。魁岸之材。有深自韜匿者。去健羨。識止足。天乃使之馳驅後先。殫精竭力。而不能自怡。有銳意進取者。天或反阨之。使之蓄其光采。以昌其後。而永其年。迹似阨之。實則厚之。材鈞也。或顯而吝。或晦而光。非人所能自處也。天也。我年伯璧齋先生。天之處之。殆厚矣哉。先生少讀書。有大志。旣冠。補博士弟子員。旋以優等食餼。屢躋場屋。貢入成均。試京兆。仍絀。權當陽校官。數月。儒術濟濟。翕然景從。其居鄉也。外和而中直。不惡而人畏之。優伶雜劇。至不敢入境。諺曰。桃李無言。下自成蹊。直其表而影曲者。吾未之聞也。先生孝友。可以施於政。尊行可以加人。課徒而得。與校而士慕。附處于鄉。而不肖知勸。此天予以有用之材也。使得所藉手。舞長衷而回旋。其展布當何如。顧乃蹭蹬棘闈。連不得志。前歲乙未。恭遇覃恩。臣僚得榮其親。維時先生之家嗣觀亭前輩。旣由翰林官西曹兩世。封贈如例。而先生猶以有事秋試。遷延不得請。於是先生橐筆鄉闈。十餘役矣。從遊之士。得其口講指畫。或皆扶搖直上。而

觀亭前輩昆仲。皆得庭訓而翔步詞林。後先輝映。獨先生黜抑良久。曾不一騁騏驥之足。固可解乎。夫以先生之德之能。於科名何與輕重。其達觀內外。何嘗不睨青紫如糠粃。然終不自畫。誠欲有所白於時。而又惡夫庸庸者。一蹶而不復振。乃借恬退之名。以文陋而售其巧。故思有以厲之耳。以志則如彼。以遇則如此。此豈盡有司之咎哉。蓋所謂天也。天者可知而不可知。無可據而自有權衡。崑山之玉。鄧林之大木。生非不材也。貢之廊廟。非不貴也。鑿之琢之。尋斧縱之。剖其璞。傷其本。向之潤澤而輪囷者。蕩然無餘。天欲厚之。則不如韜於石而光愈遠。叢之豐草之中而蔭愈廣。而枝愈蕃。向使先生假鳩漸之羽。激昂雲路。敷歷中外。詎不快於志而裨益於時。而所發既宏。所積漸薄。天與於前。或斬於後。精神有時而竭。福蔭有時而單。是亦琢玉斲木之說也。謂能優游林泉。頤神彌性。如今日也乎。謂能澤流似續。光大門閥。如今日也乎。本年某月。先生六十壽辰。次嗣君雨山。與余爲同年友。謬相知愛。將稱觴介壽。屬余以言侑爵。吾聞君子之事親也。可以無所不至。獨稱其親之善。則不敢盜詞以鄰於誣。君子之於友也。可以無所不至。道揚世德。則不敢虛述以近於諛。余悉先生嘉言篤行。稔矣。今欲敷陳盛美。頌禱龐祺。深懼其諛也。故不具論。第論天之生材。此豐彼嗇。大有權衡。以徵先生所以延年受祉之由。亦使觀亭前輩昆仲。知

今日之蜚聲騰實。其鬱積者。有自非一朝一夕之故也。欽念哉。欽念哉。小子竊祿於朝。蓋吾父之溷迹名場。撼頓不得伸。亦有年矣。持是以思。則先生之緝熙純嘏。天之厚之。正未有艾耳。質之先生。或以斯言爲不謬耶。

金殿珊先生六十壽序

往余讀韓退之符讀書城南詩。私怪彼不以聖賢之道教子。而誘之以公卿祿位。何其陋也。既伏思之。古今之所以設科取士。何爲也哉。豈不欲得明先王忠孝之道。而力行之者。與之共天位乎。道莫備於羣經。故漢唐重明經之選。而明及我朝。皆以經義試士。操其文以券其行。庶幾忠孝之彥。之或出乎此。是上之人。法固未嘗不良。而意固未嘗不美。卽爲人父母者。冀其子以文行上達於朝廷。斯亦天理人情之至。然則退之之志。其亦未可深譏矣。世衰而俗敝。應舉者不揆君公求士之本義。苟以獵取浮榮。少壯而違父母之養。窮老而不歸。眈眈於王畿勢要之場。未仕則發憤忘家。既仕則迎妻子與共安樂。而父母以衰晚之年。與子婦幼孫曠隔。音書闊疏。享封誥之虛名。受枯寂寒飢之實禍。雖疾病厄苦。不忍告聞。以恐其子。而爲子者。冥然不以介懷。方藉口於趙苞賊母。溫嶠絕裾之義。夫彼既忍。棄其親。尙何有於君國。本先撥矣。國家亦安貴此喪失良知之人。而歲舉數千百輩。以糜無窮之祿糈哉。故吾嘗曰。朝廷以忠孝求士。未爲失。而士

之應之。大相悖也。父母以仕宦望子。未爲失。而子之於親。大相悖也。噫。此豈細故也哉。吾鄉金殿珊先生。官翰林十載。宦況絕迫隘。力貧節用。歲寄少資以佐甘旨。既奉父諱。哀毀滅性。服闋矣。依母徐太恭人。不復欲仕。久之。嗣君可亭侍講舉於鄉。徐太恭人強先生攜子北上。乃襍被獨行。留賢配楊恭人養姑維謹。道光戊戌。可亭以第二人及第。先生曰。兒輩幸有立。吾親老矣。卽告養歸。與其弟承歡左右。晷刻不離。於戲。先生其可謂無負朝廷之求。無忝父母之所期者矣。歲丁未。爲先生六十壽辰。先歲。可亭以陝甘學使任滿受代。乃書告國藩曰。僕將以瓜代之際。乞假省親。幸蒙天子錫類之恩。得捧誥軸歸獻堂上。吾父母誕辰。洗爵上壽。子若敘述吾意。使吾親歡娛而盡醴。貺莫大焉。乃別紙述先生官侍御。直聲震世。家居訓課生徒。周卹族黨。恭人歛歲。購婢賑窮。豐歲擇配遣之。諸善行甚悉。余都不具論。獨著其拳拳愛親之意。俾可亭守此而不失。使吾鄉後進應舉之士。知舍此則悖乎朝廷之本義。雖得之。不足爲榮。庶以救末俗之偷。而國藩守官八年。不克歸侍晨昏。又以誌余之抱慚。而不能自克也。先生及恭人聞之。儻冒爲盡一觴乎。

黃矩卿師之父母壽序

國家歲值大慶。必推恩羣下。褒及所生。而吾師昆明少司馬黃公。以乙巳

覃恩得封我太公通奉大夫。太母太夫人。越二年丁未。太公壽八十。太母亦七十有四。是歲春初。天子以海內清晏。太和翔洽。必有人瑞以潤色休嘉。詔問一二品大臣。有親年八十以上者。有司以聞。於是協揆維縣陳公。司馬江甯何公。倉場侍郎新城陳公之母。司空濱州杜公之父。及吾師之父母。竝以遐齡。上徹天聽。賚勞有差。其三月。爲太公攬揆之辰。黃公稱觴京邸。以揚家慶。而銘君恩。門下士相與言曰。陳何諸公僅有母。杜公僅有父。因其所慶。或觸所卹。獨吾師以名儒位九列。而二親大年。賓敬不衰。計德度社。當世無雙。吾輩宜以文紀其盛。且遙致私忱於太公。若鞠髀奉舉者。乃以諉國藩。國藩伏思。自宋景濂以壽文入集。厥後踵爲之者。大抵甄敘行能。終以諛頌。雖以歸有光方苞之博通。不能洗此陋習。夫無故而敘述人之生平事蹟。與無故而貢人以譽。二者皆達於文者之所譏也。惟因事而致其敬。相與爲辭。以示不忘。則古多有之。其爲辭也。貴約而韻。質而不蔓。君子尙焉。吾師自總角以逮服官。壹秉庭訓。其初入學。則督之以討源之功。先本而後華。及視學四川。無日不面戒之弊孔之難塞。士之十拔而虞一失。官京朝。無時不寓書而申傲之。富貴之靡常。職思之不可須臾隕。故吾師仕卿貳而不驕。年五十而恂恂有弟子之色。未始非庭闈警敕之所致也。今太公太母。歸然爲天下大老。親見其子爲聖主所毗。道德文

章冠冕人倫。其娛樂蓋可度而知。而吾輩出門下者。獨撫其教子之大節。爲之祝詞。以託於因事致敬之義。此固吾師所深願。諒亦太公所許而不甚數者已。於是及門各獻祝辭。而國藩爲之唱。且爲序之。詩曰。

我皇膺運。膏流滂溥。誕降醇者。龐眉僕僕。實育公孤。陳何與杜。維我黃公。有恃有怙。怙也園綺。恃則孟桓。帝褒厥德。天露有溥。春迴南詔。日永長安。仙醞三爵。僚案同懽。

文小南之父七十生日壽詩序

道光二十有七年五月上旬。爲衡山菽堂文先生七十生日。嗣君小南。以農部入贊樞垣。先二歲。迎養京師。至期。將觴賓於邸第。以博堂上一日之懽。於是鄉之人官輦下者。各爲詩篇。以致頌禱。奚斯歌魯。麥邱獻齊。幼之祝長。與下之祝上。其誼一也。旣成冊。以授國藩。而屬序焉。竊嘗維人之所。以久視於世。大端有二。一者所踐甚厚。居能移氣。傳所稱取精多。用物宏。亦自足延歷歲年。彼得之天焉者也。一者履孝蹈友。至行純備。其精力不使敝於亡等之欲。其惠氣所迓。亦自以貞於永久。此古守身之君子所從事者也。外是二者。則滔滔凡民。天下皆是。貿焉以生。懵焉以長。積日既多。亦不得不謂之修齡。要之無譏焉耳。先生總角孤露。公私赤立。非自營不得晏食。非自憤不得就學。其所踐之不厚。而不克一日爲貿焉以生之凡。

民亦可知矣。先生茹艱漬苦。痛繩於學。奉母之教。事有命。雖大不儒。過有敕。雖細不貳。既而餼於學官。貢於成均。母王太宜人每告人曰。吾寡居四十年。所堪報地下者。有子克家耳。方贈君琴臺翁之棄養。先生甫四歲。有弟二齡耳。先生既績學發名。而弟鬱悒不得伸。又以脫略損資產。及其逝也。先生盡償其責。恤其罄。而再以己子嗣焉。由此觀之。所謂履孝蹈友。至行純備者。非邪。洪範曰。不協於極。不罹於咎。皇則受之。曰。予攸好德。女則錫之福。如先生之孝友純備。豈直不協吉。不罹咎之謂哉。殆所稱好德。而宜錫以福者矣。然則先生迪嘉離祉。而小南之食報無涯。又何疑哉。國藩固亦凡民之賢焉。生。懜焉。長者。因緣際遇。忽不自知所踐之已厚。塵埃擾擾。敝精從欲。每覩先生之容。未嘗不內慙而興企也。故於鄉人之爲祝詩。輒爲推明致此之由。又以下方來享年之未有屈。爲序其略如此。亦別爲詩以附於後。詩曰。

昔我婦翁。衡之歐陽。屢道先生。宜表宜坊。我來日下。實交哲嗣。修謁長者。淵乎玉粹。強圉之歲。星煥南弧。下燭蘭朶。明映中樞。大斗分頌。衆賓醉止。各攜祝辭。用介繁祉。

何母廖夫人八十生日詩序

道光二十有七年六月上旬。吾鄉道州何母廖夫人八十生辰。宮太保文

安公之良配也。先期鄉之人語國藩曰：子夙陋明季文士。遇人生日，輒以諛詞相溷。爲不達於屬文之律。既聞其說矣。竊聞古者因事致敬。則相與爲辭。以篤不忘。魯侯作闕宮。奚斯有頌。晉獻文子成室。張老有禱。施之少者。有冠禮三加之辭。施之老者。有祝嘏祝嘏之誼。及敦彝款識。亦往往祈以永命萬年。蓋前以表德音。後以救方來。詩人之教也。今太和翔洽。人瑞蕃臻。而夫人以淳樸之德。克享遐齡。鄉之人。相與作爲祝辭。託諸因事致敬之義。不亦可乎。國藩曰：其可。雖然。君子於其所尊敬。不敢爲盜量之語。故詩人戩穀俛臧諸篇。其稱之也質。其祈願也無奢。今吾人欲託茲義。則摛辭之斂侈。可勿審諸。蓋夫人之歸何氏。家微也。文安公陋巷孤貧。貿力以食。晝而授徒。宵而自繩於學。春而出。長至而不歸。家中有無。壹委夫人。夫人綴崎緝斷。公私井井。厚其親。以及其所愛。無或不豐。堅忍其身。以及其子。無或不嗇。嘗孳生二子。越三日而襁兒出汲。卽子貞編修。與其仲弟也。又嘗負兒入山採薪。竹萌拂左目。迄亦廢視。艱窮之境。殆非人履。而夫人泰然。無不自得。迨文安公及第。以命服迎之入都。而守約帥初不變。旣而公位尙書。天子倚如柱石。屢司文柄。門下士且盈千。編修昆季。先後列甲乙科。諸孫蔚然興矣。而夫人卒帥初不變。非布衣不御。非粗糲不甘。蓋余得之見聞者如此。夫稱述艱難。以慰膺者而飭無窮。君子之義也。貢人

以諛而長盜志。亦非君子所宜出也。以文安公創業之勛。而夫人承之。之不易。推察受福離祉之由。亦豈惟型吾鄉哉。雖風天下可矣。然則撰擬祝詩。附諸古義。以博長者之娛。而與編修昆季相劭勉者。宜在於此。不得在彼。於是鄉之人。各賦一詩。別繕爲冊。而國藩和之。且次其語而爲之序。詩曰。

九疑南奧。有濂一谿。在宋嘉祐。大賢所栖。閱祀七百。閔儒纘烈。光輔聖清。爲天喉舌。雖是閔儒。遭家未肥。舒屯倚困。爰有淑妃。宛宛女宗。亦班亦姝。百槃在賞。曰甘如蜜。台星雖閃。婺女孔明。暉澤四獲。宜曜宜康。亦有似君。三館之特。開閣觴賓。以聲母德。有酒如池。有羞孔時。四筵盡醞。各補笙詩。

黎樾喬之兄六十壽序

國家歲逢大慶。嘉與臣下。既褒揚其所生。又令私其尤戚者。得推己所宜膺之封。以貶封之。所以廣仁播誼。至無已也。道光二十五年。皇太后七十萬壽。天子大孝錫類。凡一命以上。無不得曲展私親。吾鄉黎樾喬侍御。既榮其先人。因謝己所宜膺者。貶封其伯兄梅村先生。爲中憲大夫。兄嫂爲恭人。明年。函錦軸齋至其家。又明年。梅村君六十生日。侍御謀所以篤兄歡者。乃放蘇氏兄弟以詩相壽之義。自爲一篇。以寓祈禱。又均鄉人之老於文者。各賦一章。爲老人光悅。既繕冊以授國藩。而命序焉。且言曰。吾兄

天性樸誠。少依王父。嫻篤幼儀。王父棄養。雖非也。哀毀如成人。及事二親。雖老也。愛慕如嬰兒。親有所欲。不以貧而不致。諸弟有所求。不以瑣而不謀。與人無賢愚。一飲以和。里有爭構。一諭以理。初若難釋。徐亦枝開節解。怙然各退。故自家之子姓。鄉鄰之衆寡。無不沐其誠。服其直。所之亦之焉。有役則趨焉。吾嫂陳恭人。祇順勗恭。羣女師慕。蓋侍御爲余述者如此。近世以來。士大夫相與爲縣遁之言。縣遁者。設與之論東方。則泛稱西事以應之。又變而之北。或變而之南。將東矣。則詭辭以遁之。虛懸其語。而四無所薄。終不使其機牙。一相抵觸。友朋會合。咨寒而問暄。同唯而共諾。漠然不能相仁。臣下入告。則擇其進無所拂。退無所傷者言之。一有不妥。終不敢言。一時率爲孤懸。善遁之習。背怨向利。所從來深已。往者辛丑壬寅之際。海國不恬。侍御日夜憂維。傾智倒慮。思效片語以補萬一。國藩頗感其誠。又嘉其直。今卽侍御所稱梅村君者。觀之。以里巷雀鼠之小怨。無關於己之端。且竭誠以行直道如此。況於身有言責。而日擊艱大者乎。昔司馬相如讓巴蜀之民。不能急公冒義。而歸咎於父兄之教不先。然則侍御慷慨樸質之風。亦可知其所自來矣。君之仁於鄉者如彼。教其弟子以施於邦國者又如此。其造福於物。蓋未有量。豈論區區一身之康強久視者哉。余善侍御之壽。其兄有道。旣推明其所以。而因以旁及乎薄俗之不可常。

使覽者有警焉。

曹穎生侍御之繼母七十壽序

往余讀後漢書列女傳。竊怪范氏自誇體大思精。而不達於修史之義。蓋司馬氏創立紀傳。以爲天地之所以不做者。獨賴有偉人焉。以經緯之。故備載賢君賢相。瑰智瑋材。謂若而人者。皆以倫次乾坤。法戒來葉。而范氏乃取數女子廁其間。於經世之旨何與焉。且其所載。如桓孟之流。皆門內庸行。無絕特可驚之迹。抑又不足述。私蓄此疑久矣。既而思之。天下者。合億萬家以成天下者也。一家之中。男職外。女職內。其輕重略相等。而女子所處。往往有艱難迫隘。處之曲當。卽日用飲食之恆。雖神聖當之。不能越乎其軌。然則婦女有可稱述。固不宜聽其幽隱而不彰。則范氏立篇之意。誠亦不爲無見也。同年友曹穎生侍御之繼母李太恭人。未笄而歸。贈公禹川先生。歸五年而寡處。贈公之仕江西。旅橐如灑。其沒也。責負如山。太恭人盡徹服御。壹償宿逋。旣歸櫬。堂上老姑年八十矣。欲以夫喪入告。則重傷姑心。乃詭稱遷官遠郡。外則箴悅侍姑。內則椎胸茹痛。其視侍御兄弟。戒敕而違嚴。逾所生者倍焉。願望而慰喜。逾自得者倍焉。侍御爲詞臣。無日不厲以本原之學。官諫垣。巡視輦轂。無日不申儆之。以君恩之不易。案牘之不可以漫慮。國藩嘗卽是求之。豈所謂門內庸行無絕特可驚者。

邪。抑艱難迫隘。處之曲當。神聖不能越其軌者邪。今年春。爲太恭人六十一生日。鄉之後進。年家之子。相與作爲。祝詩以致祈禱。而命國藩序其端。未世稱誦。女史好道。其奇特者。或有剗臂徇身之事。駭人聽觀。而苦節之婦。貞持數十年。冰蘖百端。兢兢細務。反不得與彼激烈者。速一日之聲譽。參觀竝論。久暫難易。較然可辨。自范氏創立女傳。厥後晉魏諸史。皆踵爲之。率以奇特相勝。苟以新耳目而止。而門內庸行。恭儉劬苦。反或置而不道。使高者慕義。而過激。常者無稱。而不知勸。而後知范氏之識。猶有見於古聖人正家之大原。而未可深爲譏議也。余既承同人之屬。爲叙述其厓略。而因以明夫至庸至難之道。不事畸異。爲修史傳列女者訓焉。

楊母張孺人七十壽序

予既與湘潭袁漱六編修爲篤古之交。又申之以婚姻。於是通知其內外戚好。與其賢懿長者之行。歲在戊申某月。爲編修之妻之母楊母張孺人七十生日。編修來告曰。往予家居。歲時慶燕。則鞠臚捧觴爲尊者壽。今官挂朝籍。而外姑既耄。不克前獻一尊。於心嗛焉。擬爲詩一章。遙展私忱。祝其彊飲彊食。深長難老。使妻之兄弟歌之。以侑其親。子如違余。則請爲叙述作詩之意。而併致之。對曰。敬諾。編修遂言曰。外姑。吾邑張顧堂先生之孫。幼隨祖父汾州同知任。張故巨室也。年二十。歸我外舅武陵楊介亭先

生。先生之父雲齋公官邳州知州。外舅姑竝侍官所。邳州君之爲政。挈鉅釐細。秋豪必躬。傾身從公。凡私家之務。外焉委之介亭先生。內焉委其賢配劉太宜人。而外姑實贊襄之矣。外姑貰姑之勞。伐夫之勛。先衆手而作。後一家而息。飲饌旨甘。非親調不以進。囊筐瑣雜。非手鑷不以告。由是闔署疏戚。必是之爲倚。僕婢必是之爲服。邳州君既罷官。家湘潭。旋捐館舍。介亭先生以哀毀得心疾。或旬歲不省人事。而劉太宜人亦以年邁羸弱。不時病作。外姑兩侍湯藥。夙嚴莫戒。既煩且殆。未幾而太宜人棄養。介亭先生亦貞疾不瘳。沈廢二十餘年。外姑飾性篤終。畢慮自支。自藥餌以及諸奇珍產。凡可以衛夫之病。亡所不致。自己身以及子女之耆。凡所以損家之故。亡所不嗇。蓋其行誼之稱於人者。大率類此。國藩窺觀世祿之家。習佚崇奢。安坐而不事事。其端多起於婦人。孺人以張氏之子。室於楊氏。張氏屢葉承明。青赤之綬數十。孺人祖父皆爲外吏。叔父經田巡撫貴州。懋田守衢州。慧田官教諭。而楊氏以宰相尙書之後。華轂高蓋。世不絕人。孺人內外名家。履豐薦盛。其勢宜日卽驕靡。乃惇謹樸懿。壹法乎貧薄遠慮者之所爲。可謂秉心塞淵。較然拔乎塵滓者也。其膺多福。不亦宜乎。編修之爲是詩。亦頗表其履泰思約之德。而推原其壽康之由。故余爲敘述大凡。亦以忝居婚媾之末。欲使吾家女子。聞此風範。知所效法焉。

曹西垣同年之父母壽序

予自道光乙未。以公車應禮部徵。卽與同年友曹君西垣相善。時則有若鄭君敦謹。鄒君振杰。金君樹榮。王君永時。鄧君庭枏數輩。皆朝夕聚處。醉飽驩虞。意氣丰盛。明年各報罷歸去。又二年戊戌。予成進士。假歸一載。而後還朝。西垣亦再返再上。不常處京師。然予與西垣未嘗而歲而不相遇。在京師未嘗五日而不見。見未嘗不深語。未嘗偶有射志也。夫人情多溺於所同。而蔽其所不見。與野人道巖廊縷紱。則茫然而駭。與世祿之子語米鹽艱苦之事。則倦聽而思臥。予與西垣皆貧士也。自先世忠厚之積。田家耕織之勩。閭里歲時問遺之狀。兩家大率相類。故常抵掌稱道。彌瑣細而彌津津焉。西垣之稱其親。霽樓先生也。以爲勤無隙休。儉無毛棄。推讓舅弟。卻肥而取瘠。教督孫子多苛而少賞。稱其母柳太孺人也。以爲奉事舅姑。勺水必親嘗。鞠育五子。寸縷必手製。皆與吾父母之行若合符契。以是西垣於諸同年中尤昵好矣。竊嘗慨夫世之馳逐於名位者。營營焉而未有已時。予壹不知其指歸謂何。方寸之口。一日之需無幾。七尺之軀。一歲之靡無幾。不必名位而後能給也。而人皆曰。爲榮親計。夫親之所賴於子者。定省甘旨。疾痛苛癢。請席請衽。亦不必名位而後能給也。求而不得。遠遊遲滯。而父母之年加老焉。至於衰髦而心思一見其子。而口不言者。

往往然也。人坐不察耳。國藩竊祿冒利。去家十年。卽西垣羈留京輦。亦越七載於茲。此又吾兩人所每懷內疚。而未敢須臾忘者也。歲在戊申。西垣以教習宗室子弟期滿。天子用爲縣令。將歸覲其親。適直先生及太孺人六十壽辰。同年鄭鄒諸君。咸爲詩贈送。而屬國藩序之。予乃追溯夫歷年之交契。因概論事親之道。在此不在彼者。以勸西垣安居而弗出。而誌予之愧焉。霽樓先生及柳太孺人聞之。其亦陶然而盡一觴也夫。

王靜菴同年之母七十壽序

國藩嘗讀孝經。竊歎仲尼所稱之孝。與今之爲人子者之從事。則不侔矣。其言自天子以至庶人。其爲道各不同。蓋古者諸侯世國。大夫世家。士之子恆爲士。農之子恆爲農。貴有常尊。賤有定等。是以人各安其分而事其親。而無敢妄干。後世以制科爵人。或布衣日莫而至公卿。於是人子咸思以祿仕尊其親。而父母亦惟恐其子終身庶人。而亟望其進取。徼幸躁競之徒。皆得藉口於榮親之說。此今之言孝。與古之道。異者一矣。經又曰。立身行道。顯名於後世。古之所謂名者。有孝悌之實。達乎州巷。播乎上下。稱其內行。無虧焉爾。後世輕德術而右文藝。雖有會閔之行。不敵帖括之工之馳譽速也。一藝之能。一文之善。至薄也。而國人稱願。父母亦嘉許焉。否則聞譽不著。父母不忻。此今之言孝。與古之道。異者二矣。居今之日。而悖

俗從古。不藉祿與名而悅其親者。雖賢者有所不能。賢者之異於衆人。獨能於祿與名之外。別敦古人之至行。以自力於門以內而已。同年友王君靜菴。惇樸而愿懿。自其少時。聞望已傾輩流。既成進士。官水曹。所謂祿與名。亦既兼得。而其內行肫焉。常若不足。奉母楊太宜人。在官夙問而莫勤。言警而行惕。每食。母以將子。子以慈母。未嘗不展轉溫劬。每寢。未嘗不再三周察。爲予稱太宜人之德。自相夫教子。以及娣姒僕婢。澣濯刀匕之微。未嘗纖末而不述。言及贈君東堂先生之遺事。未嘗不嗚噎。語太宜人少歲飢寒黽勉之狀。未嘗不茹喟無窮也。余以是敬之。處今之世。競逐於聲利之場。而其所事。壹合乎孝經之道。固吾靜菴之自厲乎。抑太宜人之敕於子。而施於家者。有以軼乎恒俗萬萬矣。今歲十一月。爲太宜人七十七生日。同人多爲祝詩。屬國藩敘其端。余以素欽靜菴之至行。不敢以未識陳長者之前。因慨論夫古今言孝之變。以勸靜菴。亦以自策於隱微焉。

孫鼎菴先生六十壽序

程子有言。科舉之學。不患妨功。但患奪志。蓋學者之始業於制舉之文也。未嘗不稽經辨義。求肖於聖人之言。以得有司之一當。其志猶射者之在鵠。無惡於君子也。其後熏心仕宦。外以印綬饜其心目。內習一切苟得之術。猶挾寸餌以釣巨魚。既得則弁其綸竿而棄之。曩時稽經辨義之志。乃

大爲纍纍若若者之所奪。此先儒所用爲慨然也。通州孫鼎菴先生。阜學而績文。其於六經之蘊。百氏精義之說。亦既轢其庭而據其席矣。乃屢應舉而不售。十進於省試。五上於春官。僅而得償。一似汲汲於科舉者。及其既得。則絕意仕宦。去之唯恐浼焉。其所求者。正鶴反身之道。而所棄者。紛華溺心之場。是豈非志定不奪之君子。軼於末流萬萬者哉。人之意量相去。什伯千萬。至不齊也。鈞是試於科目也。或爭榮一時。儉以攫取富貴。或謀慮深遠。爲積累無窮之計。各蓄所懷。若背馳焉。先生之先人。自高祖以下。兩世成名進士。官中外各有聲。先生念非發憤特達。則無以趾前美而啓後光。於是既自繩於學。復篤敕其子。先日出而興。後雞鳴而息。寢有誠。食有警。迨甲午歲。與嗣君蘭檢學士。同舉於鄉。而刻厲不改。既而學士官詞曹。屢操文柄。門下士以百數。而先生猶不改。又數年。以甲辰得雋禮部。投紱歸去。高臥林下。宜可少弛矣。而自繩以課孫者。卒帥初而不改。窺其意。以爲不得有司者之甄采。終無以驗吾學之果成與否。而子弟少年桀驚之氣。非繩之以帖括繁重之業。終無以內於程範。而上紹累葉詩書之澤。於此見先生之意量爲何如。豈與夫尋常試於科目者。比竝而論短長哉。今年十月。爲先生六十生日。同人各爲祝詩。彙書成帙。屬國藩序其端。余與學士同登乙科。又忝翰林後輩。幼承庭訓。聞家大人之論。急於科舉

而澹於仕宦者。又與先生之識趣相類。故掇其大者著於篇。冀以博長者之歡娛。若其刑於家而式於鄉。醇德穆行。所以昭令問而膺多福者。雜見於同人詩歌中。非甚緒要。遂不及云。

江岷樵之父母壽序

道光二十有九年春正月。吾友江君岷樵。以縣令之官浙江。將行。告別於常所交知。其色若歎焉。內疚。或問之曰。得百里而長之。以子之才。行子之志。天下之至裕也。吳越湖山。天下之至怡也。而子歎焉。疚者。何也。岷樵曰。古者。學而入官。非以官學也。吾智術短淺。無以澤人。一負疚。吾父今歲年齒七十。吾母六十七矣。舍晨昏之養。而從事簿書。其或不職。又詒之羞。二負疚。抱此二者。吾奚以自克。於是交知感其意。既以言贈別。又別爲歌詩。致祝於封翁一峯先生。與陳太孺人。願長者眉壽無替。以尉薦遊子孺慕之心。既編次成冊。乃屬國藩序其端。蓋先生之少。則貧乏甚矣。無田以爲賴。乃授徒而內其執贄之儀。口敝而手疲。昕警而夕戒。終歲之入。以十之六。仰事堂上。而中分其四半。以爲俯畜之需。半以急鄉里之義舉。邑中立賓興會。以贍寒士省試之資。行鄉約以殲妖賊之反側。皆先生發之。其赴義也。蹈人之所不敢爲。而其自奉也。極世之所不能堪。太孺人承闕緝匱。壹秉夫志。或累歲食粥。而舅姑甘旨甚渥也。國藩與岷樵知好以來。爲余

稱述者數數矣。人情莫不耽逸而惡勞。饗富貴而羞貧賤。至學道之君子不然。或忍飢甘凍。寔於原顏。而其中坦然有以自愉。或峨冠曳綬。呵前衛後。而憂思展轉。若旦夕不能自安者。彼各有其志也。南面而君一邑。息動而雷震。頤指而風行。僕從一怒。百姓重足。識者固當自惕。不當自憚。而浙水東西。自辛壬海上之役。創夷未復。有司者。又刮其脂而吮其血。譬若醫者。撫積瘵之人。有不蹙頰而思所振之。豈情也哉。岷樵自被命以後。誨賢而訪友。思其不逮。而虞其墮職。惴惴焉內疚無已。此與先生之安貧自樂。其志趣同耶。否耶。吾聞岷樵之需次入京師也。先生屬曰。吾不願女以美官博封誥。無使百姓唾罵吾夫婦足矣。如此。見君子之教子。視世俗相去何如。而岷樵所以娛親而養志者。宜何道之從哉。諸君子之爲詩。依於古人。戢穀難老之誼。所以祝禱先生與太孺人。至周且厚。余乃略述先生平日學道之意。以期岷樵之篤信而謹守。而因以博長者之驩娛。凡居官而言養親者。覽吾斯文。亦將有所興起焉。

陳仲鸞同年之父母七十壽序

天之生賢人也。大氏以剛直葆其本真。其回枉柔靡者。常滑其自然之性。而無以全其純固之天。卽幸而苟延。精理已銷。恆榦僅存。君子謂之免焉而已。國藩嘗采輯國朝諸儒言行本末。若孫夏峯。顧亭林。黃梨洲。王而農。

梅勿菴之徒。皆碩德貞隱。年登耄耄。而皆秉剛直之性。寸衷之所執。萬夫非之而不可動。三光晦。五岳震。而不可奪。故常全其至健之質。躋之大壽。而神不衰。不似世俗孱懦。豎子。依違孱忍。偷爲一切。不可久長者也。同年生陳君仲鸞。與余交十餘年。每相與議論。平生慷慨不撓。或品第當世人倫。意所不可。睥睨譏切。無所復忌。同人或謂仲鸞居吏部曹司。身處卑冗。更事未深。宜其囂囂不訕。若移置要地。稍稍練習文法。亦且破觚而爲圓矣。既而仲鸞果以考第。入直軍機。而鸞直發憤。芒角森然。會不減其曩者之舊。吾乃私怪生民剛直之性。其稟之有厚有薄。未可以一概度量也。聞輒與仲鸞語。家世之詳。及太公太母之行。仲鸞爲余言。封翁蔭召先生。生而伉爽。屢經艱險。履之如夷。遇人有心所不許。雖豪貴人。必唾棄之。卽心之所許。雖孤嫠卑賤。必引而翼之。愈窮阨。愈禮敬與鈞。自親族州閭。皆服其誠信。遠近紛難。就之決遣。凡所論斷。久而輒應。封母高太恭人。祇順惇篤。尊尙節義。蓋皆有剛直之風。然後知仲鸞之激烈不阿。雖受性獨厚。亦其稟之庭闈者。歲漸月染。涵濡之久而不自知也。人固視乎所習。朝有媮嬰之老。則羣下相習於詭隨。家有骨鯁之長。則子弟相習於矩矱。倡而爲風。效而成俗。匪一身之爲利害也。今年八月。爲先生暨太宜人七十生日。年家之子。同官之良。咸稱觴仲鸞之邸第。作爲詩篇。以祝難老。屬國藩爲

之序。余乃略述平昔。與仲鸞言論大指。以著先生之節概。因推國初諸儒。以剛直而享大年者。爲先生致善禱之誼。亦使世之君子。聞之而有所警焉。

季仙九師五十壽序

粵以庚子之年。建寅之月。我仙九夫子大人。奉命視學浙江。門弟子等。攜侯芭之酒。薦顯父之蒲。恭餞於國門之外。清風在道。輿從無譁。擊節而歌。林木鏗其振韻。刺船一去。海濤起而移情。是歲九月。爲夫子五秩壽辰。乃復謀郵陳皇邸。遙慶龐禔。以祝史之微言。希君子之善禱。奚斯頌魯。麥邱祝齊。斯事雖細。不可闕也。獨是二首六身。乃藝林之陳語。交梨火棗。亦仙界之浮詞。使徒侈說長生。撥張繁祉。比附陀移之國。揣侷兜率之天。文勝則史。不其諛矣。若第羨聲華之盛。誇遭遇之隆。則無雙之譽。久齊聲於許慎。稽古之力。宜蔑視夫桓榮。中朝大官。咸詢以今事古事。海內英彥。早仰爲經師人師。醜纓稱揚。抑又贅矣。夫葆真純固。當推其致此之由。美意延年。要識其本原之量。毋諛毋贅。請得而言。今夫連抱之材。經雪虐風饕而成用。步光之劍。因千辟萬灌而稱神。從古至今。偉人畸士。莫不劬勞撼頓。忍性動心。何者。精神以磨鍊而強。智慮以艱危而邃。夫子承廉吏之門風。屬紹庭之多故。揚太尉代傳清德。朱仲卿家靡餘財。昔橋蔭之尙依。已疊

空之欲取。既而槐花強踏。桂樹初攀。跋浪南圖。出門西笑。陸生遠適。鴻鵠之品。望斯高。伯樂難逢。驂騑之霜。蹶屢蹶。由是以吳中才士。爲國子先生。黃甲看人。青氈作客。守生涯於麤繒大布。嘗世味於朝齏莫鹽。開筐而觀。殘藁多於敝服。借車而出飛埃。盛於同雲。蓋至壬辰年。以第三人及第。而前此之抑塞屈服。非一日矣。然且不概於心。彌貞於道。刀無厚而善藏。玉有輝而待賈。此我夫子之歷練也。若夫雙駒稱娛。四牡駢征。采東岱之琳民。傳南宮之衣鉢。藥籠儲於江右。竹箭采於會稽。英蕩持衡。旋回舞袖。斯固時人所震盪。今昔所同矜也。而夫子翺翺如畏。翼翼殫思。巨眼澄空。初心辛苦。魚龍夜冷。燒銀燭以照遺珠。桃李春開。灑金壺而濡甘露。其於外也。砥節首公。樹聲示肅。潁川文學。能爲執俎之容。魯國諸生。半在門牆之內。修明雅術。實竭勳勞。今春去浙之前二日。猶指鬢髮示國藩曰。昔校士臨淄。猷爲靡盬。既勤三載。遂見二毛。異時歸自浙東。此旣旣者殆皓然矣。鞅掌獨賢。周詩有北山之什。苞苴不竭。漢使無南越之裝。此我夫子之靖共也。聖朝廷試詞臣。數年一舉。夫子再登上考。游陟崇階。蘇頌爲文。書史防其脫腕。相如作賦。天子幸其同時。中外人士。亦旣傾風而仰鏡。企采而翹華矣。而乃進思退思。大讓小讓。下問不恥。多聞闕疑。懼書馬之訛。慎覓雌之辯。早朝罷則陳書徧覽。夜漏深而吟事方酣。一字未安。較輜銖於同

輩片長必獎。假毛羽於後生。推之石奮家風。過路馬而必軾。晏嬰儉德。衣狐裘而累年。此我夫子之敬慎也。昔者崔邠側帽。潘岳奉輿。母養之隆。稱爲盛事。彼皆鄰於寵飾。未必篤於屬離。我夫子行不違仁。恩能錫類。感枯魚之銜索。詠有賴之在河。陟岵載瞻。萬里而白雲無極。循陔言采。三春而愛日常暉。曩者瞻依。今茲孺慕。殊恩旣被。令問斯皇。朱壽昌五十之年。效萊子而添綵戲。衛尚書八座之母。有中丞以問起居。敦牟卮匱。龍爲炙而玉爲酒。嬾星卿月。前有輝而後有光。猶復喜懼交深。形聲密察。幾同廁臉之親滌。無改菽水之昔歡。此我夫子之孝思也。夫瑞玉常堅。蘊蓄者久也。戶樞不敝。勤動者恆也。慎戒必恭。聖有謨訓。大德必得。古有明徵。準斯四者。可以言壽矣。國藩醉翁門下之人。補闕春官之士。良苗不實。有負煙鋤。庸櫟非材。曾經月斧。金丹許換。共絳帳以聆音。玉署叨陪。乃霓裳之同詠。遙想錦樹山高之地。黃花酒熟之天。籌添望海之樓。弧設重雲之會。官吏黎收而拜。門人繼屬而來。習瓠葉者五百人。祝靈椿以八千歲。何其盛也。繫匏有職。負笈難從。徒瓦奏而桴宣。莫捧觴而僕爵。區區此志。能不懷哉。道阻且長。朔洄在西湖之水。光遠有耀。第蔚瞻南極之星。鋪張洪算。胼飾龐祺。知有能者。匪所詳矣。

求闕齋記

國藩讀易至臨而喟然歎曰。剛侵而長矣。至於八月有凶。消亦不久也。可畏也哉。天地之氣。陽至矣。則退而生陰。陰至矣。則進而生陽。一損一益者。自然之理也。物生而有耆欲。好盈而忘闕。是故體安車駕。則金輿鑿衡。不足於乘。目辨五色。則黼黻文章。不足於服。由是入音繁會。不足於耳。庶羞珍膳。不足於味。窮巷甕牖之夫。驟膺金紫物。以移其體習。以蕩其志向。所搯扼而不得者。漸乃厭鄙而不屑御。旁觀者以爲固然。不足訾議。故曰。位不期驕。祿不期侈。彼爲象箸。必爲玉杯。漸積之勢然也。而好奇之士。巧取曲營。不逐衆之所爭。獨汲汲於所謂名者。道不同。不相爲謀。或貴富以飽其欲。或聲譽以厭其情。其於志盈一也。夫名者。先王所以驅一世於軌物也。中人以下。蹈道不實。於是爵祿以顯馭之。名以陰驅之。使之踐其迹。不必明其意。若君子人者。深知乎道德之意。方惡名之既加。則得於內者曰浮。將恥之矣。而淺者譁然驚之。不亦悲乎。國藩不肖。備員東宮之末。世之所謂清秩。家承餘蔭。自王父母以下。並康彊安順。孟子稱父母俱存。兄弟無故。抑又過之。洪範曰。凡厥庶民。有猷有爲有守。不協於極。不罹於咎。女則錫之福。若國藩者。無爲無猷而多罹於咎。而或錫之福。所謂不稱其服者歟。於是名其所居。曰求闕齋。凡外至之榮。耳目百體之耆。皆使留其缺陷。禮主減而樂主盈。樂不可極。以禮節之。庶以制吾性焉。防吾淫焉。若夫

令問廣譽。尤造物所靳予者。實至而歸之。所取已貪矣。况以無實者攘之乎。行非聖人而有完名者。殆不能無所矜飾於其間也。吾亦將守吾闕者焉。

新甯縣增修城垣記

道光二十有七年秋八月。漢人李世德雷再浩。爲亂於湖南之新甯。有司檄遠近。有能禽賊。予白金五百兩。於是吾友江忠源岷樵應募。部鄉兵縛賊送官司。取所謂五百金者。歸獻堂上。爲太公壽。太公曰。長吏以賞罰驅民。矯而不受。是墮上之信也。資人之力而專其利。是刑己之廉也。信墮。無以馭衆。廉刑。無以立身。二者有一。將必不可。吾邑城垣傾圯久矣。若捐此金以興修。官必嘉之。衆必和之。衆與而功易集。城完而民得安枕。此十世之勳也。岷樵從太公言。乃歸金於官而上其議。長寶道兵備使者揚公。聞之大悅。亦輸助五百金。知寶慶府事某公。知新甯縣事某公。各捐若干金。以助役。邑之士夫耆長。亦鼓舞輸財。爭先輦運。兵事之後。刻日興工。人人如驚鳥之願治其巢也。大抵天下行省所隸。各有邊區。與他省所隸相際。去會垣動以千里。往往萬山叢薄。歧徑百出。奸人亡命嘯聚其中。伺隙而爲變。捕之。此則逃之。彼鳥鼠奔竄。不可窮詰。或攻破山城。據爲窟穴。輒以號召叛徒。聲生勢長。相望也。若鄖陽際陝西。湖廣之交。南贛際江西。福建

之交。以前明原傑王守仁之才。經略數年。僅而得安。而南山老林際三省之交。嘉慶教匪之役。喪師糜饗。乃至不可勝計。新甯亦山國也。實處湖南廣西之交。匪人煽結。卵育其間。瞰葭爾之山城。而欲據而有之。屢屢矣。往在道光十六年。藍正樽以一亡賴揭竿竊發。幾欲墮城而殺守吏。會不一紀。李世德雷再浩踵而逆命。豈不以下邑孤遠。城郭不完。有以誨盜而起亂萌哉。如又不從而修葺之。數歲以後。餘孽復滋。將思一逞於我。此垣墉之卑窳者。可長恃之以爲晏然乎。於是岷樵以二十八年二月舉工。先治城之四門。有樓歧然而高。有闔儼然而堅。赤白煥然而改其舊。遂次第興築。雉高於前者幾尺。培而厚者幾尺。補缺垣若干丈。增睥睨若干都。計土工幾千幾百。石工幾千幾百。金木之工幾千。費錢幾百萬。以二十九年某月畢役。自是有可守之險。寇賊不敢規以爲利矣。岷樵之來京師也。屬余敘其顛末。俾後之守土者。不時繕治。無苟毀成功云。

槐陰書屋圖記

吾師江陰季先生。自名其寓舍曰槐陰補讀之室。而屬人爲之圖。圖成於道光癸卯之夏。時先生方官內閣學士職。思簡易曰補讀云者。以爲績學不夙。仕優而後補之。謙退之詞也。是年冬。先生視學安徽。三年還朝。則已掌吏部。或攝戶部。又督漕於潞河。釐鹽於天津。蕩滌田賦。積虧於兩浙。庶

政倥傯。刻無暇晷。閒遂有巡撫山西之命。於是先生手圖而告國藩曰。吾昔名吾居室而圖之也。將以讀吾書也。今五六年閒。腐精於案牘。敝形神於車塵馬足。曩之不逮。竟不克補。則今之悔。又果可補於後日乎。子爲我記之。志吾疚焉。國藩嘗覽古昔多聞之君子。其從事文學。多不在朝班而在仕宦遠州之時。雖蘇軾黃庭堅之於詩。論者謂其汴京之作少遜。不敵其在外者之殊絕。蓋屏居外郡。罕與接對。則其志專。而其神能孤往橫絕於無人之域。若處京師浩穰之中。視聽旁午。甚囂而已矣。尙何精詣之有哉。我朝大儒林興。號爲邁古。然如睢州湯公。儀封張公。江陰楊公。高安朱公。臨桂陳公。合河孫公。數賢人者。大抵爲外吏之日多。宦京朝之日少。卽在京朝。其任職也專。其守法也簡。亦常日有餘光。人有餘力。今六部科條之繁。既三倍於百年以前。而先生之所歷。或一身而兼數職。一歲而更數役。每夕丑初趨離宮。待漏盡午而後返。曹官白事判牘。莫夜不休。又以其閒賓接生徒。宴會寮友。伺隙以求終一卷焉而不可得。視數賢人者之處京朝時。勢固不侔矣。此先生所用爲憮然也。今者先生持節山西。政成而神暇。盡發遺編以補素願。蓋將與數賢人者。角其實而爭其光。而國藩忝竊高位。乃適蹈先生之所疚。往者不可償。來者不可必。故略述時事。令異世官朝籍者有考焉。

養晦堂記

凡民有血氣之性。則常翹然而思。有以上人。惡卑而就高。惡貧而覲富。惡寂寂而思赫赫之名。此世人之恆情。而凡民之中。有君子人者。常終身幽默。闔然深退。彼豈生與人異性。誠見乎其大。而知衆人所爭者之不足深較也。蓋論語載齊景公有馬千駟。會不得與首陽餓孳。絮論短長矣。余嘗卽其說推之。自秦漢以來。迄於今日。達官貴人。何可勝數。當其高據勢要。雍容進止。自以爲材智加入萬萬。及夫身沒觀之。彼與當日之廝役賤卒。汚行賈豎。營營而生。草草而死者。無以異也。而其閒又有功業文學。獵取浮名者。自以爲材智加入萬萬。及夫身沒觀之。彼與當日之廝役賤卒。汚行賈豎。營營而生。草草而死者。亦無以異也。然則今日之處高位而獲浮名者。自謂辭晦而居顯。光氣足以自振矣。會不知其與眼前之廝役賤卒。汚行賈豎之營營者。行將同歸於澌盡。而豪毛無以少異。豈不哀哉。吾友劉君孟容。湛默而嚴恭。好道而寡欲。自其壯歲。則已泊然而外富貴矣。旣而察物觀變。又能外乎名譽。於是名其所居曰養晦堂。而以書抵國藩爲之記。昔周之末世。莊生閔天下之士。湛於勢利。汨於毀譽。故爲書戒人。以闡默自藏。如所稱董梧宜僚壺子之倫。三致意焉。而揚雄亦稱炎炎者滅。隆隆者絕。高明之家。鬼瞰其室。君子之道。自得於中。而外無所求。飢凍不

足於事畜而無怨。舉世不見是而無悶。自以爲晦。天下之至光明也。若夫奔命於烜赫之途。一旦勢盡意索。求如尋常窮約之人而不可得。烏覩所謂高明者哉。余爲備陳所以。蓋堅孟容之志。後之君子。亦觀省焉。道光三十年歲在庚戌冬十月。

湘鄉縣實興堂記

自古開國之主。以武功龜定禍亂。而繼體蒙業之君。恆以文德致太平。如漢如魏。如宋如陳。如拓拔魏。如高齊。如唐如明。其第二世嗣爲帝者。皆諡曰文。我朝龍興遼瀋。太祖以神武肇基。其製造國書。右文布化。郊廟齋戒。諸大典。多成於太宗文皇帝之世。蓋武以開之。文以守之。干戈方興。未遑雅教。非其志有未逮。亦其時會有不得兼者也。咸豐二年。粵賊洪楊之徒。既已踰嶺而北。由湖湘而犯江漢。長驅東下。入金陵而據之。遂北寇河朔。東躡瀛碣。西擾汾晉。中原糜沸。我湘鄉實始興義旅。轉戰於兩湖。江西。廣西。廣東。河南。安徽諸行省。所在破敵克城。聲威烜然。號曰湘勇。湘勇之名聞天下。一時宿將。如羅忠節公。王壯武公。李君續賓兄弟。蕭君啓江。劉君騰鴻。趙君煥聯。蔣君益澧。及余弟國荃輩。皆以仁勇爲士卒所親附。歷久而不渝。蓋武功之懋。非他州縣所可望而及。秦漢稱山西出將。考之安定。天水。隴西諸郡。曾不能敵今日之一縣。可謂盛矣。其官斯土者。則有朱侯

孫詒。唐侯逢辰。黃侯醇熙。賴侯史直。又皆一時賢俊。有循良之績。與邦人士講求吏治。將略。互相稱美。訢合無間。同明相照。同氣相求。何其翕應者與。咸豐癸丑。唐侯臨莅茲邑。倡捐助餉。練勇防堵。越二年。申詳大憲。奏請增廣文武學額。聖恩加增。永爲定額。人爭頌唐侯之功不衰。是年天下士會試於禮部。湘鄉獨無人赴部應試。唐侯喟然曰。湘鄉之武。非無文也。今或無一士與於春官之試。豈余之不德。不足以興文教歟。抑軍興久而生事。絀公車之欲北者。不足於資歟。於是捐金若干。買七都田六十三畝。爲寶興公費。又勸諭士民。捐買田宅若干。以子午卯酉年租。入爲會試旅費。寅申巳亥年租。入爲鄉試途費。辰戌丑未年租。入爲歲科試卷費。置寶興堂。擇廉正者經紀之。立條明約。既簡既堅。以期久遠。自唐世長吏設寶主。陳俎豆。備管絃。行鄉飲酒禮。歌鹿鳴之詩以餞士。差具前古興賢之義。今猶略存其法。獨不得與計吏偕。士或起白屋。無所資藉。則剗廉捐義。媮爲一切。苟以集事無匱乏。枉吾尺以求一日之直。彼有所迫而然也。湘鄉山邑。多狷介自守之士。唐侯禮賢惠衆。所以愛士者甚重。則士之所以自待者。愈不得輕。入無仰事俯畜之累。出無金盡裘敝可憐之色。搏心壹志。以道於君子之道。而委蛇以隱射乎有司者之程度。境裕而神暇。事半而功倍。然猶有失焉者。蓋什而不能以一二耳。方今大難削平。弓矢載囊。湘中

子弟忠義之氣。雄毅不可遏抑之風。鬱而發之於文。道德之宏。文章之富。將必有震耀寰區。稱乎今日之武功。而又將倍焉蓰焉者。余雖衰鈍。尙庶幾操左券於此。請以右券責之。

聖哲畫像記

國藩志學不早。中歲側身朝列。竊窺陳編。稍涉先聖昔賢魁儒長者之緒。駑緩多病。百無一成。軍旅馳驅。益以蕪廢。喪亂未平。而吾年將五十矣。往者吾讀班固藝文志。及馬氏經籍考。見其所列書目。叢雜猥多。作者姓氏。至於不可勝數。或昭昭於日月。或湮沒而無聞。及爲文淵閣直閣校理。每歲二月。侍從宣宗皇帝入閣。得觀四庫全書。其富過於前代所藏遠甚。而存目之書。數十萬卷。尙不在此列。嗚呼。何其多也。雖有生知之姿。累世不能竟其業。况其下焉者乎。故書籍之浩浩。著述者之衆。若江海然。非一人之腹所能盡飲也。要在慎擇焉而已。余既自度其不逮。乃擇古今聖哲三十餘人。命兒子紀澤。圖其遺像。都爲一卷。藏之家塾。後嗣有志讀書。取足於此。不必廣心博鷲。而斯文之傳。莫大乎是矣。昔在漢世。若武梁祠。魯靈光殿。皆圖畫偉人事蹟。而列女傳亦有畫像。感發興起。由來已舊。習其器矣。進而索其神。通其微。合其莫。心誠求之。仁遠乎哉。國藩記。

堯舜禹湯。史臣記言而已。至文王拘幽。始立文字。頒周易。周孔代興。六經

炳箸。師道備矣。秦漢以來。孟子蓋與莊荀並稱。至唐韓氏。獨尊異之。而宋之賢者。以爲可躋之尼山之次。崇其書以配論語。後之論者。莫之能易也。茲以亞於三聖人後云。

左氏傳經。多述二周典禮。而好稱引奇誕文辭。爛然浮於質矣。太史公稱莊子之書皆寓言。吾觀子長所爲史記。寓言亦居十之六七。班氏閎識孤懷。不逮子長遠甚。然經世之典。六藝之旨。文字之源。幽明之情狀。粲然大備。豈與夫斗筭者。爭得失於一先生之前。姝姝而自悅者哉。

諸葛公當擾攘之世。被服儒者。從容中道。陸敬輿事多疑之主。馭難馴之將。燭之以至明。將之以至誠。譬若御駑馬登峻坂。縱橫險阻而不失其馳。何其神也。范希文司馬君實。遭時差隆。然堅卓誠信。各有孤詣。其以道自持。蔚成風俗。意量亦遠矣。昔劉向稱董仲舒王佐之才。伊呂無以加。管晏之屬。殆不能及。而劉歆以爲董子師友所蘄。曾不能幾乎游夏。以予觀四賢者。雖未逮乎伊呂。固將賢於董子。惜乎不得如劉向父子而論定耳。自朱子表章周子二程子張子。以爲上接孔孟之傳。後世君相師儒。篤守其說。莫之或易。乾隆中閎儒輩起。訓詁博辨。度越昔賢。別立微志。號曰漢學。擯有宋五子之術。以謂不得獨尊。而篤信五子者。亦屏棄漢學。以爲破碎害道。斷斷焉而未有已。吾觀五子立言。其大者多合於洙泗。何可議也。

其訓釋諸經。小有不當。固當取近世經說以輔翼之。又可屏棄羣言以自隘乎。斯二者亦俱譏焉。

西漢文章。如子雲相如之雄偉。此天地遒勁之氣。得於陽與剛之美者也。此天地之義氣也。劉向匡衡之淵懿。此天地溫厚之氣。得於陰與柔之美者也。此天地之仁氣也。東漢以還。淹雅無慙於古。而風骨少隳矣。韓柳有作。盡取揚馬之雄奇萬變。而內之於薄物小篇之中。豈不詭哉。歐陽氏會氏。皆法韓公。而體質於匡劉爲近。文章之變。莫可窮詰。要之不出此二途。雖百世可知也。

余鈔古今詩。自魏晉至國朝。得十九家。蓋詩之爲道廣矣。嗜好趨向。各視其性之所近。猶庶羞百味。羅列鼎俎。但取適吾口者。嗜之得飽而已。必窮盡天下之佳肴。辨嘗而後供一饌。是大惑也。必強天下之舌。盡效吾之所嗜。是大愚也。莊子有言。大惑者終身不解。大愚者終身不靈。余於十九家中。又篤守夫四人者焉。唐之李杜。宋之蘇黃。好之者十有七八。非之者亦且二三。余懼蹈莊子不解不靈之譏。則取足於是終身焉已耳。

司馬子長網羅舊聞。貫串三古。而入書頗病其略。班氏志較詳矣。而斷代爲書。無以觀其會通。欲周覽經世之大法。必自杜氏通典始矣。馬端臨通考。杜氏伯仲之間。鄭志非其倫也。百年以來。學者講求形聲古訓。專治說

文多宗許鄭。少談杜馬。吾以許鄭考先王制作之源。杜馬辨後世因革之要。其於實事求是一也。

先王之道。所謂修己治人。經緯萬彙者何歸乎。亦曰禮而已矣。秦滅書籍。漢代諸儒之所掇拾。鄭康成之所以卓絕。皆以禮也。杜君卿通典。言禮者十居其六。其識已跨越八代矣。有宋張子朱子之所討論。馬貴與王伯厚之所纂輯。莫不以禮爲兢兢。我朝學者。以顧亭林爲宗。國史儒林傳。褒然冠首。吾讀其書。言及禮俗教化。則毅然有守先待後。舍我其誰之志。何其壯也。厥後張蒿菴作中庸論。及江慎修戴東原輩。尤以禮爲先務。而秦尙書蕙田。遂纂五禮通考。舉天下古今。幽明萬事。而一經之以禮。可謂體大而思精矣。吾圖畫國朝先正遺像。首顧先生。次秦文恭公。亦豈無微旨哉。桐城姚鼐。姬傳。高郵王念孫。懷祖。其學皆不純於禮。然姚先生持論閎通。國藩之粗解文章。由姚先生啓之也。王氏父子。集小學訓詁之大成。復乎不可幾已。故以殿焉。

姚姬傳氏言學問之途有三。曰義理。曰詞章。曰考据。戴東原氏亦以爲言。如文周孔孟之聖。左莊馬班之才。誠不可以一方體論矣。至若葛陸范馬。在聖門則以德行而兼政事也。周程張朱。在聖門則德行之科也。皆義理也。韓柳歐曾。李杜蘇黃。在聖門則言語之科也。所謂詞章者也。許鄭杜馬。

顧秦姚王。在聖門則文學之科也。顧秦於杜馬爲近。姚王於許鄭爲近。皆考據也。此三十二子者。師其一人。讀其一書。終身用之。有不能盡。若又有陋於此而求益於外。譬若掘井九仞而不及泉。則以一井爲隘。而必廣掘數十百井。身老力疲。而卒無見泉之一日。其庸有當乎。

自浮屠氏言因果禍福。而爲善獲報之說。深中於人心。牢固而不可破。土方其佔畢咿唔。則期報於科第祿仕。或少讀古書。窺著作之林。則責報於遐邇之譽。後世之名。纂述未及終編。輒冀得一二有力之口。騰播人人之耳。以償吾勞也。朝耕而暮穫。一施而十報。譬若沽酒市脯。喧聒以責之。貸者又取倍稱之息焉。祿利之不遂。則傲倖於沒世不可知之名。甚者。至謂孔子生不得位。沒而俎豆之報。隆於堯舜。鬱鬱者以相證慰。何其陋歟。今夫三家之市。利析鎰銖。或百錢逋負。怨及孫子。若通閩貿易。環貨山積。動逾千金。則百錢之有無。有不暇計較者矣。富商大賈。黃金百萬。公私流衍。則數十百緡之費。有不暇計較者矣。均是人也。所操者大。猶有不暇計其小者。况天之所操尤大。而於世人豪末之善。口耳分寸之學。而一一謀所以報之。不亦勞哉。商之貨殖同時同。而或贏或絀。射策者之所業同。而或中或罷。爲學著書之深淺同。而或傳或否。或名或不名。亦皆有命焉。非可強而幾也。古之君子。蓋無日不憂。無日不樂。道之不明。己之不免爲鄉人。

一息之或懈。憂也。居易以俟命。下學而上達。仰不愧而俯不怍。樂也。自文王周孔三聖人。以下至於王氏。莫不憂以終身。樂以終身。無所於祈。何所爲報。己則自晦。何有於名。惟莊周司馬遷柳宗元三人者。傷悼不遇。怨悱形於簡冊。其於聖賢自得之樂。稍違異矣。然彼自惜不世之才。非夫無實而汲汲時名者比也。苟汲汲於名。則去三十二子也遠矣。將適燕晉而南其轅。其於術。不益疏哉。

文周孔孟班馬左莊葛陸范馬周程朱張韓柳歐曾李杜蘇黃許鄭杜馬顧秦姚王三十二人。俎豆馨香。臨之在上。質之在旁。

畢君殉難碑記

自楚軍之興。忠武公塔齊布。實始以勇名天下。楚人剽悍者。率低首塔公。亦豔稱雲南畢君。塔公每臨敵。負鎗挾弓矢。又令二卒。樹長矛。執曳馬繩。竿以從。其爲器也四。畢君每臨敵。負鎗腰五十矢。又令卒手蛇矛。持八尺刀以從。其爲器也亦四。塔公躍馬騰馳。瞋人追從。從輒返。鞭之。畢君怒。馬直穿賊陣。戒後者無得妄從我。人亦自不敢從也。畢君名金科。字應侯。雲南臨沅人。以征開化苗匪。功敘藍翎外委。署臨沅鎮標外委。咸豐四年。隨副將王國才赴湖北軍營。破賊於天門丁司橋。累敘至花翎都司。十一月。國藩檄令隨塔公攻圍九江。明年正月。賊犯武昌。王國才回軍援鄂。畢君

遂爲塔公所留。其後塔公物故。畢以驍勇冠潯軍。逆會石達開之寇江西也。連陷瑞州臨江等八府。數十州縣。畢君所至。常陷陳克捷。旋爲他部牽率失利。終不得獨錄其功。自九江奉檄而南。以五年十二月破賊於樟樹鎮。明年二月。軍敗失之。自南昌而東。以六年五月。破賊於饒州之章田渡。六月。郡城陷失之。畢君自痛爲他部所累。益發憤。募死士。再入饒州。誓衆曰。今日上岸破賊。不捷。吾不復歸舟矣。一鼓克復府城。饒之耆黎婦孺。見聞者與不見聞者。皆曰。畢君功也。由是賞加呼爾察巴圖魯名號。補臨沅鎮都司。升用游擊。名譽大振。而忌君者。日以次骨。飛謀薦謗。迭相汚染。君提千餘人。當四戰之地。索餉不至。又惡忌者出己上。中夜鬱鬱。不自得。常思立奇功。以自旌異。會徽池之賊大至。歲暮。士有飢色。有司者責君。能破景德鎮軍。食可圖也。君以正月二日出師。初四日。驟攻景德鎮。入市。乃無一賊。別挈十人。搜剿後街。賊蜂起。從卒亡七人。傷三人。君縱橫擊刺。踐血而出。最後。賊以噴筒環攻君於王家洲。隕焉。年二十五歲耳。閱十有八日。前從傷卒三人者。收得遺屍。又三載。咸豐九年。予弟國荃破賊景德鎮。憑弔畢君殉難之所。而壯士則旣死矣。功名之際。有天有人。在己者獨足恃哉。於是伐石以表遺蹟。聲之銘語。俾行路歌之。以永饒人之思。銘曰。

橫目蚩蚩。同出一冶。衆雌無雄。誰是健者。塔公首出。次乃畢君。軀幹雖小。

陳安之倫。匹馬斫陣。萬夫莫當。人心之賊。一矢或傷。內畏媚嫉。外逼強寇。進退靡依。忍尤叢詬。鬱極思伸。矯首砥天。徒飛無翼。或墜於淵。淵則有底。憤則無已。萬代千齡。哀此壯士。

林君殉難碑記

嗚呼。自余倡率楚師。轉戰荆揚二州之域。其間相從死事者。不可勝道。或貞白無他。誓不相背棄。而慷慨一瞑。志不得少伸。名不裸於當世。愛之而莫能收焉者。尤可悲也。林君源恩。字秀三。四川達州人。道光丁酉科拔貢生。癸卯順天鄉試舉人。咸豐元年。選湖南平江縣知縣。二年。粵賊洪楊之屬圍長沙。其冬。瀏陽匪徒爲亂。明年春。通城匪徒爲亂。三縣者。皆與平江壤接。君詰姦守隘。如防禦水。截然不得蟄盜。江忠烈公才君之爲。旣保奏以同知直隸州補用。又以書播告士友。道林君堪軍旅也。會國藩治舟師。檄君募平江勇五百人以從。四年三月。賊自鄂中南犯。君禦之平江九嶺。果大捷。同官有忌君者。功不得敘。又別撫他事中之。君悒悒內不能堪。而口獨重滯。嘗發憤欲一廷辨宿戒。設辭甚具。至則爲衆所噤害。卒不得發。或反引咎自責。是歲十月。追隨國藩於九江軍次。造次欲有所申理。亦不竟白也。明年春。檄君治湘軍糧臺。歸自廣信。又治塔軍門忠武公糧臺。又佐理鄱湖水師營務。十一月。又攝理陸軍於廬山之麓。姑塘之南。而江西

巡撫文公。聞君賢。飛檄調至南昌。付以所募之平江營者。君在廬山。與一二武人爲儔。折節內交。武人益不孫。嫚辭侵侮。或稱書生跬步矍矍。焉知戰事。君旣痛其獷。又口重滯。卒無以折之。獨夜歎曰。丈夫壹死強寇耳。終不返顧矣。及至南昌。領新軍。乃稍自喜。是時劇賊石達開犯江西。連陷八府五十餘州縣。六年丙辰三月。李元度次青。率師自湖口南來。君與鄧輔綸彌之。自南昌而東。兩軍會於撫州。疊戰皆捷。人心始定。賊亦糾合列郡醜類。更番擲戰。我軍輒卻之。又至。又大創之。疲極不得休息。秋九月。分軍出攻崇仁宜黃。適會援賊大至。君竟以十七日戰敗。死之。始君嘗誡其下曰。好相保。吾與若。共命於茲也。至是。衆知君不屈。相從死者三百餘人。君歿二載。咸豐八年四月。官軍克復撫州。又明年。國藩師次於此。弔君殉難之所。尋逝者之白骨。邈然其不可復識矣。於是爲立石以表遺蹟。綴以銘詩。以告於不知紀極之世之一二君子。以達余之耿耿。銘曰。

胡古胡今。強吞弱伏。佞者刀楛。訥者魚肉。文吏賊深。武夫悍激。訥者避之。負牆屏息。忽入戰場。萬馬辟易。土固難料。理固難推。災祥顯晦。孰執其機。昔聞人述。言出君口。我不知戰。但知無走。平生久要。臨難不苟。大信不盟。堅可鏗金。澆俗所侮。鬼神所欽。精魂遠矣。北斗帝鄉。遺骨莫辨。蔓草茫茫。有欲求之。環此石旁。

湖口縣楚軍水師昭忠祠記

咸豐八年七月。國藩將有事於浙江。道出湖口。廣東惠潮嘉道彭君雪琴。方庀局鳩工。建昭忠祠於石鐘山。祀楚軍水師之死事者。告余具疏上聞。八月疏入。報可。明年七月。國藩將有事於四川。再過湖口。則祠工已畢。祀營官蕭節愍公捷三以下若干人。後楹祀勇丁若干人。其東爲浣香別墅。前曰聽濤眺雨之軒。後曰芸芍齋。齋後傳以小亭。曰且閒亭。亭下有小池。度梁而南。穿石洞東出。曰梅塢。迤西少陟山曰鎮江亭。其西絕高曰觀音閣。閣外曰魁星樓。僧徒居之。又西曰坡仙樓。刻蘇氏石鐘山記。其上憑高望遠。吐納萬景。一草一石。煥然增新矣。當楚軍水師之初立也。造舟始於衡陽。大戰始於湘潭。其後克岳州。下武昌。大破田家鎮。今福建提督楊君厚菴。與雪琴暨諸君子。喋血於狂風巨浪之中。燔逆舟以萬計。轉戰無前。可謂至順。其後官軍深入彭蠡之內。賊乘水涸。大塞湖口。遏我舟使不得出。於是水師有外江內湖之分。內者守江西。外者援湖北。騞然若割肝膽。而判爲楚越。終古不得合併。至咸豐七年九月。攻克湖口。兩軍復合。蓋相持三年之久。死傷數千人之多。僅乃舉之。方其戰爭之際。礮震肉飛。血瀑石壁。士飢將困。窘若拘囚。羣疑衆侮。積淚漲江。以求奪此一關而不可得。何其苦也。及夫祠成之後。裸薦鼓鐘。士女瞻拜。名花異卉。旖旎嗽滄。江色

湖光呼吸萬里。曠然若不復知兵革之未息者。又何樂也。時乎安樂。雖賢者不能作無事之響。時乎困苦。雖達者不能作違衆之驩。欣人心之喜戚。夫豈不以境哉。吾因是而思夫豪傑用兵。或敝一生之力。擲千萬人之性命。以爭尺寸之土。不得則鬱鬱以死者。甯皆憂斯民哉。亦將以境有所迫。而勢有所劫者然也。若夫喜戚一主於己。不遷於境。雖處富貴賤貧。死生成敗而不少移易。非君子人者。而能庶幾乎。余昔久困彭蠡之內。蓋幾幾不能自克。感彭君新構此祠。有登臨覽觀之美。粗爲發其凡焉。

何君殉難碑記

嗚呼。軍興十載。士大夫君子橫死者多矣。獨吾友何君丹畦。尤深痛不忍聞。自近古以來。未有行善獲禍。如是之烈者也。豈不悲哉。君以咸豐四年五月。由翰林院侍講上書房行走。出爲安徽徽甯池太廣兵備道。時則安慶暨濱江府縣。淪沒賊中。廬州新立行省。亦陷於賊。副都御史袁公軍臨淮。提督和公。巡撫福公。軍廬州。君當之官。不克南渡。袁公欲資君以兵。西會楚師。福公亦具疏。留君江北。檄君募勇出征。公私匱乏。沮傷百端。最後得二百餘人。率之以西。至霍山。徵集潰兵團勇三千餘人。推誠獎勵。遂以十月二日。大破捻匪李兆受於城東。追至麻埠。又五日。至流波磴。檄商城固始團練堵其北。金家寨團丁禦其東。而自率所部遏其西。捻黨恟懼。李

兆受與馬超江等相繼投誠。挺散脅從。遠近大悅。環三四縣。皆輸豬雞糗糧金錢之屬。聲終宵不絕。先是大府帥檄君救援廬江。檄未至而城先陷。至是奉被劾革職之命。軍士懷不能平。雖百姓亦惘惘也。方楚師之出岳州而東也。克武昌。下黃州。破田家鎮。水陸雷邁。席卷千里。其後塔齊布羅澤南兩軍。由黃梅南渡。以圍九江。賊循北岸而上。復陷蘄黃。竄武漢。自長淮以南。天柱內外。所在蜂屯。君以孤軍流離。西與楚師不相聞。東與廬州大府隔絕。朝不謀夕。嚙指誓衆。五年正月。進攻蘄水。克之。又分軍克復英山。又殲劇賊田金爵。大府帥以君西征有效。疏令留駐英山。君出師至是。凡八閱月。僅支見銀三百兩。士卒及民團相從者。增至三千人。又益以李兆受新降之衆。無以爲食。居無帳幕。雨無薪木。村郭無居民。遠近無援。傷亡無以爲卹。始十人賦麵一斤。繼而削減半之。既又半之。而賊來益盛。日提飢卒。轉戰不得休。五月十二日。軍敗。徒行泥淖中。鄉民或哀而進食。君雖強自振厲。然憊甚。瘳痺發體。氣亦少餒矣。李兆受者。故反側持兩端。感君忠勤。不忍遽背負。絕糧既久。怪君無以活之。意望甚。又同時降人馬超江爲匪徒所殺。怨官不能捕誅以抵罪也。則大戚。議爲超江復仇。設位受弔。捨黨畢集。於是安徽河南兩省。皆以兆受復叛入告。而縣令亦懸賞購兆受頭千金。兆受益不自安。匍伏詣君。自陳無他。君撫慰稍稍綏定矣。會

大府帥有密書抵君。教以圖翦叛賊。毋後人。發爲兆受所得。遂陽爲置酒高會。而伏兵戕君於英山之小南門。遺骸殘燬。同遇難者四十七人。咸豐五年十一月初三日也。君諱桂珍。字丹畦。雲南師宗人。道光甲午科舉人。戊戌進士。翰林院編修。丙午。提督貴州學政。旋晉侍講。入直上書房。數抗疏陳軍事得失。推本君德。又采朱子眞西山大學之說。傳以己意。引申條例。手繕成帙。隨疏奏進。君之意。嘗以爲聖人者。無不可爲。功無不可就。獨患人不自克。不能竭其心與力之所竟耳。及君出而莅事。飢餓經年。而百戰不息。儻所謂自克者耶。竭吾心與力而不遺者耶。卒其獲禍如是之烈。而或不免身後之餘責。然則爲善者。何適而不懼哉。咸豐十年。國藩屯軍江北。詢君患難馳驅之所。乃立石英山。綴以銘詞。俾來者有考焉。銘曰。飢寒逼身。難顧廉恥。聖主不能安其民。慈母不能撫其子。况於揭竿烏合之徒。亡命歸誠之始。倏順忽逆。朝人暮豕。封豕負塗。積疑張弧。踞牙鉤爪。噬我閔儒。赤舌燒城。死有餘議。羣毀所歸。天地易位。悠悠之口。難可遽勝。我銘諸石。少待其定。上訊三光。下訊無竟。

箴言書院記

國藩以道光戊戌。通籍於朝。湘人官京師者。多同時輩流。其射策先朝者。卅年宿望。凋散略盡。而少詹事益陽胡雲閣先生。獨爲老師祭酒。鄉之人。就

而考德稽疑。如幽得燭。衆以無隕。而詰嗣潤之。亦以編修。趾美名父。迺知館閣。今兵部侍郎湖北巡撫。海內稱爲官保。胡公者是也。少詹君晚而纂弟子箴言十四卷。國藩實嘗受而讀之。自灑掃應對。以暨天地經綸。百家學術。靡不畢具。甄錄古人嘉言。衷以己意。辭淺而指深。要使學者自幼而端所習。隨其材之大小。董勸漸摩。徐底於成而已。竊嘗究觀夫天之生斯人也。上智者不常。下愚者亦不常。擾擾萬衆。大率皆中材耳。中材者。導之東而東。導之西而西。習於善而善。習於惡而惡。其始瞳焉。無所知識。未幾而聘耆欲。逐衆好。漸長漸貫。而成自然。由一二人以達於通都。漸流漸廣。而成風俗。風之爲物。控之若無有。鱗之若易靡。及其既成。發大木。拔大屋。一動而萬里應。窮天人之力。而莫之能禦。先王鑒於此。欲民生蚤慎所習。於是設爲學校以教之。琴瑟鐘鼓以習其耳。俎豆登降以習其目。詩書諷誦以習其口。射御投壺以習其筋力。書升以作其能。而郊遂以作其恥。故其高材。則道足濟天下。而智周萬彙。其次亦不失爲圭璧自飭之士。賈生有言。習與正人居之。不能毋正。猶生長於齊。不能不齊言也。其不然歟。侍郎自開府湖北以來。卽以移風易俗爲己任。自部曲之長。郡縣之吏。暨百執事。片善微長。不敢自褻。而褒許隨之。曰。爾之發見之微。而善端宏大。不可量也。或有過差。方圖蓋覆。譴亦及之。曰。此猶小眚。過是。誅罰重矣。與其

新。不苛其舊。表其獨。不遺其同。上下兢兢。日有課。月有舉。當世推湖北人。才極盛。侍郎則曰。吾先人箴言中。育才之法如此。吾詎能繼述。直什一耳。咸豐十年。侍郎治鄂。六載矣。功成而化洽。又以一湖之隔。吾教成於北。而反遺吾父母之邦。其謂我何。於是建箴言書院。將萃益陽之士。而大淑之。置良田以廩生徒。儲典籍以饋孤陋。寬其涂轍。而嚴其教條。崇實而黜華。賤通而尚介。循是不廢。豈惟一邑之幸。卽漢之十三家法。宋之洛閩淵源。於是乎在。後有名世者出。觀於胡氏父子。仍世育才。肫肫之意。與余小子。慎其所習之說。可以興矣。

修治金陵城垣缺口碑記

道光三十年。廣西賊首洪秀全等作亂。咸豐三年二月十日。陷我金陵。據爲僞都。官軍圍攻。八年不克。十年閏三月。師潰。賊勢益張。有衆三百萬。擾亂十有六省。同治元年五月。浙江巡撫臣曾國荃。率師進攻金陵。三年六月十六日。於鍾山之麓。用地道克之。是歲十月。修治缺口。工竣。鑿石以識其處。銘曰。

靈谷龍神廟碑記

窮天下力。復此金湯。苦哉將士。來者勿忘。

龍於古不列祀典。國有大水。智者不祭。或有旱暵。圭璧祈禳。亦不及之。漢

世儒者以龍能興雲致雨。乃別四時方色爲象。土禺繪績。有禱輒應。其後五龍九龍之堂。侵作祀事興矣。國家褒崇龍祀。祭式祝號。一準王儀。自京師黑龍潭。暨各行省。皆立廟虔奉。甘澤時降。人蒙其庥。金陵省治之東。有泉曰入功德。水出於鍾山之陽。靈谷之寺。舊有龍神祠。屢獲嘉應。洎兵興祠燬。壇宇蕩然無存。同治六年。自春徂夏。數月不雨。禱禱之術既窮。國藩乃與布政司李君宗羲。督糧道王君大經。鹽巡道龐君際雲。先後求諸靈谷之神。四祈而四效。旋叩而立應。最後甘霖滂沛。圻壤膏流。槁苗勃興。嘉蔬蒼蔚。陂澤旁匯。魚鼈謹泳。歲仍有秋。民用康樂。於是乃相與重構斯廟。以報賽而妥靈。焚燎堅致。黜堊無華。取足嚴禱獻之儀。酌質文之衷而已。蓋金陵自六代以來。號爲名都。梵宇琳宮。震耀今古。勳戚甲第。湧殿飛甍。往往數千百年。遺構尙存。獨至粵賊洪楊之亂。埽地剷除。無復一椽片瓦之留遺。卽靈谷寺屢興屢廢。行無似此次之漸盡者。今龍神廟轟立基緒。而全寺之踵修。名蹟之興復。不知更待何年。易稱龍爲乾德。萬物資始。厥施甚普。自今以往。意者百工雲興。日新月盛。將盡還承平之舊乎。斯固守土之吏。所寤寐誠求者也。

金陵軍營官軍昭忠祠記

嗚呼。軍興以來。死事者多矣。而金陵尤爲忠義之所萃云。咸豐二年十二

月。賊陷武昌漢陽。掠取巨舟萬數。三年正月。蔽江東下。連陷九江。安慶。蕪湖各城。遂破金陵。據爲僞都。城中官紳。與駐防之軍民。並及於難。當是時。天子已命向榮爲欽差大臣。自湖北逐賊而東。至則城陷已逾旬日。又繼陷鎮江。揚州兩府。而都統琦善。亦以欽差大臣由河南進至揚州。自是後。廣西元從諸軍駐金陵者。號爲江南大營。北來新集諸軍駐揚州者。號爲江北大營。鎮江別屯一軍。則金陵分兵駐之。與揚州之師。相爲犄角。未幾。揚州之賊。分支北竄河南。直隸。金陵之賊。分支西竄江西。湖北。而鎮江之賊。破我營壘。別有粵人爲亂。攻陷上海。其冬。北軍克復揚州。儀徵。羣賊移據瓜洲。四年。督師琦公卒。托明阿接統北軍。五年。江蘇巡撫吉爾杭阿克復上海。移師圍攻鎮江。六年春。南路賊陷甯國。北路賊復陷揚州。托明阿罷職。德興阿接統北軍。旋克揚州。其夏。巡撫吉公戰沒於高資。金陵大營亦陷。督師向公。退守丹陽。已而病卒。朝廷命和春爲欽差大臣。而命張國樑爲總統。七年冬。南軍克復鎮江。北軍同日克瓜洲。八年。南軍築長圍以困金陵之賊。北軍大挫於浦口。賊陷江浦。天長。儀徵。揚州。六合。張國樑北援揚州。克之。九年。德興阿劾罷。江北不復置帥。以江南大帥兼轄。十年正月。張國樑克九狄洲。二月。皖南羣賊。攻陷杭州。江南遣張玉良援杭。克之。三月。賊破建平。東壩。溧陽。羣萃金陵。攻陷大營。我師潰奔常州。蘇州繼陷。

是後馮子材等堅守鎮江。都與阿等堅守揚州。數年無恙。蓋自咸豐癸丑以迄庚申。耳目衆著之事。大略如此。其餘南軍攻取旁近郡縣。若太平。蕪湖。丹陽。溧水。溧陽。高淳。句容。屢克屢陷。不常。其得失。或北援揚州。江浦。警報朝聞。南師夕渡。而城外賊壘。濱江要隘。亦無月不事攻戰。擲千百性命。以爭尺寸之土。當時中外盛稱江南勁旅。聲威出北。軍上遠甚。諸路告急。金陵往往分兵四出援剿。其致敗亦終以此。始至之秋。卽遣虎嵩林馳援上海。既又遣和春赴援廬州。甯國失守。則遣鄧紹良自浙援之。數年。鄧君戰亡。又遣鄭魁士繼之。賊圍衢州。則遣周天受等援浙。賊入延建。又濟師以援閩。近者數百里。遠者二三千。孤軍轉鬪。累月不歸。餽餉乖時。忍饑赴敵。膏塗原野。莫相收卹。而金陵之賊。見我軍遠征者多。居守者少。營壘空虛。炊煙日滅。晝夜謀所以覆我者。咸豐六年。大營失陷。正坐壘闕兵單之故。最後十年之役。則長圍已成。汎地愈廣。我軍分兵救浙。不能遽返。而自浙回竄之賊。皖南江北之賊。十道竝進。乃一發而不可禦。將土方冀合圍之後。犁穴擒渠。策勳有期。不意倉皇潰敗。有如沙飛河決。蕩折南奔。死亡不可勝數。其僅有存者。張玉良收集餘燼。以攻嘉興。以守杭州。至明年。杭城再陷。而金陵大營入萬人者。蕩然無復留遺矣。當諸將屯駐秣陵。向公榮。張公國樞。最負重望。其餘智者竭謀。勇者殫力。亦豈不切齒圖功。思

得當以報國。事會未至。窮天下之力而無如何。彼六七僞王者。各挾數十萬之衆。代興迭盛。橫行一時。而上游沿江千里。亦足轉輸盜糧。及賊勢將衰。諸會次第僵斃。而廣封駮豎。至百餘王之多。權分而勢益散。長江既清。賊糧漸匱。厥後楚軍圍金陵。兩載而告克。非前者果拙而後者果工也。時未可爲。則聖哲亦終無成。時可爲。則事半而功倍也。皆天也。既克三載。同治六年之冬。乃建昭忠祠於蓮花第五橋。祀先後死事者同堂而異室。其中一室。祀三年二月江甯初陷時守城殉難之員。其東一室。祀三年至十年城外大營傷亡之員。其西一室。祀城內及江甯七屬紳士。而外郡紳士死於此者。亦與焉。又東一室。祀金陵將領出援各路。死於甯國及浙江等處者。又西一室。祀鎮江及揚州死事之員。鎮江本金陵所分之軍。揚州亦與金陵一體。其後又歸南軍兼轄故也。工既竣。粗爲記其梗槩。至於歷年戰爭。良將猛士之勞。攻牢保危之策。將具於國史。茲不復備述云。

金陵湘軍陸師昭忠祠記

同治三年六月既望。大軍克復金陵。國藩至自安慶。犒勞士卒。見吾弟國荃。面顏焦萃。諸將枯瘠。神色非人。蓋盛暑攻戰。晝夜暴露城下。半月而未息。余既驚痛而撫慰之。乃徧行營壘。周視所開地道。覽戰爭之遺蹟。彭君毓橘。劉君連捷。蕭君孚泗。朱君南桂。相與前導而指示曰。某所某將盡命。

處也。某所賊困我之地也。諸所君不備述。吾弟又太息而縷述之。弟之言曰。自吾圍此城。壯士多以攻堅而死。賊於城外環築堅壘數十。大者略與城埒。攢以小營。障以長塢。甃石如鐵。掘塹如川。牢不可拔。我軍以元年五月之初。始克江甯鎮。三汊河。大勝關各壘。二年五月。李臣典等克雨花臺。及南門各壘。劉連捷等會同水師克九洲。中關。下關各壘。其江東橋之壘。則陳湜等於八月克之。上方門。高橋門。七甕橋。土山。方山各壘。則蕭慶衍。蕭孚泗等於九月克之。是時朱南桂亦克博望鎮。趙三元等亦克中和橋。秣陵關。至十月。克解溪。隆都。湖墅。而東南剗削略盡。三年正月。彭毓橘。黃潤昌等。乃克鍾山高壘。賊所署爲天保城者也。每破一壘。將士須臾隕命。率常數百人。回首有餘慟焉。其穿地道以圖大城者。凡南門一穴。朝陽至鍾阜門三十六穴。篝火而入地。崖崩而窟塞。則縱橫聚葬於其中。賊或穿隧以迎我。薰以毒煙。濯以沸湯。則趨者倖脫。而慙者就殲。最後神策門之役。城陷矣。而功不成。龍膊之役。功成矣。而死傷亦多。於是歎攻堅之難。而逝者之可憫也。毓橘之言曰。我軍薄雨花臺。未幾疾疫大行。兄病而弟染。朝笑而夕僵。十幕而五不常爨。一夫暴斃。數人送葬。比其反而半殍於途。近縣之藥既罄。乃巨艦連檣。徵藥於皖鄂諸省。當是時也。羣醫旁午。而僞王李秀成等大至。援賊三十萬。圍我營者數重。我軍力疾禦之。一夕。築

小壘無數。障糧道以屬之。江賊益番休迭進。蠃傅環攻。累箱實土以作檣。楯挾西洋開花礮。自空下擊。子落則石裂鐵飛。多掘地道。屢陷營壁。凡苦守四十五日。至冬初而圍解。軍士物故殆五千人。會有天幸。九帥獨免於病。目不交睫者月餘。而勤劬如故。雖鎗傷輔頰。血漬重襟。猶能裹創巡營。用是轉危而爲安。靖毅公則病後過勞。竟以不起。九帥者。軍中舊呼國荃之稱。靖毅者。吾季弟貞幹諡也。連捷之言曰。李會解圍去後。率衆渡江。連陷江浦。和州。含山。巢縣。皆我軍新取之城。得而復失。九帥乃分兵守西梁山。遣連捷與彭毓橘輩。救援江北。既解石澗埠之圍。破運漕銅城閘之賊。遂偕水師。連收四城。江北大定。劇賊益衰。然我衆死者。亦不可勝數也。南桂之言曰。方金陵官軍圍困之際。同時鮑超之軍。亦困於甯國。水師亦困於金柱關。金柱關者。水陽江及羣湖所自出。蕪湖之藩衛也。九帥乃分兵守東梁山。而遣南桂與朱洪章。羅洪元輩。力扼此關。夾河而與之上下。亂流而相攻。卯而戰。酉而不休。水營捷。陸營或挫。一夕數起。一餐屢輟。凡七閱月而事稍定。百里內外。白骨相望。時聞私祭夜泣之聲。天下之至慘也。於是國荃與諸將竝進稱曰。此軍經營安慶。翦伐沿江諸城。凋喪尙少。獨至金陵而死於攻。死於守。死於疾疫。死於北援巢和。南援蕪湖。太平。乃籌計而不能終。今存者。幸荷國恩。封賞進秩。而沒者抱憾無窮。雞鳴山下。有

賊造府第一區。若奏建昭忠祠。春秋致祭。庶以慰忠魂而塞吾悲耳。國藩具疏上聞。制曰可。黃君潤昌。爰董其事。取有冊可稽者。造神主一萬一千六百三十有奇。無冊者姑闕焉。甫歷三載。楹棟枉橈。牆宇傾墜。同治六年。省中僚友集議。廓而新之。基扃固護。籩豆有嚴。國藩乃追敘所聞於諸君者。而系以詩章。用備樂歌。詩曰。

人無貴賤。天壽賢愚。終歸於死。萬古同塗。死而得所。身殄魂愉。六朝舊京。逆豎所都。濯征十載。莫竟天誅。嗟我湘人。銳師東討。非祕非奇。忠義是寶。下誓同袍。上盟有昊。昊天藐藐。成務實難。祚我百順。阨我千艱。狂寇所噬。刈人如菅。疹厲乘之。積馘若山。偉哉多士。夷險一節。萬死靡他。心堅屈鐵。鑿彼巧偷。守茲貞拙。縷血所藏。后土長熱。卒收名城。獲醜擒王。寵賁冥漠。千嶺馨香。新廟孔赫。彝學將將。天子之錫。烈士之光。

金陵楚軍水師昭忠祠記

咸豐九年。今侍郎彭公玉麟。建水師昭忠祠於湖口。既刻石敘述戰事。又屬余爲之記。維時湖口以下。長江千里。皆賊地也。其明年。金陵官軍潰敗。蘇浙淪陷。國藩奉命總制兩江。乃議設淮揚水師一軍。以黃君翼升統之。又二年。議設太湖水師一軍。以李君朝斌統之。厥後兩君者。皆沿江遵海。以達於蘇松常州諸內河。而上游吳楚之交。惟彭公與總督楊公岳斌之

師羅列如故。咸豐十一年。克復安慶。同治元年。下蕪湖。金柱關。及東西梁山。二年。克九洲。三年。遂克金陵。而蘇州省會。及所屬郡縣。以次廓清。水師皆有力焉。余憫死事者之多。於是又奏建昭忠祠於金陵。以妥將士之靈。蓋自湖口而下。賊中無復大隊。礮船與我角逐水上。然我衆臨敵授命者。往往不絕。若乃高城巨壘。千礮狙伏。陸軍進攻。水師和之。一堞未攀。駢尸山積。或連朝環擊。卒不能下。或創殘滿目。僅收一柵。甚者如九洲之役。攻勦三四日。凋耗二千人。唱凱於公庭。飲泣於私舍。又或支河小港。掘守要隘。賊以短兵鎗彈。迫我舟師。前者屢僵。後者堅拒。終不得少移尺寸。又或倉卒赴援。內洋行師。如福山之役。輕舟顛簸於海濤颶風之中。須臾沈溺以數百計。此皆耳目昭著。其餘邂逅捐軀。夷傷而不振者。不可勝數也。今東南大定。已逾五年。長江別立經制。水師將士。新故更代。優游無事。欲問數年前戰爭之迹。已罕能言其狀者。况更溯十載以前。若楊公之縱橫江上。出入鋒鏑。以摧方張之寇。彭公之芒屨徒步。以赴江西之急。又孰能道其彷彿。安樂之時。不復好聞危苦之言。人情大抵然與。君子之存心也。不敢造次。忘艱苦之境。尤不取狃於所習。自謂無虞。禮俗政教。邦有常典。前賢猶因時適變。不相沿襲。况乎用兵之道。隨地形賊勢而變焉者也。豈有可泥之法。不敝之制。今之水師。蓋因粵賊之勢。立一時之法。幸底於

成耳。異日時易勢殊。寇亂或興。若必狃於前事。謂可平粵賊者。即可概平天下無窮之變。此非智者所取任也。惟夫忠臣謀國。百折不回。勇士赴敵。視死如歸。斯則常勝之理。萬古不變耳。其他器械財用。選卒校技。凡可得而變革者。正賴後賢。相時制宜。因應無方。彌縫前世之失。俾日新而月盛。又烏取夫顛己守常。姝姝焉自悅其故迹。終古而不化哉。今朝廷開方略之館。戰功將著於信史。不復備述。麤述殉難者之慘。使來者恍然起敬。又因推論兵家之變化無常。用破吾黨自是之見。庶久而知所做畏云。

湘鄉昭忠祠記

咸豐二年十月。粵賊圍攻湖南省城。既解嚴。巡撫張公亮基。檄調湘鄉團丁千人。至長沙備防守。羅忠節公澤南。王壯武公鑫等。以諸生率千人者。以往。維時國藩。方以母憂歸里。奉命治團練於長沙。因奏言團練保衛鄉里。法當由本團釀金養之。不食於官。緩急終不可恃。不若募團丁爲官勇。糧餉取諸公家。請就現調之千人。略仿戚元敬氏成法。束伍練技。以備不時之衛。由是吾邑團卒。號曰湘勇。二年春。平土寇於衡山。破逆黨於桂東。其夏。粵賊圍江西省城。國藩募湘勇二千。楚勇千人。羅忠節公輩。率之東援。初戰失利。營官謝邦翰。易良幹等殉難。湘勇之越境剿賊。將領之力戰捐軀。實始於此。余聞而悼之。議立忠義祠於縣城。祀湘人與於南昌之難。

者。其冬。余奉命籌備舟師。乃募湘勇水陸萬人。明年。率之東討。岳州之役。陸兵敗挫。雖旋有湘潭之捷。而湘士中燬。既而整軍再出。羅公暨李忠武公續賓。率湘勇以從。於是大雋於岳州。克武漢。下蘄黃。破田家鎮。復江西弋陽。信州。甯州。又以其閒。由江還鄂。掃蕩枝縣。再克武昌省會。咸豐五六年閒。羅李湘勇之名震天下。而王壯武公與劉武烈公騰嶺。蕭壯果公啓江。暨巡撫蔣公益澧。皆提湘勇征戰湖北。江西。廣西。廣東等省。所在有聲。然羅公。王公。劉公。遂以六七年閒。先後徂謝。而將士傷亡者滋益多。前所議建之忠義祠。規制隘庫。不足以嚴典祀。咸豐八年秋。國藩乃與李公具疏會奏。請立昭忠祠於湘鄉。令有司春秋致祭。天子許之。吾邑軍士。沒有餘榮已。未幾而舒城三河之難作。李公殉節。部下死者殆六千人。國藩私憂。以謂湘中士氣。恐不復振。其後李公之弟勇毅公續宜。重輯部曲。轉戰皖北。張忠毅公運蘭。及唐總戎義訓輩之師。轉戰皖南。而吾弟國荃。遂以湘士克復安慶金陵兩省。蔣公暨楊公昌濬。亦用湘人平浙江。伐福建。張忠毅公。亦戰沒於閩。東南數省。莫不有湘軍之旌旗。中外皆歎異焉。其西北諸道。則提督劉君松山。追逐捻匪於河南。山東。直隸。征叛回於陝西。甘肅。而按察使陳君湜。防守山西。其西南諸道。則蕭壯果公率師入蜀。而巡撫劉公蓉。屢平蜀寇。總督劉公嶽昭。暨諸湘軍。又自蜀而南入黔。西入滇。

一縣之人。征伐徧於十八行省。近古未嘗有也。當其負羽遠征。乖離骨肉。或苦戰而授命。或邂逅而戕生。殘骸暴於荒原。凶問遲而不審。老母寡婦。望祭宵哭。可謂極人世之至悲。然而前者覆亡。後者繼往。蹈百死而不辭。困隕無所遇而不悔者。何哉。豈皆迫於生事。逐風塵而不返與。亦由前此死義數君子者爲之倡。忠誠所感。氣機鼓動而不能自己也。君子之道。莫大乎以忠誠爲天下倡。世之亂也。上下縱於亡等之欲。姦僞相吞。變詐相角。自圖其安而予人以至危。畏難避害。會不肯捐絲粟之力以拯天下。得忠誠者起而矯之。克己而愛人。去僞而崇拙。躬履諸艱而不責人以同患。浩然捐生。如遠游之還鄉而無所顧悖。由是衆人效其所爲。亦皆以苟活爲羞。以避事爲恥。嗚呼。吾鄉數君子。所以鼓舞羣倫。歷九州而戡大亂。非拙且誠者之效與。亦豈始事時所及料哉。今海宇羸安。昭忠祠落成有年。而邑中壯士。效命疆場者。尙不乏人。能常葆此拙且誠者。出而濟世。入而表里羣材之興也。不可量矣。又豈僅以武節彪炳寰區也乎。

江甯府學記

同治四年。今相國合肥李公鴻章。改建江甯府學。作孔子廟於冶城山。正殿門廡。規制麤備。六年。國藩重至金陵。明年。荷澤馬公新貽。繼督兩江。廣續成之。鑿泮池。建崇聖祠。尊經閣。及學官之廡宇。八年七月工竣。董其役。

者。爲候補道桂嵩慶。暨知縣廖綸。參將葉圻。旣敕旣周。初終無懈。冶城山顛。揚吳宋元。皆爲道觀。明日朝天宮。蓋道士祀老子之所也。道家者流。其初但尙清靜無爲。其後乃稱上通天帝。自漢初不能革秦時諸時。而渭陽五帝之廟。甘泉泰一之壇。帝皆親往郊見。由是聖王祀天之大典。不掌於天子之祠官。而方士奪而領之。道家稱天。侵亂禮經。實始於此。其他鍊丹燒汞。采藥飛昇。符籙禁呪。徵召百神。捕使鬼物諸異術。大率依託天帝。故其徒所居之宮。名曰朝天。亦猶稱上清紫極之類也。嘉慶道光中。宮觀猶盛。黃冠數百人。連房櫛比。鼓舞毗庶。咸豐三年。粵賊洪秀全等盜據金陵。竊泰西諸國緒餘。燔燒諸廟。羣祀在典與不在典。一切毀棄。獨有事於其所謂天者。每食必祝。道士及浮屠弟子。并見摧滅。金陵文物之邦。淪爲豺豕窟宅。三綱九法。掃地盡矣。原夫方士稱天以侵禮官。乃老子所不及料。迨粵賊稱天以恫羣神而毒四海。則又道士輩所不及料也。聖皇震怒。分遣將帥。誅殛凶渠。削平諸路。而金陵亦以時戡定。乃得就道家舊區。廓起宏規。崇祀至聖。暨先賢先儒。將欲黜邪慝而反經。果操何道哉。夫亦曰隆禮而已矣。先王之制禮也。人人納於軌範之中。自其弱齒。已立制防。灑掃沃盥有常儀。羹食肴馔有定位。綏縷紳佩有恆度。旣長則教之冠禮。以責成人之道。教之昏禮。以明厚別之義。教之喪祭。以篤終而報本。其出而應

世。則有士相見以講讓。朝覲以勸忠。其在職。則有三物以興賢。入政以防淫。其深遠者。則教之樂舞。以養和順之氣。備文武之容。教之大學。以達於本末終始之序。治國平天下之術。教之中庸。以盡性而達天。故其材之成。則足以輔世長民。其次亦循循繩矩。三代之士。無或敢遁於奇袤者。人無不出於學。學無不衷於禮也。老子之初。固亦精於禮經。孔子告曾子。子夏。述老聃言禮之說至矣。其後惡末世之苛細。逐華而悖本。斲自然之和。於是矯枉過正。至譏禮者。忠信之薄。而亂之首。蓋亦有所激而云然耳。聖人非不知浮文末節。無當於精義。特以禮之本於太一。起於微眇者。不能盡人而語之。則莫若就民生日用之常。事爲之制。修焉而爲教。習焉而成俗。俗之既成。則聖人雖沒。而魯中諸儒。猶肄鄉飲大射禮於冢旁。至數百年不絕。又烏有窈冥誕妄之說。淆亂民聽者乎。吾觀江甯士大夫。材智雖有短長。而皆不屑詭隨以徇物。其於清靜無爲之旨。帝天禱祀之事。固已峻拒而不惑。孟子言無禮無學。賊民斯興。今兵革已息。學校新立。更相與講明此義。上以佐聖朝匡直之教。下以闢異端而迪吉士。蓋廩廩乎企嚮聖賢之域。豈僅人文彬蔚。鳴盛東南已哉。

補侍講缺呈請謝恩狀

癸卯八月初四日

新補翰林院侍講充四川正考官會國藩爲呈請代表恭謝天恩事。八月

初三日。接到知會。轉准吏部咨。稱七月十五日。奉旨。會國藩准其補授翰林院侍講。欽此。竊國藩楚省菲材。山鄉下土。西清待漏。慙四術之多疏。東觀校書。尤三長之有忝。本年三月初十日。廷試翰詹。猥以蕪詞。下邀藻鑑。列置優等。授翰林院侍講。沐殊寵之逾恆。俾遷階以不次。旋於六月二十二日。奉命充四川鄉試正考官。溫綸再捧。寸衷之惶悚彌深。使節初持。萬里而馳驅未已。迺復荷高深之寵。俾真居侍從之班。愧屢沐夫鴻施。會無墜露輕塵之報。惟勉勤乎蛾術。益凜臨深履薄之思。所有國藩感激下忱。理合呈請代奏。叩謝天恩。謹呈。

討粵匪檄

爲傳檄事。逆賊洪秀全。楊秀清。稱亂以來。於今五年矣。荼毒生靈數百餘萬。蹂躪州縣五千餘里。所過之境。船隻無論大小。人民無論貧富。一概搶掠罄盡。寸草不留。其擄入賊中者。剝取衣服。搜括銀錢。銀滿五兩而不獻賊者。卽行斬首。男子日給米一合。驅之臨陣向前。驅之築城濬壕。婦人日給米一合。驅之登陣守夜。驅之運米挑煤。婦女而不肯解腳者。則立斬其足。以示衆婦。船戶而陰謀逃歸者。則倒抬其屍。以示衆船。粵匪自處於安富尊榮。而視我兩湖三江被脅之人。會犬豕牛馬之不若。此其殘忍慘酷。凡有血氣者。未有聞之而不痛憾者也。自唐虞三代以來。歷世聖人。扶持

名教。敦敘人倫。君臣父子。上下尊卑。秩然如冠履之不可倒置。粵匪竊外夷之緒。崇天主之教。自其僞君僞相。下逮兵卒賤役。皆以兄弟稱之。謂惟天可稱父。此外凡民之父。皆兄弟也。凡民之母。皆姊妹也。農不能自耕以納賦。而謂田皆天王之田。商不能自賈以取息。而謂貨皆天王之貨。士不能誦孔子之經。而別有所謂耶穌之說。新約之書。舉中國數千年禮義人倫。詩書典則。一旦掃地蕩盡。此豈獨我大清之變。乃開闢以來。名教之奇變。我孔子孟子之所痛哭於九原。凡讀書識字者。又烏可袖手安坐。不思一爲之所也。自古生有功德。沒則爲神。王道治明。神道治幽。雖亂臣賊子。窮凶極醜。亦往往敬畏神祇。李自成至曲阜。不犯聖廟。張獻忠至梓潼。亦祭文昌。粵匪焚郴州之學宮。毀宣聖之木主。十哲兩廡。狼藉滿地。嗣是所過。郡縣先燬廟宇。卽忠臣義士。如關帝岳王之凜凜。亦皆汚其宮室。殘其身首。以至佛寺道院。城隍社壇。無廟不焚。無像不滅。斯又鬼神所共憤怒。欲一雪此憾於冥冥之中者也。本部堂奉天子命。統師二萬。水陸竝進。誓將臥薪嘗膽。殄此凶逆。救我被擄之船隻。拔出被脅之民人。不特紓君父宵旰之勤勞。而且慰孔孟人倫之隱痛。不特爲百萬生靈報枉殺之仇。而且爲上下神祇雪被辱之憾。是用傳檄遠近。咸使聞知。倘有血性男子。號召義旅。助我征勦者。本部堂引爲心腹。酌給口糧。倘有抱道君子。痛天主

教之橫行中原。赫然奮怒。以衛吾道者。本部堂禮之幕府。待以賓師。倘有仗義仁人。捐銀助餉者。千金以內。給予實收部照。千金以上。專摺奏請優敘。倘有久陷賊中。自拔來歸。殺其頭目。以城來降者。本部堂收之帳下。奏授官爵。倘有被脅經年。髮長數寸。臨陣棄械。徒手歸誠者。一概免死。資遣回籍。在昔漢唐元明之末。羣盜如手。皆由主昏政亂。莫能削平。今天子憂勤惕厲。敬天恤民。田不加賦。戶不抽丁。以列聖深厚之仁。討暴虐無賴之賊。無論遲速。終歸滅亡。不待智者而明矣。若爾被脅之人。甘心從逆。抗拒天誅。大兵一壓。玉石俱焚。亦不能更爲分別也。本部堂德薄能鮮。獨仗忠信二字。爲行軍之本。上有日月。下有鬼神。明有浩浩長江之水。幽有前此殉難各忠臣烈士之魂。實鑒吾心。咸聽吾言。檄到如律令。無忽。

祭韓公祠文

維年月日。具官某。謹以清酒庶羞。致祭於先儒昌黎韓子之神。維先生之明德。宜祀百世。文人學子。皆所喻願。而禮典所載。獨配享先師孔子西廡。他無特祀。國藩前官翰林院詹事府。皆有先生祠堂。今承乏禮部。亦祀先生於官署之西北隅。而皆稱曰土地祀。國藩履任之日。敬謹展謁。乃神像之旁。有先師孔子之木主。儼然在焉。竊以土地之稱。非經非訓。古者惟天子得祭天地。諸侯則社以祭。士大夫以下。成羣立社。多者二千五百家。或

百家以上。小者二十五家。蓋土爰稼穡。民生所賴。凡食毛踐土者。皆得祭以報功。義固然也。自唐以下。有城隍之祀。世傳張說所爲祭文。及李陽冰碑記。舊已。今天下由京都以至行省郡縣。皆立廟以妥城隍。原易有城復于隍之占。禮有八蜡水庸之祭。高壘深池以捍民患。推社之義而爲之立祀。理亦宜之。獨土地之祀。不可究其從始。國藩所居之鄉。或家立一神。或村置一廟。大抵與古之里社相類。而京師官署。尤多有土地祠。往往取先代有名德者祀之。先生之生。未嘗莅官禮部。今歿已千年。所謂神在天上。如水之在地中。無所不際。而謂僅妥侑於一署之內。文室之中。如古所稱社公云者。亦以黷慢甚矣。若先師孔子。則先生所誦法終身者也。先生嘗羨顏氏得聖人以爲依歸。若深自歎恨。不得與於弟子之列。而無知者。乃位孔子於尊容之旁。先生若果陟降在茲。其必蹙然不安也。國藩瞻禮之餘。詢諸胥吏。舉不辨其由來。舊例。春秋以蕭薌奉祀先生。國藩亦且循沿習之常。以致吾欽嚮之私。惟於孔子之位。措置失宜。則不敢須臾蹈故。懼干大戾。謹奉木主。爇香焚之。旣敬告所以。因爲之詩歌。使工歌以人聲。冀先生之神。安休於此。不腆之誠。庶爲歆鑒。詩曰。

皇頤造文。萬物咸秩。尼山纂經。縣於星日。衰周道溺。踵以秦灰。繼世文士。莫究根芽。炎劉之興。炳有揚馬。沿魏及隋。無與紹者。天不喪文。蔚起巨唐。

誕降先生。掩薄三光。非經不效。非孔不研。一字之愜。通於皇天。上起八代。下垂千紀。民到於今。恭循成軌。予未小子。少知服膺。明誦遺集。尊靈式憑。濫廁秩宗。載瞻祠宇。師保如臨。進退維僣。位之不當。宣聖在旁。大祀躋僖。前哲所匡。我來戾止。神其安恬。敬奠椒漿。式告來葉。

祭湯海秋文

赫赫湯君。倏焉已陳。一呷之藥。拯我天民。豈不有命。藥則何辜。死而死耳。知君不悔。道光初載。君貢京朝。狂名一鼓。萬口囂囂。春官名揭。如纛斯標。奇文驟布。句鷲字臯。羣兒苦誦。自暝達朝。上公好士。維汪與曹。大風噓口。吹女羽毛。舐筆樞府。有銛如刀。儕輩力逐。一虎衆猱。曹司一終。稍遷御史。一鳴驚天。墮落泥滓。坎坎郎官。復歸其始。羣雀款門。昨鼃之市。窮鬼噴沫。婢歎奴恥。維君不羞。復乃不求。天脫桎梏。放此詩囚。伐肝蕩肺。與命爲仇。被髮四顧。有棘在喉。匪屈匪阮。疇可與投。忽焉狂走。東下江南。秦淮夜醉。笙吹喃喃。是時淮海。戰鼓殷酣。洮夷所躡。肉阜血潭。出入賊中。百憂內慘。寅歲還朝。左抱嬌娥。示我百篇。兒女兵戈。三更大叫。君泗余哦。忽瞠兩眸。曰余乃頗。瀝膽相要。斧門掙鎖。嗟余不媚。動與時左。非君謬尋。誰云逮我。王城海大。塵霧滔滔。惟余諧子。有隙輒遭。聯車酒肆。袒肩載號。煮魚大嘍。宇內兩鬢。授我浮邱。九十其訓。韓悍莊誇。孫卿之醞。慶義鬪文。百合逾奮。

俯視符充。其言猶糞。我時譏評。君曾不愠。我行西川。來歸君廷。一語不能。君乃狂罵。我實無辜。詎敢相下。骨肉寇讐。朋遊所訝。見豕負塗。或張之弧。羣疑之積。衆瘖生膚。君不能釋。我不肯輸。一日參商。萬古長訣。吾實負心。其又何說。凡今之人。善調其舌。君則不然。喙剛如鐵。鋒棱所值。人誰女容。直者棄好。巧者興戎。昔余痛諫。君嘉我忠。曾是不察。而丁我躬。傷心往事。淚墮如糜。以君毅魄。豈曰無知。鬼神森列。吾言敢欺。酌子一滴。庶攄我悲。

歲暮設奠告王考文

嗚呼。維我王考。神馭祖賓。赴音來止。今越五旬。嗟我王考。令德淵爍。體秉純剛。內含貞淑。往在戌歲。小子南旋。扶依驪戲。左右孟盤。亥年歸朝。載違色笑。行履過差。辟咩無詔。十年京國。官繫私牽。轉蓬浮徙。莫傍本根。吾皇錫類。褒封父祖。志養則虧。虛榮奚補。三載寢疾。侍藥不躬。遂淪慈照。允蹈鞠凶。我父我母。潛焉在疚。小子雖頑。不懲罪悔。疇昔提耳。彝訓猶存。十墮一守。痛思難論。歲將更始。時物遷變。敬薦庶羞。祇希僂見。尙饗。

正月八日王考生辰告文

嗚呼。王考棄養。三月有奇。音容緬邈。豈復可追。疇昔笑聲。千山震裂。今則無聞。厚地藏熱。游子遠宦。萬里關山。葬不執紼。斂不憑棺。期服去位。古有行者。竊祿不歸。拘牽苟且。上春初吉。敬遇誕辰。敢蠲嘉旨。用薦苾芬。爰循

國典。遂釋齊衰。在天靈爽。儻獲惠來。尙饗。

丁卯四月求降雨澤告辭

自客歲之仲秋。歷冬春而孟夏。閱八月而不雨。嗟羣生之凋謝。哀江南之
黎庶。困兵燹以十霜。邑何民而不孳。野何土而不荒。慶中興於甲子。甫得
脫乎兵戎。悉做賦而北伐。又杼柚之屢空。逮丙寅之夏末。高郵罹乎災凶。
運隄愴其潰決。沒六縣於波中。漲泗沂與淮湖。縮千里爲澤國。飽人肉於
蛟魚。烏鳶下而爭食。嗟赤子其何辜。實百官之不職。會水患之未平。又旱
災之相偪。麥有秋而失望。稻有種而不入。千村聚而皇皇。老幼環而悲泣。
痛蚩蚩者無罪。罪乃在於疆臣。究無德而竊位。上千怒乎百神。或屋漏之
隱慝。或秕政之不仁。將舉錯之失當。抑冤獄之未申。宜躬被乎酷罰。胡移
禍於吾民。爰致齋而惕厲。叩蒼昊而陳詞。審余身之有咎。甘百死而不辭。
爲斯民而請命。冀歲事之無虧。沛甘霖而溥降。膏百穀以蕃滋。萬彙蔚而
回春。農民忻而相告。今不慮乎旱饑。後無傷乎秋澇。感神惠之孔時。終傾
誠而圖報。

廣東嘉應州知州劉君事狀

會祖永昌。皇贈武功將軍。祖開泰。康熙甲午科舉人。皇贈武功將軍。父文
燦。雍正甲辰科武進士。山東兗沂鎮總兵。君諱廷柎。字讓木。河間獻縣人。

縣學廩生。乾隆四十五年舉於鄉。五十二年丁未。成進士。時大學士和珅當國。有中貴人與君同里同姓來告曰。相國知子。欲一燕見。能往。吾導子。詞曹可致也。君謝不能。卒以知縣歸班候選。嘉慶二年。謁選。得廣東信宜縣。明年之官。五年。攝惠州河源縣事。河源藍阿和。博羅陳爛展四。永安會鬼六。聚徒煽亂。君至縣三月。卽擒阿和。且請於惠州知府伊秉綬。及總督吉慶曰。陳會不靖。時日久矣。今阿和就擒。翦其左翼。賊所負恃。以羅浮山爲窟耳。若裹糧入山。窮力四捕。陳會可弋也。不聽。後二年。遂有陳爛展四。會鬼六之亂。總督欽飭死。知府擬遣戍。而君以前請。得不坐。六年。量移潮州揭陽縣。揭亦劇邑也。莠民何阿常。李阿七。倡爲天地會。聯八十餘鄉。分爲兩股。各二萬人。君單騎赴賊中。以編查保甲爲名。暗圖其山川形勢。出入門戶。夜宿賊巢。示以不疑。八年正月二日。率兵討阿常。賊徒七千人。屯於赤巖頭。我兵裁五百。去賊五里而營。夜聞吹螺四面。衆譁曰。賊至矣。君令曰。敢動者死。於奔中設子母礮。佐以鳥鎗。近則發擊之。驛人與火。闐無聲影。賊不知虛實。竟引去。旦日。率所部登山。適會他軍亦至。乘勝追奔。焚賊三巢。阿常投首。阿七聞之。益糾餘孽。謀再舉。君從健卒六十餘人。四晝夜。馳行九百里。追及長樂。擒之。其年八月。又擒海盜姚阿麻。於是。有送部引見之命矣。大抵嶺以南。物產蕃阜。風氣殊於中土。諸洋互市。瓌貨日至。

奸民逐利。起徒手至百萬者。往往而有。奇技妖物。旁出不窮。乾嘉之間。淫侈亡等矣。猶有不逞之徒。乃爲盜賊以自恣。小者劫奪。大者叛亂。窮則入海亡命。爲吏者莫敢誰何。苟以諱飾偷安。羣盜無憚。日以充斥。故君官廣東。所至以緝捕爲先。而大吏亦倚君如左右手。引見之命既下。大吏以捕務孔棘。留不得行。又二歲。勦獲潮陽鄭阿明。陸豐李崇玉。乃行。阿明會匪衆號四萬人。崇玉海盜。號二萬也。入見。以功升知州。歸。復任揭陽。十四年。徙知南海縣。是時兩廣總督百公齡。治尙威猛。懲刈奸宄。夜半。召君入密室。告曰。吾欲有所縛。子能之乎。君曰。何也。百公曰。洋商吳阿三。阿三者。大猾。資積巨萬。多干國紀。君歸。寅夜部勒胥役。不告所之。曰。從余行。余曰。取之。曰。斬。斬之。至。破門擒阿三。比還署。關說者數輩。賂金三萬。至雞鳴。增五萬。平明十萬。不可卒致。阿三於法。張保之寇海也。自嘉慶初年始也。後與其黨郭學顯內噬。學顯來降。保亦思歸義。首鼠進退。百公欲遣使納降。君請行。百公曰。多與爾衛。辭曰。彼真降。使者無害。其僞也。雖衛何益。從二僕。棹小舟。徑至海口。賊數百艘。交刃成列。保出。衆叱曰。跪吾王。曰。吾天子命吏。豈屈若曹。且編民之不得。何王也。卽晚保曰。吾以女爲海上豪傑。乃效匹夫。怒目恐人。劉某畏死者。不來此矣。保立起揖君。卽屏左右。因語之曰。十年來粵中巨寇。若藍阿和。何阿常。鄭阿明之屬。海盜若姚阿麻。李崇

王。今有存焉者乎。保默然曰。亡有。然今日奈何。崇玉以殺掠平民之故。尙伏天誅。况保縱橫海上十餘年。殺二總兵。一參將。三游擊。罪在不宥。今棄衆內首。則魚肉耳。曰。汝何慮之淺也。朝廷弁包海外。荒蕪萌生。削逆育順。以勸來者。猶懼不繼。若革面自效。不訾之慶也。學顯貸死。有明徵矣。且智莫大於知幾。行莫虧於食言。禍莫酷於殺已降。女視劉某。豈誘人傲功者哉。吉之與凶。在此須臾。保再拜曰。謹受教。乃泣送君歸。七日而張保降。十九年。補嘉應州知州。噓枯養瘠。相孺以澤。二十四年。攝廉州知府。簡法阜施。一如嘉應。君子於。是知君之爲政。又能視地強弱。以時其威愛也。嘉慶二十五年。年六十八以卒。子六人。曰鳳翹。曰一士。曰鳳翼。曰書年。今官翰林院編修。曰逢年。曰其年。今官翰林院庶吉士。謹具歷官行義。牒付史館。俾傳循吏者采覽焉。

書何母陳恭人事

恭人陳氏。道州何文安公之第三子婦。吾友子敬同年紹祺之配也。文安公家訓謹嚴。內外執業。各有常程。箕帚槃盂。皆有定位。閨門之內。肅若朝廷。廖夫人刻勵儉勤。終身不御紈綺。恆豆之奉。蠶薄等於寒門。凡醢醢菹脯酒餌漿醢之屬。皆率婦輩躬自治之。手營而口授。不徵諸市。不假諸僕婦。然諸婦或出外州華族。往往不中程度。獨陳恭人道州舊姻。椎髻布裙。

爲之益勤。其德益善。舅姑亦益愉懌。以謂巨室而不失儒士之風。卽家之
祥也。道光二十三年。子敬以舉人就職知縣。援例選雲南廣通縣。旋改江
蘇同知。又以知府調歸浙江。補台州府。保升道員。署糧儲道。咸豐十年二
月。粵賊入浙圍杭州。子敬時方奉使至江蘇。眷屬寓清泰門。先是。恭人生
子輒不育。有女子子三人。子敬旣以仲兄子慶治爲嗣。諸妾又生子慶銜。
慶熙。慶全。城破。恭人乃屬家人而詔之曰。主人遠出。吾遭此變。何氏名門。
男女長幼。義不可爲賊辱。遂先縛二子沈於池。外孫女二歲。掘坑槩之。旋
引一繩。與外姻朱孺人。同時自經。無幾何。援兵四至。賊衆驚遁。老僕柳春
自外歸。見慶治腦後。被斫六創。其妻邢氏。被割兩耳。而皆未死。諸妾避入
民舍得免。所沈二子慶銜。慶熙者。池中水淺。亦俱無恙。兩自經者。朱孺人
氣絕。而恭人解救得生。蓋縊二時許而不殊。自言有兩紅燈前導。忽見天
日而醒。略無所苦。由是遠近歎異。或曰。恭人半生長齋誦經禮佛。茲其效
也。或曰。孝友之門。禍將攬而常解。堅確之德。造物不懼。莊生所謂骨節與
人同。而犯害與人異。其神全也。杭州寇退。子敬返自江蘇。外而征繕以佐
軍府。內而補苴以甯穉弱。日而劬宵而不休。夏而疾。秋而不瘳。於是引病
投劾。挈家還湘。卜居於長沙之東鄉。藝稻而豢魚。善鄰而訓子。恭人亦菲
食敝衣。相與拮据以保遲暮。子敬旣逝。恭人則兼綜內外賓祭之供。耕讀

之業。囊篋錙銖之故。造次紛乘而不眩。齒逾七十而不知疲。鄉之人以是服其恪也。同治十年九月。無疾而終。去杭州城陷之時。十有二年矣。軍興以來。橫死者多矣。臨難而倖脫者。亦恆有之。獨何氏一門。慷慨就義。而俱獲生全。陳恭人事尤近於神異。恭人之夫之兄子貞先生。告余以狀。因爲述其梗概。其他懿行。不備論云。

漢陽劉君家傳

余旣銘劉君椒雲之墓。其兄子世墀。復寓書抵余。季父之行義。蒙甄敘大凡。其爲學之次第。不幸遺書未成。世墀之愚。不可驟曉。其孤世圭尤幼。卽他日長大。終無以窺尋先人甘苦。季父執友。莫篤先生。先生若哀吾昆弟。卽別爲家傳。鑄諸家牒。所以不死季父而貺我劉宗。益厚無已。蓋椒雲之學之自得於中者。有不可褻諸文字者矣。其致功之迹。國藩實親見之。而親討之。稱述以詔其諸子。吾之職也。始椒雲嘗治方輿家言。以尺紙圖一行省所隸之地。墨圍界畫。僅若牛毛。縣以圓圍。府以叉牙。交錯成圍。不爲細字識別。晨起指誦曰。此某縣也。於漢爲某縣。此某府某州也。於漢爲某郡國。凡三四日而熟一紙。易他行省亦如之。其於字書音韻。及古文家之說。亦皆刺得大指。其後益及天官推算。日夜欲求明徹。銳甚。適會喪父。勞憂致疾。乃稍稍自惜。慨然有反本務要之思矣。竊嘗究觀夫聖人之道。如

此其大也。而歷世令辟。與知言之君子。心奉程朱氏爲歸。豈私好相承以然哉。彼其躬行良不可及。而其釋經之書。合乎天下之公。而近於仲尼之本旨者。亦且獨多。誠不能違人心之同然。遽易一說以排之也。自乾隆中葉以來。世有所謂漢學云者。起自一二博聞之士。稽核名物。頗拾先賢之遺而補其闕。久之。風氣日做。學者漸以非毀宋儒爲能。至取孔孟書中心性仁義之字。一切變更舊訓。以與朱子相攻難。附和者既不一察。而矯之者惡其恣睢。因並蔑其稽核之長。而授人以詬病之柄。皆有識者所深憫也。椒雲初從事於考據。卽已洞知二者之弊。旣更憂患之餘。尤自斂抑。退然若無以辨於學術也者。默識而已矣。於是以道光二十八年二月。棄其所官之國子監學正。決然歸去。以從政於門內。積其謹以嚴父母之事。以達於凡事。無所不嚴。積其誠以推及父母之所愛。若所不愛。無不感悅。其又不合。則考之禮經。覈之當世之會典。以權度乎吾心自然之則。必三善焉而後已。病中爲日記一編。記日日之細故。自責絕痛。將卒。又爲遺令。處分無憾。蓋用漢學家之能綜核於倫常日用之地。以求一得當於朱子。後之覽者。可以謂之篤志之君子邪。抑猶未邪。國藩爲發其擇術之意。旣告其諸子。亦與異世承學者質證焉。

葛寅軒先生家傳

先生諱大賓。字興森。號寅軒。葛姓。先世自蘇州徙居湖南。遂爲湘鄉人。曾祖世珍。祖生霞。父長添。世有隱德。先生幼而端重。動止異於常兒。長而益自檢制。終日危坐。言笑不妄。盛暑不袒。焚香把卷。默識恬吟。性耐劇飲。雖醉不亂。或久無酒。終亦不索。怡然若有以自得也。乾隆之末。海內文人。以靡麗辯博相高。昆明錢南園侍御。澧。獨以剛方立朝。視學湖南。以正誼篤行風楚之人。所取率多端士。先生既受知於錢公。補縣學生員。益折節自繩。跬步必衷於古訓。學徒游其門。則先教之以忠孝大節。下至飲食起居。出處語默。取與豪釐。各有法式。從則貞吉。違則恥辱。至不得齒於人。聽者往往汗下。常稱錢公及其師湘潭朱聲越之學行。以勉其門人弟子。弟子高第者。我先大夫竹亭公。及陳君道著。籍最早。晚歲又得黃君星平。鄒君魯道。皆登甲科。知名於時。各秉師說。以教授鄉里。傳燼賡續。篤守矩矱。吾鄉風氣淳古。士人循循。不敢僭越禮法。以自放其亡等之欲。論者以爲淵源一本於先生。彼南面民上司政教之柄。其流風餘韻。得比於一諸生。被人之深且久。如此者。曾幾人哉。先生四歲喪父。哀毀若成人。年十三。值父忌日。出主以祭主。動仆地。粉面剝落。脫去葛字。微露周字。蓋木工飾周姓。廢主爲之者也。先生痛哭引咎。告墓易主。卜日乃祭。事寡母左孺人也。鉅細必躬。疾必嘗藥。生徒有餽。必歸以獻。嘗隆冬獨坐。心動。急自館所馳歸。

入門。數呼母。母方與仲兄負暄後院。聞聲趨出。而屋後山忽頽。壓坐席破碎。里之人。以謂先生誠孝之所感也。母沒。勺飲不入口者五日。既葬。衰服終其身。腰以下。無復存寸縷。服闋。每祭必泣。盡哀以爲常。兄弟五人。既分居矣。逋負纍纍。無以自存。先生則請於母。復同居如初。卽有所入。絲髮不以自私。兄弟沒。則庀其喪。無子。爲之立後。羣從諸婦。各受職業。室以大和。道光二年。朝廷開孝廉方正之科。有司舉先生應詔。或勸之一詣京師謁選。先生曰。是可以躁求耶。十二年壬辰十月二十九日。卒於家。春秋七十有一。配左氏。前卒。時先生年才三十有奇。終身不更娶。子二。長榮蔭。早沒。次榮館。孫三。封泰。先晉。封梁。孫女二人。其一歸吾弟國華。會孫鎮堡。鎮嶽。先晉縣學生員。後其世父榮蔭。先生命也。篤慎而好學。積善之報。殆將於是在。

前史官會國藩曰。人之品類。至不齊也。唐代設科取士。名目繁多。宋司馬光請開十科以求賢。其目至爲賅簡。今世官人。專出於進士之一途。蓋有科而無目矣。會典所著。特科有三。曰博學鴻詞。曰經學。曰孝廉方正。鴻博科再開。經學科一開。當時皆稱得人。孝廉方正之科。詔開六七次。而由之以踐歷顯仕者特少。或舉天下而無一人。赴部應試者。則何也。豈朝廷所以旌別此科。其法有未善與。抑有司者漫不矜慎。舉非其人與。以相鄉言。

之道光初元舉先生。咸豐初元舉羅君澤南。未可謂都非其人也。夫誠得其人。在上者固當思所以致之耳。彼膺斯舉者。豈汲汲哉。

歐陽氏姑婦節孝家傳

節母蔡氏。生三歲而室於歐陽。事玉光府君。家微也。姑劉孺人。端嚴匡敕。無所假借。節一朝之食。分之二日。併三人之事。責之一手。舉家事精麤劇易。壹委節母。不以何問他人。節母則先雞鳴而興。豫其未至。後斗轉而息。補其闕遺。箕拘無塵。井汲無濡。半米寸薪。必珍必戒。諸娣姒次第入門。節母躬其難者。讓其易者。自親舍及衆私室。衣垢則澣之。綻裂則補綴。初不問其所自來。羣從子女。寒則衣之。飢則慈以甘飧。就漏浴爲之潔除。羣從或忘其母而母節母。節母亦忘其非己出也。乾隆三十年乙酉。舅席珍府君卒。明年玉光以毀死。劉孺人大戚。節母於時年二十有八。長子惟本甫三歲。少者成材未期耳。入則泣血柴立。茹蘖自盟。出則抱子奉姑。怡聲麀。麀益屏去華飾。先姑意之未發。而從事。約其口與體。以及其孤子女。無所不約。勤其力以率其妯娌與其子姓。傭奴各有專職。土無寸曠。人無晷暇。俛拾仰取。賓祭有經。豬雞肥碩。蔬果怒生。方節母事姑之初。歲入穀二十石。逮姑之暮年。穀近千。而惟本讀書屬文。試於郡縣有聲矣。年二十七歲而卒。婦蔡氏亦以節著。

節婦蔡氏。少歸歐陽惟本。節母之冢婦也。乾隆四十三年戊戌。歲大饑。節婦將嫁。其父輔世。貧不能具禮。宗族或助之。結褵之資。凡得錢三千有奇。父爲裝遣之。節婦陰返其錢。置稗薦中而繫鑰匙其端。父歸而室無見糧。引鑰則錢在焉。泣曰。孝哉吾女。留此以活我也。惟本沒時。節婦亦二十八歲。由是捐棄萬事。壹從節母。求所以事祖姑。劉孺人之法。黎明。劉孺人與節母執笄侍左。節婦自右約之。及盥。節母奉水。節婦奉漿。及食。婦具饌。母侑之。及寢。三世聯牀。聽於無聲。劉孺人卽怒。節母負牆竦懼。節婦從容改爲。以適厥指。卽疾病。婦煮藥。母嘗而後進。夜則番宿遞侍。衣不解帶。一夕。節母起。墮牀折脇二骨。節婦號泣。就援之。母戒屏息。無令劉孺人得聞知也。劉孺人晚而喪明。手足痿痺。挽篋輿。日遊庭中。節母肩前。節婦肩後。其後劉孺人九十而終。節母且六十矣。二脇骨者。竟無恙。其後二十餘年。盜入室劫母衣。刃傷節婦指及肘。創甚。亦不醫而竟無恙。論者以爲孝徵。神或相之云。道光九年。節母沒。實年九十有六。二十三年。節婦沒。實八十有三。其前五年。歲在己亥。均旌表節孝如例。

前史官曾國藩曰。節婦之孫女子四人。次二者歸於我外舅福田先生。篤行君子也。數爲余誦述兩世事狀。余昔官禮部。見各行省題旌婦女。凡烈婦殉夫者。別具一疏。高宗皇帝常下詔非之。不予旌表。以爲行不貴苟難

也。然末俗士論。往往以矯激卓絕之行爲難。觀歐陽姑婦之節。亦似庸行無殊絕者。而純孝兢兢。事姑至六十年五十年之久而不渝。天下之至難孰踰是哉。

湖北按察使趙君神道碑銘

君諱仁基。字厚子。號悔廬。武進趙氏五世祖恭毅公申喬。戶部尙書。清正有大節。爲世名臣。恭毅次子鳳詔。官太原知府者。君高祖也。曾祖諱枚。廩膳生員。舉孝廉方正。祖匯。增監生。考鍾書。舉人。豐縣訓導。兩世皆以君貴。贈朝議大夫。妣楊氏。惲氏。皆贈恭人。君少而端視。矩行。恆言無誑。年十三。居王考之喪。哀禮周至。父老驚歎。毗陵故文獻之邦。名儒相望。君出而從訓導。君於豐縣。趨庭問業。歸而造請。里巷耆宿。若李君兆洛。陸君繼輅。吳君育。周君儀。暉輩。咸從捧手。稽經講藝。穆然如笙磬之克諧。其學旣大進。譽望亦翕翕日隆。以試於有司。則連蹇而不得一當。久之。嘉慶丙子。乃北上。應順天鄉試。未歸而遭母惲恭人之喪。又五年。再試順天。未歸而又遭父訓導君之喪。君性篤孝。兩丁大故。不克親視含殮。平生以爲至痛。又以壯年喪元配高淑人。復喪繼配錢淑人。復喪其長子鑄。客遊湖北。子身浮寄。塊然若委枯枝於大澤。廢興不復厝意。蓋自道光五年舉於鄉。六年以進士官知縣。而君年且近四十。人世紛華之念。洗除盡矣。初仕爲江西宜

春縣。旋補崇仁縣知縣。調安徽涇縣知縣。既又署懷甯縣事。所至判決滯獄。感格凶頑。齋禱於深室。而四境時雨立應。道光十三年。捕獲桃源決河奸民陳端。優詔褒勉。賞戴花翎。以直隸州升用。明年。補滁州知州。召見便殿。宣宗嘉之。歸任滁州六安州。甫歷數月。卽升平陽府知府。在晉數月。又升江西南贛兵備道。君感荷恩知。益思有以自靖。名捕椎埋盜鑄。鹽梟大猾。躬追而擒治之。禁止鴉片。約堅條明。是時天子方申嚴詔。拒絕西洋。而英吉利窺天津。陷定海。割香港。寇廣東省城。君綜理南安糧臺。晨夜憂勞。自傷無裨於時。而海氛日棘。往往被酒泣下。或力疾繞室旁皇。適奉升湖北按察使之時。閱十八日而卒。實道光二十一年六月十九日也。春秋六十有三。君既再失偶。最後娶方淑人。子熙文某官。烈文某官。女三人。適增生李嶽生。候選主事周騰虎。烏程縣知縣陳鍾英。孫六人。咸豐六年十月某甲子。葬於荆溪之東山。所著書有江水論一卷。雜文一卷。歌詩曰幽棲集。登樓集等者。凡七卷。和陶詩一卷。詞一卷。君中懷淡定。中歲頻遭憂戚。泊然不知窮通得喪之於己何與。自詩篇外。若無一足關其慮。自獎誘後進外。若無一堪自愉樂者。論者疑其超曠忘世。及海上事起。乃獨鬱鬱不能終日。豈有大志者。常頽然不易測耶。抑中年悲感。晚節一觸而不自克耶。匪可詳已。銘曰。

達人離垢。遺棄萬事。聖人忘身。不忘拯世。迹若相反。義乃相成。趙公落落。衷道而行。積困始亨。將大厥施。方駕而稅。誰實尸之。有子克家。志亢行俯。天右勞臣。永錫來許。

江忠烈公神道碑銘

公諱忠源。號岷樵。新甯江氏。曾祖登佐。太學生。祖獻鵬。父上景。歲貢生。母陳太夫人。生子四。公其長也。少而豁朗。英峙。以縣學附生。選爲道光十七年丁酉科拔貢生。旋中是科鄉舉。久客京師。以大挑得教職。與會國藩。陳源充。郭嵩燾。馮卓懷。數輩友善。嘗從容語國藩。新甯有青蓮教匪。亂端兆矣。既歸二年。而復至京。余戲詰公。青蓮會匪竟如何。何久無驗也。公具道家居時。陰戒所親。無得染彼教。團結丁壯。密繕兵仗。事發。有以禦之。逮再歸。而果有雷再浩之變。公部署夙定。一戰。破焚其巢。誘賊黨縛再浩磔之。湖廣總督上其功。賞戴藍翎。以知縣用。公入都謁選。又語國藩。前事雖定。而大吏姑息。不肯痛誅餘黨。難猶未已。踰年。而復有李沅發之變。又踰年。而廣西羣盜蠡起。洪秀全。楊秀清之徒出。大亂作矣。公爲縣令。浙江歲餘。咸豐元年。丁家艱歸。大學士賽尙阿公。督師廣西。馳疏調公赴粵。既至。則大爲副都統烏蘭泰公所賓敬。事無巨細。必再諮而後行。人無疏戚貴賤。必察公意嚮而薄厚之。敘公之勞。請擢同知直隸州。換戴花翎。公亦竭誠。

贊畫募楚勇五百人助戰。湖南鄉勇出境討賊。自此始也。烏公慷慨負氣。與提督向公榮積有違言。公以書曉譬烏公。禮下之已甚。冀感動向公。卒不能得。逮圍賊於永安。復代爲一書抵向公。力諫圍師缺隅之說。請合圍而盡殲之。又不能得。因引疾歸。歸而永安賊出。大敗官軍。遂至桂林。公聞警。募勇倍道赴援。將終佐烏公以平嶺表。未至而烏公陣沒。自是獨領一隊。賊中往往指曰江家軍矣。既解廣西之圍。旋大捷於蓑衣渡。賊不得掠舟而北。衡永以安。賊攻長沙。公與力爭南門。天心閣築堅壘。據要害。長沙以完。賊之渡洞庭而東也。實惟咸豐二年十月之杪。旌旗帆檣蔽江而下。公痛時事之益壞。怨吾謀之不見納。悵然不復欲東。巡撫張公亮基亦奏公留守湖南。是冬破賊目晏仲武於巴陵。剿平徵義堂會匪於瀏陽。明年春。署湖北按察使。翦叛民劉立簡於通城。膊陳北斗於崇陽。皆以疲卒千餘。盪寇數萬。天子褒歎。由是有幫辦江南軍務之命。公拜疏將赴金陵。中途聞廣濟宋關佑爲亂。移師討之。事甫定而朝廷命公速救鳳陽。不數日而江西巡撫檄公速援南昌。公曰。金陵鳳陽。雖有朝命。然殘破之區。效遲而事易。江西雖無朝命。然完善之士。禍急而事難。吾當先其難者。遂挈師由九江。踰四百里。森入南昌。翼日賊至。則設施略備。上下恃以無恐。賊晝夜環攻。闕地十道。分擾旁郡。以眩我謀。終不得窮公方略。凡九十餘日而

圍解。上嘉公功。賞二品頂戴。賜翎管班指諸物。厥後田家鎮失利。上疏自劾。詔旨雖許鑄四級。然旋有安徽巡撫之命。又詔公楚皖一體。當相緩急。爲去留。不必拘於成命。蓋聖主倚公辦賊。不復中制。而海內企踵喁喁。亦咸知非公莫屬也。公以爲武昌差足自保。廬州新立行省。危在旦夕。法宜經營淮南。以分吳楚賊勢。遂拜疏自鄂之皖。饋雨而行。將卒終歲。奔命道病。公亦病。至六安。病甚。六安吏民遮道請留。不許。昇疾竟達廬州。部分未定。而賊大至。公設策應敵。一如守長沙南昌時。而城無見糧。藥鉛罄竭。元從之士不滿千人。諸軍屯四十里外。觀望莫救。公弟忠濬自楚來援。爲賊所梗。咫尺不得通問。公病益困。不食數日矣。城陷。發憤投水死。咸豐三年十二月十七日也。春秋四十有二。越八日。募人入賊中。負公尸以出。事聞。天子震悼。追贈總督。賜祭葬。命廬州及湖南江西皆立專祠。褒公三代如其官。予諡忠烈。咸豐五年。劉公長佑聞關歸公喪新甯。六年某月。葬於某里某山。公弟三人。仲卽忠濬。以兵事積功至道員。歷官安徽四川布政使。次忠濟。戰功最偉。殉難岳州。予諡壯節。次忠淑。縣學附生。保敘知府。夫人陳氏無子。以弟子孝椿爲嗣。妾楊氏。公既沒而生子孝棠。國藩昔與公以學行相切磋。文宗御極。薦公以應求賢之詔。公嘗疏請三省。造舟練習水師。又嘗寓書國藩。堅囑廣置礮船。肅清江面。以弭巨寇。其後國藩專力水

軍幸而有成。從公謀也。自公之薨。忠愍等數乞余文。表公墓道。大義相許。神人共鑑。余其敢讓。軍興以來。死事者多矣。或邂逅及難。而倖廁忠義之林。何可勝道。當公赴江西之急。有詔令至金陵。及赴廬州之急。有詔且留楚中。宜可少安。以惜有用之身。而公必蹈危地。甘死如飴。但求無疚於神明。豈所謂皎然不欺者耶。嗚呼。忠已。余既揭其用兵始末。乃竝述他行義聲之銘詩。用告異世治國聞者。銘曰。

儒文俠武。道不竝張。命世英哲。乃兼厥長。惟公之興。頽俗實匡。明明如月。肝膽芬芳。有師鄧君。有友鄒子。臥病長安。朝夕在視。亦有會生。燕南旅死。謀歸三喪。反葬萬里。兩以躬致。義泣鬼神。近古之俠。孰與比倫。作宰吳越。風教露養。秀水振饑。翼民以長。蘇其枯齒。衣以文襪。儒吏之風。竝時無兩。蘊此兩美。風雷入懷。砰然變化。陰鬪陽開。宜哉大難。重奠九垓。半駕而稅。天乎人哉。楚師東征。倏逾十秋。三十萬人。金甲貔貅。死者半之。白骨蒿邱。人懷忠憤。如報私仇。千磨百折。有進無休。終殫元惡。盡復名城。天河盪穢。海宇再清。公創其始。不觀其成。九原可作。慰以茲銘。

羅忠節公神道碑銘

公諱澤南。字仲嶽。號羅山。湘鄉羅氏。咸豐四五年閒。公以諸生提兵破賊。屢建大勳。朝野歎仰。以爲名將。而不知其平生志事。裕於學者久矣。公之

學。其大者以爲天地萬物。本吾一體。量不周於六合。澤不被於匹夫。虧辱莫大焉。凜降衷之大原。思主靜以研幾。於是乎宗張子。而著西銘講義一卷。宗周子而著人極衍義一卷。幼儀不慎。則居敬無基。異說不辨。則謬以千里。於是乎宗朱子。而著小學韻語一卷。姚江學辨二卷。嚴義利之閑。窮陰陽之變。旁及州域形勢。百家述作。靡不研討。於是乎有讀孟子劄記二卷。周易本義衍言若干卷。皇輿要覽若干卷。詩文集八卷。其爲說雖多。而其本躬修以保四海。未嘗不同歸也。始公家世貧甚。曾祖王父日阮。王父拱詩。皆以公貴。贈通奉大夫。父嘉旦。公沒後。賞加頭品頂戴。曾祖王母蕭氏。王母賀氏。母蕭氏。皆贈夫人。公少就學。王父屢典衣市米。節縮於家。專餉於塾。年十九。卽藉課徒。取貲自給。喪其母。又喪其兄。旋喪王父。十年之中。連遭期功之戚。十有一嘗。以試罷徒步夜歸。家人以歲饑。不能具食。妻以連突。三子喪明。公益自刻厲。不憂門庭多故。而憂所學不能拔俗而入聖。不恥生事之艱。而恥無術以濟天下。其後年踰三十。乃補學官附生。逾四十。乃以廩生舉孝廉方正。假館四方。窮年汲汲。與其徒講論濂洛關閩之緒。瘠口焦思。大暢厥旨。未幾。兵事起。湘中書生。多拯大難。立勳名。大率公弟子也。咸豐二年。粵賊攻圍長沙。縣令召公練鄉勇。以備不虞。省城解圍。明年春。巡撫張公亮基。檄公帶勇至長沙。維時國藩奉命督治團練。因

與公講求東伍技擊之法。晨夕訓練。擊土寇於桂東。擒逆黨於衡山。其夏賊圍江西省城。乃益募湘勇二千。輔以新甯之勇。鎮篁之兵。檄公赴援南昌。湘軍越境討賊。自此始矣。既解南昌之圍。復破賊於安福。歸及衡州。殲土匪於永興。四年春。湖北之賊。大舉南侵。官軍失利於岳陽。克捷於湘潭。提督塔齊布公。追賊至岳州。余檄公與李公續賓佐之。公掘大橋以遏其衝。凡七戰而羣賊潰。岳州平。乘勝逐北。連復三縣。將攻武昌。公手一圖。就余決策。師出兩路。以塔公進洪山一路。而自請攻花園一路。當其堅者。如其策。果克武昌漢陽兩城。賊既東奔。追及於興國。大膊於田家鎮。公提卒二千。禦數十倍之寇。蹙之江濱。墜石墜崖死者萬計。而水師亦斷橫江鐵鎖。燔賊舟數千。當是時。公名震天下。前此累功保至道員花翎。至是有甯紹台道之命。加按察使銜。既而引兵北渡。克廣濟。黃梅。賞葉曾鏗額。巴圖魯名號。又引兵南渡。攻圍九江。進規湖口。賊堅守不可遽下。適會水師分兵入官亭湖。江上之軍不利。而湖北諸軍屢敗。賊自黃梅長驅西上。武昌再陷。公太息深憂。歎世變之未已也。益討部衆而申傲之。或解說周易以自遣云。時別賊陷饒州。弋陽。公入江西援勦。大戰弋陽。克之。賊陷廣信。又戰信州。克之。又以其閒。收復德興。景德鎮。東路甫定。而義甯復陷。公軍渡湖漢而西。至則示形杭口。而暗進龍嶺。屯高峯。以瞰敵。設三伏以要之。四

戰而賊大燬。義甯既克。有詔加布政使銜。公以書抵國藩。具論吳楚形勢。欲取九江湖口。法當先圖武昌。欲取武昌。便當先清岳鄂之交。於是馳疏。以公回援武漢。朝廷嘉焉。遂略通城。克崇陽。挫衄於壕頭堡。大捷於蒲圻。將達武昌。巡撫胡文忠公。歡迎勞問。凡事咨而後行。城外賊壘。鏟除略盡。殄滅有緒矣。公以霧中搏戰。中鎗子傷創甚。咸豐六年三月初八日。卒於軍。春秋五十。事聞。天子震悼。照巡撫例賜卹。二子皆賞給舉人。三省建立專祠。予諡忠節。公在軍四載。論數省安危。皆視爲一家骨肉之事。與其所往。西銘之指相符。其臨陣審固。乃發。亦本主靜察幾之說。而行軍好相度。山川脈絡。又其講求輿圖之效。君子是以知公之功。所蓄積者夙也。非天幸也。配張氏。誥封夫人。妾周氏。子兆作。配胡氏。兆升。配會氏。國藩第三女也。余與公以學行相勸。又相從於金革。申之以婚姻。迺撫其大節。銘諸墓道。銘曰。

漸車之潤。積潦縱橫。崇朝卽涸。卷勢收聲。大江西來。其源萬里。澤溥寰區。不矜厥美。無本者竭。有本者昌。羅公淵默。所蓄孔長。洞徹天人。潛睇往聖。一物未康。終虧吾性。提師苦戰。荆揚二州。斧彼凶豎。爲民復讐。矯矯學徒。相從征討。朝出塵兵。暮歸講道。洛閩之術。近世所捐。姚江事業。或邁前賢。公憤其趨。既辨其詭。仍立豐功。一雪斯恥。大本內植。偉績外充。茲謂豪傑。

百世可宗。

李忠武公神道碑銘

公諱續實。字迪庵。湘鄉李氏。湘軍之興。威重海內。創之者羅忠節公澤南。大之者公也。咸豐三年。賊圍江西省城。國藩募湘勇三千往援。公隨忠節公以行。初至失利。右營主者戰沒。公代領其衆。自是忠節公將中營。公將右營。所向有功。在江西克復太和安福。歸至湖南。克復永興。明年。粵賊犯岳州。忠武公塔齊布率師禦之。余檄忠節公與公助之。所部僅千人耳。賊衆數十倍。塔公控其東。湘軍扼其西。盛暑鏖兵。出奇制勝。凡兩旬而岳州平。轉戰而北。連下三城。八月。進攻武昌。漢陽克之。十月。大戰於田家鎮。破之。田家鎮者。江流盤折逼隘之處。其南岸爲半壁山。峭壁斗絕。賊以鐵鎖橫江。萬舟翔集。氣銳甚。公手刃怯卒三人。士皆殊死戰。連破賊壘。而水師亦乘機斷鐵鎖。焚賊舟。好事者至摩崖以紀績。公前以累功。保至直隸州知州。至是記名以知府用。賞給擊勇巴圖魯名號。旋有安慶府之命矣。先是湖南水師中江而下。陸師趨江之南岸。湖北陸師趨江之北岸。南軍屢捷。羣寇蜂屯北岸。於是公輩引兵北渡。掃蕩廣濟黃梅之賊。既又南渡。會攻九江郡城之賊。城堅不可遽下。又議分兵先勦湖口梅家洲之賊。無何。累攻不克。水師失利。北軍撓敗。金陵逆渠。益縱羣凶西上。武昌漢陽再陷。

南軍孤立潯陽。國藩以爲大戚。公亦深憂之。痛世亂之靡有屆也。五年二月。信州告警。公與忠節公自潯馳援。迭克廣信府城。及弋陽等四縣。東路甫定。遂建西援武昌之議。大捷於義甯。小挫於通山。下崇陽。略通城。蹴羊樓峒。擣蒲圻。撥咸甯。次第戡定。乃以十一月杪。師次武昌。巡撫胡文忠公林翼大喜。事無巨細。惟忠節公與公言是聽。忠節絜持大綱。其戰守機宜。胥公主之。公含宏淵默。大讓無形。稠人廣坐。終日不發一言。遇賊則以人當其脆。而已當其堅。糧仗則予人以善者。而已取其窳者。士卒歸心。遠近慕悅。咸豐六年三月。忠節公中鎗不起。公接統全軍。衆志愈厲。剷平城外悍賊之壘。卻劇寇石達開來援之衆。周城掘塹。引江水入湖。困以長圍。十一月。再克武昌。漢陽。天子偉其功。賞加布政使銜。記名以按察使用。未幾。提兵而東。再薄九江。九江賊酋林啓榮者。堅忍得衆。內與小池口湖口梅家洲諸城。首尾相援。外與皖廬之賊。互爲聲援。公旣掘長塹多圍潯。又分軍援勦江北。舟載奇兵。夜襲湖口之背。遲明。水師至而陸軍伏發。立克兩城。事聞。拜浙江布政使。明年四月。卒克九江。殄滅無遺。天下快之。賞穿黃馬褂。加巡撫銜。公每建一功。晉一秩。數省官民。歡抃稱道。若寵榮之在躬。或歌誦戰狀多爲樂。傳播中外。浙人仕京朝者。疏請敕公東兵以救浙難。而胡文忠公以皖中糜爛。請留公軍圖皖而固鄂。天子許之。公乃整旅入

皖。踰月。連下潛山。太湖。桐城。舒城。四縣。師次三河。毀賊九壘。而逆會陳玉成等。四面來援。截我糧路。我軍銳氣日蹙。師少而半潰。公力戰終日。自度事不可爲。夜半。怒馬陷陳。死之。咸豐八年十月初十日也。諸將堅守營壘。又三日而俱敗。又六日而桐城守兵亦敗。前後死者。殆六千人。無苟活者。疏入。文宗震悼。手詔曰。惜我良將。不克令終。尙冀其忠靈不昧。他年生申甫以佐予也。追贈總督。湖北。江西。安徽。湖南立祠。予諡忠武。賞騎都尉。兼一雲騎尉世職。公之先人。世有令德。曾祖本桂。祖詩白。皆以公貴。贈榮祿大夫。父登勝。公沒後。特恩加封光祿大夫。曾祖妣張氏。賀氏。王氏。祖妣戴氏。母蕭氏。皆封一品夫人。公端凝敦篤。愛人不尙美言。而意溢於色。色餘於辭。雖他軍之將士。逃難之流民。皆歸之若父兄。聞其死。哭之皆慟。至不忍聞。同治二年。朝廷遣官賜祭。三年。克復金陵。推恩有功之臣。賞二等輕車都尉世職。配謝夫人。子三。其二殤亡。光久欽賜舉人。引見。賞六部員外郎。又以兼襲二世職。併爲男爵。孫二人。某某。咸豐九年。葬公於湘鄉四十里。三都黃牯冲星子山之陽。同治八年某月某日。改葬某鄉某山。丐余文其墓道之碑。余旣羸敝戰績。乃兼述其懿德。而系以銘。銘曰。器有洪纖。因材而就。次者學成。大者天授。嶽嶽李公。表裏完好。匪琢匪追。動合大道。羅公講學。遠紹洛閩。公分其細。握衣恂恂。出而禦寇。戎馬艱辛。

入而問道。克己求仁。誰侮誰尤。責躬獨厚。胸劈衆流。會不出口。負重含汗。浩如山藪。險趨人先。利居衆後。豈無贏財。不阜我私。不忍己飽。而人獨飢。分餉諸軍。蘇槁噓飢。返自潯陽。少憩武昌。將請於朝。覲親還湘。王事有嚴。離局匪遑。斯願不遂。茹涕聞傷。遣將分兵。助我東征。擇良而予。出以至誠。四分五剖。精銳星散。自攜部曲。疲羸居半。損己濟物。近古無倫。終焉師燿。以仁隕身。行類大愚。乃動鬼神。公功久著。爛若三辰。德或不顯。考此銘文。

李勇毅公神道碑銘

公諱續。宜字克讓。號希菴。兄弟五人。忠武公諱續。實次居四。公其季也。余既銘忠武公之墓。茲不復具其家世。公少好深湛之思。強探力索。洞徹幽微。師事羅忠節公澤南。常以躬行不逮爲恥。咸豐三年。羅公募勇援救江西。公遂參軍事。以功累晉知縣同知。賞戴花翎。而名顯不顯。六年冬。湘軍再克武昌漢陽。巡撫胡文忠公奏公有勞。特爲兄續實所掩耳。有詔以知府選用。賞加道銜。既而隨兄圍攻九江。明年。以事省。余瑞州軍中。遂偕諸將圍攻瑞州。會皖北羣賊。上竄蘄黃。公乃自瑞挈千七百人。回救湖北。師至黃州。與胡文忠公弁轡謀野。周覽形勢。自巴河。蘄水。廣濟。黃梅。六戰破賊壘無算。遂會克小池口。由是公之威名。與忠武公差頡頏矣。公率所部既集九江。忠武公乃得以其閒分兵克復湖口。連下彭澤。小孤。梅家洲諸

城。公又以偏師卻湖口之賊。禦竄陷麻城黃安之寇。忠武公乃得專力破滅九江。皆公之助也。湖北事已大定。胡文忠公以皖中久困水火。奏請敕忠武公廓清皖北。而留公以固楚疆。天子亦南憂江淮。絕重李氏昆季矣。無幾何而有舒城三河之變。忠武公殉難。將士死者六七千人。天驚地岌。公在黃州。哀迫之際。經緯萬端。入則損食悲咽。出則拊循潰卒。思鄉者遣歸。願留者編伍。哺粟賜衣。接以溫語。差討諸將之罪。而簡用其良。部署麤定。適胡文忠公以母喪奉詔起復。相與申儆簡練。而湘軍復振。明年夏。劇賊石達開竄擾湖南。圍攻寶慶。公時新奉荆宜施道之命。統兵自鄂援湘。朝廷壯之。師抵長沙。進自資水之西。四戰而解寶慶之圍。圍中官軍三萬。與飢困之民。一時得蘇。衆聲大和。論功賞加布政使銜。當是時。余與胡公。方議併力規取安慶省城。余弟國荃。與將軍多隆阿。分圍安慶。桐城。公自湖南東還。駐軍兩路之中。曰青草橋者。大敗逆會陳玉成於挂車河。布陳之廣。近世罕聞。旋拜安徽按察使。十一年。又有安徽巡撫之命。公具疏。以謂逆會圖解安慶之圍。悉銳西竄。必犯湖北。以攻我之所必救。湖北爲衆軍根本。臣宜提師回援。不能遽受皖撫之事。比公馳抵武昌。而賊已犯黃州。德安。兩府五縣。其別賊自江西至者。又陷興國。大冶等縣。公經營七月。始將列城恢復。安慶亦藉以告克。而胡公薨於位。文宗亦晏駕。八音遏矣。

今上嗣位。褒安慶功。賞穿黃馬褂。調補湖北巡撫。既又命移撫安徽。公初蒞安慶。繼駐六安。屢奉密詔。以苗沛霖叛服無常。詢問勦撫機宜。公覆疏。謂苗沛霖官至道員。公犯不韙。圍撫臣於壽州。陷其城。屠其衆。乃復詭言求撫。此豈足信。不過假稱反正。號召近縣。養成羽翼。若正彼叛逆之名。人人得而誅之。而寬其黨羽。使爲我用。彼勢日孤。終成禽耳。天子聽之。公又以時解潁州之圍。克霍邱之城。綏撫各圩。陰散逆黨。選任賢吏。安民墾田。功績漸彰矣。詔授爲欽差大臣。而公適聞訃丁母憂。不克受事。朝廷命仍署理巡撫。三疏陳謝。始奉命賞假百日。回籍治喪。公既以苦思違病。徹夜不寐。夙患咯血。至是增劇。歸里後。六奉詔旨起復。墨經視師。公以哀慕未忘。而嬰疾轉篤。請假四十日調養。既而輿疾就道。又請假四月。弁開巡撫之缺。朝廷鑒其至誠。所請未嘗不許。而以淮南事棘。又未嘗不敦促上道。詔召相銜。至冬初。再疏自陳病狀。公亦自知不起。遂以同治二年十月二十八日卒於家。春秋四十有一。敕照總督例賜卹。三省建立專祠。予諡勇毅。配彭氏。子光英。特賞直隸州知州。同治三年某月某甲子。葬某處某山。八年某月某甲子。改葬某山。公與忠武公皆負重名。淡於榮利。昆弟同之。忠武好蓋覆人過。公則嫉惡稍嚴。忠武戰必身先。驍果縝密。公則規畫大計。而不甚校一戰之利。至其臨陣。百審一發。發無不捷。成功一也。余不詳

敘戰狀而略述公言以綴之銘。銘曰。

凡戰有機。鬼神翕闔。靜如山寒。終日闐寂。動若電飛。百霆齊擊。蓄勢宜久。氣鬱宜停。此公之言。吾耳所聆。凡公勳績。好謀乃成。博籌多算。終格神明。匪直戰事。學道亦然。精思力踐。誠可達天。立功雖偉。公不自賢。立德未竟。賈志九泉。我銘昭之。永詔萬年。

隨州李君墓表

道光二十六年某月。隨州李君年八十四。考終於里第。其兄之子戶部主事樹人。聞赴京師。將去官持喪。余往弔語之曰。於古期功之喪。仕者去職。總之喪。士不得應舉。今子之歸。禮也。樹人曰。豈以爲禮。致吾哀爾。且泣曰。叔父葬有日。旣埋石幽宮。維墓道當別立碣。將揭其行義。以示來者。敬以屬先生。則爲余縷述一一甚詳。樹人事余甚敬。又以禮請。余其可辭。惟君受性剛介。於事無所不敢。凡所力任。必自於公。或私於己。豪毛不以措意。人所愈憚。當之愈勇。嘉慶初。川楚教匪蠱起。漢。沔。荆。襄。蹂躪殆遍。隨州之西有環潭者。巨鎮也。賊將大掠而窟之。君戒鎮家出一人。負薪一束。執長竿籠一炬。臨水雁列。竟夕焚薪。火光亙六七里。賊不敢渡。隨以不陷。近村有田。久沒於水。吏責賦於比鄰。民絕苦之。君徧哀諸司。乞蠲無田之賦。竟以得請。其他施於鄉者稱是。是故邑有舉也。非其倡不興。里有爭也。非其

解不息。其貴盛也。人皆稱願之。其疾皆奔。視其沒也。哭之皆哀云。李氏世居隨州。家微也。君少與其兄某。發憤力學。自度終無以大其門。乃去爲賈。累致千金。一以資兄宦學。不問。久之。乃爲兄納金縣官。得除爲丞。稍遷至雲南嵩明州知州。而君亦以武學生入資爲都司。於是諸子翩翩。文學仕進。寢昌大矣。君諱某。字某。曾祖某。祖某。皆不仕。考某。以嵩明君貴。誥封奉直大夫。子二人。長某。以嵩明君得子遲。與爲嗣。後遂不還。次某。孫某某。自嵩明君之沒二十年。君撫諸孤。恩勤備至。樹人之官京師。君一資之。如資其兄。其視兄子。不知其非己子。其視己子。不知其非兄之子也。嗚呼。自衆人論之。彼施於鄉者博矣。自知道者觀之。獨其施於家者。不可能耳。不可能也。則亦不可朽也。

錢塘丁烈婦墓表

道光二十有七年十月。錢塘丁士元圖其五世祖妣烈婦周安人之墓道。又譜其世系。述其節行。踵吾門而告曰。士元之五世祖妣周氏。南疆繹史。曾以綴之列女傳者也。實以順治初殉難。今二百載矣。維塋域有下窆之石。不克宣刻事蹟。暴諸道路。懼終將晦湮。且無以興勅世世子孫。先生天下之夙於文。如不余屏。請爲文揚之墓。是寵施吾族而厚吾先世以不朽也。國藩禮辭不獲。則謹次丁氏之系。烈婦之畸行。與聖朝旌顯幽微之義。

有顛有委。以激懦者。其語曰。丁氏之別子。居山陰者曰際龍。世農也。其元孫曰瑞南。始爲賈杭州。是爲烈婦之夫。烈婦生而篤孝。其母患心痛絕急。或稱海上方。指血和藥可立已。烈婦則盡刺十指。劑血以進。病良已。瑞南既貿遷於杭。家中有無。一仰烈婦。裁冗而緝匱。贏事而縮食。秩如也。順治三年。我大清兵下紹興。土賊乘閒四出焚掠。烈婦挈二子奔竄。賊數規之。烈婦度終不得脫。乃以二子付族屬之老成者。曰。以累若襁歸兒父。吾不可爲賊辱。遂自投水。賊追救之。不殊。凡三溺乃絕。年二十有三歲。瑞南在杭。聞難奔焉。三日矣。尸不腐。蚊蚋不集。其卒以六月四日。天盛暑也。瑞南悼妻之義死。痛土賊之獸心。曰。孰不可居。又奚爲於故里。遂占籍杭州。前烈婦所挈竄之二子。長曰聘賢。季曰茂卿。至是聘賢始爲錢塘人矣。其後百有數載。至乾隆十四年。孫可學上其事於朝。乃蒙恩予旌表。又數載。以可學官某官。贈烈婦爲安人。凡九十載。至道光二十五年。烈婦之裔孫士元。以進士入翰林。丁氏寢寢昌大矣。維明季之亂。匹夫匹婦。蹈死如歸者。所在多有。而食祿者。往往濡忍不決。或偷活無幾時。旋亦周章就斃。等死也。血氣之軀。非必久長不敝之物也。彼獨須臾不審耳。人固有斷不可不慎之須臾。如烈婦之光顯。豈須臾也哉。亦且長久焉爾。

桃源縣學教諭孫君墓表

君諱葆恬。字劭吾。孫氏善化人。祖繩武。歲貢生。考先振。舉人。直隸隆平縣知縣。隆平君無子。有兄曰先捷。縣學附生。晚而生君。乃兼以後隆平君。禮律所稱。一子承二祧者也。君生貴重。兩翁絕憐之。不欲苦以學業。君曲承歡意。進則奉檠疾趨。嬉游無度。退則顛顛自敕。鑽仰羣書。本末交修。既治且篤。年十七。補諸生。中式嘉慶己卯科舉人。於是贈翁始知君之學之勤。人之所不見也。道光六年。以大挑選桃源縣學教諭。始至。學官弟子。或丙夜踰門。曰。願有謁也。君訶禁立絕諸生。相戒惕息不敢近。君稍稍引進。矜其不能。有某生才而無檢。提學使者。將除其名。君召而數之曰。若以惡聞於一縣。今當痛自艾。埽地自新則生。蹈故則否。生頓首謝不敢負。學使者亦竟不黜生。又有數十人。以錢糧浮收。訴縣令於上官。刻碑縣門。頗劫持之。冀薄斂以寬民力。縣令大怒。將名捕致之法。君從容開說。仆碑弛獄。久之壹解。縣令邵君。以事罰富人錢二十萬。輸於學宮。陰以乞君。君別藏之。及以憂去官。召諸生使具狀。出錢予之。貫則朽矣。在桃源九年。大計卓異。例以知縣赴部謁選。君曰。今日令長。豈得行其志者。吾上有老親。又奚爲於選人。道光二十一年四月某甲子卒官。春秋四十有八。卒後三年。君之子鼎臣。芝房。以道光乙巳科進士。改翰林院庶吉士。君以覃恩。晉贈儒林郎。又二年。次子頤臣。以丁未科進士。改兵部主事。又三年。今上卽位。晉贈

奉直大夫。明年。子觀臣中式咸豐辛亥科舉人。又明年。以宣宗升祔恩。晉贈中憲大夫。是時粵匪洪楊諸逆。方犯湖南。聯巨艦浮江而東。荆揚鼎沸。芝房及其兩弟。歸自京師。又二年。頤臣。觀臣。相繼淪逝。又明年。咸豐丁巳十二月某甲子。君之配桂太恭人卒。死喪頻仍。家稍替矣。太恭人孝恭任淑。處變不驚。鎮筭有卒。譁戕其長官。濱沅州縣。洵東徙避亂。流賊有自通城竄長沙者。家人亦鳥徙避之。太恭人晏然守靜。不爲訛言震駭。卒以無事。方從官桃源學署。贈翁縣學。君實在養。每晨興。君布席。太恭人進饌。贈翁年幾九十。與子婦爲辭讓者再。太恭人執玉寶。實恆有嬰兒之色。見之者不知其娶婦生孫。子已登科也。太恭人之沒後。君十有六載。咸豐九年二月某甲子。芝房奉母合葬於赤江先塋。先事屬友人會國藩表其墓。國藩因循未卽爲。而芝房不幸死矣。始君以樸學冲襟。未竟其施。士林惜之。又頤臣。觀臣。以才子早世。又益惜之。至芝房秉父之訓。立朝有風節。著書廩廩近古矣。復以憂死。每加惜焉。君子小人。知與不知。所共悼痛者也。且所謂天者。何也。高高者與人世迥絕。其好惡固當大異於人。不可究詰耶。抑食報有時。遲之又久而後大定耶。以君之積善教子。芝房之所成立如此卓卓。而猶不克顯。則將來所謂大定焉者。又可必其盡如人意。而祚之無已乎。於是爲鑿諸石。揭諸墓道。以俟夫異時觀化人者取驗焉。

武昌張府君墓表

君諱以誥。字兢安。號經圃。湖北武昌人。生而祗慎。鞠躬容儀。凡几與人無
疏戚。必先遂其所好。而後己以聽之。所遇和順。則曰。彼實宥我。余非能善
此。不順或有曲。難隱抑。則曰。我之咎也。彼何罪。卽非禮相加。尤不肖。益泊
然避之。卽嚴事我。尤卑賤。尤磬折。與之鈞等。遠近從之者。泊未嘗見其有
所觝觸拂戾也。會祖斯銳。祖維滄。國子監生。考本用。歲貢生。廣濟縣學訓
導。訓導君旣以能文鳴於時。生二子。長曰以謨。成嘉慶戊辰進士。君以少
子承父兄之業。折節力學。尤善爲制舉之文。每搆一篇。目營四海。精鷲九
天之上。不可得而究也。徐而洗心冥默。若無可言。往往鑿險鉤深。歸諸平
淡。無有寃聲曼色。坐是屢擯於有司。君亦不少變。以求速化。其爲之益勤。
自七經孟子。下逮有宋諸儒者之說。莫不鑽研。以是澤其文。訓其徒友。亦
以是行之於宗族鄉黨。里有貧不能舉婚喪者。別差等周之。宿負逋租。無
多寡。壹蠲之。乞人有強暴者。羣乞擁之山中。將椎殺之。一人寤曰。此張某
家墓地也。張公長者。無以訟事污累長者。相與徙之他所。主者果大困。於
是識者歎君之德。感及頑族矣。道光四年八月望日。以疾卒。春秋六十有
三。配余孺人。子一。善鏞。縣學生。善準。歲貢生。孫成。縣學生。裕銘。裕鈞。縣學
廩生。裕鎮。裕釗。道光丙午舉人。諸子孫皆以文行紹其家學。而裕釗賢而

能古文。日昌大不可量。君以道光十七年三月壬辰葬於大冶縣杉木橋東之張家山。凡二十二歲。咸豐九年。裕釗致父之命。乞余表其墓。自制科以四書文取士。強天下不齊之人。一切就瑣瑣者之繩尺。其道固已隘矣。近世有司。乃並無所謂繩。無所謂尺。若閉目以探庾中之豆。白黑大小。惟其所值。士之蓄德而不苟於文者。將焉往而不黜哉。余爲述一二。以彰君之懿行。亦深譏當世君子。有衡文取士之責者。尙知警焉。

翰林院庶吉士遵義府學教授莫君墓表

君諱與儔。字猶人。一字傑夫。貴州獨山人。先世居江南上元縣。有名先者。明弘治時。從征都勻苗。因留守家焉。三傳至如爵。累官游擊。君高祖也。祖嘉能。考強。州學附生。兩世皆以君貴。敕封文林郎翰林院庶吉士。妣皆封孺人。君少隨兄與班。讀書發聞。兄沒。持期服。不與有司之試。旋以州學廩生。中嘉慶三年舉人。明年己未成進士。改翰林院庶吉士。爲紀文達公及洪編修亮吉所器異。六年。散館。改知縣。署四川茂州事。徙鹽源縣知縣。縣俗富人好買無征之田。貧人鬻產。售九存一。仍輸全賦。久輒逃亡。君按籍責賦富人。而貰其隱占之罪。河西有寧遠子稅所。府隸橫征。君上言稅所非經病民。得裁去。木裏喇嗎左所有山。產銀銅。郡守徇奸民之求。請布政司符縣開礦。君持不可。上狀。以爲木裏喇嗎去鹽源且二千里。朝廷特羈

糜之。非真利其土也。彼土菽糧不足於食。朝定開廠。暮聚萬人。運夫倍之。不幸鑪礦寡耗。衆散爲盜。非土司受其殃。則吾蜀承其敝。且奸民所呈地圖。開礦去左所經堂甚遠。今得左所人訊之。銅礦得十分二銀者。卽經堂山也。貪小利。買大釁。事誠不便。大吏憐君狀。檄君往左所覆勘。春暮。鐘雪而行。至則礦山者。果在其經堂右。其衆嚴兵以待。旣瞻君貌。又聆溫語。乃皆解甲羅拜。謝使君幸奠我居。世世不敢忘。行事縣令入土司境。戶率錢二百五十。雜市雞豚百物。居有供。行有餽。君盡卻其物。又懸之禁。比還。老幼遮道獻酒。其酋項克珠。進銅佛爲壽。填咽苦不得前。由是舉治行卓異。政以大成。充甲子科鄉試同考官。以父憂去職。服闋。母張太孺人年七十餘矣。遂以終養請。凡事母十有四年。入則牽衣索棗。聽於無聲。出則生徒雲從。多文而粟。旣除母喪。吏部檄之復起。君北行至襄陽。歎曰。吾壯也。猶不能枉道事人。今能老而詭隨耶。立歸。請改教職。選遵義府學教授。遵義之人。習聞君名。則爭奏就而受業。學舍如蠶房。又不足。乃僦居半城市。日暮進諸生而詔之。學以盡其下焉者而已。上焉者。聽其自至可也。程朱氏之論。窮神達化。乃不越灑掃應對日用之常。至六藝故訓。則國朝專經大師。實邁近古。其僦易惠氏。書閻氏。詩陳氏。禮江氏。說文詁釋有段氏。王氏父子。蓋未嘗隔三宿不言。言之未嘗不津津。聽者雖愚滯。未嘗不怡如早

苗之得膏雨也。久之。門人鄭珍。與其第五子友芝。遂通許鄭之學。充然西南碩儒矣。道光二十一年七月二十二日卒官。春秋七十有九。將絕。戒曰。貧不能歸葬。葬吾遵義可也。其明年十二月二日。葬縣東青田山。配唐氏。繼配李氏。子九人。希芝。次殤。次方芝。州學增生。秀芝。友芝。辛卯科舉人。庭芝。拔貢生。瑤芝。生芝。州學附生。祥芝。湖南候補縣丞。女七人。孫十一人。曾孫五人。君所爲書有二。南近說四卷。仁本事韻二卷。詩文雜稿。爲族子攜至廣西佚去。友芝掇輯。編爲四卷。友芝又別記君言行。爲過庭碎錄十二卷。既葬。十有八年。友芝以書抵國藩。乞爲文表其墓。當乾隆之季。海內矜言考据。宗尙實事求是之說。號曰漢學。嘉慶四年。仁宗親政。大興朱文正儀徵阮文達。以巨儒爲會試總裁。是科進士。如姚文田。秋農。王引之。伯申。張惠言。臬聞。郝懿行。蘭皋。皆以樸學播聞中外。科目得人。可云極盛。君於是時。寂寂無所知名。及君出而爲吏。恩信行於異域。退而教授。儒術興於偏陬。校其所得。與夫同年生之炳炳者。孰爲多寡。未易遽定也。余爲表章一二士之孤行。而憂無和者。可自壯也。

鄧湘皋先生墓表

先生新化鄧氏。諱顯鶴。字子立。晚歲學成。遠近稱爲湘皋先生。先生自甫掇科名。卽已厭薄仕進。愼然有志於古之作者。與同里歐陽紹洛。礪東。以

詩相厲。客游燕齊淮揚嶺南。所至悲愉抑塞。一寓於詩。覲幽刺怪。遏之使平。終歲顛顛。誓不履近人之藩。而又恥不逮古人。每有篇什。輒就礪東。與相違覆。引繩落斧。剖晰毫釐。書問三反。或終不得當。交嘲互訟。神囚形瘁。已而窒極得通。則又互慰大歡。以爲解此者。天下之至豪也。先生以嘉慶九年甲子科舉於鄉。道光六年。大挑二等。官甯鄉縣訓導。凡十有三年。引疾歸。其遺外時榮而有事箸述。與礪東略同。然礪東持律矜嚴。體勢稍褊。先生則波瀾益壯。跌宕昭彰。礪東牆宇自峻。與人少可。先生則闡揚先達。獎寵後進。知之惟恐不盡。傳播之惟恐不博且久。用是門庭日廣。而纂述亦獨多。詩歌所不能表者。益爲古文辭以彰顯之。其於湖南文獻。搜討尤勤。如饑渴之於食飲。如有大譴隨其後。驅迫而爲之者。以爲洞庭以南。服嶺以北。旁薄清絕。屈原賈誼。傷心之地也。通人志士。仍世相望。而文字放佚。煙鬱不宣。君子懼焉。於是搜訪濱資郡縣名流佳什。輯資江耆舊集六十四卷。東起灘源。西接黔中。北匯於江。全省之方輿略備。鉅製零章。甄采略盡。爲沅湘耆舊集二百卷。徧求周聖楷楚寶一書。匡謬拾遺。爲楚寶增輯考異四十五卷。繪鄉邨經緯圖。以詔地事。詳述永明播越之臣。以旌忠烈。爲寶慶府志百五十七卷。武岡州志三十四卷。衡陽王夫之明季遺老。國史儒林傳。列於冊首。而邦人罕能舉其姓名。乃旁求遺書。得五十餘種。

爲校刻者百八十卷。劉陽歐陽文公元。全集久佚。流俗本編次失倫。爲覆審補輯若干卷。大儒周子權守邵州。錄其微言。副以傳譜之屬。爲周子遺書若干卷。所至釐定祀典。褒崇節烈。爲召伯祠從祀諸人錄一卷。朱子五忠祠傳略考證一卷。五忠祠續傳一卷。明季湖南殉節諸人傳略二卷。嗚呼。可謂勤矣。蓋千秋者。人與人相續而成焉者也。惟衆人甘與草木者伍。腐而腐耳。自稍有智識。卽不能無冀於不朽之名。智尤大者。所冀尤遠焉。人能宏道。無如命何。或碌碌而有聲。或瓌材而蒙詬。或佳惡同時同位。同而顯晦迥別。或覃思孤詣而終古無人省錄。彼各有幸有不幸。於來者何與。先生乃舉湖南之仁人學子。薄技微長。一一掇拾而光大之。將非長逝者之所託命耶。何其厚也。先生生於乾隆四十二年十二月十六日。卒於咸豐元年閏八月二十五日。春秋七十有五。曾祖元臣。祖勝達。父長智。妻曹氏。仁厚淑慎。里黨欽之。妾何氏。子二。琳廩貢生候選訓導。前卒。琮道光丁酉科拔貢生。癸卯科舉人。父歿後一月。以毀終。女子子三人。孫四。光緒光緒。光緒。光緒。會孫大程。自先生以名儒篤行昌其家。羣從子姓。皆孝友力學。兄子瑤。尤賢而能文章。先生之書。其不係於湖南文獻者。又有南邨草堂詩鈔二十四卷。文鈔二十卷。易述八卷。毛詩表二卷。校勘玉篇廣韻札記二卷。自訂年譜二卷。瑤皆敬謹弄藏。其未刻者。皆寫定可傳於世。先

生內行完粹。教澤在人。瑤所爲行狀甚詳。茲故不著。獨著其治詩之精。與其有功於鄉先哲者。揭於墓道。以式鄉邦而訊異世。

戶部員外郎彭君墓表

君諱永思。號兩峯。世居湖南長沙。少而峻整自將。忱恂縝栗。訥訥如不能語。事至則剖晰毫釐。枝分縷解。辨窮萬變而斷以片言。長老往往驚異。以爲吏才。天所授也。年三十二。以嘉慶五年庚申舉於鄉。十四年己巳成進士。卽用知縣。明年。署雲南嵩明州知州。斷獄入百。民譽翔洽。徙補楚雄縣。楚雄故附郭劇邑。君至。一以治嵩明者治之。訟牒入。立判紙尾。期以某日質訊。出則聽民遮道。自言。停輿研鞫。前者辭窮。後者大畏。或就逆旅。操筆定讞。且判且詰。決遣如神。尤善爲離參之法。離參者。如欲知豆價。則先以麥問甲。次以稻問乙。次以粱問丙。離其事。異其人。而旁參之。然後進退以定豆價。百不失一。君用此術多奇中。他人效之。亦不能得民情僞也。大吏以君旣政成。常使兼聽鄰縣之訟。大姚有薛繼賢者。殺人獄成。省中覆覈。則詭辭翻異。問官數易爰書。數十易終不能決。君訊之。七晝夜。卒以參鞫其子。乃得情實。論決如律。某官解餉銀至省。發封則失銀而得數石。以獄屬君。君察石有蟲齧痕。非道途閒物。因問輦運之卒。甯覺馱負。左右敲乎。頗憶敲側。始何日乎。卒對某日。過某店。始覺右敲。君自省返楚雄。挾此獄

與卒與石俱行。途中雜采羣石，較之皆不類。至某店，得石與蟲齧者類，一鞠而伏。遂抵旅店，主人於法。五侯神者，不知所起。淫祀也。土民與江西客商爭祀，搆訟數十年。君以黷祭宿獄，終無已時。令昇神像至縣庭，取筆判八字曰：爾像不滅，訟端不絕。立飭吏卒，摔而毀之。兩造相顧愕眙而散。蓋君之明而能斷，類如此。嘉慶十七年，大姚令上變告。烏龍口有衆數千，嘯聚爲亂。郡守夜召君問策。君立與區畫，草數書抵旁縣，戒勿輕動。遣數人，僞與賊暱者，風使解散。而潛發輕兵掩捕，擒七十人，罪數人而事定。於是遠近又歎君才堪濟變也。在滇六年，凡三署大姚，四署廣通，兩署南安州。再爲鄉試同考官。上官方以治行卓異薦君，而君以父命，不樂久爲吏。遂援例改就京職。官戶部員外郎，貴州司行走，兼管廣東司。議蠲逋賦，釐定鹺政。多所匡贊。道光二年丁家艱，歸。自是山居二十載，養母教子，收族振貧。祭田義渡，凡諸善舉，皇然如有失而急圖之。陶然與販夫農父相狎，自忘其爲宰官之身。人亦忘之，亦愈敬之。道光二十二年八月二十一日以疾卒。春秋七十有四。曾祖從美，祖必化，妣贈奉直大夫。考勝桂，誥封奉政大夫。以五世同堂，獲旌於朝。祖妣氏范，妣氏黃，皆封宜人。君之配黃恭人，以賢孝特爲舅姑所倚。嘗一從夫雲南官舍，而未及從宦京師。凡綜理彭氏家政，七十餘年。敕始終，內外秩秩，室靡棄物，里無違言。似婦有先亡

者。叔早逝者。撫其諸子。女公早寡者。撫其孤甥。曲有恩紀。齒逾八十。猶箠鐙紡績不倦。同治元年閏八月二日告終。蓋九十有六矣。子申甫。道光乙未科舉人。候選通判。婦陶氏。安化文毅公女也。女三。皆適士人。孫樹森同治甲子科舉人。志本。序本。豐本。孚本。孫女十二。申甫以道光壬寅九月某甲子。葬君於長沙之文家段鐘花台。同治壬戌閏八月某甲子。葬恭人於木魚山。墳壠相望。約二百步而近。屬國藩表其墓。於是敘述大節而綴以銘。銘曰。

流水不腐。古傳斯語。賢侯之明。積勤所補。壽母之壽。本諸勞苦。居上而逸。天所不許。降福者天。宰天者人。治獄陰德。恆大厥門。科名廣續。有子有孫。更千萬襪。長裕後昆。

大界墓表

王考府君以道光二十九年十月四日棄養。倏歷二十三年。當初葬時。吾父以書抵京師。命國藩爲文。紀述先德。揭諸墓道。國藩竊觀王考府君威儀言論。實有雄偉非常之概。而終老山林。曾無奇遇重事。一發其意。其型於家。式於鄉邑者。又率依乎中道。無峻絕可驚之行。獨其生平雅言。有足垂訓來業者。敢敬述一二。以示後昆。府君之言曰。吾少耽游惰。往還湘潭市肆。與裘馬少年相逐。或日高酣寢。長老有譏以浮薄。將覆其家者。余聞

而立起自責。貨馬徒行。自是終身未明而起。余年三十五。始講求農事。居枕高嶺山下。壠峻如梯。田小如瓦。吾鑿石決壤。開十數畝而通爲一。然後耕夫易於從事。吾昕宵行水。聽蟲鳥鳴聲。以知節候。觀露上禾顛以爲樂。種蔬半畦。晨而耘。吾任之。夕而糞。庸保任之。入而餵豕。出而養魚。彼此雜職之。凡菜茹手植而手擷者。其味彌甘。凡物親歷艱苦而得者。食之彌安也。吾宗自元明居衡陽之廟山。久無祠宇。吾謀之宗族諸老。建立祠堂。歲以十月致祭。自國初遷居湘鄉。至吾曾祖元吉公。基業始宏。吾又謀之宗族。別立祀典。歲以三月致祭。世人禮神傲福。求諸幽遐。吾以爲神之陟降。莫親於祖考。故獨隆於生我一本之祀。而他祀姑闕焉。後世雖貧。禮不可隳。子孫雖愚。家祭不可簡也。吾早歲失學。壯而引爲深恥。既令子孫出就名師。又好賓接文士。候望音塵。常願通材宿儒。接迹吾門。此心乃快。其次老成端士。敬禮不怠。其下汎應羣倫。至於巫醫僧徒。堪輿星命之流。吾屏斥之。惟恐不遠。舊姻窮乏。遇之惟恐不隆。識者觀一門賓客之雅正。疏數而卜家之興敗。理無爽者。鄉黨戚好。吉則賀。喪則弔。有疾則問。人道之常也。吾必踐焉。必躬焉。財不足以及物。吾以力助焉。鄰里訟爭。吾嘗居間以解兩家之紛。其尤無狀者。厲辭詰責。勢若霆摧。而理如的破。悍夫往往神沮。或具尊酒通殷勤。一笑散去。君子居下。則排一方之難。在上。則息萬物。

之黷。其道一耳。津梁道途。廢壞不治者。孤嫠衰疾無告者。量吾力之所能。隨時圖之。不無小補。若必待富而後謀。則天下終無可成之事。蓋府君平昔所恆言者如此。國藩既稔聞之。吾父暨叔父。又傳述而告誠數數矣。府君諱玉屏。號星岡。聲如洪鐘。見者憚懾。而溫良博愛。物無不盡之情。其卒也。遠近感唏。或涕泣不能自休。配我祖妣王太夫人。孝恭雍穆。姊姒欽其所爲。自酒漿縫紉。以至禮賓承祭。經紀百端。曲有儀法。虔事夫子。卑訕已甚。時逢愠怒。則竦息減食。甘受折辱。以迥眷暎。年逾七十。猶檢校內政。絲粟不遺。其於子婦孫會。羣從外姻。童幼僕媪。皆思有惠逮之。權量多寡。物薄而意長。閱時而再施。太夫人道光二十六年九月十八日卒。春秋八十。葬於木兜冲。其後三年。而府君卒。春秋七十有六。葬於八斗冲。遷太夫人之柩附焉。其後十年。爲咸豐九年己未十二月。均改葬於大界。府君之先六世祖曰孟學。初遷湘鄉者也。曾祖曰元吉。別立祀典者也。祖曰輔臣。考曰竟希。曾祖妣氏曰劉。祖妣氏曰蔣。曰劉。妣氏曰彭。以國藩忝竊祿位。府君初貤封中憲大夫。後累贈爲光祿大夫大學士兩江總督。祖妣初封恭人。後累贈爲一品夫人。聖朝推恩。追而上之。竟希公累贈光祿大夫。妣彭氏。亦贈一品夫人。府君生吾父兄弟三人。仲父上台早卒。季父驥雲無子。以吾弟國華爲嗣。孫五人。軍興以來。惟國潢治團練於鄉。四人者皆託身

兵閒國華貞幹沒於軍。國藩與國荃遂以微功列封疆而膺高爵。而高年及見吾祖者。咸謂吾兄弟威重智略不逮府君遠甚也。其風采亦可想已。曾孫七人。元孫七人。凡茲安居足食。列於顯榮者。繫維祖德是賴。於是敘其大致。表於斯阡。今後嗣無忘彝訓。亦使過者考求事實。知有衆徵。無虛笑云。

台洲墓表

嗚呼。惟我先考先妣。既改葬於台洲之十三年。小子國藩始克表於墓道。先考府君諱麟書。號竹亭。平生困苦於學。課徒傳業者。蓋二十有餘年。國藩愚陋。自八歲侍府君於家塾。晨夕講授。指畫耳提。不達則再詔之。已而三覆之。或攜諸途。呼諸枕。重叩其所宿惑者。必通徹乃已。其視他學僮亦然。其後教諸少子亦然。嘗曰。吾固鈍拙。訓告若輩。鈍者不以爲煩。苦也。府君既累困於學政之試。厥後挈國藩以就試。父子徒步。橐筆以干有司。又久不遇。至道光十二年。始得補縣學生員。府君於是年四十有三。應小試者十七役矣。吾曾氏由衡陽至湘鄉。五六百載。會無人與於科目秀才之列。至是乃若創獲。何其難也。自國初徙湘鄉。累世力農。至我王考星岡府君。乃大以不學爲恥。講求禮制。賓接文士。教督我考府君。窮年磨厲。期於有成。王考氣象尊嚴。凜然難犯。其責府君也尤峻。往往稠人廣坐。壯聲訶

斥。或有所不快於他人。亦痛繩長子。竟日嗚嗚。詰數愆尤。閒作激宕之辭。以爲豈少我邪。舉家聳懼。府君則起敬起孝。屏氣負牆。踖踏徐進。愉色如初。王考暮年大病。痿痺瘖啞。起居造次。必依府君。暫離則不怡。有請則如響。然後知夙昔之備責府君。蓋望之厚而愛之篤。特非衆人所能喻耳。咸豐二年。粵賊竄湘。攻圍長沙。府君率鄉人修治團練。戒子弟講陣法。習技擊。未幾。國藩奔母喪回籍。奉命督辦湖南團練。明年。又奉命治舟師。援勦湖北。府君僻在窮鄉。志存軍國。初令季子國葆募勇討賊。既又令三子國華。四子國荃。募勇北征鄂。東征豫章。屢有成效。而府君遽以咸豐七年二月四日棄養。閱一年而國華殉難於三河。又四年而國葆病歿於金陵。朝廷褒卹。并予美諡。而國藩與國荃。遂克復安慶。江甯兩省。雖事有天幸。然亦賴先人之教。盡驅諸子執戈赴敵之所致也。初國藩以道光閒官京師。恭遇覃恩。封王考暨府君。皆爲中憲大夫。祖妣暨先母皆爲恭人。逮咸豐閒。四遇覃恩。又得封贈三代。皆爲光祿大夫。妣皆一品夫人。今上嗣位。四遇覃恩。又以戰績。兄弟謬膺封爵。於是會祖府君儒勝。王考府君玉屏。暨府君皆封爲大學士。兩江總督。一等侯爵。會祖妣氏彭。祖妣氏王。先妣氏江。仍封一品夫人。嗚呼。叨榮至矣。江太夫人爲湘鄉處士沛霖公女。來嬪會門。事舅姑四十餘年。簪髮必躬。在視必恪。賓祭之儀。百方檢飭。有子男

五人。女四人。尺布寸縷。皆一手拮据。或以人衆家貧爲慮。太夫人曰。某業讀。某業耕。某業工賈。吾勞於內。諸兒勞於外。豈憂貧哉。每好作自強之言。亦或諧語以解勦苦。咸豐二年六月十二日疾卒。九月二十二日。葬於下要里宅後。府君以七年閏五月初三日葬於周壁沖。至九年八月某日。并改葬於台州之貓面腦。府君有弟二人。仲曰上台。年二十有四而沒。府君視病年餘。營治醫藥。旁皇達旦。季曰驥雲。推甘讓善。老而彌恭。無子。以國華爲之嗣。後府君三年而沒。女四人。其二先卒。其二繼逝。諸子今存者。惟國藩與國潢國荃三人。諸孫七人。曾孫七人。於是略述梗概。以著先人懿德。垂蔭無窮。而小子才薄能鮮。忝竊高位。兢兢焉惟不克負荷。是懼云。

海甯州訓導錢君墓表

君諱泰吉。字輔宜。號警石。先世本何氏。明洪武中。有依海鹽錢翁鞠育者。遂承錢姓。厥後徙居嘉興。代有聞人。至文端公而益大。文端公諱陳羣。以侍郎予告。特加刑部尙書。晉贈太傅。君曾祖也。祖汝懋。早卒。本生祖汝恭。安慶府同知。父復。大興縣知縣。君少而苦學。潛心孤往。從兄曰儀吉者。字衍石。博通羣籍。早有高名。君事之。師友之閒。兄弟常以純儒相勉。蓋自弱冠後。遠近已盛稱嘉興錢氏二石云。衍石以翰林改官戶部。擢御史給事中。久處京師。其後客游廣東汴梁。君則以廩貢爲海甯州訓導者。近三十

年與給諫君離多合少。而書問叢沓。咨詢學術。動逾數千言。自周秦諸子。馬班羣史。許鄭詁訓。杜馬典章。洛閩之淵源。唐宋名賢之詩古文辭。以及目錄。校讎。金石。書畫。方志。雜說。一孔半枝。無所不詢。蓋亦無所不辨。或獻一疑而詰難十返。或尙論前哲。評騭時流。雜以嘲詼鄙諺。窮極理趣。故二石家書。蔚然天下之至文也。給諫晚而搜刻經說。刊正譌謬。君自中年。卽好校古書。假人善本。及先輩評點之冊。寫而注之眉端。如史記前後漢書。晉書。集韻。元文類。禮記集說等編。皆勘校數周。一字之舛。旁求衆證。嘗著曝書雜記。以發其凡。嘉慶中。海內猶尙考據之說。尊漢而黜宋。先博覽而後躬行。獨桐城姚氏鼐。恪守程朱。孤行不惑。宗主義理。不薄考據。而二石風指。乃與姚氏相近。其論文亦頗法姚氏。嘗稱以爲字體故訓者。漢儒之小學也。曲禮少儀者。宋儒之小學也。二者皆扶植基本。而宋重明倫。於道爲尤尊。兄弟相與修飭人紀。誦述先德。給諫輯廬江錢氏藝文略。君則纂清芬世守錄。皆表一門之懿行。以播芳馨。而詒典則。先是文端公嘗進呈其母畫冊。高宗賜題十詩。發還原冊。弁書清芬世守四字。逮文端公致仕還鄉。高宗寄賜冊卷詩篇。累數千首。君纂輯此錄。具載君臣賡和。曠古無倫。又紀錢氏十餘世翰墨。及名公鉅儒題詠。上以著祖宗文獻之盛。下以勸後人孝友於弗替。其敘軼事。述彝訓。懇懇乎懼來葉之遺墮。有味哉其

言之也。咸豐庚申辛酉之際，粵賊縱橫浙中。君展轉播遷，最後由江西以達安慶。國藩乃獲與相見，以飄泊兵閒，偷得骨肉完聚也。則爲之破顏一喜。語及世事滄桑，邱墓成毀不可知。則又蠱焉以悲。其明歲同治二年十一月廿日卒於安慶旅舍。將沒，猶以先世文字之責，未能及身整理爲恨。足以知其志之所存已。君配胡氏，誥封恭人。子二：長炳森，道光甲辰舉人。出爲冢兄學源後，前卒。次應溥，以拔貢官吏部主事軍機處行走，加四品卿銜。君以子貴，累封朝議大夫。女六人，孫七人，孫女三人。君所箸又有學職禾人考、海昌備志、甘泉鄉人稿。亂後板燬，僅有存者。古今才智之士，常思大有爲於世，其立言常雄駿自喜。若文章不求雄駿而但求平澹，德業不求施於世而但求善於一身一家，此殆非知者愉快事也。具無所不能之才，斂之又斂，彌晦焉而彌愉快，則其自得於中者必大矣。夫自得之學，惟君其庶幾哉。

新甯劉君墓碑銘

君諱時華，字廷材，號寶泉。先世自江西徙湖南之新甯，曾祖有義，祖儒禹，府學增生。父世貴，太學生。家貧，爲商賈，化居以自給。君生有至性，不忍其父久勞市廛，乃跪請曰：大人宜少休，兄學且有成，弟弱，兒願代父勞而服賈矣。遂遊資於江漢之間，量物度時，廣取而節用。後人而往，先人而歸。家

用阜康。親以大悅。父病。在視終宵。醫者言疲。鹹可生。淡則死。君輒以手承。疲嘗之。味淡。因大哭。父沒。母亦前卒。則推其所以事父者。以事繼母。歸自武昌。繼母不憚。長跪自陳。遲歸之咎。繼母病。服勞達旦。營治藥物。必自其手。不自他人。繼母沒。則推其所以事親者。以事長兄。而蓄季弟。兄病。調護年餘。兄卒。弟後卒。則又推恩。以恤其孀。以鞠其孤子。厥後兩家孤兒。皆成立。兩孀皆旌表於朝。壽皆七十八。涕泣頌君之德。不敢忘云。新甯山邑也。僻在楚南。黔粵之交。巨嶺層巒。穹窿雜襲。鬱撓而不得少舒。自古未聞偉人傑士。出於其間。亦乏甲乙科第。居民治生。纖嗇。有唐魏之風。獨君與江太公一峯。輕財好義。不屑屑於自殖。江君之子諡忠烈者。仕至安徽巡撫。而君之子蔭渠。令爲直隸總督。並有勳伐。爲時名臣。蓋徧陋之俗。一變而山川之氣昌矣。當君初賈異縣。頗求饒益。以娛親心。旣而經紀有方。智足以擴其業。利足以仁其三族。所得資財。隨手散去。壹以濟物爲功。息耗都不訾省。鄉里除道成梁。捐金錢。惟恐不贍。施藥療疾。惟恐不周。嘗遇益陽大水。買小舟拯百人。藁葬數百人。新甯大饑。餼鄰里親舊粟。日半升。全活無算。又嘗修育嬰堂。建忠義節孝祠。皆縣中前此所無。自君創之。城東北有義塚。歲歲常以冬春培其陀坐。而植其仆碑。城南有義塾。器物缺乏。常於君家取給焉。人或謂君歲入幾何。施諸人者什七。而自謀不及什三。

後將難繼。何不頗買田宅。爲子孫稍立基業。君笑謂家有薄田。自足供疏食。焉用多爲。吾以人情爲田。以培養土類爲種。耕不計年。穫不計世。庸詎知留貽子孫者。不更大乎。逮君沒而門內鼎興。君子四人。長名長佑。卽蔭渠也。以拔貢生歷官廣西巡撫。兩廣總督。直隸總督。加兵部尙書銜。次長佐。某官。次長伸。長健。某官。孫某某。曾孫永祚。永祺。天子褒長佑功。贈君暨君之祖父。皆爲光祿大夫。君配鄭氏。暨祖妣某氏。妣李氏。曾氏。皆爲一品夫人。蓋君言於是果驗。爲善之報。抑何捷也。鄭太夫人恭儉寬仁。悉秉夫教。姒婦娣婦。寡居敬之。終身有恩。紀君卒。以道光三十年六月十四日。壽六十有一。太夫人先三日卒。壽五十有九。是歲十二月某甲子。合葬新甯西鄉楊溪村之鸞嶺。昔道光丁未戊申間。江忠烈公嘗爲余稱道蔭渠之賢。兼述其世德。及蔭渠入京聞親之訃。求余文銘其墓。展轉兵閒。久疏文字。越今十有七年。始得表而銘之。銘曰。

舉世奔利。獨行抱義。庸言庸德。感格天地。外救飢溺。內撫諸孤。仁心難懔。百憂一愉。孰云不顯。在幽彌馨。孰云無報。如影隨形。神覲在室。奇福在庭。卽君崛起。爲國干城。削平寇亂。鼎祭鐘銘。自天錫寵。褒榮先隴。夫彝之南。萬山環拱。我表其阡。來者欽竦。

母弟溫甫哀詞

咸豐五年十月。賊目僞翼王石達開。引其黨自湖北通城。竄入江西。別有廣東匪徒曰周培春。葛耀明。關志江者。自湖南茶陵州竄入。與石逆相聚於新昌縣。周培春等投歸石逆部下。願爲前驅。石逆授之僞職將軍。總制軍師旅帥之類。兩逆黨者。合併爲一。江西亂民。從之如歸。贛水以西。望風瓦解。十一月初十日。攻陷瑞州府。明日。陷臨江。晦日。袁州繼陷。遂圍吉安。明年正月二十五日。陷之。余檄副將周鳳山。率九江之師入援。二月十八日。軍敗於樟樹鎮。而撫州建昌兩府。以是月之季。相踵淪沒。國藩躬率水陸諸軍。自湖口入援。而南康又沒於賊矣。九江自爲賊踞如故。凡江西土地。棄之賊中者。爲府八。爲州若縣若廳。五十有奇。天動地岌。人心惶惶。訛言一夕數驚。或奔走奪門相踐死。楚軍困於江西。道閉不得通鄉書。則募死士。蠟丸隱語。乞援於楚。賊亦益布金錢。購民間捕索楚人致密書者。殺而榜諸衢。前後死者百輩。無得脫免。吾弟國華溫甫。自湘中間關走武昌。乞師以拯江西。於是與劉騰鳩峙衡。吳坤修竹莊。曾承堯欽堂。率五千人以行。而巡撫胡公奏請。以溫甫統領軍事。出入賊地。盛暑鏖兵。凡攻克咸甯。蒲圻。崇陽。通城。新昌。上高六縣。以六月三十日。銳師翔於瑞州。由是江西湖南。始得通問。而溫甫亦積勞致疾矣。七月十六日。棹小舟昇疾至南昌。兄弟相見。深夜悄悄。喜極而悲。涕泣如雨。弟疾寢劇。治之多方。不效。至

九月乃痊。復還瑞州營次。瑞州故有南北兩城。蜀水貫其中。劉騰鳩軍其南。溫甫與曾承堯軍其西北。賊於東隅通外援。市易如故。七年正月。予率吳坤修之師。自奉新至東路。始合長圍。掘塹周三十里。溫甫則大喜。吾攻此城。久不舉。今茲事其集乎。不幸遭先君子大故。兄弟匍匐奔喪。入里門。宗族鄉黨。爭來相弔。亦頗相慶慰。國藩得拔其不肖之軀。復有生還之一日。溫甫力也。溫甫既出嗣叔父。以咸豐八年二月。降服期滿。復出抵李君續寶迪菴軍中。李君與溫甫爲婚姻。益相與講求戎政。晨夕諮議。是時九江新破。強悍深根之寇。一掃刮絕。李君威名聞天下。又克麻城。蹶黃安。喋血皖中。連下太湖。潛山。桐城。舒城四縣。席全盛之勢。人人自以無前。師銳甚。溫甫獨以爲常勝之家。氣將竭矣。難可深恃。時時與李君深語。悚切。以警其下。亦以書告予。盱上。竟以十月十日軍敗。從李君殉。難廬江之三河鎮。嗚呼痛哉。曩吾弟以新集之師。千里赴援。摧江西十萬之賊。而無所頓。今以皖北百勝之軍。萃良將勁卒。四海所仰望者。而壹覆之。而吾弟適丁其厄。豈所謂命耶。常勝之不足深恃。吾弟之智。既及之矣。而不肯退師以圖全。營壘以十三夜被陷。而吾弟與李君。以初十之夕。併命同殉。又不肯少待以圖脫免。豈所謂知命者耶。遂綴詞哭之。詞曰。

鱣鱣我祖。山立絕倫。有蓄不施。篤生哲人。我君爲長。魯國一儒。仲父早世。

有季不孤。恭惟先德。稼穡詩書。小子無狀。席此慶餘。粲粲諸弟。雁行以隨。吾詩有云。午君最奇。挾藝千人。百不一售。彼羸穢者。乃居吾右。抑塞不伸。發狂大叫。雜以嘲詼。萬花齊笑。世不吾與。吾不世許。自謂吾虎。世棄如鼠。相舛相背。逝將去汝。一朝奮發。仗劍東行。提師五千。往從阿兄。何堅不破。何勁不摧。躍入章門。無害無災。壘篋鼓角。號令風雷。昊天不弔。解民銜哀。見星西奔。三子歸來。弟後季父。降服以禮。匝歲告闋。靡念苞杞。出陪戎幄。匪辛伊李。既克潯陽。雄師北邁。剗潛剡桐。羣舒是嘷。豈謂一蹶。震驚兩戒。李既山頽。弟乃梁壞。覆我相人。君子六千。命耶數耶。何辜於天。我奉簡書。馳驅嶺嶠。江北江南。夢魂環繞。卯慟抵昏。西悲達曉。莽莽舒廬。羣凶所窟。積骸成岳。孰辨弟骨。骨不可收。魂不可招。崢嶸廢壘。雪漬風飄。生也何雄。死也何苦。我實負弟。茹恨終古。

予於道光甲辰寄諸弟詩有云。辰君平正午君奇。屈指老
玩真白眉。辰君謂弟澄侯。生庚辰歲。午君謂溫甫。生

壬午歲。老玩
即玩甫也。

吳君墓志銘

吾邑吳君榮楷。既以道光辛丑成進士。將之官浙江。乃手其先人狀請曰。吾父母棄養十一年矣。窳窳之事。粗已安吉。尙未有以銘幽室。子其爲我銘之。固辭不獲。按狀。先生姓吳氏。諱文深。字致遠。相鄉人。曾祖文章。祖太若。父振世。皆以愿謹稱。家故饒。振世公既老。攜資客遊常德。先生從之行。

留明遠翁家居。明遠先生兄也。常德去湘鄉千餘里。逾二年而振世公卒。鄰里無行者。利其有。率衆闖然至喪次。叫囂隳突。雜以胥役。先生雞斯徒。跌擊胸如壞牆。號泣向衆曰。孤兒在此。環顧無功。總之戚。無密友幹僕。若輩不哀吾喪而迫人於難。是可忍乎。且胥役何爲者。孤兒請以泣血。饑懸官之庭矣。衆瞠視各鳥獸散。乃部署喪事。從容扶櫬歸湘。時先生年十六歲也。既歸。事母益謹。然家益落。遂與明遠翁經營生計。惟母養特豐。他則皆從儉約。久之。復稍裕。吳氏自鼎革後。謫牒散佚。先生力爲倡修。特徵詳核。數年而成。既又倡修家祠。明遠翁捐基地數十畝。先生竭力締構。夫其拮据漂搖之際。旁午未遑。而能敬宗收族。先其大者。可謂知本矣。道光某年某月某日卒。年八十有四。葬某縣某里某原。配宋孺人合葬焉。宋孺人少先生十餘歲。既來歸。尤耐艱劬。振世公之客常德。孺人不逮事也。逮事姑。曲意承歡。如恐失之。性好卹窮困。鄰婦紡績無資。則罄所有給之。先是明遠翁常外出。有子名榮林者。絕穎異。先生擇師督讀。視猶己子。遂以成立。爲名諸生。已而榮楷兄弟皆從之受業。孺人之視榮林也。不以爲姪也。以爲師也。邑人咸謂先生之教子。孺人實贊之云。某年月日以疾卒。年六十有一。子二人。長榮楫。邑庠生。次卽榮楷。孫光煦。邑庠生。次某。次某。女孫七人。銘曰。

少而禦侮豪強伏。長而克家宗族睦。耄而韜光訥且樸。訥乎樸乎。黑而雌者福乎。斧之藻之。舟之方之。夫子之協琴瑟以將之。宰樹青青。有桐有梓。我銘諸石。以妥泉宮。以昌其孫子。

彭母曾孺人墓志銘

天道五十年一變。國之運數從之。惟家亦然。當其隆時。不勞而坐獲。及其替也。憂危拮据而無少補救。類非人所爲者。昔我少時。鄉里家給而人足。農有餘粟。士世其業。富者好施與。親戚存問。歲時餽遺繼屬。自余遠遊以來。每歸故里。氣象一變。田宅易主。生計各蹙。任卹之風日薄。嗚呼。此豈一鄉一邑之故哉。王姑彭孺人。吾祖之伯姊。其冢婦。又吾姑也。兩世之好。視他戚尤厚已。王姑之未嫁也。事吾曾祖王父母以孝聞。既適彭宜仁先生。相夫敬克厥愛。無片言稍忤。自吾成童以後。王姑已五十餘。其堂上舅姑。八十有奇矣。每見王姑奉甘旨。未嘗不潔。議酒食未嘗不豫。大而課讀勸農。未嘗不營慮。小而廁牕灑掃。未嘗不躬親也。蓋余所見賢母。無如王姑勤者。早歲物產殷饒。內奉菲薄。外圖豐潔。比年以來。稍稍歉絀矣。己亥秋。余將入都供職。走辭王姑。視其庭除。氣象不侔。憫其愈勤。又驚其衰。爲之泣。王姑亦泣。蓋心知其不可復見。而哽咽不能言也。竟以次年春卒。豈不悲哉。王姑生乾隆二十九年甲申十一月十七日。卒於道光二十年庚子。

三月二十三日壽七十有七。葬湘鄉二十四都西坤山陽首辛趾乙。子三人。長慶齡。予姑夫也。先孺人二年卒。次慶吉。次慶也。好學能文。孫六人。毓素。毓楷。毓橘。毓椿。毓杖。毓麓。女一。孫女一人。銘曰。

懿我王姑。既莊以嫺。佩管舟鱗。德容棣棣。勛哉夫子。儷光儷鳩。五十餘載。无遂有終。曷瘁厥躬。言育我鞠。無恥我壘。實繁旨蓄。離離令問。匪爾伊遙。貽澤之蔭。何幽不喬。南山畢萃。宰樹青青。弗騫弗拜。萬代千齡。

余安人墓志銘

攸縣余世校。客京師五年。聞母訃。將奔喪。以銘墓之文來請。且曰。世校生不能侍槃匱。歿不能視含斂。是罪人也。先生幸次吾母淑行。以光幽室。按狀。安人姓譚氏。衡山舉人昌明之孫。廣西巡檢禹門之女。七歲喪母。事繼母以孝聞。適攸別駕余君。君山瀑順衷和。翼翼如也。久之。別駕君之漢陽分府任。以家事屬安人。時堂上舅已棄養。姑老矣。諸子弱小不識事。安人謀初甚終。鉅細必躬。祭必虔奉。免薨必時。委諸子於學。朝而蠲饘禮師。夕而課男。旋課女。課畢而紡績。而經營錢布。如是者十餘年。而精力衰矣。道光辛丑某月某日。以疾卒。春秋六十有七。以某年某月某日。葬某縣某里某原。子四人。長世柄。次卽世校。廩貢生。次世芳。次生春。縣學生。女一。孫九人。某某。世校之入都也。安人拊其背而戒之曰。去去強飯。鄉里齷齪。終不

得進取。京師文物殷鱗。賢士大夫繹繹如繁星。汝往勸哉。名自可致。學可染人。道德有軌塗可循。而青紫可拾也。往矣。勿吾念。今世校雖不得爵位。而業日進。聲聞日敷。謂非安人之教哉。嗚呼。可謂知其大者已。是宜銘。銘曰。

維車有輔員於輻。維矢有房利於鏃。維壺有賢。維家之福。光光別駕。亦載其贄。悃悃碩人。既詒斯肆。雖則詒肆。無儀以無蹟。無蹟於山。曰巢於顛。口卒瘞。令手復脗。鳳之雖兮。谷之遷兮。不得反哺。令涕漣漣。銘幽表淑。令千萬年。石不爛。山不騫。

陳岱雲妻易安人墓志銘

道光二十四年正月。陳君岱雲喪其配易安人。則大戚。哀溢於禮。已而謂國藩曰。子知吾之哀乎。吾祖自康熙間。由茶陵徙長沙。六世百餘年。今其存者五人。吾門祚之衰可知也。吾父之沒。至今十六年。而死亡相繼。凡十三役。吾母之不能一日以歡可知也。吾妻從宦五年。既沒而斂。求衾衣無一完者。吾之貧可知也。人之居此世者。謂何。吾欲不過哀得乎。則又曰。吾妻之賢。子宜有所知。請爲銘。余曰。然。固知之。蓋安人卒之前一歲。陳君嘗大病。余朝夕存問。備得安人侍疾狀。他日。又得陳君所述。以是頗詳。陳君之病。凡三閱月矣。安人單憂極瘁。衣不解帶者。四十餘日。凡可以自致者。

無弗致也。久之。則禱於室神。求促其身之齡。以益夫壽。猶不應。六月丙戌。乃割臂和藥以進。當是時。安人之母弟易光蕙。及陳君之友三數人者。皆在。惶愕不知所爲。國藩則仰天歎曰。陳氏累世。賴以不墜者。獨此人耳。而有他乎。然已無可奈何。明日。疾乍平。則皆訝。光蕙覘安人衣袖血蹟。稍廉得之。不敢以詢。又數日。疾漸瘳。乃詢之。安人曰。其有之。此不幸事耳。勿復言。傷病者心也。道微俗薄。舉世方尙中庸之說。聞激烈之行。則訾其過中。或以罔濟尼之。其果不濟。則大快奸者之口。夫忠臣孝子。豈必一一求有濟哉。勢窮計迫。義不反顧。效死而已矣。其濟天也。不濟於吾心。無憾焉耳。安人本醴陵人。居長沙。處士昌綱之孫。歲貢生履元之子。以孝謹特爲父母所愛。生二十二歲矣。而難其適。有王秀才者。自負知人。謂歲貢君曰。茶陵陳某。神仙人也。卽擇壻。不可失此子。今貧不能衣食。數年後。當爲達官。不者。且扶吾目也。是時陳君之元配。沒二年矣。旣歸陳。不逮事舅。以事其父者敬姑。而以其母者致愛焉。以是得姑歡。凡修所職。皆衷於大體。無鉅細必慤。詩曰。何有何無。黽勉求之。茲可謂賢矣。况有至行。足感神明者哉。安人生於嘉慶某年月日。年三十有一。生子男二人。長遠謨。次遠濟。生四十日而安人卒。女一人。將以某年某月某日。歸葬於某縣某鄉某原。余旣重其請。乃先期銘之。以激懦者。亦少塞陳君之悲。陳君名源充。今爲翰

林院編修纂修國史也。銘曰。

民名有天惟所治。燾我以生託其下。子道臣道妻道也。以義擎天譬廣廈。其柱苟頽無完瓦。自今無以身代者。有一於此雙蓋寡。憂勞積劇焉可支。天之所隕非人尸。跖修淵短誰敢訾。銘茲大節貞厥垂。有他淑行以類推。

新化鄒君墓志銘

君諱興愚。字子哲。鄒姓。先世由江西再遷至湖南新化居焉。有瑁玉者。以選拔貢生。官永明縣教諭。是生祖詢。縣學生。於君爲高祖。曾祖某。祖某。皆不仕。父某。家貧。客遊陝西紫陽。族子有先家於是者。遂因其戶籍。補紫陽縣學廩膳生。生二子。長興魯。次卽君。君生數歲而廩膳君卒。依母曾氏。力食僅存。痛繩於學。年十六。仍補縣學生。二十五。舉道光庚子陝西鄉試。甲辰。再上公車。不第。歎曰。吾不得祿。餓死無所損。然如吾母何。益發憤不歸。日刻錢以食。爲文務極思。同業者或不能究其指。明年乙巳二月。疾作。不得與禮部試。竟以六月九日卒於京師。年三十耳。君性躑直。糾友之違。盡言無異。有餽以財。辨義無小。非其義。卻之無大。安貧若天性。然庚子赴省試。其師陳僅資之金。君盡以金奉母。而自囊錢八百。負布被徒步露宿。行千里。僅益敬之。僅故爲紫陽令。見君文。奇之。憐愛如親戚。月繼米贍其家。久之。僅徙官他縣。移君家就養官所。而別以資贈君之京師。君且死。泣曰。

吾負大恩未報命也。遂絕。既卒。其友人江忠源職其後事。其從兄子律歸其喪紫陽。將立其兄子隆岱爲嗣。而國藩買石先事爲銘。銘曰。是人非蚓。生世實艱。爰有狷者。伯夷是班。有投以幣。擲棄如菅。或泰於取。負恩如山。恩不果酬。母不終將。又寡厥配。厥氏維黃。僅遺子息。天其俾臧。吾言可信。納券於藏。

單縣典史張君墓志銘

君諱鼎五。字薌陞。世居浙之蕭山。會祖朝琮。直隸通永道。祖文瑞。山東青州府海防同知。考學斯。廣東主簿。主簿君兄弟三人。長偉山。次條三。皆不仕。條三以子相崖官汀州知府故。贈官如其子。主簿君官粵。噤不一施。遽卒。君時五歲耳。依母童安人。萬里返葬。孤貧赤立。斬焉自修。久之。乃遊楚。依從兄黃陂令相崖。相崖由楚徙豫。三遷而官汀州知府。君壹從焉。居亡何。荆梁教匪蠱起。蹂躪三省。兵餉糜萬萬。朝廷議民有輸金縣官。得除爲吏。嘉慶四年。君由是官山東。署沂水縣丞。補單縣典史。單故多豪右。素慢易。尉君抑桀扶仄。峻拒干謁。傷恤獄囚。痛與糞除。漉其污溼。而時其凍餓。後三十年。君退歸。囚有流紹興者。塗遇君。匍伏叩頭。君錯愕。囚曰。某單縣人也。清獄之惠不敢忘。官單十年。歎曰。尉所得爲者。吾旣爲之矣。吾所欲爲者。豈尉謂哉。聞竟移病歸。而山東舊僚酷慕君。累書招致。乃復薄遊齊。

魯傳客淮泗之間。至七十二歲。始杜門不出。又一紀。乃考終云。君於孝友。若趨利。然初喪父。童安人撫之。積劬僅存。內外無倚。寒飢力學。夙興。母爨。汲。君負薪。恐傷母手。盡拔芒刺。然後之塾。或竟日無所得炊。母子對泣。已而互慰。汀州君以事牽連被劾。君營護奔告。凡四晝夜。行千餘里。卒脫汀州君。於是人人翕然。伏君之內行也。道光壬寅十月四日卒。配陳安人。祇順敦儉。見者師效。子男子三人。長錫戊。浙江鄉試舉人。次百揆。以一甲進士通籍。爲翰林院編修。次百衢。殤。女子三人。長適某官。某次適某官。某。次適某。孫某某。百揆之舉於鄉。與余同年。相善也。以某年月日葬君某縣某原來徵銘。銘曰。

析柁作楠。蒿作梁。大小易位。今古傷。有嘉一尉。仁且彊。皓首卑栖。不得驤。身之乖時。遭厥子。愼終下。臧魂藏此。我最其行。垂孔軌。萬千億年。無壞毀。前海甯州知州長沙李君母黃宜人墓志銘

宜人。善化黃君孝職之子。長沙李君天錫之婦。敕贈奉直大夫。熙臣府君之妻。而浙江海甯知州象昺之母也。海甯之爲良吏。楚之賢者。與浙東西之士庶。莫不知聞。而海甯君曰。非吾之能。繫吾母之勛。宜人之歸李氏。家微也。歲入不足自贍。贈君則奔走。以取給。大府之從事。郡縣吏之賓客。裘而往。葛而不歸。朔而寓書。再晦而不達。如是以爲恆。宜人挈鉅省細。壹不

假人督二子入學。晨有責。夕有程。就傳之所需。不足。則貨田宅資之。海甯以選拔貢生。廷試爲縣令。每獄成。宜人則詢曰。毋已寃乎。族黨有來官所者。則曰。毋貧乎。卽有平反。而餽飲厚。則宜人喜。卽無所平反。或餽飲稍廉。則愠見於色。故海甯之發名樹績。雖贈君亦嘗曰。宜人之力也。海甯以道光戊戌奉贈君之喪歸葬。宜人雖老。習勤不改。又六年。甲辰正月六日。年七十二以卒。卽以其年某月日。葬某鄉某原。有子二人。長象晟。先十年卒。次卽海甯。孫六人。某某。會孫二人。某某。宜人以道光十四年。冊立孝全皇后。恩勅封孺人。卒後一年。皇太后七十萬壽。天子推恩錫類。迺得誥贈宜人。又二年。乃諡余文其幽。將追事焉。末世稱述列女。好道其奇特者。異則異矣。而難爲式也。方贈君客遊四方。每出屬曰。上吾父。每下吾子。以付女。及宜人侍姑疾。三年無絲毫異志。舅病大漸。贈君自客遠歸。越夕而遭喪。大慟不知所爲。而宜人於附身之具。已夙嚴矣。夫其教子也如彼。而其事親又如此。此殆庸行。無足標絕者。幼然而難可幾矣。銘曰。洞庭之南。有賢刺史。龜食筮祥。葬母於此。誰與銘者。漣水曾氏。深刻大書。以詔無止。

適朱氏妹墓志

適朱氏妹。吾父之第三女子也。與而病痾。父母恐不實于壻。特慎許人年

二十二矣。友人某告余曰。聞若爲女弟。擇所歸。有朱氏子詠春。愿而敦。訥而慈愛。必得佳壻。莫良此子。國藩卜之。吉。請於父母而嫁與之。道光十九年十月也。是歲國藩以初廁詞臣。乞假家居。而朱氏之諸昆。亦適有舉於鄉者。兩家父母大父母各無恙。里人頗稱門祚之盛。親迎之夕。姻婭族黨。會者數百人。越三日。內無長幼。皆以爲賢。外無戚疏。皆以爲祥。比及反馬之期。則舅姑之所職者。悉以委決新婦。妹故明慧。粗解書數。條分件布。咸有節文。由是遠近謂朱氏有賢幹婦矣。二十六年丙午。以產難卒。凡春秋二十有九。室於朱者八載。有子一人某。卽於九月某甲子。葬於某縣某里某山。吾姊妹四人。季者早殤。二長者竝窮約。不得怡。獨朱氏妹所處稍裕。而少瘳痼疾。又離婉厄以死。何命之不淑也。妹卒以八月晦日。不踰月而吾祖母棄養。國藩竊祿京朝。發一家書。而兩遭期功之喪。又何痛也。於是泣識其略。使詠春追埋諸幽。且敘其內外家之系。而聲以銘詩。以宣吾悲。銘曰。

有女會姓聖爲宗。父班泮水祖辟雍。兩世大夫帝褒封。母江夫人勗且恭。鞠茲惠質艱厥從。嬪朱其先國比莛。納夫方軌轡如組。君舅鎮湘鄉所舉。銘者母兄滌生父。濫躡朝官無寸補。

滿妹。吾父之第四女子也。吾父生子男女凡九人。妹班在末。家中人稱之滿妹。取盈數也。生而善謔。旁出捷警。諸昆弟姊妹竝坐。雖黠者不能相勝。然歸於端靜。笑罕至矧。道光十九年正月晦日。以痘瘍。明日。吾兒子楨第相繼亡。妹生於世十歲。兒三歲也。卽日瘞諸居室之背。高帽山之麓。吾母傷弱女。與冢孫。哭之絕痛。聞命諸子曰。二殤之葬也。無碑以識之。卽墳夷級陵。誰復省顧者。國藩敬諾。亡何。繫官於朝。公有執。私有孺。久不得卒事。越八年。而適朱氏妹徂逝。以其新悲。觸其夙疚。愴然不自知。何以爲人也。於是粗述一二。遺家人植石墓北。且綴之辭。使有垂焉。銘曰。

荆門州學正郭君墓銘

物有初阜。或奮其終。有馭於後。而窒其躬。陶公之山。潛蟠冊載。雙雛雲興。吐騰滄海。持鐸再徇。當陽荆門。祁祁學子。如飢授飧。刑獄有箴。扇仁孔永。胡德之遐。光不長炳。入龍岡下。斑竹原中。埋我銘語。載奠幽宮。

善化夏母楊宜人墓志銘

宜人。甯鄉縣學士楊君開梅之孫。處士應灼之女。善化地贈奉直大夫夏君諱某之子婦。贈奉直大夫諱某之配也。宜人在家。則溫恭孝豈。偏獲於親。擇所宜歸。莫良夏氏。旣歸。事舅馳贈君。及姑劉太宜人。逆志而籌之。未

命而赴之。甘旨之調。不躬不進。贈君前所配黃宜人者。已早卒。僅遺一女。有兄與嫂亦卒。遺三子。贈君又仍歲多病。家無鉅細。壹委宜人。宜人共潔祭祀。斟藥禮醫。裁贏補絀。公私井井。視前女如己女。不敢毫末替焉。視己子如從子。不敢毫末加焉。督諸子之學。日省而月稽。師塾之饑。豐倍其室。就試於有司。出必戒。反必詰。其見錄也。悅而不盜。其黜也。赦而不怒。以是諸子皆底於成。道光十七年。次子家泰舉於鄉。又三年庚子。長子家鼎舉焉。又三年癸卯。季子家升繼之。又二年乙巳。家泰登名於禮部。主政於吏部。值皇太后七十聖節。天子大孝錫類。遂得覃封。褒封兩世。而家鼎亦以是年。充景山官學教習。蓋自贈君之歿。至是二十年。中間郡縣行省之試。獲雋者無歲無人。而婚嫁喪紀之役。亦薦至不絕。皆宜人一心營治。而亦以勞肆甚矣。道光二十六年八月十九日。以疾卒。春秋六十有八。卽以其年十二月某日。葬於甯鄉黃花塘鳳形山之陽。有子男六人。長次卽家鼎。家泰。又次家豫。太學生。又次家謙。早卒。又次卽家升也。又次家賁。出嗣從祖兄弟萬程後。女二人。長適蔣。前卒。次適侯。孫男十二。降服孫二人。孫女八。曾孫女二人。宜人寬仁周摯。救困如焚。深達大義。不徇私愛。疾篤。顧言曰。寄語鼎兒。泰兒。努力當官。無以家爲念。以二子時在京師也。將奔喪。以銘屬國藩。越二年。乃銘之。而追內諸幽。銘曰。

杞恪賓周。別氏維夏。承馥遠牟。踵興達者。宛宛女宗。亦大其閭。迪將多子。竝聘天衢。諸孤遺經。十年手澤。影其羣起。下報我特。報以吾職。不告實勞。職之靡負。厥伐斯高。鑄於樂石。千世其牢。

祖四世元吉公墓銘

道光歲戊申。家叔父爲太高祖考妣署祠宇。其明年。又爲修其墳域。乃郵書於京師。命國藩記其源委。國藩於公爲六世孫。公之行事不盡悉。謹按家乘。及傳聞於祖父者。以表於公之墓道。公諱應貞。字元吉。遷湘四世祖也。少貧。手致數千金產。室廬數處。盡以予其子。而自置衡邑之靛塘灣田四十畝。以老焉。公沒後。子孫歲分其租。以爲常。至嘉慶歲丁巳。家祖及族長尊三。以彰二公糾族之人。議積一歲之租。以爲公清明之祀。今所置圳上之田是也。家叔父所修祠宇在焉。而靛塘灣之田。族之人。又於嘉慶壬申。議永爲公祀田矣。獨公之墓未修。族衆憂之。家叔父乃慨然任之。糾工不一月。竣。距公沒時。已八十餘年矣。公生於康熙甲戌年二月廿三日辰時。沒於乾隆甲申年八月十五日巳時。配劉太孺人。生於康熙乙亥年三月十二日未時。沒於乾隆甲申年三月初二日子時。合葬於湘鄉大界鄉羅家屋場後之陽。子六人。長楚材。次輔臣。次文炳。次明德。次兼山。次容若。國藩乃公次子輔臣公之元孫也。銘曰。

昔公創業。源遠流長。服疇食德。寢熾而昌。菴龍鬱積。有耀其光。千秋宰樹。終焉允臧。

國子監學正漢陽劉君墓志銘

道光二十有八年九月十八日。吾友漢陽劉君卒於家。年三十有一。踰月。訃至京師。國藩爲位哭於舍旁道院。遂徧告諸友。皆相弔。哭有失聲者。明年某月某日。葬於某里某山。劉氏先隴之次。國藩乃爲銘。伐石於都下。寓舟浮江。以達於漢。既不及事。則追而埋諸墳之趾。君之爲學。其初熟於德清胡渭。太原閻若璩。二家之書。篤嗜若渴。治之三反。既與當世多聞長者游。益得盡窺國朝六七鉅儒之緒。所謂方輿六書九數之學。及古號能文詩者之法。皆已規得要領。采名人之長義。與己所考證。雜載於書冊之眉。旁求秘本鈎校。朱墨竝下。達旦不休。久之。稍損心氣。又再喪婦。遂疾作。不食。君自傷年少羸弱。又所業繁雜。無當於身心。發憤歎曰。凡吾之所爲學者。何爲也哉。舍孝弟取與之不講。而旁驚瑣瑣。不以慎乎。於是痛革故常。取濂洛以下切己之說。以意時其離合。而反覆之。先是君官國子監學正。薄有祿入。而婦翁鄧氏資之數千金。歲益饒給。至是盡反金鄧氏。而移疾罷官。將家居。食力以爲養。蓋浩然自得以歸。歸未數月而奄。及於死。可哀也。始君之歸。嘗語國藩。沒世之名不足較。君子之學。務本焉而已。吾

與子做精於讐校。費日力於文辭。以中材而謀兼人之業。傲倖於身後。不知誰何者之譽。自今以往。可一切罷棄。各敦內行。沒齒無聞而誓不復悔。國藩敬諾。其後君歸。果黽勉孝恭。族黨大悅。規畫家政。條議麤具。而君遽卒。命之永不永。不足憾。獨其事親從兄之志之美。且堅。而不克竟其事。茲其可悲者也。而國藩之無似。不克踐死別之約。以一塞故人地下之望。此又余所深恥而切痛者也。君諱傳瑩。字椒雲。會祖良琨。祖方仍。世有隱德。父正柏。以君官封徵仕郎。母葉氏。封孺人。始娶湯。繼娶陳。皆前卒。終娶鄧氏。君之反婦家金。鄧贊成之。無子。以兄子世圭嗣。君之學業。其考核載於書冊之眉者。與其詩古文。皆不以刊布。惟搜得朱子所輯孟子要略一書。國藩爲校刻行於世。修君志也。銘曰。

竝吾之世。江漢之濱。有志於學者一人。其體魄藏於此土。其魂氣之陟降。將游乎在天諸大儒之門。敢告三光。幸照護乎茲墳。

錢塘戴府君墓志

錢塘少司馬戴君。既葬其親。資政府君王太夫人。六年未有以聲諸幽。乃以命其友會國藩。國藩爲譜其系。述其行。紀其恩遇。因及其息。以識其葬。其系曰。周植湯。後於宋。幽王時。宋公諡戴後。遂以公族爲氏。聖與德。扶經闡教。襲爲通儒。傳至南唐。安爲銀青光祿大夫。上柱國。諡忠恭。子奢。始居

新安之隆阜。孫處居上溪口。仍世爲徽人。至明崇禎間。有一美者。仕浙江。都指揮經歷。子孫遂爲錢塘人。會祖永莖。祖承徵。考佳瓊。兩世皆封朝議大夫。朝議君生四子。長道亨。鄉試爲舉人。次道立。議敘府同知。次道泰。府君諱道峻。字升甫。其季也。王太夫人考曰通泗。贈奉直大夫。其門族自爲風氣。杭人甲乙目之。其行曰。府君綜洽羣書。不以一流自域。不與橫目之民爭利。不與逆撓者校曲直。改葬長兄之墓。迎主於家。而時其祭。從父墓崩。易棺而遷葬。又葬其姊之夫。又葬其師之無主後者。少嗜碑碣。繼耆古扇。聚以千計。老耆古金泉刀布幣。兼收博考。既寄於三者。乃冥於萬物。陶然自娛。不爲執必。凡譽毀窮通。有亡壹等。齊之終其身。不以關於慮也。太夫人操作暇豫。而供具倍於衆手。御下無甚色。而僕婢肅然。嫁衣燬於火。而無戚容。將死而無哀語。其恩遇曰。府君既補學官弟子。七試於鄉。而七黜。以子熙貴。敕封儒林郎。誥封朝議大夫。既沒而熙躋卿貳。國恩例晉資政大夫。太夫人初封安人。繼贈恭人。亦例晉夫人。其息曰男子三人。長卽熙。以翰林三直南書房。再視廣東學。累官至兵部右侍郎。次曰煦。府學生。明天官算術。次曰燾。議敘府同知。女子四人。皆歸士族。孫十一人。有恆府學生。以恆之恆。縣學生。可恆。如恆。果恆。其恆。斯恆。所恆。自恆。爾恆。孫女三人。會孫三人。兆登。兆春。兆衡。會孫女一人。其葬曰。太夫人卒於道光十五年。

年四月十八日。年六十七。明年九月十七日。葬於西湖之三台山麓。越七歲。道光二十二年三月十七日而府君卒。春秋七十有三。卽以其年十二月十一日。穿太夫人之域而合葬。旣固旣虔。永貞無紀。銘曰。

錢王湖濱有一士。十年內廷書畫史。會使嶺南萬里行。又坐樞府統九兵。是爲府君之令子。實奉老親葬於此。旣葬六載。吾爲銘。下告誰何。上日星。

崇仁謝君墓志銘

君諱廷恩。字拜賡。姓謝氏。少則貧甚。讀書裁盡論語。遽去而之農。又之商。南入閩。西入蜀。逐物貴賤。轉徙常贏。嘗與鄧氏俱爲賈。主計者誤以金六百入君。君密歸其金。而戒主計者更易簿記。鄧氏由是厚德君。遠近布聞。人人爭欲相倚助矣。亦有天幸。所居恆獲。累致巨萬。羨輒散之。爲縣建義倉。構廩四十二間。貯穀萬六百石。捐金凡千三百斤。建育嬰堂。捐金二千兩。家置宗祠。捐穀若干斛。郡縣立羣祀廟。捐錢若干緡。學官於新進生。例取束修之資。新進生或貧乏無所出。則又爲捐四百萬錢。君弱冠孤寒。蝟蝟赤立。商賈所入。盡委義舉。苟利於人。不以絲毫自爲顧計。苟力所能。劬勞百於人。不辭也。自太守縣令。爭欲致君。君終不一私謁。邑有大役。長官杖任。羣目相屬。君亦不以他人規我。稍爲辟縮。蓋行之五十載。靡財不可算。而君年亦七十矣。先是崇仁有黃洲橋。屢修屢毀。以資用浩博。莫敢大

興。至是君出任之。錐石鎔金。堰水淘沙。衆匠束手。卽君計畫。橋成。廣一丈九尺。袤四十七丈。費白金六萬而強。以七十二歲而經始。四載而畢。畢工二載而君卒。壽七十有七。道光二十一年九月廿四日也。祖亮彌。考上許。並贈中憲大夫。君以急公聞於朝。議敘巡檢候選。又以子貴。贈中議大夫。配周氏。劉氏。皆贈淑人。子蘭階。候選州同。蘭生。進士工部郎中。蘭英。優貢生。蘭墀。刑部員外郎。蘭黻。縣學生。女五人。孫男子十二人。女子九人。以某年某月日。葬於某鄉某原。既葬之幾歲。蘭墀屬予爲銘而追事焉。銘曰。民之豐約。有尸在天。彼富而吝。終或餒焉。貧而能施。積乃如山。徒手十載。富埒周公。一毫匪義。神鑒厥衷。聚有神監。散有天視。利濟宏多。人天駢喜。佔畢豈久。僅盡魯論。因心之矩。絜其經綸。光儀既整。奕世承福。載厥徽猷。以愧儒服。

劉母譚孺人墓志銘

國藩不肖。幸得內交於當世之通才碩學。仁人君子。不爲不多。而莫夙於里中。劉蓉。孟容。誼亦莫隆焉。以是爆於人。人亦爆之。以謂兩人者。天下之至愛也。自余挂名朝籍。待罪六官。去父母之邦。十有四年。孟容之中屢儀度。不可接於吾之目。其語笑不可際於吾之耳。僅以書問勞遺。然且闊絕。或望甚私。怨喁喁。咸豐二年六月。先太夫人棄養。孟容亦以五月二十八

日喪母。國藩匍匐來歸。兩人者相遇於縣門。斬焉對泣。自傷老大。又離凶
疚。而是時粵中逆賊。方渡湖而北。聯巨艦數十里。旌旗蔽江。譎言雷動。其
後遂破漢陽。陷武昌。明年。又殘九江。掠安慶。入江甯揚州。而據之。烽火達
於淮徐。天下震駭。國藩以天子命。治團練於長沙。挾孟容以俱出。苦語窮
日夜。相與悲憤追憶。誠不意世變遽已。抵此。患氣之積。有自來也。五月辛
亥。孟容將葬母於樂善里。莫冲山之陽。乃不敢自致。謹致其太公之命曰。
四方多難。而陵谷有不可知。汝既獲私於會君。葬有日。宜從會君謀。所以
識其葬者。遂督銘。銘曰。

譚有淑妃。衛姜之媿。仍世不墮。名媛紹之。來室於劉。莫逮先姑。繼姑曰謝。
投溫承愉。胡洪胡瑣。室事敦我。未匱先防。有置無頗。夫子人傑。是名振宗。
畸以平劑。如羽諧宮。廣賚窮民。鄉亭大悅。身無華御。終年補綴。魚菽尸祭。
蠲饘必躬。孝婦篤敬。遂與天通。篤生五子。長其蓉也。徑睇淵騫。吾見亦寡。
二仲竝塲。化爲黃土。次葬次蕃。驂駕如舞。三女婉婉。皆嫁士人。兩孫葩茁。
玉立振振。長曰培基。幼者培屋。女孫惟四。不書誰某。乾隆辛亥。託生十月。
六二春秋。返其大宅。受形之初。萬邦太和。畢命之歲。天地干戈。生死盛衰。
難究難詳。感慨泐銘。以詔茫茫。

湘陰郭府君墓志銘

君諱家彪。字春坊。郭氏。相陰人。生而溫約夷愉。與人無競。不苟爲和。翁亦不爲介。介。蹕異之行。卒然投之事變。若不克辨。其是非曲直也者。及夫羣疑劫劫。徐出一言折之。關開節解。風生冰釋。雖強辯者。常默然而內自詘也。曾祖遇傑。貤贈奉直大夫。祖熊。貢生。誥贈奉直大夫。考詮。世。縣學生。世父世遵。縣學廩膳生。世遵無子。以諸子家噉爲嗣。早世。乃復以君爲嗣。家故饒贍。諸父豪宕好施。或日費數十萬錢。無所惜。君亦夷然。不爲有亡。顧慮。親故假貸。每盈其意。或他人相稱貸要君。一言爲質。及期。責償於君。輒量償之。又急。則又旅歸之。歲中爲人理宿逋。率三四役。久之。往往不讎。則毀其約契。會歲大稔。家以中圯。君故夙於澹泊。豐約不以易其度。布衣糲食。蕭然自得。益務濟人。廣儲方藥。病者踵門求乞。手劑與之。自尋常草木。馬勃牛溲。以至丹砂鍾乳。千歲之苓。尙方之稜。諸奇珍物。可致與不可。卒致無所不蓄。蓋亦無所不施。其尤貧者。輔以羞餌。使人日再問焉。疾革。躬三問焉。君沒後。里人劉氏言之。涕泗交頤也。君生以乾隆五十九年八月廿四日。沒以道光庚戌二月十六日。春秋五十有七。配張安人。少君二歲。以道光己酉七月十六日。先君沒之七月而卒。春秋五十有四。張安人柔婉懿恭。旣篤旣靜。長沙舉人正旭之孫。永州府儒學訓導鵬振之子。自在其室。以逮爲婦爲母。莫不訓式。始時家噉有婦吳氏。早寡而卞急。姑張太

安人性亦嚴厲。積不相善。張安人既嗣爲後。恭以事嚴姑而卑以承姒婦。先姑之意。以隆其奉。以推及於姒婦小姑。無所不隆。詘己之身以薄其給。以達於己之子若女若婦。無所不薄。上尉下薦。內外融融。閭里親族無少長。皆歎以爲不可及。觀其諸子貴盛。皆領首歎以爲宜。其沒也。哭之皆哀。有餘云。子嵩燾。道光丁未科進士。改翰林院庶吉士。咸豐三年。以救援江西功。聖恩特授編修。崑燾。道光甲辰恩科舉人。宗室官學教習。國子監助教。嵩燾。縣學生。候選訓導。其季曰先樾。早殤。孫六人。咸豐二年壬子歲三月十四日。嵩燾與其弟。奉君之喪。葬於湘西善化楊梅山之原。張安人祔焉。又三年。歲在乙卯。國藩乃敘而銘之。銘曰。

我有執友。翰林郭君。至交金石。天下莫不聞。昔歲在戊。赴告親喪。徵我銘刻。用識幽藏。會幾須臾。歲星周半。大地戈鋌。東南塗炭。我以喪歸。墨經卽戎。葬不極禮。筮不協從。惟郭氏阡。在嶽之麓。雲台峯環。龜著竝穀。不肖之嚙。郭宗之祚。詩於堅石。以奠茫茫。

誥封光祿大夫會府君墓志

咸豐七年二月初四日。我顯考會府君卒於湘鄉里第。春秋六十有八。男國潢。國葆。謹視含斂。男國藩。降服男國華。自江西瑞州軍營聞訃。男國荃。自吉安軍營聞訃。皆奔喪來歸。天子廣錫類之仁。賜銀四百兩。經理喪事。

閏五月初三日癸未。卜葬於二十四都周壁衡山內。從形家言。丙山壬向。去先世舊廬六里而強。去梁江新宅八里而近。國藩少長至冠。未離親側。讀書識字。皆我君口授。自竊祿登朝。去鄉十有四年。逮待罪戎行。違晨昏者又五年。府君之至言。懿行。不可得而盡識。僅從季父驥雲所。泣問近事。而昆弟子姓。諸姑姊妹。亦稱述音容。往往而悉。其述府君侍先。大父疾病。至難能矣。道光二十六年八月。大父病痿痺。動止不良。明年冬。疾益篤。喑不能言。卽有所需。以頤使。以目求。卽有苦。蹙額而已。府君朝夕奉事。常先意而得之。夜侍寢處。大父雅不欲頻頻驚召。而他僕殊不稱意。前後洩益數。一夕六七起。府君時其將起。則進器承之。少間。亦如之。聽於無聲。不失分寸。嚴寒大溲。則令他人啓移手足。而身翼護之。或微沾污。輒滌除。易申衣。拂動甚微。終宵惕息。明日。則季父入侍。奉事一如府君之法。久而諸孫孫婦。內外長幼。感化訓習。爭取垢污襦袴。澣濯爲樂。不知其有臭穢。或挽篋輿遊戲庭中。各有常程。大父病凡三載。有奇。府君未嘗得一安枕。愈久而彌敬。是時府君年六十矣。吾會氏家世微薄。自明以來。無以學業發名者。府君積苦力學。應有司之試。十有七。始得補縣學生員。不獲大施。則發憤教督諸子。國藩以進士入翰林。七遷而爲禮部侍郎。歷官吏部。兵部。刑部。工部侍郎。遭逢兩朝。推恩盛典。褒封三世。會祖諱竟希。誥贈光祿大夫。

曾祖妣彭氏。誥贈一品夫人。祖諱玉屏。累贈光祿大夫。祖妣王氏。累贈一品夫人。府君諱麟書。字竹亭。誥封中憲大夫。疊晉榮祿大夫。光祿大夫。妣江氏。誥封一品夫人。小子非材。微府君厚澤。曷克成立。以蒙茲光顯。於是泣述一二。并列刻系屬。敬銘諸幽。若其懿德純行。宜傳不朽者。將以俟諸知言君子。銘曰。

西望新居。東望舊廬。此焉適中。羣山所都。我先人之靈。其尙妥於斯而永於斯乎。嗚呼。

男五人。國藩配歐陽氏。國潢監生候選縣丞。配汪氏。國華監生。卽補同知。出繼叔父驥雲爲嗣。配葛氏。妾歐陽氏。國荃優貢生同知職銜。配熊氏。國葆縣學生。配鄧氏。

女四人。長適王鵬遠。次適王家儲。壻先卒。次適朱氏。先卒。壻朱麗春。季女塲。

孫八人。紀澤二品廕生。配賀氏。紀梁聘魏氏。紀鴻聘郭氏。紀渠聘朱氏。紀瑞聘汪氏。紀官聘歐陽氏。紀湘聘易氏。紀崧聘王氏。孫女九人。

先大夫以咸豐七年丁巳五月。葬周壁沖。至九年己未八月十六日癸丑。改葬於二十九都台洲之貓面腦。自丁巳九月。男國荃復出治軍於吉安。至戊午六月。男國藩復出治軍於浙江。皆以墨經卽戎。而男國華降服期。

滿從軍皖北。竟殉難於廬江之三河鎮。至己未五月。諸子服闋。而男國潢亦治團練於鄉。男國葆亦從軍於湖北。歲月不居。人事遷變。輒因改葬。補記一二。俾後有考焉。男國荃附記。

先妣江夫人。生於乾隆乙巳年十一月初三日申時。春秋六十有八。咸豐壬子年六月十二日卯時。沒於梁江新宅。原厝宅後山內。己未八月同日。改葬於此。與先大夫共一塋域。國荃又記。

劉君季霞墓志銘

君諱蕃。字季霞。吾友劉蓉孟容之弟也。國藩治團練於長沙。提水師自巴陵至九江。及入江西。屯軍南康。孟容皆展轉相從。三年奔走。夷險共之。季霞常以其太公之命。省孟容於軍中。出則美意相迎。諷勉其兄。歸則傳會吉語。慰安其父。咸豐四年三月。岳州官軍失利。賊犯甯鄉。季霞聞關至長沙。存問孟容。孟容方以疾先歸。其六月。孟容將率舟師渡洞庭而北。季霞復送至省垣。明年八月。又自其家二千里。視孟容於南康。中途聞羅君澤南。督師至義甯州而西。將掃蕩岳鄂之交。規復湖北。孟容亦分領湘右軍。從羅君俱西也。季霞與兄會於羊樓峒。時我師遠來。新有濠頭堡之敗。士氣初復。料簡糧仗。稍與休息。賊據蒲圻縣。得以其暇。益築堅壘。完守備。十月十七日。我師進營白石鋪。以蒲圻南門地險而逼。不利仰攻。乃繞道出

公安賊。抵城西。駐軍鐵山。湖北巡撫胡君林翼。以師來會。二十一日辛亥。分四路進攻。賊阨險立柵。穿塹數重。鎗礮環擊不可近。聞出悍賊。揚旗跳盪。自辰至午。相持不決。軍勢少卻。季霞從兄督戰。進曰。事急矣。賊將乘我。遂棄所乘馬。獨步而前。賊遽奔之。季霞發鎗斃二賊。又鞭卒之少退者一。賊伏下田。發鎗中傷季霞仆地。孟容昇其弟歸營。而自麾衆禦之。短兵確鬥。驍將銳卒。傷亡數十人。賊亦大創。我軍乘間舉火。燔其木柵。煙焰蔽天。五壘齊破。是夕。遂破蒲圻縣。克之。孟容還營。視其弟創在臍旁。氣息僅屬。撫之大慟。季霞徐曰。兄勿爾。命也。語訖而絕。春秋二十有五。事聞。諭旨追贈知縣。照知縣例賜卹。季霞事兄。致嚴以順。而風韻各異。孟容於士類。揚清激濁。而季霞不置臧否。孟容稍立崖岸。別白是非。鮮所假借。而季霞脫去畦封。瞑無一語。款誠相接。其臭如蘭。以是人樂近之。劉氏世居湘鄉之四十都。近歲兵事方殷。有司分都團練。季霞部勒鄉人。獨嚴整。喪歸自蒲圻。族之少長。遠近之耆德學徒。與羈者團結之。丁壯會葬送死。哭者至數千人。如喪親戚。然後知其得衆。宿將不及也。咸豐八年 月 日甲子。葬於樂善里之王湖嶺。配孔氏。國子監學錄廣璠之女。生女一人。無子。以孟容子培。屋爲嗣。銘曰。

元二之厄。兵氣崢嶸。方州大府。鼠卻狐驚。提戈殺賊。年少書生。厥少維何。

星終兩紀。溫玉刻荇。翔翔文史。事親從兄。辟咥而詔。仗劍出門。海飛龍嘯。蒲首之山。故壘嵯峨。一儒奮臂。永奠山河。位豈在大。齡豈在多。我銘斯石。萬代不磨。

季弟事恆墓志銘

同治元年十一月十八日丙寅。我季弟歿於金陵軍中。逾月。喪過安慶。國藩設次哭奠如禮。遣之反葬。弟名國葆。字季洪。後更名貞幹。字事恆。少則落落自將。脫去町畦。視人世毀譽。及書史褒譏。不甚厝意。不隨衆爲疑信。時或詰難參伍。大破羣惑。嘗應縣試及學政試。再冠其曹。已而厭薄舉業。不肯竟學。咸豐三年。國藩奉詔討賊。召募水陸諸軍。季弟挈六百人以從。提督楊載福。侍郎彭玉麟。始皆客季弟所爲僚佐。季亟薦此二人。爲英毅非常器。己願下之。四年三月。岳州兵敗。季又亟白諸將無罪。己願獨坐之。其後楊彭二人。果以水師雄視東南。而諸將亦次第登用。掇取高官大名。獨季弟黯黹歸去。築室紫田山中。閉門絕人事。身與世若兩不相收。八年十月。母弟國華戰歿三河。季則大慟。誓出殺賊。以報兄仇。而雪前恥。鄂帥胡文忠公。方廣求將材。命季分領千人。自黃州建旆而東。十年正月。連克太湖潛山。三月始與叔弟國荃會師以圍安慶。十一年八月。克之。明年。爲今皇帝元年。弟以正月師次三山。三山者。宣池羣賊四萃之區。軍入

援絕。寇十倍我。乃以計招降二縣。義民之陷賊者。噢咻而厲使之。得四千人。編伍約法。用破魯港。克繁昌。下南陵。蕪湖。而國荃亦以是時。克東西梁山。徇和州當塗。奪采石。兄弟復會師。進薄金陵之雨花臺。江東久虐於兵。疹疫繁興。將士物故相屬。弟病亦屢瀕於危。定議假歸養疾。適以援賊大至。強起戰守。四十六日。賊退而疾甚。不可復治矣。季弟初以功敘儒學訓導。加國子監學正銜。克復安慶。晉秩同知。賞戴花翎。厥後連克繁昌三縣。天子雖以國藩前有辭賞之奏。猶特賜迅勇巴圖魯名號。至大破援賊。晉階知府。命下而弟不及見矣。事聞。遂追贈按察使。照軍營病故例議卹。詔書謂朝廷早欲擢用。特以國藩懇辭。留以有待。嗚呼。聖主之於臣家。恩寵不訾。獨惜國家欲大用吾弟。與吾弟欲得當以報國。兩相須於微莫之中。而卒不克少待。以竟厥志。嗚呼。茲所謂命焉者。非耶。季弟生以道光八年九月二十日。春秋三十有五。會祖諱竟希。妣彭氏。祖諱玉屏。妣王氏。父諱麟書。妣江氏。三代皆封光祿大夫。妣皆一品夫人。配鄧氏。先弟十月卒。兄弟五人。自仲氏國潢外。四人者皆從事戎行。季無子。以國潢子紀渠嗣。同治二年某月某日甲子。葬於某里某山之陽。輒敘次事狀。繫以銘語。以寫吾哀。銘曰。

智足以定危亂。而名譽不並於時賢。忠足以結主知。而褒寵不逮於生前。

仁足以周部曲。而妻孥不獲食其德。識足以祛羣疑。而文采不能伸其說。嗚呼。予季。缺憾孔多。天乎人乎。歸咎誰何。矢堅貞而無怨。儻彌久而不磨。

閩浙總督季公墓志銘

公諱芝昌。字雲書。號仙九。姓季氏。道光之末。咸豐之初。公以正卿內知樞密。外督封疆。朝廷亟以大事相屬。而公噤然自以爲不足。海內賢士。亦第宗其文章。而若忘其政事之美。公於文。裁量完密。官徵鏘鳴。當世歎爲臺閣夷憚之音。而又忘其營度之苦。至其身世。備歷諸艱。則知者尤少也。季氏世家江陰。公會祖諱愔。祖諱熙。歲貢生。累葉窮約。至考諱麟。字晴郊者。始以拔貢舉人。官鉅鹿縣知縣。嘉慶十四年。公侍王父從鉅鹿。君於官所。又迎婦於衛輝。婦翁爲王蘇儕嶠。以翰林出守大郡。兩家皆科第名宦。政聲溢於河朔。寢寢光大矣。無何。歲貢君卒於鉅鹿。鉅鹿君坐不身捕妖民。褫職。遣戍新疆。踰年沒於戍所。公所生長子旣殤。又殤一女。又殤次子。而鉅鹿君有官逋。簿責益急。籍家產輸之。官親知不相省錄。胥吏侵侮。殆無人理。厥後以道光元年。舉順天鄉試。三年。考取國子監學正學錄簿。宦京師。生事日紕。蓋至十二年。成一甲三名進士。而公之困厄。餘二十載矣。旣以巍科改翰林院編修。明年散館。則大爲宣宗所褒。御書魁字於卷之傳別。而大臣亦自登公首選。旋又以大考翰詹列高等。簡授山東學政。任滿

還京。充戊戌會試同考官。明年己亥。大考。復列高等。奉使江西主考。浙江學政。累遷至內閣學士。兼禮部侍郎。由是舉朝慕公。遇合之隆。臺省耆宿。交口稱公詩賦。以諷勉後進。儕輩斂衽。皆以爲不及。高才未達。皆傳鈔而模範之。雖天子亦以君臣文字契合。爲足樂也。公在浙。丁母憂。道光二十三年。服闋入都。與考試差。翼日。召對。宣宗嘉歎公文。以謂他人竭蹶。端汗有不能到。汝則沛乎有餘。譬之於射。汝穿楊百中矣。語畢。大笑。公且感且悚。退而不失鵠名其齋。是歲。擢禮部吏部侍郎。督學安徽。公益兢兢。恐無以育才厚俗。上負主知。二十六年。受代還朝。明年。充會試知貢舉。殿試讀卷官。經筵講官。衡文之事。無役不從。四方學徒。翰林新進。輻輳造門請業。而上察公忠謹廉介。可任艱鉅。不復欲以校文角藝相屬。蓋科目取士既久。至爭聲律一字之得失。而置軍國於不問。宣宗晚歲。遠覽唐季明末之陋。卹焉思有以易之。亦預憂治安之不可深恃也。二十八年。命公爲倉場侍郎。是冬。命偕定郡王載銓。查辦長蘆鹽務。及天津所屬倉庫。二十九年。命偕大學士耆英。查詢東南兩河冗員浮費。又命公馳赴浙江。釐剔鹽務。清查倉庫。凡政有奸弊叢雜。輒屬公梳扶而廓清之。公晝夜稽覈。不吳不揚。盡得要領。而於人無所乖迕。使浙未返。有詔簡授山西巡撫。甫至晉。又內召。爲軍機大臣。三十年。宣宗升遐。與諸王大臣受遺輔政。文宗繼序。

益欲以艱大付公。會廣西軍興。南服不靖。遂命公總督閩浙。公鈞校官書。發舊牘與新事雜治。廢寢忘食。未幾疾作。陳請開缺。勿許。咸豐二年。病益劇。屢疏乞退。溫旨慰留。最後十一月。詔許回籍調理。三年正月。返蘇之常熟家焉。二月。金陵淪陷。賊乃日熾。公聞之大痛。自以朝廷重臣。出泄海疆。不能濟弱扶傾。副聖主倚畀之意。而時事糜爛。又不克力疾強起。以效尺寸。往往獨夜悲泣。或爲詩歌以鳴積鬱。至咸豐六年。而得偏痺之症。十年。蘇常失陷。挈家北渡。又聞九月淀園之變。益憂憤內傷。不復可支矣。是歲十一月三十日。薨於通州。春秋七十。自公之貴。三代皆贈光祿大夫。如公官。曾祖妣趙氏。祖妣趙氏。妣史氏。皆贈一品夫人。妻王夫人。妾郭恭人。皆前卒。妾吳氏。公沒後。自裁以殉。旌表如例。子念貽。道光庚戌進士。翰林院編修。加四品卿銜。女二人。長適翰林院編修陳彝。次適鉅野縣知縣張彭年。孫綸全。邦楨。曾孫厚堃。厚基。厚鎔。公卒時。渴葬通州城東。同治四年八月十八日。始卜葬於江陰長山南麓。當公在閩引疾。方怪宏才若彼。重任如此。何遽謙讓勇退。及歸田數載。而憂國乃更甚於當官之時。而當世之自以爲能。負荷非常者。覆轍相屬。乃不忍聞。然後知君子歆然之抱。誠不易量度哉。嗚呼。是可銘已。銘曰。

兩社貞卜。實啓季宗。世閱休德。集於我公。十韜一襮。積塞乃通。發爲宏篇。

藻火笙鏞。輪軒四出。使節落旄。冥索章句。盡拔其豪。靡幹不采。何埴不陶。天子曰咨。時有屯蹇。道有平頗。著在前典。良臣幹之。天迴斗轉。斂此鴻文。謀奠乾坤。入筦天樞。出帥海濱。鋤奸詰蠱。萬緒交紛。每況彌恭。若虛若無。讓賢避位。長往江湖。心摧形瘁。與世同臞。我貢春官。出公門下。斯鑄斯鎔。或躍於冶。岱宗云頽。有隕如瀉。紀績埋幽。用詔來者。

仁和邵君墓志銘

位西仁和邵氏。諱懿辰。與國藩交二十餘年矣。咸豐十年二月。賊入杭州。五日而復。七月。位西訪余祁門軍次。語余以城破時。盡室陷賊中。賊退。乃挈家東徙紹興。老母考終。羸得盡禮。欲乞師以援兩浙。不果。遂別去。明年十一月。杭州再陷。位西之妻余恭人。二子順年。順國。轉徙滬上。余聞而迎致之安慶。順年語余以城破時。盡室饑困。其父麾家人出避。圖延宗祀。亦詭詞自稱將出。遂泣別不復相聞。國藩心知位西。烈士也。必不苟免。其家固知之。以無定問。不敢發喪。同治三年二月。杭州克復。順年奔哭。周詢具得三日不食。罵賊遇害狀。實以十一年十二月朔日。殉難。於是始除次執喪。赴告遠近。浙江巡撫上其事。天子下詔褒卹。然後知親在則避。親沒則死。賢者遭難。如是其不苟也。位西之學。初以安溪李文貞公。桐城方侍郎爲則。擯斥近世漢學家言。爲文章。務先義理。不事縟色繁聲。旁徵雜引以

迨時好。厥後以舉人仕京師。爲內閣中書。刑部員外郎。入直軍機處。與上元梅曾亮伯言。臨桂朱琦伯韓數輩游處。博覽國故朝章。其文益奧美盤折。亦頗采異己之說。呂自廣。詢訪高才秀士。折節造請。交譽互證。酣恣而不厭。狎習而彌虔。然位西性故戇直。往往面折人短。以謂書籍所無。公何得漫爾不應。再糾焉。猶不獲。三諫焉。無問新故疏戚貴賤時否。一切蹙頞相繩。人不能堪。終以此取戾於世。大學士琦善公在獄。嘗發十九事難之。大學士賽尙阿公視師廣西。手疏七不可諍之。諸公貴人病其陷直。由是齟齬焉。不得安其位。咸豐四年。坐濟甯防河無效。吏議鐫職。位西旣罷歸。則大覃思經籍。纂箸尙書通義。孝經通義。詩古文若干卷。飢餓圍城之中。猶箸禮經通論。誦聲鏘然。徹於巷外。亂後。僅得禮經一卷。文三十餘首。刻之淮安。蓋不能什之一二。餘則散佚矣。位西之曾祖王父寶勤。王父又曾。父宗贄。本生父鳳儀。世箸清德。有兄懿藩。早喪。無子。以順年後之。有女二人。順年歸自杭州。未得父尸。大痛。盡疾。同治四年六月十三日。沒於金陵。余恭人少而刲股療親。晚而事姑有聲。旣痛其夫。又悲其子。七月十二日亦卒。嗚呼傷已。國藩於是命順國。與其壻鄭興儀。具位西衣冠。葬之西湖二龍山。以余恭人及順年祔。順年之妻伊氏。前死賊中。至是亦以衣冠祔葬。銘曰。

城有時而爲湖。海有時而成田。物固有非常之變。烏可以常理測彼昊天。善不必福久矣。曾不自夫子而始然。愍東南之大戾。仁聖與螻螻而同捐。箸述盡其蕩盡。僅弔煨燼之殘編。文之精者不復存。存者又未必果傳。獨其耿耿不磨之志。與日星而長懸。魂無遠而不之。魄則依妻子以全。庶上爲神祇所許。而下爲百世學者之所憐。

張君樹程墓志銘

君諱善準。字樹程。號平泉。晚更自號愚公。武昌張氏。考諱以誥。國藩嘗表其墓。既詳其世矣。君孕育前徽。出入造次。不離古先之訓。既補縣學生員。以制舉之文。震耀於時。主學政者每嗟賞之。舉以爲羣士式。君顧不以自意。獨有志於樸學之塗。篤好浚儀王氏困學紀聞。崑山顧氏日知錄二書。刪取其要。別爲一編。手寫數通。亟繹而不厭。博覽而彌深。前所謂舉業者。漸高簡而不諧於衆。遂爲歲貢生以終。與之遊者。但見其於科目仕宦。窮通得喪。豐約毀譽。泊乎未有以干其慮也。及聞時政安危。賢不肖進退。當否。乃憂之樂之。如其家事。則相與忱焉起敬。粵賊之起。賢人君子。往往殉難。或闔門同盡。君聞輒悼痛。語及卓行奇節。則泫然泣下。如喪周親。一夕。篝燈讀書。忽甚悲失聲。舉家驚起。趨視。君方手一編。顧曰。有傳胡巡撫祭李帥文至者。余讀之。不覺哀而一號耳。胡巡撫者。益陽胡文忠公林翼。李

帥者。湘鄉李忠武公續賓。時方戰沒三河。天下所共傷也。自是兵事利鈍。家人相戒不敢以聞。閭里過從。相與遣懷望治。道吉語以忘憂。君一接以恭謹。遇耆長。怡聲酬對。如恐傷之。自敵以下。褒能獎善。溫溫致敬。終不以有故而加慢。姻好或有患難疾疢。早夜省視。匍匐護持。時其有無。而周濟焉。人咸謂君爲慈惠之師。緩急可倚杖矣。然君性實剛介。嫉惡如讐。深恨昏墨之吏。暨士人居家者。財利與買豎競錙銖者。以謂天下大亂。端由此輩。意不快。則昌言誅責。唾而斥之。或以書抵友朋。其語絕痛。又嘗戒其子裕釗。汝才薄。慎無求仕。苟仕。慎無爲身家謀。居民上而黷貨。是穿窬也。神不福矣。聞者凜凜然。後知君之德。不得僅以仁厚名也。同治三年十二月十日卒於家。春秋六十有九。所著有史學提要續編六卷。妻金氏。秉禮習勞。儉而澤物。子二人。長裕鏞。次卽裕釗。舉人。積學能文。女子二人。孫幾人。某某。某年月日。葬君於某縣某山。裕釗來徵銘。銘曰。

訥訥哲人。斯須繩矩。遇事激發。剛亦不吐。慟恤忠良。有涕如雨。譏貶燕負。有舌如斧。能好能惡。是謂至仁。邈然物外。未侵一塵。樊口之南。重湖之濱。藏骨黃壤。垂範千春。

苗先篋墓志銘

君諱夔。字先篋。肅甯苗氏。自幼讀書。卽異常童。不好爲科舉文藝。而竊嗜

六書形聲之學。讀許氏說文。若有夙悟。精研而力索。滯解而趣昭。已又得顧處士炎武音學五書。慕之彌篤。曰。吾守此終身矣。年二十餘。卽纂毛詩韻訂。繼又纂廣籀一書。授徒窮鄉。制藝試帖之屬。不中有司程度。學子稍稍引去。君益冥心孤往。子焉寡儔。聞之。河閒城外得漢時君子館博。又得開元瓦於獻王墓旁。私獨欣喜。以爲神者餉我。以慰寂寞。久之。道光十年。縣令王君聞而敬異。聘君主講翼經書院。明年。爲學使沈侍郎維鎬所知。舉辛卯科優貢生。高郵大儒王氏念孫父子。聞君之說禮。先於君。遂與暢論音學源流。由是譽望日隆。督學使者。爭欲致之幕下。與共衡校。初隨編修汪君振基。衡文山西。繼隨祁文端公鶴藻。衡文江蘇。所至甄拔宿儒。周覽山水。又以其暇。編摩撰述。從事於其所謂聲韻之學。道光二十一年。祁公還京師。乃釀金刻君所著說文聲訂若干卷。說文聲讀表七卷。毛詩韻訂十卷。建首字讀一卷。君以爲許叔重遺書。多有爲後人妄刪。或附益者。乃訂正說文聲類八百餘事。顧氏音學所立古音表十部。宏綱已具。然猶病其太密。而戈麻旣雜西音。不應別立一部。於是併耕清及蒸登於東冬部。併歌戈於支脂部。定以七部。彙括羣經之韻。書出。識者歎其精審。又數年。侍讀馮君譽驥。視學山東。國藩薦君偕往。役未畢而先歸。於是君亦齒衰而倦游矣。道光之末。京師講小學者。卿貳則祁公。及元和吳公鍾駿。庶

僚則道州何紹基子貞。平定張穆石舟。晉江陳慶鏞頌南。武陵胡焯光伯。光澤何秋濤願船。君既習於祁公。又與諸君傾抱寫誠。契合無間。子貞嘗命工圖己及石舟及君三人貌。蓑笠而處田間。蓋三人者皆同年優貢。又皆有逸士之風。謂宜與負耒者伍也。君既泊然無營。暇則徒步造訪諸君。與辨論前世音學。暨近人江戴段孔諸家部分之多寡。意指之得失。褒譏亭決。窮日夜不倦。閒亦過余劇談。歸自山東。余從容問東士亦有擊究說文者乎。有得見吾子箸述者乎。曰有之。何以知之。曰吾書中有自稱夔按云者。東人稱引及焉。曾不知夔之爲誰氏名也。則相與拊掌大笑。君徐又曰。吾家有蠢僮。昨者日晏。吾責賢子何不具食。僮輒報以錢物罄矣。欲以何具。吾柔聲謝之。僮乃不遜竟去。吾今方躬治爨耳。則又相與大笑。蓋君處困約。有以自怡如此。他日。君又語余曰。吾窮於世久矣。甘之若飴。死無所恨。獨平生箸書。尙有數種未及刊刻。不能無耿耿於懷。自余咸豐初出京。展轉兵閒。至同治七年。重入都門。昔之與君遊者。十人蓋八九死。君之嗣子王璞來。告君以咸豐七年五月初七日逝矣。春秋七十有五。抱君所箸書曰說文聲讀考者。曰集韻經存者。曰韻補正者。曰經韻鈎沈者。述君遺命。謂當送國藩觀覽。且以銘墓之文相屬。君且死。戒其子必葬我衆書叢中。其子乃擇君生平尤嗜之書。納諸棺中以徇。嗚呼。斯亦篤古之徵已。

銘曰。

視以多歧而薈。聽以雜奏而聾。技之精者。不能兩工。苦思專壹。可與天通。課形而得聲。勘異而得同。黜陟百世。惟許君是崇。胡學之旁達。而遇之不豐。抱此孤賞。永奠幽宮。

唐確慎公墓志銘

公諱鑑。號鏡海。唐氏先世自江西豐城。徙居湖南之善化。四傳至諱煥者。以舉人官至山東平度州知州。公之祖也。生子仲冕。以進士卽用知縣。官至陝西布政使。公之父也。平度君以子貴。誥贈通奉大夫。配李氏。譚氏。俱封夫人。譚夫人沒而葬於山東之肥城。布政君及配甯夫人。皆踵葬肥城。公以父命。徙籍山東。故又爲肥城人焉。少而邁異精勤。嗜學如渴。以廩生入貲爲臨湘縣訓導。嘉慶十二年舉於鄉。十四年成進士。改翰林院庶吉士。又二年。授職檢討。又六年。補浙江道監察御史。充甲戌科會試同考官。戊寅科順天鄉試同考官。坐論淮鹽引地一疏。吏議鑄級。以六部員外郎降補。會宣宗登極。詔中外大臣。各舉所知。諸城劉文恭公鏗之薦公。由是有廣西知府之命。厥後再爲平樂府知府。一爲安徽徽甯池太廣道。量移江安十府糧道。拜山西按察使。遷貴州按察使。擢浙江布政使。遷江甯布政使。數歷於外。蓋二十年。其守平樂也。亭平民徭之獄。而解其仇。屢磔劇

盜境內肅然。是時布政君解組東歸。僑居金陵。公聞母病。卽引疾去官。省親江南。既遭內外之艱。皆北葬肥城。廬墓讀禮。服闋。以例仍發廣西。再守平樂。道光十二年。廣東湖南生猺爲亂。公出防邊圉。內譏奸宄。往來富川。賀縣。安撫熟猺。獸擾而兒蓄之。設立五原學舍。延師教讀。羣猺大悅。揜郡中煽亂者譚于先等十餘人。立斬以徇。而賞其脅從千餘。火其名籍。一無所問。其按察貴州也。平反疑獄。歸美令長。曰。非吾能正之。某縣尹來省。自易之耳。其在江甯。拯災修廢。百度畢張。時總督陶文毅公樹寢疾。公代行使院政事。文牘如山。賓僚填咽。味爽而勤職。丙夜而不休。忘寢輟餐。形神交瘁。而言者乃劾其多病近藥。廢閣公事。又雜摭他端以相訾毀。朝廷遣使者按問。率無左驗。宣宗知公端謹。一切弗論。忌者或憚其方嚴。未幾。內召爲太常寺卿。道光二十年四月也。公潛研性道。宗尚洛閩諸賢。所至以是敕其躬。亦以牖於人。亦時時論箸以垂於後。在翰林時。箸有朱子年譜考異。省身日課。畿輔水利等書。在廣西著讀易反身錄。居喪著讀禮小事記。官平樂時。延納人士入署。親與講授。設立義塾。誨誘寒賤。官貴州時亦如之。官江甯亦如之。及入爲九卿。又著易牖。學案小識等書。扶掖賢俊。倡導正學。時如今相國倭仁良峯侍郎。吳廷棟竹如侍御。寶埴蘭泉。何文貞公。桂珍輩。皆從公考德問業。國藩亦追陪几杖。商榷古今。觀其陋室危坐。

精思力踐。年近七十。斯須必敬。蓋先儒堅苦者亞。時賢殆不逮也。已而致仕南歸。主講金陵書院。文宗踐阼。有詔召公赴闕。凡進對十有五次。中外利弊。無所不罄。諭旨以其力陳衰老。不復強之服官。令還江南。矜式多士。公至金陵。學徒益盛。以賊犯湖南。急欲歸展先塋。咸豐三年。乃自浙還湘。卜居於甯鄉之善嶺山。深衣疏食。泊然自怡。晚歲著讀易識。編次朱子全集。別爲義例。以發紫陽之蘊。十一年辛酉正月十八日疾卒。春秋八十有四。其家函封遺疏。郵寄東流軍中。國藩以聞。天子軫悼。予諡確慎。配王氏。楊氏。皆封夫人。前卒。無子。以弟子爾藻嗣。女四人。適某某。孫男三人。某某。孫女三人。某年月日。葬公某縣某鄉某山。又八年。國藩始追爲之銘。銘曰。俗學徇時。行與名鈞。孰捐其華。而練其要。唐公翼翼。與世殊趨。懼明戒旦。篤信程朱。有譏其隘。或諷以迂。浩然不顧。履我康衢。顯皇初政。詔徵國老。造膝前陳。嘉謨要道。願致吾君。上躋軒昊。進退以禮。斂茲宏抱。宦遊所至。我求童蒙。晚居京國。羣彥景從。何才不育。有金皆鏐。以善孳善。偕之大同。播此芬韻。昭示無窮。

歐陽府君墓志銘

先生諱凝祉。初名鼂。晚易今名。字福田。歐陽氏先世。自江西徙居衡陽。會祖天鼎。祖心敬。父順源。并有清德。會祖妣氏劉。治家嚴肅。祖妣氏蔡。妣氏

蔡均以節孝旌表於朝。國藩所作歐陽氏姑婦節孝家傳者也。先生生三歲而孤。恪遵母訓。跬步必謹。母或戒之。無觸忤人。卽終身不以言色加人。或戒以慎無耽酒。卽沒齒不近杯勺。稍長。巖然自厲於學。不假董督。日俾月增。旣入爲學官弟子。旋補廩膳生。遠近歸仰。交幣迎致。適館課徒。凡四十年。主講蓮湖書院者。又十年。門下生箬籍數百人。其高第者。與之稽經講藝。兼及敕躬之道。成物之方。其不帥教。則訶求饋責。屏斥門牆之外。初雖怨望。後常悔憾自愧。不爲良師所齒。從之游者。恆守繩矩。雖垂老而憚之如初。先生疏於治生。臨財則辨別精審。若將浼焉。一歲中學徒束修之資。不足自給。往往隨事散去。少以孤童。爲叔父成材所養。晚節竭力贖之。宗祀不足於資。先捐金以成之。議爲衡陽裁減錢漕浮費。有啖以利而尼其事。峻辭卻之。事成而合邑德之。其它人事問遺。率常謝絕。人謂先生少貶其節。可致饒裕。先生獨謂取舍有義。神明難欺。吾心所不許者。天道亦不與也。道光末。以歲貢生候選訓導。同治初。誥封奉直大夫。配邱氏。誥封宜人。子二人。柄銓廩貢生候選訓導。柄鈞光祿寺署正。女子二。長者歸於國藩。次適彭治官。孫六人。定果湖北候補同知直隸州。定林候選縣丞。定枚府學生員。定樞。定楫。定幹。孫女五人。會孫二人。同治八年五月初九日疾卒。春秋八十有四。自七十以後。不復授徒遠方。家居課孫。細字鈔書。講

論不倦。同治六年。歲在丁卯。孫定枚入學爲附生。先生以嘉慶丁卯入學授室。至是六十年矣。乃用昔者成婚之日。燕客受賀。遠近歎美。夫婦既皆八十。而先生之伯兄八十有五。暇輒過從。相與道幼時瑣語。以爲歡。自詡爲家門之祿。人亦祿之。夫其孝友雍雍。敦善不怠。殆所謂無忤於天人者。復奚憾於其死邪。嗚呼。可銘也已。銘曰。

衡西兩世。貞節之門。實生令德。孝子孝孫。上承慈訓。下啓後昆。位豈須顯。身蹇道尊。名豈須震。多士崇信。小叩大鳴。甄陶羣儁。獎誘自寬。壇宇自峻。七十碩師。還山娛老。耄而從兄。推黎讓棗。亦有孫會。質文完好。金籟匪貴。一經是寶。家有休徵。英彥輩興。門有上瑞。和氣薰蒸。其休其瑞。人世同稱。若考隱德。吾銘可憑。

翰林院侍讀學士丁君墓志銘

君諱善慶。字伊輔。號養齋。丁氏世居清泉之白沙甲。幼孤。從母劉太淑人。育於外王父劉文恪公家。自少而好惡欣戚。不主於己。惟母志之。從長亦如之。終身亦如之。久處京師。寄籍宛平。由順天府學生。中式道光壬午科舉人。明年癸未成進士。選翰林院庶吉士。散館授編修。其歷階爲國子監司業。詹事府右中允。左中允。右庶子。翰林院侍講學士。其任職爲國史館總纂。庶常館提調。文淵閣校理。奏辦院事。日講起居注官。其使事爲戊子

科貴州鄉試正考官。辛卯科廣東鄉試正考官。乙未科會試同考官。其秋順天鄉試同考官。丙申以後。迭爲廣西學政。君雖閭然自敕。無所矜異。宣宗嘗從容問翰林中。孰爲篤學。曹文正公舉君以對。天子旣異之。在廷名卿耆德。亦多稱歎。以爲令僕之器。歲月可冀。君以母老懷思鄉里。歸自廣西。遂解官養親於長沙。早歲事母。執爨必躬。浙米必潔。至是益加謹焉。母或加餐輒喜。述諸人以爲至幸。或有饋賜。輒豐其好貨。端篋而將之。或體中不適。則憂皇如不終日。或意有不懌。則長跪引咎。旣解乃起。或將他適。則先於其所往。百物畢齋。所欲立應。室無纖埃。庭無高語。一身肅戒。舉家兢兢。宦游餘財。爲其弟口口所耗。君則經營置產。以覆弟短而悅母心。舅氏劉若珪。謫官遠戍。君又傾其前產以贖鼻罪。而慰母於地下。蓋畢生孺慕。自順親外。不知天地更有何事也。母沒數年。而廣西寇賊大起。咸豐二一年秋。攻圍長沙。君矢死堅守。寓書其弟曰。城陷。弟收吾骨於桂樹旁井中矣。日夜令其子馴。巡警周垣。馴以勞致疾。妻蔡氏。刲股療之。不愈。遂卒。君乃曰。兒致身衛國。婦刲肉救夫。吾門之祥也。吾母幸而考終。吾身若家。皆可殉難。尙何惜哉。賊退則趣治戰船以濟水師。立共武社。使諸生與衆練卒。肄習火器。事上。議敘加三品銜。論者謂謹厚如君。乃能臨危應變如是。爲不可測也。同治八年六月十五日卒於家。春秋八十。其年十一月十六

日葬於北關外洪山渡饗堂坑莊山之陽。會祖某。祖某。父某。皆贈中憲大夫。會祖妣氏某。祖妣氏某。贈恭人。妣氏劉。累封恭人。晉贈淑人。旌表節孝。配陶氏某。配周氏。妾呂氏。生子馴。早卒。乃以弟之子驊爲後。妾廖氏。生子騏。女六人。孫四人。焯。煥。煊。烜。皆驊出。煥復出爲馴後。女孫二人。君之學。詳於治經。尤嗜易春秋。著有左氏兵論。主講嶽麓書院二十餘年。以洛閩正軌。陶鑄羣弟子。亦頗參陰德感應之說。警發愚蒙。生徒翼翼。無敢軼踰法度。庶幾以身教者。銘曰。

不斲不蘄。不揭己以爲崇。公以校士。毅以卽戎。勇以辭祿位。而誠以啓羣蒙。皆以仁孝爲之本。本立而用自不窮。老成逝矣。康此幽宮。

郭依永墓志銘

依永。名剛基。一名立箴。姓郭氏。吾友筠仙中丞嵩燾之子。而國藩之第四女婿也。少而羸弱。善病。就學數歲。猶戒其師無過督責。年十四五。筠仙奉命巡撫廣東。依永從親於南海使院。遜志研求。學以大進。其後從親還湘。益有慕乎古人述作之林。自場屋經義律賦試帖。以至唐人楷法。名家繪畫。皆窺其藩而究其趣。而於古近體詩。爲之尤勤。同治七年。以試藝冠其曹。補縣學生員。父兄或詔以專事科舉之業。而於詩姑輟焉。依永以爲志廣塗遠。安能敦敦獨事舉業。退輒矯首長吟。叢稿滿室。有龍光輔樹棠者。

老僧東林者。年皆六十。與爲忘年交。時時相從。倡和不厭。或騎駿馬。挾一僮。薄暮游古寺。覓句以歸。用是自適。依永之詩。嵯峨蕭瑟。如秋聲夜起。萬彙傷懷。又如閱盡陵谷千變。了知身世之無足控搏者。長老皆怪名門少年。不應有此。東林亦嘗誥之。依永則自謂吾每爲詩。百感中來。不可遏抑。竟以同治八年十二月四日病卒。年才二十有一。會祖某。祖某。皆以錫仙貴。誥贈榮祿大夫。會祖妣氏某。祖妣氏某。妣氏陳。皆誥贈一品夫人。子二。本舍。本謀。女生月餘而瘍。疾革。援例爲員外郎。同治九年某月某甲子。將以品官禮葬於某縣某山。嗚呼。衰齡而哭子。仁慧而不壽。皆人世所謂不幸。然聖賢有遭之者矣。豈天之所可否。與人閒所稱善惡禍福。其說絕不類邪。抑人事紛紜萬變。造物者都不訾省。一任其殃慶顛倒。漫無區別邪。天人感應之故。自昔久無定論。依永之生。其詩已頗知一得喪。齊彭殤之旨。今其既死。殆將沛然而大學矣。於是述吾所聞。爲之銘辭。以質幽遐。亦塞錫仙之悲。銘曰。

吾聞君子之畏天命。有如孝子之事庭闈。苟遭禍譴。敬受不疑。恭若申生。順若伯奇。又聞道家之言。與化推移。縱心任運。有若委衣。雖宗旨之各別。要安命而無違。覽依永之詩篇。似多見道之詞。胡含愁而鬱鬱。豈其中有不自治。修德之報或爽。雖神聖不能測其微。主之人者。爲吾能爲。主之天

者。吾安敢與知。等死生於晝夜。信長短之有涯。存者抑情而復禮。逝者奠魄而永綏。

羅君伯宜墓志銘

君諱萱。字伯宜。湘潭羅氏處士某某之孫。吾友候選內閣中書汝懷研生甫之子也。少而穎特。旁通。旣聞庭訓。多所開解。咸豐四年。國藩率師自岳州。逐賊東下。強挈君以俱東。是歲克武昌。破田家鎮。攻九江。舟師不利於湖口。明年。國藩至南昌。重立水軍。進屯南康。視陸師於湖口。弔忠武公塔齊布於潯陽。君展轉相從。跬步必偕。余或口占書疏。君輒操筆寫錄。或危急之際。君甘心同命。而外則美言相溫。諸將或輕重不得。輒爲之通懷。使各當其意以去。又明年。羣寇環集。江西陷沒五十餘城。諸軍多壞散。乃授卒三千人。令君領之赴敵。初戰建昌。繼攻撫州。旣又會擣瑞州。君之躬臨行陣。自此始也。其後湖南援師四至。江西稍稍解嚴。君以久役。請急還湘。國藩亦以咸豐七年。丁憂去職。君旣暫脫兵閒。則假館以課學僮。製造詩詞。以酬勝侶。作蠅頭細字。以與古人校離合於豪芒。負篋走場屋。以競得失於有司。漠然若不知有世變者。未幾。駱文忠公秉章。檄辦湘潭團練。劉總兵培元。招至鼎澧。又招至衢州。與謀軍事。君稍規大計。不肯久留。自浙西旋。省余於安慶。又省其從兄逢元於當塗。軍次。亦不欲久居。會所親黎

福疇沒於涇縣。君遂護其喪。及其孤嫠以歸。同治二年。廣東巡撫郭公嵩燾。招君至粵。屬以創立水師。君又遜謝而歸。每歸。從事文藝。與諸生比肩就秋試如初。久之。佐某君治威信軍。又自領一隊。曰威震軍。防禦粵賊。事定散去。蓋自是君亦倦遊。不復有意於兵事矣。七年冬。記名按察使黃君潤昌。征苗貴州。要君偕行。君慨然曰。是足與有爲。吾所敬也。吾不可以已。八年正月。至黔。師比有功。遂克鎮遠府衛兩城。道員鄧君子垣。提督榮君維善。兩軍來會。迭克關寨。欲遂由施秉以達於黃平。氣銳甚。師至小甕谷。礮以道隘籌深。爲賊所困。君與文武將弁十八人者皆死。三月二十二日也。嗚呼。君之於戎事。亟就之。亟去之。天於君之勳名。若成之。若吝之。乃卒不得一當。而委骨於荒徼絕壑之中。果何爲邪。儻所謂命焉者非邪。事聞。諭旨照按察使陣亡例賜卹。贈太常寺卿銜。世襲雲騎尉。恩騎尉罔替。君幼有夙慧。二歲能識風翦兩字。自真草法書。古文詩辭。以至科舉之業。俱有義法。既入學。爲優行生。從軍累歲。敘功至同知直隸州。加知府銜。其論吏治軍政。皆貫徹古誼而不戾於時。向使得守一官。統一軍。與當世之成名者校。何渠不如邪。然終不得藉手以一伸其志。此君子有陶鑄人才之責者之咎。國藩所以內疚而尤惜之也。銘曰。

孰推焉。而屢起。孰尼焉。而屢止。孰予以飛躍之資。而不假以升斗之水。出

躍馬而橫戈。入稽經而誦史。亦何嫌乎時賢。胡亨於彼而屯於此。終效命於蠻陬。長賈志其何已。蓋憐才者之悲。而竊位者之恥。

甯津龐君墓誌銘

君姓龐氏。諱朋。字君錫。以字行。更字百朋。先世有自昌黎。遷河間之甯津者。遂爲甯津縣人。大考復還。考自誠。皆以君子際雲貴。誥贈通奉大夫。祖妣孫氏。妣李氏。皆贈夫人。君少而篤行。幼學。事父母存得其歡心。沒能盡禮。有兄四人。以父命析居。君所應得資產。皆擇取劣下者。又稍稍推其所。有以全友愛。讀羣經及諸子書。能得要領。手錄口誦。鏗鏘疲敝。而自勉不衰。尤耆宋儒程子朱子之說。願躬行何如。不爲空論。屢試輒黜。最後儀徵吳文節公。視學直隸。乃識君。以爲績學之士。擢置上第。補邑增生。君既不屑爲速化之術。不得以其所學。祿之於世。則擇後生雋穎有志之才。鍛厲而淬濯之。範成其器。出君門下者。率有聞於鄉里。而君之子秉彝。訓。被知於有司。通籍而仕者二人。當咸豐癸丑之歲。粵匪渡河北。竄畿輔。被擾。運河以西。郡縣騷動。咸欲團結鄉勇。各固境圉。君建議。阻運河而守。可省勁兵數萬。籌畫垂定。會鄰邑爽約。計以不行。然甯津終得保全者。資君所訓練鄉兵萬人之力。由是遠近人知君。不獨學優行高。又有應變戡亂之略也。際雲仕京師。仕熱河。數迎養。君耽於田園之樂。到官所。未幾輒復旋里。

年七十有六。以咸豐九年己未三月初五日卒於家。同治九年庚午。誥贈通奉大夫。如其子際雲官。娶同邑宋氏。專靜煦愿。天性儉勤。事舅姑事夫。里之人稱曰賢婦。教成其子。服官中外。所在著績。人曰太夫人之誨實然。稱爲賢母。以子際雲貴。累封夫人。就養揚州。逾月。終於揚州公廨。實同治九年十一月初八日。壽九十。距通奉公卒時。十有一年矣。子三人。際韶力耕不仕。際咸舉人。官戶部主事。際雲由翰林改官刑部。以軍功洊擢江南鹽巡道。權兩淮都轉鹽運使司。女子二人。適楊惠琇。李萬倉。孫二人。作森。澤鑾。孫女十人。嫁者七人。先是江蘇巡撫丁公之母某太夫人。將以九十九生日稱觴。先一日而卒。際雲在揚州。亦將以十月十四日肆筵娛賓。爲母宋太夫人壽。而太夫人先六日卒。江南之人。皆謂兩太夫人德稱其福。而微以不得旅進祝嘏爲歉。夫壽至九十。有賢子孫。此人間所不多觀。兩太夫人可以無憾。豈藉一二日之宴樂。以爲樂觀哉。獨國藩重奉朝名。蒞兩江。疏陳衰年多疾。不任艱劇。不宜久點高位。既不得請。則私恃友朋之同官江南者。匡余之不逮而共底於治。今丁龐二君。先後以母憂去職。或南踰嶺嶠。或北歸燕薊。於余心不能無離別之愴爾。際雲於咸豐丁未。考覈羅官學教習。庚戌考國子監學正。余皆閱取其文。故執摯於余。又館余家。教余子者數年。同官江南亦數年。爲余言通奉公太夫人之德甚悉。將以

明年扶柩還里。豫來乞銘。銘曰。

通奉之阡。祔者夫人。孝視其事親。共視其事舅。行視其身。學視其所尊。慈惠感人。視諸其鄰。種德斂福。視其子孫。其永不朽。視茲銘文。

遵義黎君墓志銘

君諱愷。字雨耕。晚自號石頭山人。遵義黎氏。曾祖國柄。祖正訓。廩貢生。考安理。舉人。山東長山縣知縣。長山君二子。長曰恂。字雪樓。雲南大挑縣知縣。君其次也。雪樓厚重寡言。氣蓋一世。君則個儻通易。周覽羣書。兄弟間自爲師友。長山君少遭不造。備歷艱險。既見二子之成。乃大歡慰。二子翼翼趨承。食必佐餽。饋必奉漿。應唯猶嬰兒也。嘉慶十八年。逆賊林清等倡亂。內煽京師。外起滑縣。河南北山東直隸震動。時長山君仕山東。雪樓侍於官所。譎言四起。或告於貴州曰。長山破矣。縣令殉城死矣。雪樓殉父矣。親屬都無存者。僅存兩孺子。漂轉吳楚間去矣。君於時。奉母楊太宜人在家。聞則北望號痛。請於母。刻日戒途。赴山東之難。至長山。則闔門故無恙。傳者妄也。由是遠近以孝歸之。君曰。父兄得全。幸也。庸有稱乎。雪樓之自桐鄉以憂歸也。家居十五六年。君晨夕造請。進止雍雍。語或不合。亦敬應之。而徐理之。終無所忤。雪樓嘗病喉痺。絕言與食。君午夜禱於宗祏。泣曰。我不及兄。兄不可死。必死者。請以我代。喉亦旋愈。其敬嫂也。如嚴其兄。其

訓羣從。如教其子。蓋歷久而不改。至其終身。亦卒不少懈。居京師。有友會某之喪。新尸穉厲。雖其兄亦畏惡不敢近。君就舉而斂之。必恪必躬。見者感歎。君少而善病。長山君雅不欲強之學。而博涉多通。窺見百家要指。以縣學生中式道光乙酉科舉人。十五年乙未。大挑二等。補貴陽府開州訓導。二十二年十二月辛卯。以疾卒官。春秋五十有五。卒之日。囊無十金之蓄。士無識不識。莫不惜君之位。不稱其德。又不獲者。壽以昌其教澤也。嗚焉。若有憾於天地。至其孝友篤行。饜於人人之心者。則誠服而更無遺憾。然則君之自省。與後之論世者。亦可以無憾已。君配張氏。妾吳氏。劉氏。子四人。庶燾。咸豐辛亥科舉人。庶蕃。壬子科舉人。候選知州。庶昌。以諸生獻策闕廷。天子褒嘉。特授知縣。候補直隸州知州。庶誠。女五人。皆適士族。孫四人。孫女五人。咸豐七年四月。葬君於河西小青欄林。其後閱十五年。庶昌乞余追爲之銘。銘曰。

賢聖盛業。豈貴高名。其道甚邇。事親從兄。穆穆碩儒。黔南之特。韜斂英奇。以修內則。聞變趨庭。萬里戴星。禱疾身代。感徹百靈。胡誠不格。何施不曾。化被梟狼。澤以甘雨。生徒濟濟。飭爾五常。白華孔絜。馨我膠庠。亦有賢嗣。文行竝卓。埋石茲邱。永貞喬嶽。

君諱松山。字壽卿。少而沈雄豁達。通曉家人生事。親長稱譽。以謂足昌吾門。咸豐壬子癸丑之間。粵賊度嶺北犯。圍長沙。陷武昌。吾邑二三賢俊。召募丁壯。激揚家聲。毅然有討賊之志。君實隸王壯武公鑫部下。號曰老湘營。轉戰湖南北江西諸省。歷有名績。王公既沒。則從張忠毅公運蘭。戰於江西饒信諸郡。追餘寇於閩邊。別擊逆黨於廣東廣西。才望日彰。超越輩流矣。咸豐十年。余檄老湘軍及鮑超之師。防勦宣歙。攻牢保危。喋血二年。始克徽州甯國兩府。張忠毅以疾歸里。君乃與易紫橋。分領老湘營之半。自持樞柄。堅守甯國涇縣等城。屢卻巨敵。以底於江浙大定。同治四年。國藩奉命攻討捻賊。捻賊者。始於安徽河南。而蔓延於秦楚燕齊者也。其叛亂稍後於粵匪。而梟悍略同。其步隊少於粵匪。而驍騎逾萬。剽疾過之。湘中士卒。慣戰江濱。未習車騎。馱運之勞。不樂北征。獎之而不勸。痛之而不服。君獨感奮請前。部卒不願北渡者。殺數人而事定。師至臨淮。易紫橋病歸。

定安謹按公此文係壬申歲正月作屬稿僅三百餘字病發輟筆距易紫橋時僅數日耳文雖未完不敢輕廢謹依元稿錄出以見珍重手鐸之意

仿古字版

曾文正公詩集

世界書局印行

曾文正公詩集目錄

四言

題楊忠愍公二疏手草.....一

題易公筠亭遺像.....一

五古

雜詩九首.....一

里胥.....三

送吳榮楷之官浙江三首.....四

題錢崙仙同年慈竹平安圖二首.....五

寄懷劉孟容.....五

題周小邨前輩塞外課經圖.....六

地用莫如馬二章思賢也.....七

題龍九詩.....七

贈李生.....七

西征一首呈李石梧前輩.....八

留侯廟.....八

柴關嶺雪.....九

廢邱關.....九

岱雲同年喪妻爲此詩替之.....九

寄弟.....一〇

乙巳春闈謝戴醇士前輩畫竹.....一〇

請醇士前輩畫竹歸貽樹德堂題詩一首.....一一

又贈筠仙一幅.....一一

送王子壽歸荊州五首以高步追許由爲韻.....一一

送陳岱雲出守吉安.....一二

丙午正月二日作.....一二

題箕谷圖.....一四

送王孝鳳之雲南卽題其尊人松菊圖.....一四

題錢崙仙難燭修書圖.....一四

題孫君采芝圖二首.....一五

訓陳慶覃侍御.....一五

小池.....一六

茲晨.....一六

失題.....一六

題泛海圖.....一六

秋懷詩五首.....一七

訓薛曉颿.....一七

送舒伯魯.....一八

劉宴詩.....一八

送莫友芝……………一九

題彭旭詩集後即送其南歸二首……………二〇

丁未六月廿一為歐陽公生日集邵二寓齋分

韻得是字……………二〇

送黎樾喬侍御南歸五首……………二一

題季仙九師采蘭莢菊圖……………二二

題朱伯韓詩集後十首……………二三

送黃恕皆使秦中……………二四

北堂侍隱圖為姚吏部題二首……………二四

題陳氏五世鄉賢遺像……………二五

韓齋為孔舍人題……………二五

桐陰消夏圖為史吏部題……………二五

題苗先簾寒鐙訂韻圖……………二六

養閒草堂圖為潘博士題……………二六

陶太常小像……………二七

會合詩一首贈劉孟容郭伯琛……………二七

王母方太夫人詩……………二八

贈李眉生……………二八

題俞蔭甫羣經平議諸子平議後……………二九

謝王王秋徐州見贈之作……………二九

伎求詩二首……………三〇

七古

謝疊山賣卜研為劉太守題……………三一

送凌九歸……………三一

送楊春皆歸……………三二

題毛西垣詩集後即送之歸巴陵五首……………三一

題顧南雅先生畫梅應何子貞……………三三

傲奴……………三四

瓊瓊行戲簡何子敬乞醃菜……………三四

反長歌行……………三五

題畫蘭三首應田敬堂同年……………三五

贈何子貞前輩……………三六

題唐鏡海先生二圖……………三六

感春六首……………三八

為何大令題明趙忠毅公鐵如意……………三九

喜筠仙至即題其詩集後……………四〇

六月二十八日大雨馮君樹堂周君苻農郭君

筠仙方以試事困於場屋念此殆非所堪詩

以調之……………四一

苻農既和余詩而三子者皆見錄於有司乃復

次韻……………四一

題明陳忠愍公雪聲堂硯為唐觀察樹義作……………四二

題醇士前輩爲溟生師畫竹疊前韻……………四二

謝岷樵……………四三

移居偶成……………四四

陳慶覃詩鈔題辭三首……………四四

憩紅詩課戲題一詩於後……………四五

書朱皋亭家傳後……………四五

送周文泉大令之官城武……………四六

送陵十一歸長沙五首……………四七

送謝果堂前輩歸江南……………四八

題王少鶴裏砧課讀圖……………四九

丙午初冬寓居報國寺賦詩五首……………四九

酬李生三首……………五〇

次韻戴醇士邵蕙西見過……………五一

題平谷山莊圖……………五一

題王麓屏扁舟歸養圖二首……………五二

書嚴太守大關賑糶詩後……………五二

送黎樾喬侍御南歸……………五二

題張石舟煙雨歸耕圖……………五三

大學石鼓歌……………五三

題朱伯韓侍御之尊人詩卷手蹟……………五四

題簷篋谷圖……………五五

答李生……………五五

題唐本說文木部應莫邵亭孝廉……………五六

贈吳南屏……………五七

游金山觀東坡玉帶詩……………五七

五律

早起憶九弟二首……………五八

得郭筠仙書並詩卻寄六律……………五八

寄弟三首……………五九

獨出……………六〇

訪苗先麓……………六〇

懷劉蓉……………六〇

歲暮雜感十首……………六〇

桂湖五首……………六一

至日二首……………六一

兩……………六一

送吳英樾之官浙江兼簡魏黃生大令三首……………六三

送鄧伯昭兼簡家伯醇秀才三首……………六三

莫過竹如……………六三

東鄰杜氏義塾……………六四

送王少鶴……………六四

送金竺虔之官閩中……………六四

七律

歲暮雜感十首……………六四
 寄郭筠仙浙江四首……………六五
 三十二初度次日書懷……………六六
 憶弟二首……………六六
 漫興……………六六
 聞客話里中近事……………六七
 元戎……………六七
 溫甫讀書城南寄示二首……………六七
 早發沔縣遇雨……………六七
 初入四川境喜晴……………六七
 梓潼道中有懷馮樹堂陳岱雲……………六八
 早發武連驛憶弟……………六八
 三十三生日三首……………六八
 國士橋……………六九
 哭少時同學某……………六九
 送妹夫王五歸五首……………六九
 酬九弟四首……………七〇
 贈梅伯言二首……………七〇
 夜直苦寒……………七〇

吳宮黃病中屬市鹿尾……………七一

臘八日夜直……………七一

失題四首……………七一

丁未六月七日考試漢教習試院作二首……………七二

武會試闈中作……………七二

送孫芝房使貴州二首……………七二

書邊巖石詩集後二首……………七二

送梅伯言歸金陵三首……………七三

酬李芋仙二首……………七三

次韻何廉昉太守感懷述事十六首……………七三

讀吳南屏送毛西垣之卽墨長歌卽題其集……………七五

五絕

讀李義山詩集……………七六

七絕

入陝西境六絕句……………七六

題畫竹次醇士前輩韻二首……………七七

送唐鏡海先生九首……………七七

壬戌四月沅弟克復巢縣和州含山等城賦……………七七

詩四首……………七七

沅甫弟四十一初度……………七八

會文正公詩集

四言

題楊忠愍公二疏手草

古孰無死。會不可班。輕者鴻毛。重者泰山。楊公正氣。充塞兩閒。遺文妙墨。深播人寰。馬市一疏。聲振薄海。更擊賊臣。五奸十罪。心追逢比。身甘蒞醢。取義須臾。歸仁千載。翩翩諫草。猶存手藁。古柏擎空。似枯彌好。鬱此英風。輔以文藻。長有白虹。爛茲瓌寶。

題易公筠亭遺像

昔歲在丑。蒞人西遊。我作挽辭。比許文休。馬磨既甘。不競不絀。亦有月日。胸剖九流。東崖奉親。朝戲綵舞。暮歸讀書。羣言藻斧。鄉闈屢試。爨無完桐。文章憎命。淚灑秋風。不於其躬。迺祚其子。濯濯芳蘭。芥拾青紫。弓冶不墮。載述先芬。瞻言遺像。永播青塵。

五古

雜詩九首

早歲事鉛槧。傲兀追前軌。張網挈陬維。登山追岷嶷。述作窺韓愈。功名鄙侯儼。三公渺如稊。萬金睨如屣。腸胃鬱千奇。不敢矜爪觜。稍待蘭蕙滋。烈

芬行可喜。豈期揭鶻駘。前驅不踰咫。滔滔大江流。年光激若矢。春秋三十
一。頑然亦如此。染絲不成章。橘遷化爲枳。壯盛百無能。老蒼真可恥。樗散
吾所甘。多是慚毛裏。

西山何鬱鬱。白日馳昭昭。六街淨如練。雙闕凌神霄。沈沈府中居。員井鑿
瓊瑤。罽毼周四角。窗霧濛皎綃。公子盛文藻。九陌鳴金鑣。羣從袂成幄。掠
風馬蹶驕。紅燭舞絳雪。會宴皆金貂。朝餐羅鯖鯉。晚衙沸笙簫。今夕旣相
酢。明日還見招。天高地則厚。何事不逍遙。

手斲不烘熨。足趺不趨徑。問我何自苦。我歌君且聽。激湍無駐波。止水光
凝凝。懷棟與構櫨。豈曰非天定。東蒿代虹梁。於道未爲稱。朝菌濡濃露。天
天不及暝。適意一須臾。骨朽猶詬病。可憐繁華子。醉夢幾時醒。炫妝豈無
服。自媒羞妾媵。已矣吾何營。閉戶覽明鏡。

傷禽悲弦聲。遊魚驚月影。丈夫貴倔強。女子多虛警。強弧有時弛。夷塗有
時梗。颺風揚海濤。潮平已復靜。君子別有憂。衆人恐未省。

霜落萬瓦寒。天高月浩浩。美人在何許。相思心如擣。我昔覲美人。對面如
蓬島。神光薄軒墀。朱霞蕩初曉。彩鳳儀丹霄。顧視無凡鳥。意密恩還疏。微
誠不敢道。貽我彤管煒。粲令希世寶。可憐金屋恩。長門闕秋草。謠諑日以
多。覲閔會不少。寵眷難再得。蛾眉行衰老。區區抱私愛。夜夜祝蒼昊。

天雞鳴半夜。六合未清曉。烏鵲鳴向晨。羽毛誇矯矯。一日金丸驚。戢翼暗百鳥。鳴鴉流惡聲。萬方憂集蓼。青蠅鳴棘樊。繆彭復虛鼎。閒鳴百無補。嗟爾秦吉了。螻蟻草閒鳴。亂人徒擾擾。

入門忽怳怳。出門復皇皇。嗟我素心人。各在天一方。庸夫厭鼎食。誼士謀糟糠。奔走徧天下。歸去仍空囊。秋老江湖闊。何以慰淒涼。勿勞我之思。我今足稻粱。所憂非所職。所樂殊未央。日暮登高邱。四顧何茫茫。落葉東南飛。孤雁西北翔。思君不得觀。慘澹詠斯章。

松柏鬢危巖。葛藟相鉤帶。兄弟非它人。患難亦相賴。行酒烹肥羊。嘉賓填門外。喪亂一以聞。寂寞何人會。維鳥有鷦鷯。維獸有狼狽。兄弟審無猜。外侮將予柰。願爲同岑石。無爲水下瀨。水急不可磯。石堅猶可磕。誰謂百年長。倉皇已老大。我邁而斯征。辛勤共羸羸。來世安可期。今生勿玩愒。誰能烹雋燕。我願燎桑薪。誰能釣巨鼈。我願理其綸。南澗芼蘋藻。可以羞神鬼。大材與小辨。相須會有因。嗟余不足役。豈謂時無人。

里胥

牛羊忽竄突。邨社雜喧逐。昨聞府牒下。今見里胥來。召募赴戎行。羽檄馳如雷。後期不汝宥。行矣胡遲迴。老嫗搥胸突。哭聲亦何哀。龍鍾六十餘。伶仃惟一兒。弱小不識事。黃犢母之隨。筋力儻可食。或免一家飢。薄命不足

惜兒去傷永離。老嫗泣未闌。老翁跪致辭。王事亦云棘。婦人那得知。螻蟻穴寸土。自荷皇天慈。天威有震疊。小人敢疑猜。貧者當敵愾。富者當輸財。便當遣兒去。不勞火急催。所媿無酒食。與吏佐晨炊。貧者勉自效。富者更可悲。隸卒突兀至。誅求百不支。舊襦統袴子。纍纍飽鞭笞。前卒貪如狼。後隊健如犛。應募幸脫免。傾蕩無餘貲。吁嗟朝廷意。兵以衛民爲。守令慎其柄。無使胥吏持。此輩如狐鼠。萋萋肆恣睢。聊爲道人徇。敢告良有司。

送吳榮楷之官浙江三首

讀書三十年。今來始一試。自抱輪囷材。構廈隨所置。世人苦寒儉。舞衷先擇地。斤削不能遷。壘盜各自器。君子儲百用。多藏如列肆。深厲與淺揭。所向皆如志。君本青雲士。摩空排健掖。置之承命廬。枚馬當偃幟。才多厭閒散。翩然去作吏。方今清華秩。駢拇僅云備。不如膺專城。張弛從吾意。觀魚莫結網。網過酷於餌。治絲莫求多。緒多亂神智。聖朝淪洽恩。陬澨實漸被。可憐蚩蚩氓。惓惓還好義。願君愷弟思。隨時勞撫字。

西湖吾未到。夢想若遇之。荷花夏如海。當春萬柳垂。秋月隨潮湧。暮霽天無涯。三百六十寺。嵐翠渺迷離。君去事幽討。扶剝發天倪。餘慳收昔遁。奇賞獲新知。朝餐吸山綠。暮雨張水嬉。尋碑嗅梅蘂。獨往無人隨。政成無一事。風流方在茲。懷抱一如彼。江山復如斯。此樂可持贈。寄我千首詩。

鄉閭昔相從。殷勤託詩酒。再來長安道。舟車並攜手。如今彌曠遠。脫然絕窠臼。少年尙意氣。崢嶸各自狂。風塵飽所諳。蒼然皆老醜。激湍亦已平。真氣充戶牖。相見無藩籬。灑落眞吾友。昨夜秋風來。嫋嫋涼生柳。念子當乖離。旁皇如失守。萬族各有營。歡聚焉可久。意趣苟無違。秦越如左右。後會知何年。今茲歲在丑。

題錢崙仙同年慈竹平安圖二首

冉冉南山竹。柯葉互檀欒。上有一片雲。下有九畹蘭。清風相戛擊。虛碧鳴秋寒。玲峴走鞭散。抗衡勁節干。養成兩雛鳳。文彩何姍姍。高枝足棲宿。芳實供朝餐。歸昌忽采律。言振九霄翰。引吭發鈞奏。俯視失鸞鸞。卻顧篔簹谷。依舊青琅玕。年年託美蔭。歲歲祝平安。

紅塵日夜深。遊子思無已。倦鳥有時還。桑弧有時弛。我有山中廬。僅籬夾綠水。修竹倚大椿。重重互幡纒。發條播芳蕤。清陰亦何美。依戀會有因。庶往恭桑梓。殷勤寸草心。區區方在此。

寄懷劉孟容

清晨采黃鞠。薄莫不盈襖。寧知弟昆好。忍此四年別。四年亦云已。萬事安可說。昔者初結交。與世固殊轍。垂頭對鐙火。一心相媚悅。炯然急難情。熒熒光不滅。漣濱一揮手。南北音塵絕。君臥湘水湄。辟人苦扁鑷。懷璧誤一

投已遭官長劄。我作燕山囚。衾襪冷如鐵。塵土塞中腸。經旬聞嘔泄。夢魂互往還。邂逅在嶧嶲。君魂畏豺虎。我魂阻蛇蠍。明年會長沙。對牀殊咄咄。可憐郭生賢。日夜依我闥。三子展殷勤。五旬恣猖獗。自從有兩儀。無此好日月。決渠東西流。人事有蹉跌。當時別江干。懸知成久闊。郭生從我行。再踏長安雪。束蒿貢廊廟。塗丹強作闥。磐松困澗底。千歲老不屈。行藏一以歧。會合焉可必。知君障污塵。憎我逐煩熱。摧蘭擣作糝。本馨固難奪。皇天造羣倫。位置各成列。煌煌帝者都。峩峩集勳閱。前庭充組圭。後閔煖清瑟。大馬疾如飛。高車如電掣。陋巷時騎過。牆震窗紙裂。而我支肘眠。朦朧兀頑劣。視蔭呼晚飯。終年會不缺。癡兒亦肯堂。四齡已饗饗。所愧偷太倉。無異哀窮乞。羨君老巖阿。閒味甘於蜜。嗟哉趣豈殊。所處良不一。坦蕩觀皇途。轉側思家室。永懷素心人。悠悠難具述。

題周小邨前輩塞外課經圖

肉食多亨途。通儒邁百閔。時蹇心匪乖。身窮道未窘。周君信奇侏。天機苦捷敏。昔歲乘青驄。羣飛畏秋隼。偶被金丸驚。可憐翠羽隕。十年遼海行。九月邊風緊。銅雀夢觚棱。鐵衣錦纈純。自信茲遊豪。甘受世人哂。日日抱叢書。森森如束筍。吾道儻欲東。獨善良不忍。此邦盛球琳。多士紛籛篋。斧斤試一施。穀率聊可引。弟子初反車。先生大倒囷。文囿張百旃。經畝接千畛。

但期道傳薪。未要歸載糶。昨者唱刀環。塞外回文軫。勝事告友朋。餘味足
咀吮。方今柄師儒。華秩半卿尹。虎觀車如龍。辟雍市如蜃。會看招旌旆。且
須巖鞮鞞。稽古榮復榮。吾言非蠢蠢。

地用莫如馬二章思賢也

地用莫如馬。越險思驍騰。豈無汗血種。相求亮未曾。萬鍾繼稟粟。千金登
鈎膺。隆儀苟一闕。市駿休漫稱。

人用莫如龜。幽室能廢燭。告猶儻見從。外侮敢余毒。從短翻棄長。惜哉支
牀足。良無藻悅登。不如塗泥辱。

題龍九詩

李唐盛聲律。初響鏗華鐘。逮及下衰時。切切鳴寒蟲。扶輿發朝氣。百彙曜
麟龍。缺月夜騰光。不與東昇同。秋霜入科木。色黯蒿與蓬。文章說心腑。本
不從窳隆。能者自植立。餘子靡隨風。孰於衆音颯。玉振開羣聾。君才美無
度。大圭宜廟中。君詩如春融。秋爽亦自工。肉好用爲賢。琢刻生芒鋒。南輶
斐然作。山水滌襟胸。雜什多未芟。略可芟厖茸。要道鏗不舍。金木隨所攻。
且況力宵窺。奧阼辨西東。終然到聖處。今古誰雌雄。

贈李生

生名嗣元是科四川十九名余在闈中最賞其文揭曉來謁則神清似郭
筠仙愈傾愛之看書亦不少真美才也年廿二歲因作古風一首贈之云

岷山萬仞雪。太古人迹稀。中有窈窕谷。綠蕙芳以菲。幽芬亦已鬱。賞識方

庶幾。澗邊棘荆滿。山上春草肥。託根亮同地。豈辨誰是非。地亦不能易。香亦不能飛。忽逢荷樵子。采擷盈裳衣。臨風再三嗅。俯仰情依依。由來有臭味。不必崇知希。

西征一首呈李石梧前輩

我昨賦西征。熾熾實朱夏。烈日焚八荒。息影無寸暇。孱體甘所侵。炎威冱少倡。一病罹百艱。煩煎竟日夜。夙昔傷勁弓。聞弦神已怕。壹志事呻吟。僇儀任嘲罵。瘡疫難指名。熱寒互嬗謝。粒食經旬辭。況能問燔炙。帶月方首塗。參橫未云罷。顛簸筍輿中。磋磨破腰胯。奴子蒼黃詢。庸醫再三詫。猛然肆造攻。云當一戰霸。惡莠雖已鋤。良苗亦失稼。隔旦嘻其疲。無復平生咤。皮皺面有窪。耳聾氣愈下。慘澹過潼關。沈昏渡清灊。赫赫李中丞。觥觥范韓亞。老羸臥三邊。犬羊敢狙詐。聞我至驪山。材官百里迓。秋雨長安邸。征鞍庶一卸。旅魄頗飄搖。公來百慰藉。遣僕炊香粳。呼童伺館舍。徵醫未辭煩。饋物不論價。古誼暖於春。美言甘於蔗。我魂稍稍旋。望蜀仍命駕。裹藥充篋筐。買飴養嬰妣。漸覺身能輕。如馬脫韁鞞。吾固慶生存。衆雖亦嗟訝。燕譽多親知。艱難少姻婭。永媿夫子賢。高情壓蒿華。賤子不足矜。西人實沾化。

留侯廟

小智徇聲榮。達人志江海。咄咄張子房。身名大自在。信美齊與梁。幾人飽
載醢。留邑茲巖疆。亮無懷璧辜。國仇亦已償。不退當何待。鬱鬱紫柏山。英
風渺千載。遺蹤今則無。仙者豈予給。榻來瞻廟庭。萬山雪皜皜。赤日巖中
生。照耀金銀彩。亦欲從之遊。惜哉吾嬾怠。

柴關嶺雪

我行度柴關。山光驚我馬。密雪方未闌。飛花浩如瀉。萬嶺堆水銀。乾坤一
大冷。走獸交橫奔。凍禽竄荒野。揮手舞巖巔。吾生此瀟灑。忽憶少年時。牽
狗從獵者。射虎層冰中。窮追絕壁下。幾歲馳虛名。業多用逾寡。久逸筋力
頹。回頭淚盈把。

廢邱關

項王西入關。叱咤何雄哉。鼻息撼山岳。號令如轟雷。分茅割大地。駕馭英
雄才。六王既立後。三將還西來。降臣剖符竹。洪度方洞開。廢邱亦善地。百
里關蒿萊。桓桓章將軍。乞乞貔虎材。奸豎主帷幄。大將終疑猜。望夷不足
惜。此類良可哀。行人一長歎。萬壑悲風迴。

岱雲同年喪妻爲此詩譬之

陳君喪厥妃。善憂世無有。情至生幻機。有夢造王母。紫殿何言言。衆星挂
戶牖。穆滿翔其旁。方朔戲其後。陳某蟣蝨臣。昧死訴左右。彼有何德功。鶴

鷄到白首。此獨何罪辜。生世不少久。剜肉補其天。於德未爲醜。食貧入九年。辛勤足梁筍。何孽之難逭。斬刈如惡莠。王母反袂泣。倉皇頗怩怩。方朔踉蹌出。曰余不執咎。衆生自生滅。非神有官守。高秋金氣肅。萬葉同衰朽。朝落非獨殤。夕脫非獨壽。皇天了不知。無人司薄厚。不見狼臙女。蓬頭雙足垢。一生不洗面。媚夫稱佳偶。亦有綠林豪。掠人如雞狗。堂前妖姬舞。堂下鬼妾走。彼雖得偕老。於君意可否。此雖中道捐。名聲極萬口。令妻果然令。何必在駘耆。惡妻不可言。牀第森械杻。陳君翻然覺。再拜謝善誘。歡喜不復愁。逢人但索酒。

寄弟

昔我初去家。諸弟各弱小。阿季髡兩髦。覷人眸子瞭。後園偷棗栗。祿升極木杪。叔也從之求。揖我謂我矯。分甘一不均。戰爭在毫秒。余時輕別離。昂頭信一掉。老弟況童騃。樂多愁憂少。瞥然成六秋。光陰如過鳥。世味一飽嘗。甘心厭荼蓼。夢裏還鄉國。溝涂苦了了。朝企恆抵昏。夕思或達曉。君詩忽見慰。迴此肝腸繞。生世非一塗。處身貴深窈。衆萬奔恬愉。聖賢類悄悄。二陸盛撥張。鶴唳悲江表。夷齊爭三光。豈不在餓殍。我今寄好語。君聽其勿藐。一願先知命。再願耐撻撻。

乙巳春闈謝戴醇士前輩畫竹

余少淪賤貧。學書等畫墁。中歲偷太倉。誤爲金紫紳。文字雖所攻。錢嘗不能半。邇來又十年。拋棄如土炭。豈謂選佛場。謬來事裏贊。列仙盛瀛洲。腰魚何璀璨。禁院扃重棖。沈沈宵桂觀。鍵戶無一營。馳箋鬪豪翰。蘸藍掃秋葉。斯須復堆案。衆雖亦好事。奔命極雨汗。戴嵩聖雲孫。三絕天所歎。干謁填其廬。鐵門說三換。竭來困棘闈。逢人句脫腕。爲余寫新竹。風筠兀繚亂。呵壁呼老可。笞案何足算。我雖不解畫。耆古頗知岸。但得琴中趣。何必工抑按。爲報青琅玕。微詩庶一粲。

請醇士前輩畫竹歸貽樹德堂題詩一首

孔翠閉雕籠。失羣忤本性。懷我如玉人。三旬闕寶敬。老醇今鄭虔。支離頗自聖。余爲揚其波。畫詩極輝映。寫此貽君子。持將作寶鏡。筠以喻其文。幹方晚節勁。桃李漫紛紛。語君勿與競。物外求交知。塵中鬪幽窺。

又贈筠仙一幅

人生有乖隔。咫尺成關山。我心日百轉。從來輪石頑。日吾語戴侯。君在張李閒。爲君畫新竹。幽澹不容攀。我家雙谿上。萬竹圍沙灣。涼夜幽篁裏。月冷水潺潺。行攜子僧隱。鹿豕相往還。詩名滿天地。蹤迹混榛菅。

送王子壽歸荊州五首以高步追許由爲韻

冠組墮塵海。與世日滔滔。豈知魯連子。脫身美遯逃。十輩蝸與鷺。跣跟不

能高。黃鶴冥一舉。大地如秋毫。

揮鞭拾科名。咄嗟踏天路。四十非不彊。萬卷非無具。尋直如可期。須臾得少駐。側聞馮潛郎。龐眉守故步。

盛年窟關輔。結客頗支離。負米半天下。有婦愁朝炊。詩名滿湖海。持是欲安之。菰中一漁笠。懷哉不可追。

天人互轉旋。時勢有虎鼠。結交貴結心。寧當變寒暑。可憐拙匠斤。繆被纓人許。一杯君強醺。無人解觴汝。

皇明燭八極。小范臥西川。嗟君老從事。招招豈無舟。廢興難可道。時來不自由。投竿欲強起。何代無馬周。王君嘗爲林少穆制軍幕府從事

送陳岱雲出守吉安

有序在文集

驪駒且莫喧。我歌始一放。憶昔初逢君。漢濱俯高浪。同拾春官第。天門躡闥閱。射策干羲軒。挾神一何王。君喁我斯于。躡履星辰上。雙鳥不分飛。短翎實所傍。借屋兩頭居。嬉遊不可狀。六月寒瓜肥。嚼冰滌府藏。劈牛持作冠。狂呼極跌宕。秋雨催歸人。膏車各南向。長沙揖君廬。入門刪三讓。拜母升後堂。排筵倒家釀。明歲同還朝。百扶接居巷。朝餐或來過。夕渴還相訪。問學商米鹽。經綸說魚醬。驅驢駕雞棲。似狗頗茁壯。有甑例宜塵。無衣安用朽。我道夫子賢。世人或嘲謗。世人病我頑。夫子憐其誑。袍笏雖支離。貌

卑心則亢。平生企高遐。力微不自量。樹德追孔周。拯時儷葛亮。又兼韓歐
技。大言足妖妄。夫子不予譏。和高越初唱。洽比三四年。爲權亦云暢。卯歲
夏之中。九門盛炎瘴。君實罹其災。一病月三望。毒熱轟外疆。客瘡兀中脹。
有婦賢且勤。籲天事供養。背分苟令涼。饋進冀缺餉。剜肉補其天。有神實
克相。繫我相扶持。計窮屢快快。國工吳竹與鄭小。調齊妙心匠。鬼錄不見
收。人謀信可仗。由來福與禍。茫茫自天貺。時月無幾何。中饋遭死喪。我時
匍匐救。倉皇事擗擋。黃口抱呱呱。稽首別總帳。移巢翼其兒。室毀子無恙。
良人匪頑石。焉能缺悽愴。傾家營奠齋。淚河送反葬。我謂君已愚。稽經懼
失當。君謂情自纏。誰超六塵障。展轉彌再期。病貧互摩盪。南望問尸饗。儲
糧不盈盎。推腸與蹙眉。萬端欲誰諒。一朝被殊恩。千憂始滌蕩。士窮守艱
危。時來類放曠。爲君述前塵。在莒慎無恙。報恩不在他。立德乃可尙。丈夫
要努力。無爲苦惆悵。

丙午正月二日作

蹉跎三十五。聞道其既晚。去日良已富。來程亮復遠。自從伊閩亡。大道閉
元棧。有誓不識珠。賣珠事驕蹇。微數陳豆籩。小知辨蜚蜺。迂腐譏淵騫。空
疏訕商偃。前者激波瀾。後者恣鬪狠。大江日滔滔。衆人死婉婉。誰能抱孤
芳。寂寥守舊碗。通經不達時。失身下豬圈。嗟予局咫聞。亦不工嗒嚙。非仁

不敢祖。非義豈嘗本。所學誠流俗。攀躋但分劑。不挂高明眼。讖評月少損。民各有依倚。吾寧變愚悃。文字局緘臙。經綸在房栊。浩蕩冠蓋場。一心自嘉遯。聊用陳區區。夢魂庶謚穩。

題篔簹谷圖

大雅卽高詠。耽隱青山岑。手折篔簹枝。鏗爲琅玕音。松風石壁高。箐霧林霏深。幽幽人不知。獨鶴明孤心。

送王孝鳳之雲南卽題其尊人松菊圖

累世無咎繇。寃民塞九縣。數畀危衆魚。吞舟不加譴。王叟邦之良。溫恭少側弁。獄吏一牽連。秋毫忤雷電。田甲時見陵。馬遷莫相援。盆底無昊天。荷戈出摩甸。萬里蒲蠻道。征人淚如霰。廿載餐氈糜。衣無故時線。回首望家山。柴桑信所戀。老松儻無急。叢菊向誰綯。有子鏗華鐘。蜚聲震金殿。武庫羅其胸。干將思一剗。誓上緹縈書。不乘長卿傳。一麾首滇南。征心已如箭。預想王坦之。初覲懷祖面。抱持至膝上。悲喜集一見。萬事如浮雲。滄海日千變。獨有骨肉離。重逢真可羨。明歲唱刀環。懽聲若雷忙。歸食武昌魚。比鄰張高宴。鳳詔喧里閭。純孝迴天眷。不學朱壽昌。徒登獨行傳。

題錢崙仙難燭修書圖

腐叟音塵涸。千載無完史。斷代自班生。鉞掘破大體。茂先賞三志。編摩或

索米。舊書留黷瑕。但爲吳生詆。數賢不足珍。餘外况靡靡。聖代盛文章。羣
英躡前軌。殷鑒曩成編。唐經今繼美。磊磊南董倫。影纓足幡纒。錢子邦之
良。弱冠捋金紫。涇渭原胸中。袞袞極筆底。朝踏東華路。柴車等敗屣。夜歸
南窗下。椽燭照大几。一字褻幽潛。片言殛姦宄。曲直在豪端。誰能矜爪觜。
我亦載筆臣。大昭久復弛。三載糜官錢。甌塵亦莫洗。披圖聊粲然。作詩一
洒恥。

題孫君采芝圖二首

孫君名葆恬字劬吾善化人嘉慶己卯舉人道光六年以大挑選桃源縣學教諭芝房侍講之父也

衆羽工飛騫。先生獨摧挫。十載桃花源。寒氈屢告破。古木發深彈。從來拒
俗和。采蕨晞殷頑。餐英補楚些。自擷三秀芝。窮年振寒餓。豈謂人事乖。悠
悠卽長臥。掇草求長生。無靈欲誰那。長是拜畫圖。千秋聆咳唾。
少室吾黨英。儲能實完好。韶齒殊不廉。閒偷仙人棗。航海探琪花。踟躕踏
三島。根本良已深。衆芳信在抱。言采幽蘭歸。種作階前草。上有竹修修。下
有清風埽。竹節寒逾堅。真心永難老。風暖扇餘馨。繁香滿穹昊。

訓陳慶覃侍御

赤水沈元珠。千年遲象罔。君子迴深眷。翻然辱旌獎。馬走那解詩。鉤章事
鹵莽。秋蟬挂高柳。風過自成響。豈意師曠聰。偏聽發謬賞。維君堅高壘。無
人敢掉鞅。筆端一縷香。百靈通胎嚮。方今隆棟穹。伊巫擁天仗。巢燧無關

遺無處著。岨彊以茲得雍容。閒吟寄慨慷。有書亦盈牀。有沽亦盈盎。六宇自冥冥。秋塵莫予網。請君拊夔石。予亦擊堯壤。

小池

屋後一枯池。夜雨生波瀾。勿言一勺水。會有蛟龍蟠。物理無定資。須臾變衆竅。男兒未蓋棺。進取誰能料。

茲晨

茲晨曷不樂。端念良自尤。自吾有爪觜。半啄匪躬謀。俯視見后土。仰視見光浮。關門赫婢僕。雄長如諸侯。專精事羹飯。餘政及乾餿。兵後物力絀。平世生齒稠。人人似我飽。實重黃屋憂。吾皇惕味爽。彼相爭前籌。聖者自危厲。愚者自優游。大哉六合內。人類難等儔。

失題

西山一夜雨。秋風入庭除。清晨展書坐。愴然樂有餘。天宇一何廓。蕩蕩真吾廬。熇熇夸毗子。守隘無曠居。衆鱗爭坳潦。鬣鬣安得舒。豈知逃閒寂。放蕩得尾閭。吾樂正如此。君樂復何如。

題泛海圖

昔我權瓜州。金焦望嶮巖。靈山咫尺閒。不得窮巉巖。還家述遊蹤。高堂一笑莞。江湖險可吁。泛海況不難。撫摩慰驚魂。輒脚呼盤盞。由來慈母心。險

夷最所揀。孝廉本儒衣。文章富編刻。胡爲涉遐思。浮海窮規轡。有母足慈悲。奉佛信瑟僂。共道洛伽巖。實惟仙藥產。神人渡迷津。福汝能簡簡。虔禱或有憑。孝思本無限。圖此塞寸誠。靈心聊結撰。何知妄與眞。雲濤紛滿眼。

秋懷詩五首

木葉下如雨。西風吹我衣。天地氣一肅。回頭萬事非。虛舟無抵忤。恩怨召殺機。年年絆物累。俯仰鄰詬譏。終然學黃鶴。浩蕩滄溟飛。蟋蟀吟西軒。商聲方茲始。小人快一鳴。得時亦如此。大澤藏蟄龍。巖冬臥不起。明歲澤九州。功成返嶽底。君道惡多言。喧囂空復爾。

吾愛邵夫子。

謂仁和邵懿辰

古之三益者。鑿鑿攻我瑕。不隨世人啞。薄俗尊文章。吾亦事苟且。赫赫揚子雲。末途裂於瓦。再拜謝獲人。斤斧行可捨。

城頭昨宵月。今夕虧其圓。丈夫矜小節。一缺誰復全。蝸廬抱奇景。高視羲皇前。蒼蠅颯尺壁。江漢難洗蠲。馬融頌西第。今爲時所憐。吾友劉孟容。遺我兩好書。三年不報荅。幽怨今何如。深山闕大寶。光氣塞州閭。樊英履壇席。名業箕斗虛。補天儻無術。不如且荷鋤。

謝辭曉颿

大谷闕幽蘭。由來習霜雪。摧挫彌歲年。歲蕤減昔悅。本性誠未移。芬芳詎可滅。時物一爲遭。適爲吳人擷。會合亦有宜。廢興固難說。旁有荷樵子。殷

勤事寡頹。出山嗅懷。餘馨亦未輟。臭味良有然。非渠獨明哲。
風騷難可熄。推激惟建安。參軍信能事。聲裂才亦殫。寂寞杜陵老。苦爲憂
患干。上承柔澹思。下啓碧海瀾。茫茫望前哲。自立良獨難。君今抱古調。傾
情爲我彈。虛名播九野。內美常不完。相期蓄令德。各護凌風翰。

送舒伯魯

神駒秉清峻。墮地凌無前。男兒志萬里。亦在華妙年。舒生吾楚儁。結髮疲
丹鉛。內外承嘉蔭。託根魁斗躔。迎婦范陽府。結客彌幽燕。途來窟京輦。滿
月彎鳴弦。謂言拾高第。如撥牀頭錢。人事有奇偶。虎鼠非吾權。文章不賦
媚。例爲時世捐。芝蘭合鋤刈。朝菌香徹天。可憐壯夫志。摧撼終不遷。時時
造我闈。屏慮商詩篇。高吟動厚地。幽思絕重淵。維桑古有敬。況此接才賢。
昨來忽告別。歸意何翩翩。寢門疏定省。冑爲世網牽。一鳴不稱意。脫去如
鷹鷂。趙孟等閒事。難者參與騫。馬走蝨此閒。歲月逐風顛。謀歸百不勇。送
女聊自鑣。

劉麥詩

新甯江君忠源。予之執友也。數爲予稱其邑孝子劉麥者。道光丁
未。麥年齒六十。江君求予以詩揚其行。爲老人光悅。且以風里人。
夫甄采畸德。作獨行傳之長編。史氏之任也。嘉善而懲不能。勸一

而勵百。亦士大夫有風俗之責者事也。故爲之詩歌。遠貽劉安。安名某。字某。實縣學生。

金峯萬山轉。劉安巢山椒。邦人所賓禮。與山兩岿嶢。天窮苦無告。孤露初及髻。傾家樹四壁。馬磨風蕭蕭。朝餐或恥盜。夕飲恆賭瓢。子衿式學省。童冠各在招。束脩斂薄少。歲穫償蕘穰。上堂奉甘滑。入室馨脂膏。一噎三味摩。一食再溫劬。蒸梨或忤志。捐斥無寬條。嬰兒抱酷愛。畢世非一朝。白日不東返。孝養隨瞥飄。所餘楛與椹。傍身而瓊瑤。觸時卽子卯。有賈如春潮。仰供不知劬。俯畜安能饒。舉家浩鵝雁。妻餒兒號宵。維安不鹵莽。長短與量料。絢箴教補裂。呼粥權息鬪。鄉鄰敬其誼。百里無飛鴟。長官式其賢。唾息不敢驕。噫乎血氣倫。報本義所要。人紀有乖沸。茲實懸之杓。惠迪經所訓。物理亮非遙。感歎遂成詠。庶以風鄙饒。

送莫友芝

豪英不地囿。十九興偏邦。斬崖撥叢棘。往往逢蘭茝。黔南莫夫子。志事無匹雙。萬書薄其服。廿載幽窮鄉。今年偶作劇。射策來都堂。青鞵側破帽。日繹書賈坊。邂逅一相見。揖我謂我臧。劉郎吾庸敬。好事迷短長。炙酒頰君頰。亦用沾我腸。微瀾時激引。稍稍觀濤江。可憐好手眼。不達時溫涼。果然被捐斥。鋤刈不成芳。誰能尼歸駕。飄若鷺鳩翔。我時走其廬。深語非淺商。

次及蓼莪痛。老淚何浪浪。嗟余亦心性。內刺不能降。竇然拜牀下。十分肅老龐。關山有乖隔。人事不可詳。萬里共日月。肝膽各光芒。作詩勸歲莫。亦以勤劉郎。劉郎謂某雲

題彭旭詩集後卽送其南歸二首

日日送歸客。情抱難爲佳。老彭復去我。內撫焉所偕。往予初遇子。睇眄無等儕。鷹眼迴高秋。勢不甘塵埃。自言困鄉國。橫被口語猜。絳侯畏牘背。田甲欺死灰。脫身來洛下。稍攝驚魄回。風波一震薄。萬事何有哉。雄篇勿枉我。峻句何崔嵬。險拔肝膽露。憂患才地開。終然達紫氣。幽獄難可埋。男兒要身在。百忤寧足摧。臨歧不知報。努力乾深杯。

大雅淪正音。箏瑟實繁響。杜韓去千年。搖落吾安放。涪叟差可人。風騷通臍蠶。造意追無垠。琢辭辨倔彊。伸文掇作縮。直氣摧爲枉。自僕宗涪公。時流頗忻嚮。女復揚其波。拓茲疆宇廣。大道闢榛蕪。中路生罔兩。孱夫阻半途。老大迷歸往。要當志千里。未宜局尋丈。古人已茫茫。來者非吾黨。竝世求人難。勉旃各慨慷。

丁未六月廿一爲歐陽公生日集邵二寓齋分韻得是字

讌飲非吾欣。十招九不起。豈不耽羣歡。未諳諾與唯。今日飲邵侯。婆娑辦一喜。多因坐上賓。可人非俗子。梅叟伯言名世姿。蕭然紅塵裏。蟬蛻三十年。

萬事如脫屣。獨留文章性。貞好無遷徙。頗獎歐陽公。時時挂牙齒。後者開會王。前追韓與史。自愛持此論。斯文有正軌。二三邦國英。風流相依倚。持斤向老鼻。郢門欲成市。邵侯宏其波。崢嶸見爪觜。時作好事人。排蕩詩酒理。長安三月雨。炎威力一弛。洗醜招近局。衆賓稍填委。尙想老醉翁。茲辰實攬揆。展圖拜光儀。焚香追無始。餒鱗初在嘗。良琴復動耳。跌宕宇宙閒。嚶嚶亦未已。鄙人實昏頑。百非盡一是。麋鹿生野性。謬來絆金紫。紛華一蕩滌。精光半銷毀。常恐道未聞。殞身同螻蟻。苦緬六一公。終古長不死。名位匪絕人。所貴不關彼。作詩謝邵侯。梅叟竝送似。

送黎樾喬侍御南歸五首

原六首其六
係七古見後

時歲善逾邁。煩悵無少舒。秋色滿大地。良朋還去予。十年聚京輦。竝頭相向濡。深言洞金石。密意安綦綯。傾歡酌家釀。鐙火照狂愚。不能久依倚。脫棄如驚鳧。民生各自令。進止非人圖。物自持其末。吾自敦其初。高秋天萬里。浩蕩一春鉏。

平生秉微抱。志與詩騷親。孤音裂肝膈。劃然震乾坤。持用告庸子。舉世褒不聞。先生有妙鼻。容吾揮一斤。賞妍越恆理。逐臭詫奇芬。高歌切哀玉。吹我上青雲。多譽墮盛德。雖然豈不仁。文章事微薄。在物未爲珍。秋豪較得失。老死相斷斷。從今概根本。破硯吾欲焚。

萬歲行滔滔。後水逐前水。今古數達官。河沙不可紀。生存勢薰天。死去飽螻蛄。達人計深長。誓不欲糠粃。嗟余本野性。邂逅絆金紫。尺寸無功能。高明畏神鬼。雷同溷太倉。或恐損廉恥。倦羽企歸風。余亦行休矣。筐筍錡松秧。從君萬山裏。

逆夷昔爛漫。兵甲禦南東。殺人飼蛟鱷。大海爲之紅。君時卽我謀。雪涕向蒼穹。夜半草萬言。朝奏甘泉宮。道謀復旁午。羣策雜昭聾。聖擇有姑舍。神斷自天聰。自獻雖不效。義憤侔賈終。事往一回首。人各發舊蒙。所貴中無疚。焉計達與窮。

洞庭天下闊。清傑橫六宇。中有兩佳人。乃是淵騫伍。湖北字茱雲。南曰孟容甫。厥氏同劉宗。神明本漢祖。實惟吾友生。交期澈肺腑。乖隔漫關河。夢魂奔越苦。朝憶便成昏。夜思或達午。此士臥深山。靜氣卻豺虎。君去儻尋求。夙鯁還一吐。物外得真遊。方寸能歌舞。

題季仙九師采蘭菽菊圖

靈儀耀德輝。昌期偶一造。翮羽時倦飛。丹穴仍高蹈。吾師生民傑。瑩粹邁珪璋。文章養其原。木雞極啄菽。詩老昔采風。滇海烝英髦。聖皇豁四聰。惇樸信所勞。文軫馳西南。武庫職旌纛。夷然鎮廟堂。羣士息浮躁。秋月照琴心。忽理思歸操。東籬菊正肥。南陔蘭可芼。翩然謝綦簪。巾車已復膏。小子

秉孱薄。門牆備灑掃。近隨漫十年。未洗緇塵眊。稻梁逼旅懷。詩禮荒庭誥。
賦詩鑄此心。搖搖如植韜。

題朱伯韓詩集後十首

以才難不其然有亦未易識二語爲韻

雞鳴足朝莫。陰暄終不開。高秋戰寒夜。四壁轉風雷。有客投明月。驚顧非凡胎。古人亦已矣。吾猶及此才。

稂莠驕復驕。桃李闐無言。堂堂魏長史。畫籌壁上觀。丈夫有深意。出手無俗彈。恆沙閱人面。相識良獨難。

明珠伏濁浪。能媚不能流。碩人力如虎。折節師溫柔。肝腸自骯髒。面目自伊優。再拜問君子。此可言詩不。

金陵昔鍤血。裂皆激癘疲。事過付東風。杳杳如故時。豈非吾輩恥。痛鉅不可思。三更荷戈起。四閭夜何其。

東家老鼻祖。詔我三百篇。造詞如日月。萬古趨新鮮。竊人者無恥。自得斯爲賢。鄙夫目論爾。君謂然不然。

吾子如春陽。照臨列枯朽。我亦無所知。我亦無所有。頗好感事詩。善歌敵矇眊。歲晚脣又乾。君須濡我酒。

吾國有狂生。白眼善揮斥。

謂益陽湯鵬

稱子賢無朋。許予曰頗亦。中途生波瀾。生

死長乖隔。青山一抔土。永埋壯士魄。

桂林天下秀。生才雅且毅。有美王與龍。虎視令人畏。謂馬平王錫振臨桂龍啓瑞誰道儒誤身。等閒拾富貴。平津老封侯。君今齒尙未。

甚矣吾其衰。百思今廢置。平生所好賢。支離背時利。明鏡承食漿。干將不一試。天高帝閭嚴。薦達談何易。

舉世禮邱軻。貌尊非心卽。草元二千年。今無一人識。思之復思之。粒粟開入極。君試騰汗漫。我當借羽翼。

送黃恕皆使秦中

輦轂蜂房聚。萬人肩閉牢。脫身得出走。塵鞅方一逃。黃君吾黨彥。閤默謝羣鷲。持節下關隴。太華秋氣高。西北收功實。自古產英髦。聖朝枋儒術。土室始深韜。三徵臥不起。四字爛天褒。張呂去云久。餘緒猶可縈。丹穴鳳所都。累葉無凡毛。猗蘭豈不馥。所貴采擷勞。三洗人天眼。往觀大海濤。括盡波底蚌。明月終在遭。先民有遺紹。邂逅入甄陶。歸來謝天子。亦用誇吾曹。爲己辨檠輔。與世置夔皋。

北堂侍膳圖爲姚吏部題二首

脫葉辭喬柯。迴旋依舊晚。行役有乖違。梓桑終繾綣。姚君虞舜裔。純行亞珪瓊。伯瑜陳采服。下堂自婉婉。一從通朝籍。鄉關日已遠。浮雲有東西。遊子不得返。

樹蘭服衆芳。誰能忘根本。爰圖聖善容。慰此深愛悃。嘉魚初在烹。新筍欲盈橐。不惜求取勞。但虞珍膳損。魏闕身事羈。南陔歸夢穩。移孝出忠勳。擬近還補袞。

題陳氏五世鄉賢遺像

純皇撫九有。至文耀天樞。詔舉明經士。四皓來于予。介休薦梁竇。江南顧與吳。陳公實稱首。人中見騶虞。峩冠長太學。魯國始一儒。洪河無近脈。崑山玉所都。三朝襲令緒。四世表其閭。緊維聖舜胄。家聲自古初。義門翁惇穆。太邱世簪裾。門風不復墜。繼踵踐天衢。金籙澤易斬。君子席詩書。瞻言禮遺像。杖几如可趨。聊表先民軌。一爲薄俗模。

韓齋爲孔舍人題

西京大雅淪。斯文日凋敗。天不喪周孔。使人續警歎。韓子興中原。聖言始有賴。孤竅吐雄奇。金聲塞兩戒。時於蕙蘭室。中出蛟龍怪。迴首視齊梁。有作頗衰憊。一從茲塗闢。來者方雲會。豪彥仍響臻。歐會得兩大。聖清炳昌運。方姚實孤邁。魯叟有雲孫。耆古百無懈。齋被奉烝嘗。但下昌梁拜。大書榜其室。夙莫見著蔡。誰云千載遙。神理與鍼芥。湜期漫親炙。相夷等自鄙。

桐陰消暑圖爲史吏部題

炎曦灼大地。蠕蚊同烹煎。有生奔未利。擾擾不遑安。史君靜者流。置身巢

燧閒。綠天展珍簾。桐葉生虛寒。煮茶激清吹。拂箔迴微瀾。客來戒不報。塵事莫相干。頗亦哀老子。佳眠未渠闌。

題苗先麓寒鐙訂韻圖

大雅久淪歇。正音委榛蕪。永明肇四聲。稍變周漢模。開皇集八士。牙曠相飾揄。夜半畫綱紀。韻學茲權輿。承襲一千載。灌莽成康衢。韓公頗好古。枉啜六經腴。放者騁遊騎。斂者如轅駒。進退失所恃。不得返皇初。有宋盛文藻。才老信狂夫。陳生興晚明。秉燭照幽墟。勝廣驅除畢。沛下風雲趨。聖清造元音。崑山一鳩儒。中天懸日月。堂堂燭五書。上追召陵笈。千載若合符。斯文有正軌。來者何于于。江戴揚其波。段孔入其郛。苗髯最晚出。匯爲衆說都。精思屈鬼膝。高論揖唐虞。鬻熊咬入夢。薪火耀天樞。神光不可熄。長夜一鐙孤。風雪交四壁。橫膏校殘書。人謂髯何憊。髯謂吾自娛。自我與髯友。大海禮閒鷗。時洗箏笛耳。一聽秦青謳。物外有真知。肝鬲助歌歛。愛髯不忍別。作詩寫區區。

養閒草堂圖爲潘博士題

浩浩市聲沸。塵霧如驚濤。中有澹定人。萬事渺秋毫。家世東山舊。諸謝各清高。未行濯德輝。九天一羽毛。豈謂迴風勁。修路滯將翔。乾坤豈不大。一笑解天弢。四時足休息。靜極思作勞。時攜桑輿友。物外得佳遨。脫帽談虞

夏。生理寄濁醪。歸來對虛室。風日淡相遭。老鶴傍人睡。羣雞正喧嘈。

陶太常小像

江波少還態。耆宿日凋零。豈知永嘉末。吾猶及老成。乾嘉昔云盛。錢王蔚典刑。傳經子孟喜。鄰問字子雲。亭各奉本師說。森然啓門庭。先生時少壯。槃敦接芳馨。會從大匠鼻。揮斧動神靈。跌宕五十載。數輩倚聲名。踏破九州莎。依舊還天廷。後生仍好事。快覩先民程。飄然好須鬢。圖此歲星精。柏寢話疇昔。緒論吾嘗聆。瞻言詠斯篇。一寄思古情。

會合詩一首贈劉孟容郭伯琛

咸豐五年秋
月南康舟次

東風吹片雲。嘉客來千里。喘如竹筒吹。腐公蹙然喜。朋僚雜迎笑。吾亦倒吾屣。各自被其魂。告曰某在此。傾衿語晨夜。爛漫不知止。上言離別長。歲月弦脫矢。下言兵事殷。成敗真夢耳。江漢天下雄。三年宅蛇豕。王師有蹴踏。戈船照清泚。掀浪煮黿鼉。洪濤染爲紫。長驅下蘄黃。鐵鎖沈江底。羣龍水中生。怒螳車下死。英英塔與羅。威名讐南紀。倚嘯嚮廬閬。天戈欲東指。人事有變遷。由來不可擬。鬼火夜灼天。壞雲壓高壘。龍驤付一炬。韓壁僅可抵。偕行竟無衣。存足乃無履。夜半飢腸鳴。大聲震江水。腐公不知羞。恬然矜爪觜。謂言多難時。從來福所倚。在莒義不忘。圖南風漸起。稍稍召驚魂。時哉可歸矣。世論自悠悠。水膚生瘡疥。困窮念本根。風雨思君子。艱難

復相逢。得非天所社。回首廿年前。志亢聲亦侈。憂患閱千變。返聽觀無始。老夫苦多須。須多老可鄙。二子苦無髭。無髭亦可恥。自乏諧俗韻。不關年與齒。貞松無春競。歲晏行可俟。作詩誌會合。亦用砭窳砦。

王母方太夫人詩

凡響無異材。爨餘得佳桐。衆卉競春華。歲寒彰貞松。坤德无咎譽。非儀兩不蒙。熒然邁閔凶。高義古所崇。中材利行之。綽楔留芳蹤。卓哉賢母德。激烈乃過中。別嫌謹錙銖。年高茲益恭。至性無矯揉。情摯超凡庸。無所爲而爲。乃與神明通。有孫立朝端。蹇蹇蓋匪躬。乃知玉泉流。璇源已冲灑。白嶽黃山閒。靈氣鬱蔥蔥。明靈永不泯。奕世揚休風。

贈李眉生

倦翮復南翔。重眺鍾阜煙。舊遊多環萃。羣卉正芳鮮。謂可擴吾襟。孤懷乃悄然。非材竊祿位。俯仰慚高天。術業一無成。浩浩送流年。窳惰常廢事。識閻或蔽賢。多病無安食。多悔少佳眠。無德居高明。衆鬼瞰瑕訐。無學臻衰耄。但爲時所鑄。誰言所遇順。撫衷百慮煎。勤子來存訪。至論探九淵。鬱塞乃過我。神困難爲妍。人世多乖迂。圓一缺常千。羲娥驅童卯。舉世惜華顛。天命誠足畏。愁思且當捐。

青松生危巖。獨立向清昶。風韻戛韶咸。交柯蟠龍象。逸氣干層霄。瀟灑謝

塵埃。廟廊構瓌材。羣工共嗟賞。虹梁皎朱曦。天門信蕩蕩。豈知咫尺閒。歧路多迴枉。挽來不能寸。推去或千丈。託根倚峻巖。植基固不廣。孤高招烈風。薄俗甯足仗。蒼穹富雨露。百昌日夜長。大鈞一轉旋。悱惻神所獎。聊究莊生旨。齊物尋影響。行止皆有待。還以咨罔兩。

題俞蔭甫羣經平議諸子平議後

聖祖曠千禩。微言久歇絕。六籍出燔餘。諸老抱殘缺。尚賴故訓存。歷世循舊轍。從宋泊有明。軌涂稍歧別。皇朝褒四術。衆賢互標揭。顧閻啓前旌。江戴紹休烈。迭興段與錢。王氏尤奇傑。大儒起淮海。父子相研悅。謂高郵王懷祖先生念孫及其

子文簡公引之

子史及羣經。立訓堅於鐵。審音明假借。

王氏精於古音。讀字義多從音出。經籍多假借字。皆古音本同也。

課虛

釋癥結。

王氏每於句調相同者。取彼釋此。謂之句例。又戒不得增字。以釋經。皆係從虛處領會。

旁證通百泉。清辭皎初雪。

王氏立訓必確據。每識

昔人望文生訓。或一字而引數十證。其反覆證明。乃通者必曲暢其說。使人易曉。

九原如有知。前聖應心折。俞君一何偉。陸步

追曩哲。盡發高郵奧。擔囊破其編。君昔趨承明。鳳鸞與頰頰。輶車騁嵩洛。康衢誤一跌。子雲宦不達。草元更折節。文囿芟天葩。經神供清醲。厖言頗舐排。諸子亦梳扶。復從羣賢後。森然立縣莖。嗟余老無成。撫衷恆惓惓。閔才不薦達。高位徒久竊。茲編落吾手。吟覽安可輟。

謝王壬秋徐州見贈之作

戒徒事秋蒐。理權及淮甸。塵埃正紛拏。經逅接英彥。乖離七易霜。天遣更

相見。後車攜嘉客。同馳彭城傳。輕颺解素襟。名論迴深眷。自云尋絕學。涂軌約三變。僑居蒸水陽。親知斷游讌。閉戶自高歌。寒宵百慮戰。羣聖下窺瞰。憂喜相慶唁。盡挾諸經心。始知老儒賤。探篋出新編。照座光如電。說易燭大幽。箋書祛衆眩。旁及莊生旨。抵巇發英眊。大雅久不作。小知各自銜。漢宋互嘲讖。餘炎更相煽。遲君紹微言。豪芒辨素絢。高揭姬孔情。洪曦消積霰。湖湘增景光。老懷亦忻忭。

伎求詩二首

諫紀傳
紀傳

善莫大於恕。德莫凶於妒。妒者妾婦行。瑣瑣奚比數。己拙忌人能。己塞忌人遇。己若無事功。忌人得成務。己若無黨援。忌人得多助。勢位苟相敵。畏偪又相惡。己無好聞望。忌人文名著。己無賢子孫。忌人後嗣裕。爭名日夜奔。爭利東西驚。但期一身榮。不惜他人污。聞災或欣幸。聞禍或悅豫。問渠何以然。不自知其故。爾室神來格。高明鬼所顧。天道常好還。嫉人還自誤。幽明叢詬忌。乖氣相迴互。重者裁汝躬。輕亦減汝祚。我今告後生。悚然大覺悟。終身讓人道。會不失寸步。終身祝人善。會不損尺布。消除嫉妒心。曾天零甘露。家家獲吉祥。我亦無恐怖。

左不
伎

知足天地寬。貪得宇宙隘。豈無過人姿。多欲爲患害。在約每思豐。居困常求泰。富求千乘車。貴求萬釘帶。未得求速償。既得求勿壞。芬馨比椒蘭。馨

固方泰岱。求榮不知饜。志亢神愈怵。歲燠有時寒。日明有時晦。時來多善緣。運去生災怪。諸福不可期。百殃紛來會。片言動招尤。舉足便有礙。戚戚抱殷憂。精爽日凋瘵。矯首望八荒。乾坤一何大。安榮無遽欣。患難無遽懟。君看十人中。八九無倚賴。人窮多過我。我窮猶可耐。而况處夷塗。奚事生嗟憤。於世少所求。俯仰有餘快。俟命堪終古。會不願乎外。右不求

七古

謝疊山賣卜研爲劉太守題

青花一片瑩寒泉。中有毅魄務蒼天。大宋河山滄桑改。孤臣心事金石堅。當年賣卜建陽市。麻衣血洗流成淵。吞炭不復容三擊。下簾何曾索一錢。稠父宋父弔鸚鵡。東川西川泣杜鵑。豈知歷劫冰霜後。尙留人世文字緣。辰陽太守亦可憐。老抱石兄喜欲顛。三年膜拜憫忠寺。萬里攜將書畫船。書生癡絕例如此。稱先道古口流涎。不如堯桀兩忘去。日摩頑石支頭眠。

送凌九歸

白日杲杲黃埃飛。君胡少住遽言歸。萬族由來各有託。借問君心何處著。自言暫歸奉晨昏。溫席不暖還出門。丈夫生世會有適。安能側身自踟躕。南箕北斗徒虛名。東走西顧知何益。磬折已覺素心違。璞獻況逢俗眼白。要將萬舞誇輝光。肯爲兩言求恩澤。皇天畀我非不豐。平生長策能固窮。

一飽那爭雞鶩食。萬事從付馬牛風。君家才望人所豔。兄弟縱橫兩龍劍。霜蹶甃教長板蹶。雲藻終向天庭掞。卽今歸去慎勿稽。歲時努力謀鹽齏。綵衣好娛老萊母。椎髻尙有梁鴻妻。我亦屢尋還鄉夢。年年送人頗自諷。送君無酒爲君歌。楊花如海柰愁何。

送楊春皆歸

去年同送蕭郎歸。心如風幡亂掀簸。今君告歸亦何遽。臨別無言但兀坐。君才捷敏非尙儔。早時羣書讀已破。堆案細字如毫毛。擲筆新詩成咳唾。揭來燕市騁逸足。聊隨鴛鴦爭芻莖。出門百錢買犢車。入戶一編旋蟻磨。虛牝擲金古所悲。五年長安竟坎坷。剖瓠作尊何所容。種柏傍石終不大。首途雖舛心愈雄。懷寶空奇時難貨。嗟余昏懦百無能。與世趨起動得過。忽逢良友相鑄磨。有似酒狂得史佐。隔日一見歡未闌。鼓缶鳴箏唱復和。削除巉巖得平夷。厭見俗氛揚堀堦。可憐俠氣千層雲。時有忠言驚四座。一麾從此悵分離。萬事何當付嬾惰。方今廊廟構羣材。搜林剔穴行可賀。看君形容不易凋。顧此芒刃豈終挫。明年仍騎瘦馬來。滿面還受緇塵浣。

題毛西垣詩集後卽送之歸巴陵五首

伐木截兩端。半作犧尊半溝壑。南鄰北里輕薄兒。昨日薰騰今冷落。巨屨小屨天所區。焉能屑屑齊美惡。勸君把酒持雙螯。百年爛醉拚嬉遨。不學

陋儒談狗曲。修禊整巾徒碌碌。

歐君

謂小岑

昔言鄉國彥。汝與吳生

謂南屏

皆狂狷。看汝織古得新機。惜哉弋時

無急箭。獨抱質缶辭雕鐫。世人皆憎我獨羨。金盤銀醜有時灰。得不垂顧
鉞與疊。

朝誦幽通賦。夕吟顯志篇。咄哉此子頗聞道。煩毒迷惑劇可憐。古來騷人
都如此。君亦苦語相糾纏。日月瀟灑百蟄蘇。老抱幽憂胡爲乎。

長羨江頭白髮翁。扁舟如瓦飄西東。船頭得魚船尾煮。穉子哈笑老婦聾。
王稅早輸百無事。從古不遇打頭風。君家正臨洞庭水。一飽弄舟樂何底。
舍此他求真左矣。

我生乾坤一贅人。逐衆轉徙如飛蚊。袞袞臺省無相識。紛紛時事了不聞。
門外車馬何隱鱗。獨立階下看浮雲。君今歸哉渺千里。我方塵土無窮已。

題顧南雅先生畫梅應何子貞

詩老餐冰老更臞。傾身謀醉一錢無。忽然嚼梅供大噉。笑吐滿紙森模糊。

當時酒徒相饋餉。

本寫贈張淵父子貞從張乞得

至今遺墨何清腴。平陵公子亦好事。巧偷豪

奪無罪辜。時將巨障補空壁。已覺暗香來座隅。長安一雪寒切膚。冷官瑟
縮同圍爐。開眼忽到西湖上。四更殘月孤山孤。我聞繪事通草隸。此語自
古誰云誣。何君作書妙天下。生吞百虎心膽麤。世人只解傳柅蠟。獨能餐

氣真吾徒。莫言書畫直小道。不到聖處甯堪娛。吁嗟詩老不可作。君雖抱此徒區區。

傲奴

君不見蕭郎老僕如家雞。十年答楚心不攜。君不見卓氏雄資冠西蜀。願使千人百人伏。今我何爲獨不然。胸中無學手無錢。平生意氣自許頗。誰知傲奴乃過我。昨者一語天地睽。公然對面相勃僂。傲奴誹我未賢聖。我坐傲奴小不敬。拂衣一去何翩翩。可憐傲骨撐青天。噫嘻乎。傲奴安得好風吹汝朱門權要地。看汝倉皇換骨生百媚。

瑣瑣行戲簡何子敬乞醃菜

瑣瑣復瑣瑣。謀道謀食無一可。大人天矯如神龍。細人局蝓如螺贏。皇皇百計營齋鹽。世間齷齪誰似我。既不學虎頭食肉飛將軍。又不能駝峯犀筋醉紅裙。長將野蔬說奇錯。春筍秋芋評紛紛。吾鄉芋最美拙妻嘲訕婢子笑。可憐先生了不聞。苦思鄉國千里月。夢想牀頭一甕雲。君家醃菜天下知。忍不乞我賑朝饑。丈夫豈當判畛域。仁者況可懷鄙私。炯炯子心天所許。堂堂此理君莫疑。忽憶條侯理入口。黃頭銅山竟僵拮。功高七國安如山。錢布九州浩如藪。當時鼎烹會親賓。後日饑腸作牛吼。今我與子俱不材。懷抱傾筐倒篋開。取與廉惠兩無猜。青天白日森昭回。不醉不飽胡爲哉。

反長歌行

馮樹堂三十初度有汲汲顧影之憂故爲詩以廣之得失靡常驚名無極繁稱雜奏歸之於正道云

羲和驅日如驅豕。鞭之不行汗流泚。頃刻奔馳過百年。老盡世人渠獨喜。
渠獨喜。我甯愁。已拚一老百無恥。馮夫子。我歌君莫鄙。柏梁銅爵安在哉。
盜跖唐堯俱朽矣。北翁得馬知何祥。臧穀亡羊定誰是。平原轉眼成嵩邱。
華屋隔宵生荆杞。上蔡黃狗空歎嗟。洛陽銅駝百遷徙。萬事支離那可論。
吾生得失亦如此。卻笑張毅空飾文。更憐單豹強治裏。修衷修瀑皆虛名。
老向人前矜爪觜。君看從古軒赫人。一半名場夸毗子。今晨令問傾王侯。
明日枯齒飽蚋蝮。銘功誅德千萬言。可信人閒有真史。馮夫子。我歌君且
起。君今三十胡皇皇。浮名驅君不自止。頻嗟短景難少延。便得長春甯足
恃。世閒自有清淨業。日往月來了無累。人迹不到禽不來。萬年廢井養秋
水。

題畫蘭二首應田敬堂同年

淺紅生綃一尺半。描金蘭葉光爛爛。不知誰氏書畫船。遺作君家錦繡段。
時棄時取了無憑。花若有情花亦歎。有客對此三沈吟。一夜魂飛洞庭深。
故鄉蘅杜知我心。

洛陽三月天如銀。楊花浩浩愁殺人。美人璇閣弄鸚鵡。傷心不敢當青春。
獨對盆蘭訴幽怨。再拜且爲花寫真。腕輕著花只嫌瘦。釧重放葉難爲伸。

簾外雙雙蛺蝶舞。羨汝自在好要身。閣筆下階傍花立。臨風三嗅馨香泣。
田郎田郎似我癡。反鎖衡門走賓館。三年啖蔗未會甘。九畹蕪蘭行腹滿。
不願舉國揚芬芳。但願同心通烟款。晨書小楷眼欲花。午睡醒來日已斜。
從容讀畫還煮茶。

贈何子貞前輩

以紙索子貞作字久不見償詩速之也

九嶷山水天下清。中有彥者何子貞。大謫老謀不自白。世人誰解此縱橫。
入法道卑安足數。君獨好之如珉珉。終年磨墨眼不眯。終日握管意未平。
自言簡箋通性道。要令天地佐平成。怡神金鯽朝吹浪。失勢怒猊夜擣營。
同心古來亦有幾。俗耳乍入能無驚。可憐四十好懷抱。空使九州播書名。
嗟我波瀾頗莫二。知而不爲真不智。捧心恥與時爭妍。畫足久爲聖所棄。
行當就子更柱弦。可能爲吾倒筐筥。去年一諾今未償。舊迹已陳誰復記。
世閒萬事須眼前。須臾變態如雲煙。煩君一揮清我室。驅逐毒熱無煩煎。
高堂巨壁蛟龍走。鄙夫白晝敲枕眠。

題唐鏡海先生二圖

十月戎行圖

生世不能學夔皋。裁量帝載歸甄陶。猶當下同郭與李。手提兩京還天子。
三年海國困長鯨。百萬民膏餒封豕。諸公密勿既不臧。吾徒迂疏尤可恥。

岱宗夫子唐太常。今日儒林有正軌。宗傳久已追廉伊。餘事猶堪作牘起。
昨來示我戎行圖。回首軍興今一紀。九疑南去山連天。八排獐獐多於螳。
猱升鼯伏巢穴繁。青絲白馬風塵駛。籌邊樓下雲屯營。臨賀嶺前雨注矢。
先生獨出當九關。磨鍊衆心作高壘。千礮齊震雷破山。萬馬不嘶月如水。
先生兀坐了不驚。秉燭從容讀書史。大儒意趣未可量。小醜羸豪安足齒。
功成行賞不自言。羞與駑駘較尺咫。我覽此圖發長歌。可憐黃髮今皤皤。
四海息兵無一事。先生且住安樂窩。

五原學舍圖

大兒垢膩衣短襖。小兒蓬頭語更吃。生長搖戶習繩行。不識詩書定何物。
昨者縣門鼓如雷。太守如父從天來。走章馳檄到山寨。要與羶俗辨頸顛。
皇天於人何厚薄。未必蠻貊皆不才。一朝得與冠裳會。青天始見雲霧開。
黠結公然被儒服。笑言啞啞歡且哈。山南伐石千指碎。山北挽木萬牛回。
縮版登登日復夜。取次學舍高崔嵬。五原便同石渠閣。百丈似築通天臺。
銅鼓蘆笙雜弦誦。衣冠俎豆何文哉。但願使君長世世。坐看槃瓠成瓌材。
豈期文翁難久借。至今蜀國有餘哀。披圖卻憶十年事。富川風物落酒杯。
方今聖人舞干羽。薄海懷柔不用武。會崇我丈比桓丁。立使殊方變鄒魯。
三老五更古所尊。嗚呼此事非小補。何時虎觀擁皋比。我亦執經走廊廡。

感春六首

奉君以象白猩脣之異味。青琴碧玉之妖姬。子復漠然不我與。我今寸意當訴誰。散髮狂歌非關醉。枯株兀坐未是癡。手撮黃塵障河決。自有幻想非人知。城南海棠已爛放。牡丹如霧行離披。如此青春忍不賞。直待白髮甯可追。

今我不歡子不悅。攜手天街踏明月。西南白氣十丈長。銳頭突尾射天狼。東方狗國亦已靖。復道羣鼠舞伊涼。徵兵七千赴完隴。威稜肅厲不可當。國家聲靈薄萬里。豈有大輅阻孱螳。立收烏合成齏粉。早晚紅旗報未央。嗚呼天意正如此。小儒不用稽災祥。

男兒讀書良不惡。乃用文章自束縛。何子吳南朱伯韓西不知羞。排日肝腎

困錐鑿。河西別駕酸到骨。昨者立談三距躍。老湯秋海語言更支離。萬兀千

搖仍述作。丈夫求志動涓莘。蟲魚篆刻安足塵。賈馬杜韓無一用。豈況吾輩輕薄人。

明珠二百斛。江湖三十年。徧求名劍終不得。耳聞目見皆鈍鉛。聞道海外雙龍劍。神光夜夜燭九天。珍氣妖星不敢撓。橫斬蛟纏血流川。天子寶之無倫比。列置深殿闔風前。千金萬金買玉匣。火齊木難嵌中邊。元臣故老重文學。吐棄劍術如腥膻。如今君王亦薄恩。缺折委棄當何言。

蕩蕩青天不可上。天門雙嶠勢吞象。豺狼虎豹守九關。厲齒磨牙誰敢仰。
羣鳥啞啞叫紫宸。惜哉翅短難長往。一朝孤鳳鳴雲中。震斷九州無凡響。
丹心爛漫開瑤池。碧血淋漓染仙仗。要令惡鳥變音聲。坐看哀鴻同長養。
上有日月照精誠。旁有鬼神瞰高明。

太華山頂一虬松。萬齡千代無人蹤。夜半霹靂從天下。巨木飛送清渭東。
橫臥江干徑十里。盤坳上有層雲封。長安梓人賦一見。天子正造咸陽宮。
大斧長繩立挽致。來牛去馬填坑澍。虹梁百圍飾玉帶。螭柱萬石搵金鐘。
莫言儒生終齷齪。萬一雉卵變蛟龍。

爲何大令題明趙忠毅公鐵如意

君不見天啓初載國步頻。逼迫英彥如束薪。龍章鳳姿膏斧蹟。狐鳴梟噪
騰要津。大璫滔天不足道。羣小羅拜馬頭塵。執笏無因殛元惡。請劍未許
梟佞臣。觥觥趙公天所鑒。年年磨鐵影隨身。世事萬端不稱意。惟有此鐵
還可人。誓將裹椎擊逆豎。休教鑄錯汚君親。星光啖啖趨朝夜。霜氣稜稜
拜疏晨。一回摩挲一灑淚。寸心如石腸如輪。高皇有靈尙來鑒。小臣此志
何由伸。一朝荷戈西出塞。辜負白鐵悔因循。茄花枯盡委鬼滅。可憐明社
亦荆榛。二百年來餘此物。萬劫不做唯精神。世人蠢蠢寶珠玉。如君乃獲
希世珍。老鐵耐寒終得主。豈有正氣長鬱湮。請君雪夜倚闌看。金精上燭

撼星辰。

喜筠仙至卽題其詩集後

昌黎聖者徂不作。嗚呼吾意久寥廓。郭生近出還峻嶒。腸胃森然起邱壑。古來文士非羸阡。各有雄心戰墳索。自尋世界鍼孔中。別聞九州造城郭。衰叔曹尚安可論。襲兒沿聲膽已薄。丈夫舉步驤兩龍。豈有趨趨躡人腳。我方僵踣瘖不前。君能踐之道斯託。憶君別我東南行。挽袞牽裾事如昨。五年奔走存骨皮。龜坼硯田了無穫。時時音問相照臨。語言雖甘意緒惡。豈知今日還相逢。席地惟天共一酌。紛紛蠻觸爭土疆。誰能買閒事笑詭。解顏一覲豈尋常。百歲忽如埽秋籜。衆木有知草有心。殊性異涂那可度。昨夕之炭今晨冰。轉燠回寒在焱霍。弓影構似公成真。箭鋒失機君相覿。葛亮書說雖貴和。屈原平生莫量鑿。趨同造獨良難兼。攘詢納尤詎非樂。方今帝舜明四聰。朱虎夷夔弁高爵。大鐘土鼓相和鳴。文字秋霜起廉鍔。號呼朋侶趨上流。聊可示強孰云弱。嗟余瞽者迷嶽塵。不殖十年得毋落。欲張漢幟標新軍。要盟不從誰寫諾。獨者無倚同者羞。心之簸搖欲何著。智小謀大姬所懲。偏有狂夫百不怍。移山愚叟無日休。填海冤禽有時涸。屠龍大噉願已虛。哆口如箕且一嚼。老筠老筠子視余。謬志誕言豈堪藥。閉門引竅號五噫。欲與秋蟲鬪方略。宇宙空曠時日寬。安用出膏自燔灼。

忽憶元和奇崛翁。會合聯吟雨鳴鶴。雲龍相逐終不能。海南江東各飄泊。彼之賢俊尙如斯。我今耆頑當何若。與君辦醉千億場。誰道人間有紕錯。六月二十八日大雨馮君樹堂周君苜農郭君筠仙方以試事困於場屋念此殆非所堪詩以調之

墨雲壓城眞欲摧。銀河倒瀉天如篔。我巢倉皇變澤國。嗟爾三子嘻可哈。孔鸞欲爭雁鷺食。貪饕豈得逃天災。矮簷埤危小於盜。拳曲裁足容頸顛。上雨旁風忽衝突。蟄蟲有戶安能坏。脫屣漂流不可覓。筆牀茶臼何有哉。馮君枯坐但閉目。急溜洒面不會開。周侯仰天得畫本。倚牆絕叫添喧阗。郭生耐寒苦索句。飢腸內轉鳴春雷。卻笑羣兒薄心膽。瑟縮啾唧良足哀。丈夫守身要倔強。雖有艱阨無愁猜。我今高臥舒兩膝。深簷大棟何恢恢。白日軒聲答雷雨。殘滴初歇清夢回。甘眠美食豈非慶。又聞逸樂生禍胎。數君健強齒尙未。正可磨鍊筋與髓。明朝日晴各轉鬪。老羆戰罷還歸來。爲君廣沽輓腳酒。泥污不洗且銜杯。

苜農既和余詩而三子者皆見錄於有司乃復次韻

王師四出枯朽摧。築城如鐵黃土篔。公然一戰收全勝。笑言啞啞何歡哈。文章有時奏奇績。不信五鬼能作災。諸君運命頗磨蝎。可憐顛頓愁眉顛。年年力戰略城邑。不分上國土一坏。卻願羣公無寸效。封侯起第何難哉。

李廣旗亭遭醉罵。衛青幕府排雲開。今朝背城偶自奮。一呼振臂何轟豕。
皇天亦助昆陽捷。亂飛屋瓦奔雲雷。稍雪平生三北恥。一洗往日千悲哀。
但令蠶食得小補。休睨雞肋生疑猜。神龍卷舒在勺水。綽綽進退真宏恢。
誼士飲河但解渴。貪泉未到車先回。要將廉退式鄉國。坐看合浦還珠胎。
菟裘他年儻可老。林壑休息舒脾脍。不然崇階借尺木。崢嶸富貴還鼎來。
升沈變遷不可必。今日一樂聊千杯。

題明陳忠愍公雪聲堂硯爲唐觀察樹義作

人閒尤物天所隘。豪奪巧偷生災怪。尙書老硯差復尤。流落君家足一快。
區區石耳烏足珍。重談勝朝可深啜。金陵已破汀州摧。桂林孱王甚矣憊。
書生短褐陳老謀。欲傾南溟洗兩戒。西走臨賀東珠江。剜身莫醫六州瘵。
已聞餘燼飄煙埃。復道妻孥餒杻械。丈夫首斷心不懲。賤妾癡兒況足芥。
袁粲狹巷猶塵槽。張巡孤城已粉壞。可憐此硯隨忠魂。未了多生文字債。
文豹已燬皮尙存。笑倩後人爲爬疥。不須更道夢中緣。已覺英靈接警效。
阿翁作吏今龔黃。惜哉老嵇亦翻鍛。君今撫硯勘楹書。世守櫝龜安敢懈。
惠然何日持示余。我見石兄或三拜。唐君得此硯於桂林其尊人於清道丹中
夢陳忠愍道及之因名所居曰夢硯齋

題醇士前輩爲滇生師畫竹疊前韻

鎖院重深春爛漫。聖壁潭潭古所墁。盡收羣彥歸樊籠。有似神駒遭繫絆。

戴侯健者胸宇宏。足迹略經九州半。苦者書畫拚金錢。頗睨蟬貂等塗炭。
錢唐夫子今儒宗。藻火虎雉賴翊贊。兩賢分吸西湖光。東壁交輝北斗燦。
亦有繪事追宣和。豈徒宏文敵貞觀。頃來巨卷寫風篁。欲學湖州贈內翰。
斷枝零葉不整齊。但覺清風拂書案。試院經今五百年。文字何止千牛汗。
前水後水但東之。萬事悠悠良可歎。獨有名墨長流傳。壽世不隨星霜換。
故知雨露濡李桃。不如風雲生肘腕。我今老硯久荒蕪。圖史拋如秋籜亂。
外文內節兩無稱。蠹蟲班行誰比算。誓將歸牧竹石間。不管世途有陵岸。
戴侯畫牛有家法。何不誤筆試一按。尙書早兆調燮幾。我亦願歌南山粲。

謝岷樵

市塵交態角一闕。朝爲沸湯莫冰凍。江侯爾豈今世人。要須羊左與伯仲。
漢上鄒生犛者徒。臥病長安極屢空。謂柳翁導養難絕三彭仇。惡讖欲尋二
豎夢。君獨仁之相掖攜。心獻厥誠匪貌貢。執役能令賤者羞。感物頗爲時
人誦。丈夫智勇彌九州。守愚常抱漢陰甕。不學世上輕薄兒。巧笑人前事
機弄。昔我持此語馮生。謂樹堂沈飲深觥豈辭痛。郭生酒後猶激昂。謂鶴仙往往
新篇發嘲諷。君今勁節盤高秋。況有詩句驚萬衆。喜雨一章已恢奇。猶嫌
伏轅受羈鞅。頃來貺我珍瓊瑤。韜以錦囊無殺縫。我今塵海久淪胥。方寸
迷蒙足霧縹。乃知貧賤眞可歡。富貴糜身百無用。因君寄語談天客。狂夫

小言或微中。但教毛羽垂九天。未要好風遽吹送。

鄒興愚字柳谿。新化人。客居陝西興安。道光庚子。舉陝西鄉試。家酷貧。而自守嚴。不苟取。今年大病京師。不得與禮部試。醫藥雜役。皆岷樵躬之。急難之誼。吾見亦罕。予既爲此詩。後十日而興愚死。予與岷樵。及興愚之族兄子律三人者。爲經紀其後事。秩然可以無悔。將以七月歸其喪興安。岷樵蓋有終始者。子律字春生。亦篤士。六月十二日附記。

移居偶成

前人栽藤後人看。我年於藤未及半。前人種竹青成林。舞影窗月清我心。況有丁香海棠樹。堆砌牡丹亂無數。霜風但遣枯枝立。春光猶遲隔年度。獨立何必念芳菲。正肅氣與天地遇。此身今古如脫屣。人得人弓等閒耳。冰霜百物半摧藏。掃除一室吾安事。轉眼花開春事新。四座唯延澹蕩人。讀書養性聊爲樂。日可招要梅子眞。

陳慶覃詩鈔題辭三首

魏王大瓠號豐碩。酌水盛漿百不適。丈夫身手豈不良。沈沒詩篇眞可惜。嗚嗚道古無一符。畫脂工夫竟何益。我昔鏤肝好苦言。今來百憂頗冰釋。誓將輟軫收哀彈。不唱君家行路難。

近聞西蜀甚陸梁。驅人大邑如驅羊。羣揭竿旌過都市。廣開林藪收畔亡。
新市下江頗竊發。左谿橫水還披猖。州家上名使家縱。昔我經過心繁傷。
太平風塵亦如此。胡不上書達天子。

虞舜藏弓蒼梧野。我家正渡南嶽下。眼看鄉井多譽髦。後周郭李皆健者。
何郎蒼老孫郎少。君合衆銅付一冶。楚人自古工語言。湘流到今悼屈賈。
編夫例縛文字禪。劍頭一吷眞粲然。後魏州周杏農郭錡仙李梅生
何子貞孫芝房皆同鄉人也

憩紅詩課戲題一詩於後

鉛山不作桐城逝。海內騷壇委寒灰。龍蟄虎潛斷吟嘯。坐令蚯蚓鳴驚雷。
憩紅先生頗好事。欲拓詩國疆土恢。號召英豪執牛耳。大蒐燕冀選龍媒。
走章馳檄遍都市。紛紛吟札如雲來。較量錙銖判殿最。豈有魚目還珠胎。
傾身受才劇如命。酬字金帛布成堆。達官貴人不好士。先生此舉眞豪哉。
嗟余楚狂百無用。長安十載餐黃埃。作碑無錢枉自苦。乞米有帖長空回。
臣朔飢死侏儒飽。古來顛倒何足哀。偶然塗抹爲新句。畫眉深淺乖時裁。
鬢髻飄零有誰惜。雖刀角逐吁可咍。豚蹄果遂篝車祝。一笑取醉三百杯。

書朱皋亭家傳後

韓公會作董生行。坡老亦詠姚氏堂。末世文人苦孱陋。雖有行誼無由彰。
徽州太守萬夫特。承明一出腰銀黃。政聲今鄰趙張右。名翰昔在崔蔡行。

憶昨石渠同討論。稱引先德何琅琅。考亭絕學半庭訓。佩章奕葉仍作堂。孝經五齡誦在口。內則半編時相將。一朝老親蒙霧露。醫不能力巫難禳。妙年誠心破金石。午夜剗臂和羹湯。探丸何會讓耆域。臥冰殆欲嗤王祥。誰言昊穹闊且遠。小叩大應如宮商。阿耶道躬既純固。阿兒行義宜褒揚。漢家本來重孝友。薄俗尤應式厲涼。豈謂虛舟藏大壑。空教幽獄埋寒鉞。獨留孤兒好頭角。神駒墮地不可當。逸足騰踏蓬島路。八載與我同趨蹌。昨年一麾出歙浦。南飢北渴永相望。白塔觚棱晨漠漠。黃山煙靄暮蒼蒼。懷人卻寄相思字。念祖仍徵述德章。前人艱危事栽種。後人但識嘉蔭長。卽今榷柑貢天府。莫忘老幹在冰霜。

送周文泉大令之官城武

周侯爲政知者鮮。地小衷長自不展。早歲讀書如老饑。堆案徧嘗盡百饌。詞源一瀉不得休。往往巉巖雜婉孌。頻年大海泣遺珠。卅載湖南綰銅篆。本因名父求蕭威。始見分符來張緬。深藏干邪匿銛銳。盡壞屏障通關鍵。閒官那暇自料理。時逢順風亦遷轉。由來赤令須老成。早有仁聲先流衍。東窮二酉緣砢崖。南入九嶷踏秋蘚。馬援舊愁惡氛惡。文翁新化善俗善。忍教蠻犵歎無襦。坐看獐狝來解辦。蘆笙銅鼓喧峒歌。苗婦焚童通絳纒。我亦自是湘中人。有賢不知嗟何淺。長安一見兩無猜。詎比尋常徒睥眄。

大開戶牖吐真氣。倒決江河放清辯。拘守咫尺聞苦自繩。我固儒酸君未免。方今要路爭騰馳。幾輩兼程獵華顯。高車大馬塵埃香。翠羽長纓腰腳軟。看君敝褌猶網繒。長是敗茵策駑蹇。行囊賸有書滿箱。公廚會恐塵生甌。此去清風入濮曹。定知甘露灑青兗。誰云廉吏不可爲。須信夷途百無舛。陽城豈畏書殿考。卓茂終當膺首選。邇聞海國還喧咋。此邦幸未近兵燹。可憐疲民困科條。有如聚蠅遭蹂踐。豈無積弊含瘡痍。聊欲爬梳愈疥癬。枯魚在轍誰能久。惡草當門要須剪。知君不薄芻蕘陳。世俗但解筍蒲錢。明朝一別各東西。愁緒多於甕大甗。

送凌十一歸長沙五首

昨日微雨送殘秋。落葉東西隨水流。世閒萬事皆前定。行止遲速匪自由。謀道謀食兩無補。祇有足迹徧九州。一杯勸君且歡喜。丈夫由來輕萬里。皇天陶鈞造萬器。甕盜鉗蠱巧安置。頗怪君材無不能。胸中多藏如列肆。刀光刺眼瞬不搖。小事疑駭大事智。吁嗟世事安可知。干將補履不如錐。螺贏負青蟲。祝祝亦相似。眼見平地轟高臺。縮版登登無基址。王侯將相豈有種。時來不得商進止。君歸讀書更十年。看君白日上青天。

憾我不學山中人。小小從耕拾束薪。朝去暮還對妻子。殺雞爲黍會四鄰。世事疑聾百不識。笑置詩書如埃塵。君歸自有青塘山。築室種樹莫言艱。

如我自鏡猶可憎。非君誰復肯相偶。寂寞陋巷長叩門。三日一見開笑口。常時徒步噉塵土。偶然驅車馬如狗。君此歸去慰門閭。我今留滯當何如。

送謝果堂前輩歸江南

我昔曾讀知恥集。憾不追逐參翔期。當時小人竊國柄。狐鳴梟噪何貪饕。霍家奴子青油幟。夜半狹巷公嬉遨。一朝燒車震都市。驄馬御史真人豪。至今朝士誦遺直。言之凜凜寒生毛。先生早聞過庭訓。豈有勁幹能枉撓。

謝誠泉先生名振定爲御史時會燒和珅家奴車旋以他事中傷落職嘉慶四年起復爲禮部主事今上嘗呼果堂爲燒車御史之子

廿年作吏領畿赤。王事何

會怨賢勞。爲憐疲民困蹂躪。親撫積瘵勤爬搔。豫州豐碑吾所見。德政猶傳萬口牢。復聞巴棘難結惡。十載邊陲苦繹騷。先生手草諭蜀檄。剖巢熏

穴黠。鼯號殺賊自是書生事。成功屢蒙聖人褒。

果堂討平四川夷匪賞戴花翎

陳立餘威懾驪

冉。文翁雅化烝譽髦。方今時俗忌博謔。傲傲萬衆鋪醜糟。卻笑先生抱古

調。冑隨里耳同喧嘈。誰言夷途百無舛。未免奇數時一遭。大江東下日滔滔。濁水沈珠不可撈。使君一去萬人哭。牽衣遮道何嗷嗷。蛾眉謠詠古所惜。坐使斧柯終倒操。竭來長安談舊事。磨礱圭角深自韜。削如太華立千

仞。絕頂秋隼下平皋。始知老輩尙矯節。堪哂薄俗徒塵囂。嗟余昏頑大無識。隨人俯仰如桔槔。頻蒙美言藥狂齷。須臾便達旨與膏。昨者告別驚何遽。歸心已似風中旄。逝將買山學耕釣。行且築室誅蓬蒿。世事癡聾不復

問。典衣取酒樂陶陶。天空地闊網羅少。黃鵠一舉何其高。紛紛燕雀非吾曹。

題王少鶴篋砧課讀圖

破屋荒園陰雨候。桐樹清陰向人覆。皤皤危巢鳥鋪敷。風窗瑟縮燈如豆。砧聲清切姊心悲。書聲函胡姊淚垂。天乎汝此不自力。豈惟乃姊摧肝臆。二親魂魄長嗚咽。躍馬天街得路回。龍鍾老疾姊顏開。一笑迎門雪雙涕。此日當時互悲喜。當時荒園姊攜弟。此日安爐弟迎姊。鳳詔輝輝賁下泉。柳江春色煥雲煙。長途珍重難爲別。願且無忘在莒年。

丙午初冬寓居報國寺賦詩五首

閉門百慮叢憂煎。出門葛蔓相糾纏。苦被塵埃縛欲死。脫身來此親僧氈。老松大槐遮四徑。日月爲我生光妍。道人龍鍾五十七。黝深碧眼珍珠圓。烹茶煮餅時勤我。亦有山果堆初筵。橐駝對座不相管。兩家各有無言禪。皋夔稷契非吾事。休囚饑飽付皇天。

去年肺熱苦吟呻。今年耳聾百不聞。吾生卅六未全老。蒲柳已與西風鄰。念我識字殊珍少。淺思詎足燔精神。忽憶軒頤初考文。羣鬼唬夜天裂晨。斯高揚馬竝姦怪。召陵祭酒尤絕倫。段生晚出吾最許。勢與二徐爭嶙峋。惜哉數子琢肝腎。鑿破醇古趨囂囂。書史不是養生物。雕鑿例少牢強身。

我今日飲婆婆尚不樂。嗟爾皓首魚蟲人。

長安十月飛繁霜。西風落葉裊金商。道場隙地一千畝。頽垣破礎淒荒。
壞塔陂陀野狐噪。華楹漫漶飢鼠忙。憶昔憲皇興作日。飛樓湧殿何巍昂。
外家恩澤敵田寶。祖師勢要凌侯王。三百年來變陵谷。龍象孱弱鸚鵡狂。
毗盧閣子今安在。向時鐵鳳蟠穹蒼。銅駝荆棘古所歎。今我何爲獨旁皇。
鼻涕垂頤不須管。況問人世滄與桑。

俗儒閣閣蛙亂鳴。亭林老子初金聲。昌平山水委灰燼。可憐孤臣淚縱橫。
東西南北轍迹遍。斷柯缺斧終無成。獨有文書巨眼在北斗。麗天萬古明
聲音。上溯三皇始地志。欲掩四子名。丈夫立言要須爾。擊甕拊缶烏足鳴。
嗟余孱退昏庸百不力。付與四海劉傳瑩。

劉郎三十甘蒿萊。荷蓀箸書眞豪哉。郭生辭我還鄉國。東遊章貢噉紅埃。
跌宕江山要詩句。傾倒懷抱須尊罍。此閒頗似醺池寺。但少晁張登然來。
朝飢夕渴不可解。安得銀潢倒落注金杯。

訓李生三首

一別李生今四載。我有情懷浩如海。白日西下江水東。嗟余與女不相逢。
念女春秋正壯大。勳名邂逅能鼎鐘。三年五年伏不出。鏡中便恐改昔容。
丈夫自謀要深遠。求田莫問陳元龍。深山窮谷霜鏑老。何人拂拭青芙蓉。

曳尾不羨宗祏龜。孤豚不慕太廟犧。我今等閒爲世用。自憐骯髒百不宜。
海國波濤一萬里。天吳罔象相娛嬉。聖主宵衣事展轉。小臣辱薄何能爲。
胸中不辨管與樂。囊中嘗少淺與耆。朝欷夕噫不自得。俛首長誦鵝梁詩。
孫生粲粲如刻苴。玉立偕女雙瓊瑤。同作二喬好夫婿。盛年咳唾千雲霄。
蜀山嵯峩蜀江闊。終有畸士光斗杓。文章不是救時物。揚雄司馬烏足驕。
男兒萬事須嘗膽。詎可俯僂倖呼盧梟。女曹報國好身手。看我嵯跼已老醜。
次韻戴醇士邵蕙西見過

去年城南臥古刹。高秋萬葉聲鳴戛。病中強哦七字詩。欲調苦腸變甘滑。
樞府先生辱相和。神鬼雕鑿何桀黠。鏟除險語歸溫柔。痛與鄙人砭莖軋。
我時鄉夢正南飛。欲促歸裝理脂羶。奇章偉句不能報。自慙久暗蒼與蝨。
豈期歲序遽周遭。西風蕭蕭又愁殺。東烏西兔老鞭笞。鏡裏催人雙鬢鬢。
一賢忽來曠我懷。高論邱索窮九入。但得尊前賭歡笑。遑冀身後誰識察。
紛紛人海縛簪纓。汨汨天刑被髡削。何時卻隨兩閒鷗。摩空一盤萬里鷗。

題平谷山莊圖

十年京國踣朝鼓。九陌黃塵塞肝腑。已分喧囂儕市估。忽夢歸去釣湘煙。
洞庭八月水如天。沙鷗與我抵足眠。醒來依舊馬嘶櫪。車聲隆隆震牆壁。
始知樊籠困羽翼。開圖對此好谿山。萬重雲水一僧閒。清輝照我塵裏顏。

何日飄然報芒屨。往尋盤山松下路。買鄰來傍羊求住。

題王麓屏扁舟歸養圖二首

冷風融日作好春。吾子嘉遯逢茲晨。長安高蓋擁衢術。住者牛毛去者麟。
不明趨衙莫退舍。日日人前伺喜瞋。誰識扁舟五湖外。尚有朝士梅子眞。
漣水之頭資江尾。十年同違桑與梓。君去芒屨踏萬山。谷鳥崖花各歡喜。
白頭老母迎門笑。傾身一拜兒歸矣。我今濡尼不知還。猿鶴息壤猶在彼。
書嚴太守大關賑糶詩後

去年河北哀鳩磬。千里剝地境無毛。靈牲瘞圭百不應。妻兒鬻食夫遁逃。
吾皇慘惻軫飢溺。銀潢下灌傾恩膏。詔發內儲一百萬。拯置衽席蘇號咷。
頗聞洪波有滲漏。蝨賊難防胥役饕。令我苦思循良吏。部勒仁政明秋毫。
麗江太守今召父。噢咻赤子歸甄陶。政成蠻犵罷歌舞。跌宕滇海窮詩騷。
揭來金門謁帝座。一編示我何桀驚。賑糶兩章尤驚絕。風格欲與次山爭。
旌旄大夫出疆得專擅。汲黯發粟史所褒。叔世議賑非細事。走章馳檄相
警警。州家申求使家阻。民册吏牘如山高。君能奮身拯水火。一破積習萬
口牢。畫脂不是壯夫業。詩外有事眞賢豪。安得九州徧公等。撫摩萬衆離
煎熬。作歌聊用勸來哲。下考莫晒陽城勞。

送黎樾喬侍御南歸

原六首前五首五古見前

驄馬鑿蹏行如飛。幡然下馬賦歸去。諫草上付九重天。扁舟遙指三湘路。先生素志在湖海。復欲蒼生歸陶鑄。十年風緇虎觀書。六載霜冷烏臺樹。滄海鯨鯢浪正高。洪河蛟蜃秋尤怒。杜老窮年憂黎元。賈生伏闕陳時務。虞廷自有龍夔在。朝士誰結巢由慕。長安風寒秋氣高。離筵酒暖日色暮。共因去國惜歐九。私喜見幾繼疏傅。昭山樹古霜逾瘦。洞庭水深寒可渡。定將蹤迹溷漁樵。猶有耕桑酬雨露。他年拂衣我歸來。爲訪先生嘉趣處。

題張石舟煙雨歸耕圖

靖陽老翁飢不死。四十年來噉書史。一朝悔悟思改弦。萬卷書拋如脫躡。高車大馬謝羣兒。草服黃冠吾歸矣。朋知聚處頗相怪。問翁生涯欲何以。東阡南陌一毛無。四海九州將安底。翁言少小睇夔臯。會對老蒼矜爪觜。幾年束縛蠶在匡。數輩啣濡魚乞水。中散自憐七不堪。於菟但聞三見已。閱世蠻觸多戰爭。策身臧穀無完美。逝將巖壑躬耕桑。不受邱軻老鞭箠。軀體諒非百年物。夢魂條在千山裏。煙雨濛濛插新秧。短渠鱸鱖長鱸鱖。泥飲邨農與酣嬉。招呼黃犢同臥起。翁言未終我已躍。此身不歸神先徙。行趨神武挂衣冠。往尋谷口買鄰里。誰能皓首黃塵中。項短尻高不知恥。

太學石鼓歌

韓公不鳴老坡謝。世閒神物霾寒灰。我來北雍撫石鼓。坐臥其下三裴徊。

周宣秉旄奠八柱。岐陽大狩鞭風雷。四山置罽布天布。羣后冠帶如雲來。
東征北伐盪殪穢。方召暉暉何雄哉。銘功鑄石告無極。欲鎮后土康八垓。
自從七國戰龍虎。荒荒王迹淪蒿萊。嬴顛劉蹶六代沸。把酒但勸長星杯。
陳倉流落一千載。霜鬢日剝空黃埃。國子先生老好事。欲比郟鼎珍瓊瑰。
東都相公守右輔。始昇沖沼剡蒼苔。五季蝸蟻頗星散。司馬刺史初重恢。
是時十鼓嗟失一。拋棄不辨何山隈。博搜民閒得異白。秦關復贖連城回。
宣和天子嚮儒雅。太清書畫千雲堆。詔移此石歸汴水。圓橋觀聽何轟隆。
行填字鉤發光怪。照耀良岳金碧開。豈知六龍卒北狩。法物會不禳凶災。
高車大牛輦萬貨。填坑咽谷驚三才。是鼓蒼黃亦北徙。重器始此蟠燕臺。
道園詩翁主太學。與舉百廢扶傾頽。中門兩楹與位置。華楹大棟增崔嵬。
承以磚壇護以檻。清陰四竊連疏槐。邇來春秋閱五百。光氣夜夜騰斗魁。
聖清文明邁巢燧。搜抉書契窮根芽。從臣技能半史籀。別作新鼓相追陪。
小儒昏鈍無所識。得從械櫜備條枚。細思物理窮顯晦。茫茫人事不可推。
作歌聊繼二公後。不羞駑蹇隨龍媒。

題朱伯韓侍御之尊人詩卷手蹟

異時河內初陸梁。誰其禦者朱與強。強公身死翦妖黨。殊恩稠疊旌國瘍。
朱公墨守一黑子。遮蔽懷衛如苞桑。時逾歲邁三十載。事過頗憶張睢陽。

吾皇繼序錄勳伐。詔祀名宦褒忠良。流芬遠韻不可賞。遺墨始此瞻暉光。
詩律欲傳杜宗武。風徽略近元漫郎。公家衰師吾所友。向人纏繞好肝腸。
往時嬌養比荇玉。今日柯條還老蒼。諫章九門懾虎豹。文事四海知班揚。
阿季行能亦超越。輕收科第如掇筐。永慰老翁山下魄。九原一笑能軒昂。
近聞汴州赤大地。千里滌滌無罌糧。析骸易子都窮盡。公之舊部亦流亡。
河北枯柴相枕藉。關西寇盜仍披猖。安得如結且千輩。散布都邑蘇瘡傷。
摩挲此卷三太息。聊表先正詒方將。

題蒼筤谷圖

我家湘上高峯山。茅屋修竹一萬竿。春雨晨鋤玉版。秋風夜館鳴琅玕。
自來京華暱車馬。滿腔俗惡不可刪。洞庭天地一大物。一從北渡遂不還。
苦憶故鄉好林壑。夢想此君無由攀。嗟君與我同里社。誤脫野服充朝班。
一別蒼筤謝猿鶴。十年臺省翔鸞鷺。魚須文笏豈不好。卻思鄉井長三歎。
錢塘畫師天所縱。手割湘雲落此閒。風枝雨葉戰寒碧。明窗大几生虛瀾。
簿書塵埃不稱意。得此亦足鐫疏頑。還君此畫與君約。一月更借十回看。

答李生

我年廿四登鄉貢。始與劉蓉相追陪。延津雙劍忽會合。深夜挂壁鳴風雷。
勳名自謂凌管樂。文采何曾怯鄒枚。豈知羲和鞭日月。頭上光陰火急催。

老劉偃蹇不稱意。酸寒一衿初受裁。我雖置身霄漢上。器小僅儕鉞與壘。
立朝本非汲黯節。媚世又無張禹才。似驢非驢馬非馬。自憎形影良可哂。
中天廣殿鑿雲開。飛甍結構要羣材。倦眼相徧天下士。焉知吾國有顏回。
李生年少風骨峻。驍騰汗血龍所胎。平地一朝能九仞。欲與老劉爭崔嵬。
萬里辭家來從我。如金受冶玉受鎚。斲輪祇有一心喻。獻璞翻爲兩足災。
世上升沈日千變。得失於我何有哉。朝來告別問何往。迎婦塞外祠高謀。
長安自是別離海。新婚便作錦繡堆。離情吉語雙恂怳。新詩妙句千瓊瑰。
我有一言生聽取。冰檠乃爲福之媒。富貴綺羅遭鬼瞰。憂患可以堅筋骸。
陳平終非貧賤客。王章莫忘辛苦懷。邊關十月雪黏天。勸生爲我盡一杯。

題唐本說文木部應莫邵亭孝廉

插架森森多於筍。世上何曾見唐本。莫君一卷殊瓌奇。傳寫云自元和時。
問君此卷有何珍。流傳顯晦經幾人。君言是物少微識。殘牋黯黮不能神。
豪家但知貴錦裘。陋巷誰復憐綦屣。黟縣令君持贈我。始吐光怪千星辰。
許書劣存二百字。古鏡一掃千年塵。篆文已與流俗殊。解說尤令耳目新。
乾嘉老儒耽蒼雅。東南巖段竝絕倫。就中一字百搜討。詰難蠹起何斷斷。
暗與此本相符契。古轍正合今時輪。乃知二徐尙鹵莽。詒誤幾輩空因循。
我聞此言神一快。有如枯柳揩馬疥。我昔趨朝陪庶尹。頗究六書醫頑蠢。

四海干戈驅迫忙。十年髀肉消磨盡。卻思南閣老祭酒。舊學於我復何有。
安得普天息櫓槍。歸去閉戶注凡將。

贈吳南屏

春霖颯沓天如篔。大麥菘邑小麥摧。愁顏彌月何會破。故人飛檣從天來。
與君握別纔幾日。已見新火十鑽槐。當時洞庭醺別酒。乾坤戰伐正喧阗。
沅湘義軍參差起。十事欲成九事乖。英豪半藏蜀國血。大地徧種秦時灰。
卽今南紀風塵靖。亂後遺黎多眚災。荒村有骨餉狐貉。沃土無人闢蒿萊。
筋力登危生理窄。斗粟誰買易嬰孩。三里誅求五里稅。關市或逢虎與豺。
謬領大藩二千里。瘡痍不救胡爲哉。羨君高臥君山頂。吞吐湖月無愁猜。
世味飽諳肱三折。長吟極望天四隤。招邀軒轅論古樂。瀚被屈氏錢餘哀。
談經頗折巨儒角。手攜晴日照昏霾。翩然一葉忽東下。相見各憐雙鬢皑。
甯知滄桑閱百變。復此對持掌中杯。蒼天可補河可塞。祇有好懷不易開。
努力且謀千日醉。高談巢燧訖有郅。

游金山觀東坡玉帶詩

去歲歸颿拂金山。咫尺浮圖不可攀。今年又翦瓜洲渡。扶攜妙友陟孱顏。
簿領叢中困桎梏。脫身一試腰腳頑。微風蹙江衆皴靜。一抹橫吞東海寬。
耿耿樓觀今安在。無情瘦石空巘岏。六飛昔臨浮玉頂。御榻霄漢千龍盤。

兵火十年變陵谷。道場百畝荒榛菅。頽垣不見螭纏棟。荆扉無復獸齧環。
古佛負牆滲秋雨。雖僧無食號夜寒。獨餘蘇公舊法服。腰玉片片留人間。
紋佩流傳七百祀。天章褒寵同錫鞶。舊玉帶有殘缺純廟敕內府琢玉補之題詩五章我懷峨嵋老尊
宿。翱翔人海如鳳鸞。揚子江頭數來往。幾回愉樂幾悲酸。北去烏臺判死
別。南遷嶺表絕生還。東坡往來江上屢過金山惟自湖州攝入烏臺獄及暮年南遷惠州兩次經過金山尤極艱苦磨蝎作災魑魅壯。荆
棘塞天行路難。差喜名山藏故物。長倚江月照忠肝。巴陵詩叟抱奇逸。齊
盟早歆風騷壇。斂板厭束淵明帶。談經時敲子夏冠。昨來省我鍾山麓。今
此東遊興未闌。扁舟更欲探甌越。誓窮人力發天慳。嗟余本志耽邱壑。羈
束塵鞅無由刪。江山自佳日自富。堪笑紛紛苦不閑。

五律

早起憶九弟二首

別汝經三月。音書何太難。夜長魂夢苦。人少屋廬寒。骨肉成飄泊。雲霄悔
羽翰。朝朝鳥鵲噪。物性固欺謾。
尙餘詞賦好。隨衆頌康哉。報國充無力。擎天別有才。寒雲迷雁影。遠道望
龍媒。百尺金臺矗。看君躡蹠來。

得郭筠仙書竝詩卻寄六律

展轉看書字。嗟君亦老蒼。昊天眞藐藐。白日故堂堂。與子相期事。窮年恐

不償。憂來聊飽食。吾壽會無央。

大雅悲淪歎。斯文久不尊。至情宜偏強。吾道有籬藩。仰首呼虞舜。狂歌答屈原。自非君子性。茲意固難論。

垂耳甘芻豆。儒冠信誤人。長爲羈旅客。嗟汝少年身。物極能思返。天心會好仁。鹿鳴歌旨酒。滴滴入君脣。

閒閒觀物化。耿耿究時喧。誼士羞要譽。廉夫重報恩。賈憎惟片語。求福實多門。種蕙怡幽獨。歸休勿復言。

昨來殊不適。日落獨登樓。西北看遼瀋。東南望海陬。蒼茫懷百代。浩蕩足千愁。畫肚思長策。嗟余肉食謀。

日日懷劉子。

謂孟容

時時憶郭生。仰天忽長歎。繞屋獨巡行。雲暗乾坤隘。風

來戶牖鳴。孤吟無與賞。寸憾浩縱橫。

寄弟三首

去年長已矣。來日尙云賒。身弱各相祝。家貧儻有涯。鄉心無住著。望眼久昏花。寥落音書闊。多疑驛使差。

咄咄延平劍。英英江夏黃。求聲方出谷。一別各他鄉。東下江河駛。南征道

路長。汝儕身手健。看我鬢毛蒼。

黃子壽彭年後起之秀
予嘗命九弟與之納交

夢裏攜予季。亭亭似我長。三年不相見。一變安可量。神駿初銜轡。牽牛寫

服箱。朝朝偷芋粟。知爾足奔忙。季弟今年十四歲往年好食粟煨芋避人偷竊頑趣可掬

獨出

匪直完裘好。今年故未寒。晚來還獨出。宇內一何寬。銜尾千人聚。高蹠百馬攢。天街原蕩蕩。辟路亦非難。

訪苗先麓苗精說文之學著書四十年一貧如洗今年六十無子

大隱東方朔。箸書揚子雲。出門無所詣。落日一從君。倦鳥宜何集。閒鷗亦有羣。烹茶餘幾火。小啜愧殷勤。苗無僕從親煮茶敬客

懷劉蓉

我思竟何屬。四海一劉蓉。具眼規皇古。低頭拜老農。乾坤皆在壁。霜雪必蟠胸。他日余能訪。千山捉臥龍。

歲暮雜感十首

殘歲垂垂盡。囂塵逐逐忙。世人同一悔。匪我獨顛狂。身計嗟頻左。家山亦未忘。時猶憂世事。此志固荒唐。

殺氣行南紀。溫風轉北條。陽和迴地幹。神鬼助天朝。挾纊三軍舞。層冰萬里消。小臣長皦皦。無術贊唐堯。江浙去年大雪京師今歲不甚寒

堯皋無並育。天地詎終溫。此日咸陽市。當年上蔡門。風雲悲昔遇。霜露等深恩。聞道南山木。窮冬尙負暄。

壯幾耽經訓。艱難始一隅。力耕無近穫。陟古有通衢。茅塞由來久。蓬生且待扶。國讐猶未雪。何處著迂儒。

四山仙侶會。角逐事賡歌。日日爲詩祟。人人被墨磨。相從良可適。不樂復如何。尚有平生友。飄零在澗阿。

久矣劉生隔。孟容嗟哉信爾賢。才高防作聖。情極屢逃禪。歧路多魑魅。深山足歲年。狂風能作劇。吹我墮君前。

阿弟光明者。阮甫愛兄心尙孩。良時無汝共。雅抱向誰開。難就陸雲業。多慙許武才。皇都甯不美。捨去竟何哉。

萬族求饒益。吾謀頗用疏。民生各心性。天道有孤虛。得俸堪加飯。無錢且買魚。逐貧思作賦。才薄欲何如。

浩浩翻江海。爭奔且未闌。古來名利客。誰不到長安。獨立看參昴。橫天如此寒。肯能尋冷淡。夜夜照簷端。

爆竹家家沸。兒時此味長。追歡斟綠螳。隨例祀黃羊。明日夔龍集。中天日月光。八年吟舊句。回首但蒼茫。乙未年曾作歲暮雜感詩十首

桂湖五首

新都桂湖。明楊升庵修撰故宅也。使旋過此。縣令張君宜亭招飲湖上。爲賦此詩。

遂別華陽國。歸程始此賒。翻然名境訪。來及夕陽斜。翠竹偃寒螿。丹楓噪暮鴉。詞人云異代。臨水一咨嗟。

短城三面繞。淺水半篙寒。鳥過穿殘日。魚行起寸瀾。秋來樓閣靜。幽處地天寬。平昔江湖性。眞思老釣竿。

十里荷花海。我來吁已遲。小橋通野港。壞艇臥西陂。曲岸能藏鷺。盤渦尙戲龜。傾城遊女盛。好是采蓮時。

矮桂枝鉤裏。叢篁葉打頭。隄行皆仄徑。路斷得高樓。欄檻千迴錦。琉璃五色秋。落霞沈水底。綺散不能收。跨水一樓名沈霞榭

頗憶家山好。去鄉茲六年。此閒行樂地。小有洞庭天。點綴須人力。招尋信妙緣。使君殊不俗。把酒意茫然。

至日二首

久行忘節序。夙莫但奔忙。茲日卽長至。我征仍未央。寒雲低樹白。邊日際山黃。時覩南來雁。飄零不作行。

海市三年舶。河源八月槎。水衡勞碩畫。漆室足咨嗟。天步方長健。民饑亦有涯。燔柴崇大禮。靈貺正來賒。

雨

稍稍車塵隔。安閒一閉門。高歌亦未輟。驟雨方此喧。宿霧依城靜。低雲入

樹昏空庭緒盛水。容易卽江邨。

送吳英樾之官浙江兼簡魏黃生大令三首

一第尋常事。服官方獨難。書生長短淺。世態自波瀾。被褐欲誰語。濫竽仍未安。無言堪汝贈。只是耐加餐。

大邑匪輕寄。斯民會可蘇。養魚防攬水。牧馬合求芻。兵甲連滄海。瘡痍正道塗。樂郊枯旱久。遲子一霑濡。

魏子好心事。相從興頗賒。與君聯肺腑。棄我各天涯。煙雨黔山道。風濤海

國槎。東南彌萬里。吟望一長嗟。魏君與吳爲婚姻識
選得貴州縣令也

送鄧伯昭兼簡家伯醇秀才三首

萬里西風道。艱哉信爾行。力耕無半穫。寒日耐孤征。身世嗟杭葦。文章一覆杯。平生餘意氣。未惜爲君傾。

君家老癡叔。海內久詞宗。謂湘皋
廣文歲晚餐幽菊。空山倚冷筇。我今方速謗。茲

味亦非濃。他日龐公榻。來尋物外蹤。

吾宗良大雅。老矣尙巖阿。六載長乖隔。百年能幾何。高明遭鬼侮。圭璧受沙磨。動忍由來事。無爲棄斧柯。

莫過竹如

維摩元未病。子祀空復疑。薄暮還相訪。經旬繫我思。深談四壁靜。交道一

燈知天畢看西下。來歸亦未遲。

東鄰杜氏義塾

稍得塵埃隙。來茲一散襟。喧車闕四聽。時鳥送餘音。亦有邊韶嬾。誰能季主尋。邨童休問字。剖璞方自今。

送黃少鶴

待爾雙雙至。春回又一年。開尊皆舊友。發篋半新篇。荔子紅時雨。芭且綠外天。江鄉好風景。話向酒杯前。

送金竺度之官閩中

朋好翩翩去。君今傷此行。春風一杯酒。舊雨十年情。循吏平生志。神仙薄倖名。海隅氛正惡。看汝斫長鯨。

七律

歲暮雜感十首

芒屨鎮日踏春還。殘臘將更卻等閒。三百六旬同逝水。四千餘里說家山。緇塵已自沾京雒。羌笛何須怨玉關。爲報南來新雁到。故鄉消息在雲間。高帽山下是儂家。歲歲年年鬪物華。老柏有情還憶我。夭桃無語自開花。幾回南國思紅豆。會記西風浣碧紗。最是故園難忘處。待鶯亭畔路三叉。莽莽寒山匝四圍。眼穿望不到庭闈。絮飄江浦無人管。草綠湖南有夢歸。

鄉思怕聽殘漏轉。逸情欲逐亂雲飛。敬從九烈神君訴。遊子於今要換衣。
去年此際賦長征。豪氣思屠大海鯨。湖上三更邀月飲。天邊萬嶺挾舟行。
竟將雲夢吞如芥。未信君山剗不平。偏是東皇來去易。又吹草綠滿蓬瀛。
紛紛節候儘平常。西舍東家底事忙。十二萬年都小劫。七千餘歲亦中傷。
蜉蝣身世知何極。胡蝶夢魂又一場。少昊笑儂情太寡。故堆錦繡富春光。
韶華彈指總悠悠。我到人間廿五秋。自愧望洋迷學海。更無清福住糟邱。
尊前瓦注會千局。腳底紅塵卽九州。自笑此身何處著。笙歌叢裏合閒遊。
爲減爲否兩蹉跎。搔首乾坤踏踏歌。萬事拚同駢拇視。浮生無奈繭絲多。
頻年蹤迹隨波瀾。大半光陰被墨磨。匣裏龍泉吟不住。問予何日斫蛟鼉。
舊雨會遺尺鯉魚。經年不報意何如。自從三益睽違久。學得五君世態疏。
碧樹那知離別憾。青鐙偏照故人書。殷勤護惜金鑪鴨。香火因緣付與渠。
擬學坡公饋歲詩。花箋何處寄相思。陽和未老貂先敝。暖氣初回鳥竟知。
遊子情懷隨地遠。天家雨露及時施。小儒莫獻昇平頌。幸傍龍樓覩上儀。
蓼蓼歲鼓走輕雷。竹馬兒童綵戲纒。仙仗九重圍霧住。宮花一萬鎖煙開。
迷離佳氣從空繞。不斷狂香拂面來。我比春風尤放蕩。長安日日騁龍媒。

寄郭筠仙浙江四首

一病多勞勤護惜。嗟君此別太匆匆。二三知己天涯隔。強半光陰道路中。

兔走會須營窟穴。鴻飛原不計西東。讀書識字知何益。贏得行蹤似轉蓬。
碣石逶迤起陣雲。樓船羽檄日紛紛。螳螂竟欲當車轍。鼉髀安能抗斧斤。
但解終童陳策略。已聞王歙立功勳。如今旅夢應安穩。早絕天驕盪海氛。
無窮志願付因循。彈指人間三十春。一局楸枰虞變幻。百圍梁棟藉輪囷。
蒼茫獨立時懷古。艱苦新嘗識保身。自愧太倉糜好爵。故交數輩尙清貧。
向晚巖霜破屋寒。娟娟纖月倚檐端。自繙行篋殷勤覓。苦索家書展轉看。
宦海情懷蟬翼薄。離人心緒繭絲團。更憐吳會飄零客。紙帳孤鐙坐夜闌。

三十二初度次日書懷

男兒三十殊非少。今我過之詎足歡。齷齪挈鉉嗟器小。酣歌鼓缶已春闌。
眼中雲物知何兆。鏡裏心情只獨看。飽食甘眠無用處。多慙名字侶鸛鷺。
憶弟二首

無端繞室思茫茫。明月當天萬瓦霜。可惜良宵空兀坐。遙憐諸弟在何方。
紛紛書帙誰能展。豔豔鐙花有底忙。出戶獨吟聊妄想。孤雲斷處是家鄉。
忽憶他時裏水上。惡風半夜撼春雷。舟人振舵聲同泣。客子扶牀面已灰。
仰荷皇天全薄命。信知浮世等輕埃。汝今歸去復何似。回首世途誠險哉。

襄陽遇風戊戌九月出都事弟
今年南歸亦由襄水陸武昌

漫興

今日今時吾在茲。我兄我弟儻相思。微官冷似支牀石。去國情如失乳兒。
見慣浮雲渾欲語。漫成詩句未須奇。徑求名酒一千斛。轟醉王城百不知。
聞客話里中近事

蓬萊清淺信推遷。回首鄉關事可憐。今日朝簪陪末秩。早時社鼓舞華筵。
陳平宰國無消息。庾信辭家有歲年。蹙蹙生涯非我里。滔滔四望極敷天。
元戎

大旆元戎喜起歌。舊時鼎鼐藉調和。豐貂長組朝金闕。駟馬瑠弓照塞河。
黃閣居然元老在。蒼生竟柰此人何。誰憐寂寞揚雄宅。獨抱繁憂臥薜蘿。
溫甫讀書城南寄示二首

十年長隱南山霧。今日始爲出岫雲。事業真如移馬磨。羽毛何得避雞羣。
求珠采玉從吾好。秋菊春蘭各自芬。嗟我蹉跎無一用。塵埃車馬日紛紛。
嶽麓東環湘水迴。長沙風物信佳哉。妙高峯上攜誰步。愛晚亭邊醉幾回。
夏后功名餘片石。漢王鐘鼓撥寒灰。知君此日沈吟地。是我當年眺覽來。
早發沔縣遇雨

此身病起百無憂。敢爲艱難一怨尤。曉霧忽飛千嶂雨。西風已作十分秋。
近知地利真堪恃。早信人謀不自由。昨日定軍山下過。蒼天一望故悠悠。
初入四川境喜晴

萬里關山睡夢中。今朝始洗眼矇矓。雲頭齊擁劍門上。峯勢欲隨江水東。
楚客初來詢物俗。蜀人從古足英雄。臥龍躍馬今安在。極目天邊意未窮。
梓潼道中有懷馮樹堂陳岱雲

複嶂七盤相約束。清流九曲與周遭。日高旌旆鳥蛇亂。秋老爪牙鷹隼豪。
北望幽燕天漠漠。東歸歲月水滔滔。江山如此知交隔。獨對菱花數二毛。

早發武連驛憶弟

朝朝整駕趁星光。細想吾生有底忙。疲馬可憐孤月照。晨雞一破萬山蒼。
日歸日歸歲云暮。有弟有弟天一方。大壑高崖風力勁。何當吹我送君旁。

三十三生日三首

三十餘齡似轉車。吾生泛泛信天涯。白雲遠望千山隔。黃葉催人兩鬢華。
去日行藏同踏雪。迂儒事業類團沙。名山壇席都無分。欲傍青門學種瓜。
大載承明饜祕書。河東一賦又吹嘘。多慙袞職無遺事。實藉文言有慶餘。
白壁出山終就琢。黃金擲谷總成虛。何時卻返初衣好。歸釣蒸谿縮項魚。

蒸水去吾家十里

苦飮風塵未息機。駑駘已絡紫金鞿。詩禪入悟無三昧。世路回頭有百非。
翁子少年原落拓。承宮家世本清微。故山鷗鳥吾盟在。

謂劉大

會記江邊各

忍饑。

國士橋

增城縣西

亂鴉呼噪若爲情。疲馬逡巡尙欲驚。遭遇一生容可再。艱難萬死竟無成。至今平楚風猶勁。終古寒流意未平。他日王孫知己感。可憐鐘室淚縱橫。

哭少時同學某

君嘗二試有司被黜以事牽連爲吏胥奇辱貧鬱以死

少日低飛各羽翰。幾年苗溷不同看。竟緣無食填溝壑。終古銜羞在肺肝。蟻戰莫償三北恥。蠶僵更吐一絲難。寡妻弱子知何倚。雪虐風饕可耐寒。

送妹夫王五歸五首

飄然棄我卽山林。野服黃冠抵萬金。滢滢污塵得少辟。茫茫歧路一長吟。梁鴻旅食妻孥共。蘇季貧歸憂患深。東去大江蘆荻老。皇天颯颯正秋霖。荆楚梗枻夾道栽。於人無忤世無猜。豈知斤斧聯翩至。復道牛羊爛漫來。金碧觚棱依日月。崢嶸大棟逼風雷。回頭卻羨曲轅櫟。歲歲偷閒作棄材。高嶺山下草芊緜。去國蹉跎今六年。邨老半聞悲薤露。人間容易卽桑田。炎雲涼雨有翻覆。舞榭歌臺況變遷。莫訝榮枯無定態。君今猶守舊青氈。

王氏故室今貧矣

有齊季女吾弟行。操白君家老孟光。曾是弋鳧相勞饗。猶聞雛鳳已軒昂。秦嘉上計心情薄。王霸躬耕身世忘。織屨辟繻終古事。牛衣歲月卽羲皇。老弟三年困省門。寒山無律可回溫。由來命分政須爾。久信文章不足尊。

南雁乖違少書信。西風牢落對乾坤。因君傳語告予季。失馬亡羊莫更論。

酬九弟四首

違離予季今三載。辛苦學詩絕可憐。王粲辭家邁多患。陸雲入洛正華年。
輪轅塵裏鬢毛改。鼙鼓聲中筋骨堅。門內生涯何足道。要須嘗膽報堯天。
漢家八葉耀威弧。冬幹春膠造作殊。豈謂戈鋌照京口。翻然玉帛答倭奴。
故山豈識風塵事。舊德惟傳嫁娶圖。長是太平依日月。杖藜零涕說康衢。
杜韓不作蘇黃逝。今我說詩將附誰。手似五丁開石壁。心如六合一游絲。
神斤事業無凡賞。春草池塘有夢思。何日聯牀對鐙火。爲君爛醉舞僂僂。
辰君平正午君奇。屈指老沅真白眉。入世巾袍各骯髒。閉門諧謔卽支離。
中年例有妻孥役。識字由來教養衰。家食等閒不經意。如今飄泊在天涯。

澄侯以庚辰生
溫甫以壬午生

贈梅伯言二首

隘巷蕭蕭劣過車。蓬門寂寂似逃虛。爲杓不願庚桑楚。爭席誰名揚子居。
喜潑綠成新引竹。仍磨丹覆舊讎書。長安挂眼無冠蓋。獨有文章未肯疏。
單緒眞傳自皖桐。不孤當代一文雄。讀書養性原家教。績學參微況祖風。
衆妙觀如蜂待蜜。獨高格似鶴騫空。上池我亦源頭識。可柰頻過風日中。

夜直苦寒

白虎西流朱鳥高。五更風利鷗鷗刀。勁寒戰栗通心曲。轆氣冰霜上口毛。
曠蕩青天如可對。折旋丹地敢辭勞。頻聞交戰呵金馬。驀入鐙廬多凍毫。
吳宮黃病中屬市鹿尾

越舫迎來手指千。屋多不畏貯風偏。華鐙鄉話初長夜。藥碗吟愁欲雪天。
陽氣眉閒回病客。元精至後固崖仙。內廚斫取殷紅色。判費西清月放錢。
臘八日夜直

翻從官宿得閒時。仙掖深深晝掩帷。靜向古人書易入。寒偏今日酒堪持。
濃醴說獻宮中佛。晴雪看分禁裏墀。日暮武英門外望。井闌冰合柳枯垂。
失題四首

抽得閒身鶴不如。高秋酒熟鞠黃初。便驅天駟識途馬。歸釣江鄉縮項魚。
往日心情隨轂轉。今來身世似舟虛。不須更說知幾早。且喜塵緣盡剷除。
蚤雨蠻煙日日催。側身周望重低徊。海濱膏血深無極。帳下笙歌自莫哀。
安得賈生時痛哭。可憐楊僕本庸才。投章欲問茫茫意。何處通天尚有臺。
金堤舊蹟高家堰。復道今年盛昔年。自古塵沙同浩劫。斯民塗炭豈前緣。
沈江欲禱王尊壁。擊楫誰揮祖逖鞭。大廈正須梁棟柱。先生何事賦歸田。
兩度歸帆派上流。蕭蕭落木洞庭秋。送君此去風前酒。憶我當時月夜舟。
宏景舊居句曲洞。杜陵新卜浣谿頭。好栽修竹一千畝。更抵人間萬戶侯。

丁未六月七日考試漢教習試院作二首

潭潭深院鑷局牢。闕日溼雲作鬱陶。薄茗何曾解消渴。纖絺便欲等重袍。
高堂燕息尙如此。矮屋蜂屯毋已勞。得失沈沈紛滿眼。世間人事等牛毛。
虞廷胄子肄聲律。漢室小侯齒辟雍。銀漢支流原博大。璧門追琢要從容。
師儒落落渺千載。鍼芥時時還一逢。明日鄧林斤斧入。可能澗底拔長松。

武會試闈中作

禁闈蓮漏已宵深。涼月窺人冑一臨。此地頻來從案牘。吾生何日得山林。
貔貅霧隱三更肅。河漢天高萬籟沈。火冷鐙青無箇事。可憐忙殺愛才心。

送孫芝房使貴州二首

妙年作賦動明光。又策星軺赴夜郎。文采邊陲瞻泰斗。儀容寸步中宮商。
沅湘過訪三閭廟。宛葉行經百戰場。定有新詩傳萬口。歸來吾與解奚囊。
六年陳迹吾能記。病骨秋風入劍關。會洗人天清淨眼。飽看巴蜀怪奇山。
君今巖壑搜羣玉。自有光芒照百蠻。不似老夫徒碌碌。崑岡一網手空還。

書邊陲石詩集後二首

鑄章琢句尋常事。激烈心情絕可憐。今日詞臣須頗牧。古來豪士出幽燕。
楊家忠義存三疏。孫相威名在九邊。莫藉文章追往哲。要憑肝膽報皇天。
苦憶荊州王仲宣。投簪浩蕩臥江天。三年促膝從予坐。四海低頭道子賢。

北李南何各壇坵。楓青塞黑與纏緜。因君更逐停雲想。望斷襄陽落照邊。
送梅伯言歸金陵二首

金門混迹髮蒼蒼。從此菰蒲歲月長。人世正酣爭奪夢。老翁已泊水雲鄉。
自繙素業衡輕重。久覺紅塵可憫傷。祇恐詩名天下滿。九州無處匿韓康。
徵君絕學冠寰瀛。又見文孫樹立宏。六葉弓裘傳柏槻。百年耆舊數宣城。
緬懷仁廟虛前席。盡訪鴻儒佐太平。豈獨當時能感激。至今臣子涕縱橫。
伯言宣城人著
柏槻山房詩文集

文筆昌黎百世師。桐城諸老實宗之。方姚以後無孤詣。嘉道之間又一奇。
碧海龍吟鯨掣候。青山花放水流時。兩般妙境知音寡。它日曹谿付與誰。
訓李芋仙二首

巴東三峽猿嘯處。太白醉魂今尙存。遂有遠孫通臍蠻。時吟大句動乾坤。
愛從吾黨魚忘水。厭逐人間蝨處禪。卻笑文章成底用。千篇不值一盤飧。
勁翻摩空故絕倫。吹噓曾未出風塵。細思科第定何物。卻是饑寒解困人。
大道但期三洗髓。長途終遇九方歎。高秋一放脫羈去。看汝飛騰亦有神。
次韻何廉昉太守感懷述事十六首

域中哀怨廣場開。屈宋而還第二回。幻想更無天可問。牢愁甯有地能埋。
素瓜鉤帶何人種。社櫟支離幾日培。大冶最憎金踊躍。那容世界有奇材。

慘澹兵戎春復秋。濁醪誰信遣千憂。戰場故鬼招新鬼。世事前漚散後漚。
馳逐幾同秦失鹿。劬勞祇愧魯無鳩。何時浩蕩輕鷗去。一舸鴟夷得少休。
二月長安春始歸。觚棱回首夢魂飛。宮鴉掠日槐陰瘦。廢馬嘶風柳絮肥。
東閣賜茶雙鳳闕。西郊扈蹕九龍旗。十年苦憶鈞天奏。老大眞憐未拂衣。
滄海橫流澤有鳩。微生偶出一當熊。千艘梭織怒濤上。萬幕笳吹明月中。
屠罷長鯨波尙赤。戰歸驕馬汗猶紅。誰知春晚周郎老。更與東皇乞好風。
鍾山祠廟巋然存。憑弔湖湘烈士魂。馬革裹屍男子志。鸞刀祭脰聖明恩。
弓旌夜動神依戶。簫鼓春祈福滿門。萬世游人應指點。血殷篙眼古時痕。
潯陽江水接天長。良將新祠皎雪霜。半壁東南支柱石。數州士女薦馨香。
竟無耆壽追充國。猶有嘉名配武鄉。匹馬寸金都謝絕。三明何必數西涼。
山縣寒儒守一經。出山姓字各芳馨。要令天下消兵氣。爭說湘中聚德星。
舊雨三年精化碧。孤燈五夜眼常青。書生自有不成量。地脈何曾獨效靈。
猿鶴沙蟲道竝消。誰分糞壤與芳椒。昨來皖水三河變。堪痛阿房一炬焦。
句踐池邊醪易醉。田橫墓上酒難饒。同袍才俊彫零盡。苟活人間只自嘲。
鶴原橫賈第三人。鶴唳華亭不復春。先軫歸元何日是。虞翻相骨本來貧。
科名久滯青雲路。身手難扶赤日輪。十二萬年香不滅。從渠擣麝作灰塵。
江雪湖波路幾千。壺頭歸葬事堪憐。鑄金叩叩終何益。埋玉深深不計年。

夜月一鉤涼蕙帳。春風十萬散榆錢。神靈甲馬如相助。莫遣愁人歎逝川。
濫觴初引一泓泉。流出蛟龍萬丈淵。從古精誠能破石。薰天事業不貪錢。
腐儒封拜稱詩伯。上策屯耕在硯田。巨海茫茫終得岸。誰言精衛憾難填。
幕府山頭對碧天。英英羣彥滿樽前。共扶元氣迴陽九。各放光明照大千。
短李迂辛雜嘲謔。箕張牛奮總安便。獨憐何遜今漂泊。望斷寒雲暮靄邊。
薇閣藤廳淡淡紅。多君知步五雲中。良緣彩鳳雙飛翼。慧業靈犀一點通。
典郡四旬書上考。闔門入口祀昭忠。災祥誰識天公意。休向西風泣路窮。
由來忠孝易通神。忉利華鬢識後身。石爛海枯終有盡。生天成佛豈無人。
關河庾信空蕭瑟。形影陶潛孰主賓。雞犬全家存帝所。淮南生計未全貧。
荒城風雪臥袁安。高節鵠才萬目看。懶讀司空城旦法。會希柱後惠文冠。
出山馴雉網羅密。失水神龍變化難。猶有老梅嬌萼發。先從三界解春寒。
聖主中興邁盛周。聯翩方召弁公侯。神威欲挾雷霆下。大業常同江漢流。
藻火但聞山甫袞。桐廬豈有子陵裘。鸞臺閣方新構。杞梓楸枿一例收。

讀吳南屏送毛西垣之卽墨長歌卽題其集

十載鄉園獨爾思。眼明今日見新詩。嘗憂大雅終將絕。豈意吾儕覩此奇。
木落千山初瘦削。風迴大海乍平夷。此中真意憑君會。持似旁人那得知。
人閒骯髒一毛生。與子交期如弟兄。忽出國門騎瘦馬。去看東海掣長鯨。

放歌一弔田橫島。醜酒還臨樂毅城。併入先生詩句裏。千戈離別古今情。

五絕

讀李義山詩集

渺緜出聲響。輿緩生光瑩。太息涪翁去。無人會此情。

七絕

入陝西境六絕句十一日

西風已謝朔風迨。客子勞勞且未休。行過嘉陵三百里。飛崖絕壁又秦州。

破曉七盤山上望。回看蜀國萬峯環。英雄割據終何有。陵谷滄桑事等閒。

南棧惟七盤嶺與朝天關最高

亂山合處響沈沈。古洞千年海椽深。獨臥藍輿初夢覺。時聞腳底老龍吟。

兩山忽合中如長虹名龍洞背下有洞可容數千人

忽憶老筠吾匹儔。謂郭大汨羅江上苦吟秋。未成嘉會方王貢。便恐才名駕

應劉。

江流日夜走荆襄。隴蜀由來四戰場。故壘無人談往事。空山有客弔斜陽。

入秦三十里為百牢關關以東水皆東流入河關以西水皆西流入嘉陵江

七二寒谿沒斷深。谿邊茅屋隔楓林。歸人正怯征衣薄。又聽山城響暮砧。

甯羌州多山獨病涉俗名七十二道脚不乾

題畫竹次醇士前輩韻二首

森森鳳尾一時抽。滿地孫枝翠篠稠。老幹已凌霄漢上。曲江猶自憶遨頭。
列仙不比山澤臞。碧梳瓊鬢事有無。更向禪宗參玉版。花豬竹鬣冑分吾。

送唐鏡海先生九首

六年高臥大江隈。萬里蒲輪驛吏催。京國諸儒齊額手。溫公新自洛陽來。
金殿從容道古今。高言字字印天心。鐘聲送出東華路。已報槐階轉午陰。
摹天繪日本難工。聖德何由測六龍。白髮老臣私贊歎。文如聖祖武高宗。
漳衛滔滔走帝都。堯封何事闕溝渠。廿年深究齊民術。一卷新呈水利書。
上相南征策衆材。軍容十萬轉風雷。書生卻進安民策。盜弄潢池事可哀。
泰岱高雲不可攀。會興霖雨在人閒。如今老去神功斂。祇就君王乞放還。
道德神仙各有謀。行藏雖一事難侔。功名不數种司諫。出處羞稱李鄴侯。
熙朝正學要匡扶。衆說紛紛各啓塗。歸語江南諸父老。太平天子好真儒。
枌榆後進謬升堂。習習春風杖履旁。此後追陪何日是。鏡中吾亦鬢毛蒼。

壬戌四月沅弟克復巢縣和州含山等城賦詩四首

濡須塢裏漲春波。三月鶯囀氣正和。一騎雲飛新報捷。漢家收復舊山河。
碧血家家百草腥。荒郊五夜泣坤靈。將軍一掃陵陽道。便有遊人說踏青。
半壁山前鐵鎖橫。當年諸將各聲名。卽今錐鑿西梁下。益信先皇萬里明。

師淑韓公二十霜。敢將裴令竝論量。諸君自有涪溪筆。看取穹碑日月光。
沅圃弟四十一初度

九載艱難下百城。漫天箕口復縱橫。今朝一酌黃花酒。始與阿連慶更生。
陸雲入洛正華年。訪道尋師志頗堅。慚愧庭階春意薄。無風吹汝上青天。
幾年橐筆逐辛酸。科第尼人寸寸難。一劍須臾龍變化。誰能終古老泥蟠。
廬陵城下總雄師。主將赤心萬馬知。佳節中秋平劇寇。書生初試大功時。
沅甫初在吉安統兵二萬八
年八月十五日克復府城

楚尾吳頭閩戰塵。江干無土著生民。多君龕定同安郡。上感三光下百神。
十一年八月初一日克復安慶欽
天監奏是日四星聯珠日月合璧

孺須已過歷陽來。無數金湯一剪開。提挈湖湘良子弟。隨風直薄雨花臺。
邂逅三才發殺機。王尋百萬合重圍。昆陽一捷天人悅。誰識中軍血染衣。
平吳捷奏入甘泉。正賦周宣六月篇。生縛名王歸夜半。秦淮月畔有非煙。
河山策命冠時髦。魯衛同封異數叨。刮骨箭瘢天鑒否。可憐叔子獨賢勞。
左列鐘銘右謗書。人間隨處有乘除。低頭一拜屠羊說。萬事浮雲過太虛。
已壽斯民復壽身。拂衣歸釣五湖春。丹誠磨鍊堪千劫。不藉良金更鑄人。
黃河餘潤沾三族。白下飢民活萬家。千里親疏齊頌禱。使君眉壽總無涯。
童穉溫溫無險巖。酒人浩浩少猜疑。與君同講長生訣。且學嬰兒中酒時。

甲子八月二十日沅甫弟四十一生日。爲小詩十三首壽之。往在壬戌四月。沅弟克復巢縣和州含山等城。余賦詩四首。一時同人以爲聲調有似饒歌而和之。此詩略仿其體。以徵和者。且使兒曹歌以侑觴。國藩識。

仿古字版

會文正公鳴原堂論文

世界書局印行

序

縮地二三千。里。官爲尙書侍郎。兼古御史大夫中丞之號。跨州連郡。多者百餘城。少或五六十縣。監司郡守牧令丞倅雜職數百人。武弁自提鎮以下承命唯謹。賦稅刑獄軍謀河工鹽漕黜陟諸大政待之而決。又有賓從往來屬僚請謁。雞鳴盥沐。整衣肅容。閤人持手版。第其先後。魚貫雁行以進。更十餘番猶未畢。則辭以他日。他日復如此。退則吏抱文書。右手及額。左手下至腹。且行且捧。嫵嫵而入。分公私新舊。錯陳於几案之間。其緊要者官乃審視而詳裁之。例行者略一瞥省署行而已。故今之督撫大吏。凡夫敷陳入告之詞。多倚辦於幕友。其不能親自吮毫搆思者勢也。然而充斯選者。率用刑名家言。規規焉循例案避處分。以文無害爲事。卽有勤求民隱。發憤爲雄。破除一切拘束者。輒格於部議而不能施行。蓋奏疏之難於笑善兼盡也如此。我伯兄太傅文正公。當顯皇初政。以議大禮諫聖德諸疏。忠讜聞天下。及執兵符。開幕府於東南。東南之碩儒名彥。博辯洽聞之士。皆禮羅而珍儲之。其達者洊膺將相。勳伐爛然。次亦以文學稱著於時。夫以宏通淹雅之才。論時政之得失。料軍情之勝負。出之以沈思眇慮。申之以修飾潤色。固無患其言之不工。意之不諧也。然公或初善之而卒易之。字點句竄。十不存一。豈與夫冥搜幽抉。顛頓專精之士。較勝負於文字哉。蓋才者天所賦也。識者練而精者也。人之聰明才力不甚相遠。天下事變之來。往往出於智慧思慮之所不及。惟歷事久者。能守義理之常。以待時勢之變。故公之奏疏。不爲大喜過美之詞。亦不爲憂怵無聊之語。其論賊勢興衰。中外大局。一切將然未然之事。若燭照龜卜。不失毫髮。而謙謙冲挹。若不敢決其必然。而其後卒無不然。豈非識之加人一等哉。國荃少侍公京邸。從而問學。壯歲輟轉兵間。隨公馳逐江西江南諸行省。賴聖天子威德。大功告蕞。兄弟荷蒙殊寵。惴惴焉懼以不才致罪戾。乞身歸里。公慮其昧所擇也。選古今名臣奏疏若干首。細批詳評。命之曰鳴原堂論文。國荃受而讀之。蓋人臣立言之體。與公平生得力之所在。略備於此。今歲王君鼎丞來湘。編公遺書。因出此篇。屬其校讎付梓。國荃行老矣。自慚荒譚。無補於時。追念往時與公從事於驚濤駭浪之中。出萬死不顧一生之計。以爭尺寸之士。曾不計後此尙有安閑之一日。今海內又安。公以考終。國荃亦能養疴林下。優游暇豫。與二三故舊。聯樽酒文字之歡。蓋非始念所及。此後

之讀公書者。知其人。論其世。其必徘徊往復而歎公之文章德業。與身世遭逢。爲均不可及云。同治十二年九月
湘鄉曾國荃敘。

序目

常棣爲燕兄弟之詩。小宛爲兄弟相戒以免禍之詩。而皆以脊令起興。蓋脊令之性最急。其用最切。故常棣以
喻急難之誼。而小宛以喻征邁努力之忱。余久困兵間。溫甫沅甫兩弟之從軍。其初皆因急難而來。沅甫堅忍果
擊。遂成大功。余用是獲免於戾。因與沅甫常以暇逸相誠。期於夙興夜寐。無忝所生。爰取兩詩脊令之旨。名其堂
曰『鳴原堂』云。曾國藩記。

鳴原堂論文集目次

匡衡戒妃匹勸經學威儀之則疏	一
賈誼陳政事疏	二
劉向極諫外家封事	一〇
劉向論起昌陵疏	一一
劉向論甘延壽疏	一三
谷永救陳湯疏	一五
耿育訟陳湯書	一五
劉安諫伐閩越書	一六
賈捐之罷珠厓對	一九
諸葛亮出師表	二〇
陸贄奉天請罷瓊林大盈二庫狀	二二
蘇軾代張方平諫用兵書	二四
蘇軾上皇帝書	二六
朱熹戊申封事	三六
王守仁申明賞罰以厲人心疏	四八
方苞請矯除積習興起人材劄子	五二
孫嘉淦三習一弊疏	五六

鳴原堂論文

匡衡戒妃匹勸經學威儀之則疏

漢書云。成帝卽位。衡上疏戒妃匹勸經學威儀之則。是分爲三事也。姚選古文辭類纂題云。戒妃匹勸經學疏。則漏末一事矣。茲題從漢書。

陛下乘至孝。哀傷思慕。不絕於心。未有游虞弋射之宴。誠隆於慎終追遠無窮已也。竊願陛下雖聖性得之。猶復加聖心焉。詩云。『煢煢在疚。』言成王喪畢。思慕意氣未能平也。蓋所以就文武之業。崇大化之本也。以上總起。臣又聞之師曰。『妃匹之際。生民之始。萬福之原。』婚姻之禮正。然後品物遂而天命全。孔子論詩以關雎爲始。言太上者民之父母。后夫人之行。不侔乎天地。則無以奉神靈之統。而理萬物之宜。故詩曰。『窈窕淑女。君子好逑。』言能致其貞淑。不貳其操。情慾之感。無介乎容儀。宴私之意。不形乎動靜。夫然後可以配至尊而爲宗廟主。此綱紀之首。王化之端也。自上世以來。三代興廢。未有不由此者也。願陛下詳覽得失。盛衰之效。以定大基。采有德戒聲色。近嚴敬。遠技能。以上戒妃匹竊見聖德純茂。專精詩書。好樂無厭。臣衡材騫。無以輔相善義。宣揚德音。臣聞六經者聖人所以統天地之心。著善惡之歸。明吉凶之分。通人道之正。使不悖於其本性者也。故審六藝之指。則天人之理可得而和。草木昆蟲可得而育。此永不易之道也。及論語孝經。聖人言行之要。宜究其意。以上勸經學。臣又聞聖王之自爲動靜周旋。奉天承親。臨朝饗臣。物有節文。以章人倫。蓋欽翼祗栗。事天之容也。溫恭敬遜。承親之禮也。正躬嚴恪。臨衆之儀也。嘉惠和悅。饗下之顏也。舉措動作。物遵其儀。故形爲仁義。動爲法則。孔子曰。『德義可尊。容止可觀。進退可度。以臨其民。』是以前民畏而愛之。則而象之。大雅云。『敬慎威儀。惟民之則。』諸侯正月朝覲天子。天子惟道德昭穆穆以視之。又觀以禮樂。饗禮乃歸。故萬國莫不獲賜祉福。蒙化而成俗。今正月初幸路寢臨朝。賀置酒以饗萬方。傳曰。『君子慎始。』願陛下留神動靜之節。使羣下得望盛德。德休光以立基楨。天下幸甚。以上威儀之則。

三代以下。陳奏君上之文。當以此篇及諸葛公出師表爲冠。淵懿篤厚。直與六經同風。如「情欲之感。無介於儀容。宴私之意。不形乎動靜」等句。朱子取以入詩經集傳。蓋其立言爲有本矣。此等奏議。固非後世所能幾及。然須觀其陳義之高遠。著語之不苟。乃能平躁心而去浮詞。

賈誼陳政事疏

臣竊惟事勢可爲痛哭者一。可爲流涕者二。可爲長太息者六。後文可流涕者實僅一條。可爲長太息者實僅五條。各缺一條。殊不可解。若其他背理而傷道者。難徧以疏舉。進言者皆曰天下已安已治矣。臣獨以爲未也。曰安且治者。非愚則諛。皆非事實。知治亂之體者也。夫抱火厝之積薪之下而寢其上。火未及然。因謂之安。方今之勢。何以異此。本末舛逆。首尾衡決。衡決猶橫決也。古人言直皆曰縱。言橫皆曰衡。於事之忤亂無條理者。則橫字作去聲讀。如曰橫逆。曰洪水橫流是也。此處若作橫決。亦當讀爲去聲。國制搶攘。非甚有紀。胡可謂治。陛下何不壹令臣得執數之於前。因陳治安之策。試詳擇焉。夫射獵之娛。與安危之機。孰急。使爲治勞智慮。苦身體。乏鐘鼓之樂。勿爲可也。樂與今同。而加之諸侯軌道。兵革不動。民保首領。匈奴賓服。四荒鄉風。百姓素樸。獄訟衰息。大數既得。則天下順治。海內之氣。清和咸理。生爲明帝。沒爲明神。名譽之美。垂於無窮。禮祖有功。而宗有德。使願成之廟。稱爲太宗。此疏陳於文帝時。便謂文帝死後。廟號應稱太宗。足見當時風俗近古。上配太祖。與漢亡極。建久安之勢。成長治之業。以承祖廟。以奉六親。至孝也。以幸天下。以育羣生。至仁也。立經陳紀。輕重同得。後可以爲萬世治程。雖有愚幼不肖之嗣。猶得蒙業而安。至明也。以陛下之明達。因使少知治體者。得佐下風。致此非難也。其具可素陳於前。願幸無忽。臣謹稽之天地。驗之往古。按之當今之務。日夜念此至孰也。雖使舜禹復生。爲陛下計。亡以易此。以上總序。夫樹國固必相疑之勢。樹立也。於京師之外。又樹立宗室多國。勢必相疑。下數被其殃。上數爽其憂。甚非所以安上而全下也。今或親弟謀爲東帝。親兄之子西鄉而擊。今吳又見告矣。親弟謂淮南厲王長。親兄之子謂齊悼惠王之子與居。皆謀反也。天子春秋鼎盛。行義未過。德澤有加焉。猶尙如是。况莫大諸侯。權力且十此者乎。然而天下少安何也。大國之王幼弱未壯。漢之所置傅相。方握其事。漢之諸侯王各有大將有相。是大

子所置者。數年之後。諸侯之王。大抵皆冠血氣方剛。漢之傳相稱病而賜罷。彼自丞尉以上。徧置私人。如此有異。淮南濟北之爲邪。淮南謂上文親弟謀爲東帝也。濟北謂上文親兄之子西向而擊也。此時而欲爲治安。雖堯舜不治。黃帝曰。『日中必斃。操刀必割。』今令此道順而全安甚易。不肯早爲。已迺墮骨肉之屬而抗到之。豈有異秦之季世乎。夫以天子之位。乘今之時。因天之助。尙憚以危爲安。以亂爲治。假設陛下居齊桓之處。將不合諸侯而匡天下乎。臣又知陛下有所必不能矣。以上言數年之後諸侯王必爲變。宜早爲之所假設。陛下如曩時淮陰侯尙王楚。黥布王淮南。彭越王梁。韓信王韓。張敖王趙。貫高爲相。盧縮王燕。陳豨在代。令此六七公者皆亡。兇。此六七人皆高祖之臣。封王而叛者。當是時而陛下卽天子位。能自安平乎。臣有以知陛下之不能也。天下淆亂。高皇帝與諸公並起。非有仄室之勢。以豫席之也。仄室之勢。猶日寸土半階之勢。席猶日憑藉也。諸公幸者。乃爲中涓。其次塵廬。與僅同得舍人。材之不逮至遠也。高皇帝以明聖威武。卽天子位。割膏腴之地。以王諸公。多者百餘城。少者乃三四十縣。德至渥也。然其後七年之間。反者九起。陛下之與諸公。非親角材而臣之也。又非身封王之也。自高皇帝不能以是一歲爲安。故臣知陛下之不能也。以上言高帝時尙不能禁諸侯王之不反。然尙有可諉者。曰疏。臣請試言其親者。假令悼惠王王齊。元王王楚。中子王趙。幽王王淮陽。共王王梁。嬰王王燕。厲王王淮南。六七貴人皆亡。兇。此六七人皆高祖之子弟。封王而叛者。當是時。陛下卽位能爲治乎。臣又知陛下之不能也。若此諸王。雖名爲臣。實皆有布衣昆弟之心。慮亡不帝制而天子自爲者。慮音閩。猶曰大抵也。大抵無不帝制。自爲擅爵人。赦死罪。甚者或戴黃屋。漢法令非行也。雖行不軌如厲王者。令之不肯聽。召之安可致乎。幸而來至。法安可得加。動一親戚。古人稱父子兄弟曰親戚。天下圍視而起。陛下之臣雖有悍如馮敬者。適啓其口。匕首已陷其胸矣。陛下雖賢。誰與領此。故疏者必危。親者必亂。已然之效也。其異姓負疆而動者。漢已幸勝之矣。又不易其所以。然同姓襲是迹而動。既有徵矣。其勢盡。又復然。殃禍之變。未知所移。明帝處之。尙不能以安。後世將如之何。屠牛坦一朝解十二牛。而芒刃不頓者。所排擊剝割皆衆理解也。至於醜髀之所。非斤則斧。夫仁義恩厚。人主之芒刃也。權勢法制。人主之斤斧也。今諸侯王皆衆醜髀也。釋斤斧之用。而欲嬰以芒刃。臣以爲不缺則折。胡不用之。淮南濟北。勢不可也。言淮南王爲親弟。濟北王爲親兄子。尙不可用芒刃。況今同姓諸王。勢尤不可用芒刃矣。以上

言反迹已露。則難制之。宜卽早施以斤斧。臣竊迹前事。大抵彊者先反。淮陰王楚。最彊則最先反。韓信倚胡則又反。貫高因趙竇則又反。陳豨兵精則又反。彭越用梁則又反。黥布用淮南則又反。盧縮最弱最後反。長沙乃在二萬五千戶耳。在讀如纔猶日僅也。功少而最完。勢疏而最忠。非獨性異人也。亦形勢使然也。曩令樊鄴絳灌樊鄴灌三人皆姓周。勃封絳侯。絳乃其封地之名耳。而史漢中多稱樊鄴絳灌。想當時通稱如此。如今日稱塔羅揚彭耳。據數十城而王。今雖以殘亡可也。令信越之倫。列爲徹侯而居。雖至今存可也。然則天下之大計可知已。欲諸王之皆忠附。則莫若令如長沙王。欲臣子之勿菹醢。則莫若令如樊鄴等。欲天下之治安。莫若衆建諸侯而少其力。力少則易使以義。國小則無邪心。令海內之勢。如身之使臂。臂之使指。莫不從制。諸侯之君。不敢有異心。輻湊並進。而歸命天子。雖在細民。且知其安。故天下咸知陛下之明。割地定制。令齊趙楚各爲若干國。使悼惠王幽王元王之子孫。畢以次各受祖之封地。地盡而止。及燕梁他國皆然。其分地衆而子孫少者。建以爲國。空而置之。須其子孫生者而後君之。空而置之。謂存其國土。暫不封人。待其子孫生後乃封之。諸侯之地。其削頗入漢者。爲徙其侯國及封其子孫也。以數償之。諸侯之地。前頗有削而入漢者。猶今云入官也。仍當移徙界址。歸入侯國境內。待封其子孫時全數償之。一寸之地。一人之衆。天子亡所利焉。誠以定制而已。故天下咸知陛下之廉。地制壹定。宗室子孫。慮莫不王。猶云大抵無不王也。下無倍畔之心。上無誅伐之志。故天下咸知陛下之仁。法立而不犯。令行而不逆。貫高利幾之謀不生。柴奇開章之計不萌。細民鄉善。大臣致順。故天下咸知陛下之義。臥赤子天下之上。而安植遺腹。朝委裘而天下不亂。當時大治。後世誦聖。壹動而五業附。陛下誰懼而久不爲此。以上言強者先反。宜多建諸侯而分其力。天下之勢。方病大瘡。一脛之大幾如要。一指之大幾如股。平居不可屈信。一二指搯。身慮亡聊。身慮亡聊。言偶有一二牽動。偏身大抵皆痛。無聊賴也。失今不治。必爲痼疾。後雖有扁鵲。不能爲已。非徒病瘡也。又苦蹶齧。元王之子。帝之從弟也。今之王者。從弟之子也。惠王之子。親兄之子也。今之王者。兄子之子也。親者或亡分地以安天下。疏者或制大權以偏天子。臣故曰非徒病瘡也。又苦蹶齧。可爲痛哭者此病是也。以上慮宗室諸侯地大生變。痛哭之一天下之勢。方倒縣。凡天子者。天下之首。何也。上也。蠻夷者天下之足。何也。下也。今匈奴嫚侮侵掠。至不敬也。爲天下患。至亡已也。而漢歲致金絮采繒以奉之。夷狄徵令。是主上之操也。天子共

賈。是臣下之禮也。足反居上。首顧居下。倒懸如此。莫之能解。猶爲國有人乎。非亶倒懸而已。亶與但同。又類辟且病痺。夫辟者一面病。痺者一方痛。今西邊北邊之郡。雖有長爵。不輕得復。五尺以上。不輕得息。斥候望烽燧。不得臥。斥遠也。候候伺也。斥候猶今之放哨者。將吏被介胄而睡。臣故曰一方病矣。醫能治之。而不上使。可爲流涕者此也。陛下何忍以皇帝之號。爲戎人諸侯。勢既卑辱而旣不息。長此安窮。進謀者率以爲是。固不可解也。亡具甚矣。臣竊料匈奴之衆。不過漢一大縣。漢之匈奴。南北二千里。東西五千里。而曰不過抵漢一大縣。此賈生閭歷之淺也。以天下之大。困於一縣之衆。甚爲執事者羞之。陛下何不試以臣爲屬國之官。以主匈奴。典屬國之官。專主外國事。後蘇武嘗爲之。行臣之計。請必係單于之頸而制其命。伏中行說而答其背。舉匈奴之衆。惟上之令。今不獵猛獸而獵田彘。不搏反寇而搏畜兔。玩細娛而不圖大患。非所以爲安也。德可遠施。威可遠加。而直數百里外。威令不信。可爲流涕者此也。以上流涕者二實止言匈奴一事。今民賣僮者。爲之繡衣絲履。偏諸緣。偏諸卽牙條。今之鬼子。關于也。內之閑中。是古天子后服。所以廟而不寔者也。而庶人得以衣。婢妾白縠之表。薄紈之裏。繞以偏諸。偏諸卽縷子也。縷謂縫於衣之領緣也。美者黼繡。是古天子之服。今富人大賈。嘉會召客者。以被牆。古者以奉一帝一后而節適。今庶人屋壁得爲帝服。倡優下賤得爲后飾。然而天下不屈者。殆未有也。且帝之身。自衣卑綈。而富民牆屋被文繡。天子之后。以緣其領。庶人嬖妾緣其履。此臣所謂舛也。夫百人作之。不能衣一人。欲天下亡寒。胡可得也。一人耕之。十人聚而食之。欲天下亡饑。不可得也。饑寒切於民之肌膚。欲其亡爲姦邪。不可得也。國已屈矣。盜賊直須時耳。然而獻計者曰。毋動爲大耳。夫俗至大不敬也。至亡等也。至冒上也。進計者猶曰。『毋爲。』可爲長太息者此也。以上俗太奢。修冒上亡等太息之一。商君遺禮義。棄仁恩。并心於進取。行之二歲。秦俗日敗。故秦人家富子壯。則出分。家貧子壯。則出贅。借父耰鋤。慮有德色。言大抵有德色也。母取箕帚。立而諄語。抱哺其子。與公并倨。公舅也。孩婦與舅。并倨無禮甚矣。婦姑不相說。則反脣而相稽。其慈子嗜利。慈子嗜利。猶云爾。愛貪利不同禽獸者亡幾耳。然并心而赴時。猶曰。蹙六國兼天下。功成求得矣。終不知反廉愧之節。仁義之厚。信并兼之法。遂進取之業。天下大敗。衆掩寡。智欺愚。勇威怯。壯陵衰。其亂至矣。是以大賢起之。威震海內。德從天下。曩之爲秦者。今轉而爲漢矣。然其遺風餘俗。猶尙未改。今世以侈靡相競。而上無制度。棄禮義。捐廉恥日甚。可謂

月異而歲不同矣。逐利不耳。利不耳卽利否耳。慮非顧行也。慮非顧行猶云大抵不顧行之是非也。今其甚者殺父兄矣。盜者剝寢戶之簾。擐兩廟之器。白晝大都之中。剽吏而奪之金。矯僞者出幾十萬石粟。賦六百餘萬錢。乘傳而行郡國。此其無行義之尤至者也。而大臣特以簿書不報。期會之間。以爲大故。至於流俗失世壞敗。因恬而不知怪。慮不動於耳目。猶云大抵不動於耳目以爲是適然耳。夫移風易俗。使天下同心而向道。類非俗吏之所能爲也。俗吏之所務。在於刀筆筐篋。而不知大體。陛下又不自憂。竊爲陛下惜之。夫立君臣等上下。使父子有禮。六親有紀。此非天之所爲。人之所設也。夫人之所設。不爲不立。不植則僵。不修則壞。筦子曰。『禮義廉恥。是爲四維。四維不張。國乃滅亡。』使筦子愚人也。則可。筦子而少知治體。則是豈可不爲寒心哉。秦滅四維而不張。故君臣乖亂。六親殃戮。姦人並起。萬民離叛。凡十三歲而社稷爲墟。今四維猶未備也。故姦人幾倖而衆心疑惑。豈如今定經制令。君君臣臣。上下有差。父子六親。各得其宜。姦人亡所幾幸。羣衆信上而不疑惑。此業一定。世世常安。而後有所持循矣。若夫經制不定。是猶渡江河亡維楫。維所以繫舟楫。所以行舟中流而遇風波。船必覆矣。可爲長太息者此也。以上四維未備。秦俗未解。太息之二。夏爲天子。十有餘世。而殷受之。殷爲天子。二十餘世。而周受之。周爲天子。三十餘世。而秦受之。秦爲天子。二世而亡。人性不甚相遠也。何三代之君。有道之長。而秦無道之暴也。其故可知也。古之王者。太子乃生。固舉以禮。使士負之。有司齊肅。端冕見之南郊。見於天也。過闕則下。過廟則趨。孝子之道也。故自爲赤子。而教固已行矣。昔者成王幼。在襁褓。召公爲太保。周公爲太師。保保其身。體傳傳之德義。師道之教訓。如三公之職也。於是爲置三少。皆上大夫也。曰少保。少傅。少師。是與太子宴者也。故乃孩提有識。三公三少。固明孝仁禮義。以道習之。遂去邪人。不使見惡行。於是皆選天下之端士。孝弟博聞有道術者。以衛翼之。使與太子居處出入。故太子乃生而見正事。聞正言。行正道。左右前後皆正人也。夫習與正人居之。不能毋正。猶生長於齊。不能不齊言也。習與不正人居之。不能毋不正。猶生長於楚之地。不能不楚言也。故擇其所善。必先受業。乃得嘗之。擇其所樂。必先有習。乃得爲之。孔子曰。『少成若天性。習貫如自然。』及太子少長。知妃色。則入於學。學者所學之官也。學禮曰。帝入東學。上親而貴仁。則親疏有序。而恩相及矣。帝入南學。上齒而貴信。則長幼有差。而民不誣矣。帝入西學。上賢而貴德。則聖智在位。而功不遺矣。帝入北學。上貴而尊爵。則貴賤

有等。而下不隲矣。隲同踰越也。帝入太學。承師問道。退習而考於太傅。太傅罰其不則。而匡其不及。則德智長而治道得矣。此五學者。既成於上。則百姓黎民。化輯於下矣。及太子既冠成人。免於保傅之嚴。則有記過之史。徹膳之宰。進善之旌。誹謗之木。敢諫之鼓。警史誦詩。工誦箴諫。大夫進謀。士傳民語。習與智長。故切而不媿。化與心成。故中道若性。三代之禮。春朝朝日。秋暮夕月。所以明有敬也。春秋入學。坐國老執醬而親饋之。所以明有孝也。行以鸞和。步中采齊。趣中肆夏。所以明有度也。其於禽獸。見其生不見其死。聞其聲不食其肉。故遠庖廚。所以長恩且明有仁也。夫三代之所以長久者。以其輔翼太子有此具也。及秦而不然。其俗固非貴辭讓也。所上者告訐也。固非貴禮義也。所上者刑罰也。使趙高傳胡亥而教之獄。所習者非斬剗人。則夷人之三族也。故胡亥今日卽位。而明日射人。忠諫者謂之誹謗。深計者謂之妖言。其視殺人若艾草菅然。豈惟胡亥之性惡哉。彼其所以導之者。非其理故也。鄙諺曰。『不習爲吏。視己成事。』又曰。『前車覆後車誠。』夫三代之所以長久者。其已事可知也。然而不能從者。是不法聖智也。秦世之所以亟絕者。其轍迹可見也。然而不避。是後車又將覆也。夫存亡之變。治亂之機。其要在是矣。天下之命。縣於太子。太子之善。在於早諭教與選左右。夫心未濫而先諭教。則化易成也。開於道術智誼之指。則教之力也。若其服習積貫。則左右而已。夫胡粵之人。生而同聲。著欲不異。及其長而成俗。累數譯而不能相通。行有雖死而不相爲者。則教習然也。臣故曰。選左右早諭教最急。夫教得而左右正。則太子正矣。太子正而天下定矣。書曰。『一人有慶。兆民賴之。』此時務也。以上教太子一條。太息之三。却未揭明長太息字樣。凡人之智。能見已然。不能見將然。夫禮者禁於將然之前。而法者禁於已然之後。是故法之所用。易見。禮之所爲至難知也。若夫慶賞以勸善。刑罰以懲惡。先王執此之政。堅如金石。行此之令。信如四時。據此之公。無私如天地耳。豈顧不用哉。然而曰。禮云禮云者。貴絕惡於未萌。而起教於微眇。使民日遷善遠罪而不自知也。孔子曰。『聽訟。吾猶人也。必也使無訟乎。』爲人主計者。莫如先審取舍。取舍之極定於內。而安危之萌應於外矣。安者非一日而安也。危者非一日而危也。皆以積漸。然不可不察也。人主之所積在其取舍。以禮義治之者。積禮義。以刑罰治之者。積刑罰。刑罰積而民怨背。禮義積而民和親。故世主欲民之善同。而所以使民善者或異。或道之以德教。或馭之以法令。道之以德教者。德教治而民氣樂。馭之以法令者。法令極而民氣衰。哀樂之感。禍福之應也。

秦王之欲尊宗廟而安子孫。與湯武同。然而湯武廣大其德行。六七百歲而不失。秦王治天下。十餘歲則大敗。此無他故矣。湯武之定取舍審。而秦王之定取舍不審矣。夫天下大器也。今人之置器。置諸安處則安。置諸危處則危。天下之情與器無以異。在天子之所置之。湯武置天下於仁義禮樂而德澤洽。禽獸草木廣裕。德被蠻貊四夷。累子孫數十世。此天下所共聞也。秦王置天下於法令刑罰。德澤亡一有。而怨毒盈於世。下憎惡之如仇讎。禍幾及身。子孫誅絕。此天下所共見也。是非其明效大驗耶。以刑罰與禮教層層比較。勸漢帝宜學周。不宜學秦。人之言曰。聽言之道。必以其事觀之。則言者莫敢妄言。今或言禮誼之不如法令。教化之不如刑罰。人主胡不引殷周秦事以觀之也。以上定取舍重德教大息之四。亦未揭明長太息字。據人主之尊。譬如堂。羣臣如陛。衆庶如地。故陸九級上。級等也。廉遠地則堂高。廉側隅也。陸亡級。廉近地則堂卑。高者難攀。卑者易陵。理勢然也。故古者聖王制爲等列。內有公卿大夫士。外有公侯伯子男。然後有官師小吏。延及庶人。等級分明。而天子加焉。故其尊不可及也。里諺曰。『欲投鼠而忌器。』此善喻也。鼠近於器。尙憚不投。恐傷其器。況於貴臣之近主乎。廉恥節禮以治君子。故有賜死而亡戮辱。是以黥劓之辜不及大夫。以其離主上不遠也。禮不敢齒君之路馬。蹴其芻者有罰。見君之几杖則起。遭君之乘車則下。入正門則趨。君之寵臣。雖或有過。刑戮之辜。不如其身者。尊君之故也。此所以爲主上豫遠不敬也。所以禮貌大臣而厲其節也。今自王侯三公之貴。皆天子之所政容而禮之也。古天子之所謂伯父伯舅也。而今與衆庶同。黥劓剕答。僞棄市之法。偶與罵同。然則堂不亡陸乎。被戮辱者不泰迫乎。泰與太同。廉恥不行。大臣無乃握重權大官而有徒隸亡恥之心乎。夫望夷之事。二世見當以重法者。投鼠而忌器之習也。臣聞之。履雖鮮。不加於枕。冠雖敝。不以苴履。夫嘗已在貴寵之位。天子政容而禮之矣。吏民常俯伏以敬畏之矣。今而有過。帝令廢之可也。退之可也。賜之死可也。滅之可也。若夫束縛之。係縲之。縲謂以長繩係之也。輸之司寇。編之徒官。司寇小吏。詈罵而榜笞之。殆非所以令衆庶見也。夫卑賤者。習知尊貴者之一旦。吾亦乃可以如此也。非所以習天下也。非尊尊貴貴之化也。夫天子之所嘗敬。衆庶之所嘗寵。死而死耳。賤人安宜得如此而頓辱之哉。豫讓事中之君。智伯伐而滅之。移事智伯。及趙滅智伯。豫讓斃面吞炭。必報襄子。五起而不中。人問豫子。豫子曰。『中行衆人畜我。我故衆人事之。智伯國士遇我。我故國士報之。』故此一豫讓也。反君事讎。行若

狗彘已而抗節。致中行出平列士。人主使然也。故主上遇其大臣如遇犬馬。彼將犬馬自爲也。如遇官徒。彼將官徒自爲也。頑頓亡恥。莫胡結反詬亡節。廉恥不立。且不自好。苟若而可。故見利則逝。見便則奪。主上有敗。則因而挺之矣。主上有患。則吾苟免而已。立而觀之耳。有便吾身者。則欺賣而利之耳。人主將何便於此。羣下至衆。而主上至少也。所託材器職業者。粹於羣下也。俱亡恥。俱苟安。則主上最病。故古者禮不及庶人。刑不至大夫。所以厲寵臣之節也。古者大臣有坐不廉而廢者。不謂不廉。曰簞簋不飾。坐污穢淫亂。男女不別者。不曰污穢。曰帷薄不修。坐罷軟不勝任者。不曰罷軟。曰下官不職。故貴大臣定有其罪矣。猶未斥然。正以諱之也。尙遷就而爲之諱也。是時丞相繆侯周勃免就國。人有告勃謀反者。逮繫長安獄。故賈生以此譏之。故其在大體大何之域者。聞譴何。則白冠繫纆。盤水加劍。造請室而請罪耳。上不執縛係引而行也。其中有中罪者。聞命而自弛。上不使人鑿而加也。其有大罪者。聞命則北面再拜。跪而自裁。上不使摔抑而刑之也。曰。子大夫自有過耳。吾遇子有禮矣。遇之有禮。故羣臣自憲。舉以廉恥。故人矜節行。上設廉恥禮義。以遇其臣。而臣不以節行報其上者。則非人類也。故化成俗定。則爲人臣者。主耳忘身。國耳忘家。公耳忘私。利不苟就。害不苟去。唯義所在。上之化也。故父兄之臣。誠死宗廟。法度之臣。誠死社稷。輔義之臣。誠死君上。守圉扞敵之臣。誠死城郭封疆。故曰。聖人有金城者。比物此志也。彼且爲我死。故吾得與之俱生。彼且爲我亡。故吾得與之俱存。夫將爲我危。故吾得與之俱安。夫猶彼也。左傳則夫致死焉。亦謂彼致死也。願行而忘利。守節而仗義。故可以託不御之權。不御之權。謂全授以權柄。不復制御之也。可以寄六尺之孤。此厲廉恥行禮誼之所致也。主上何喪焉。此之不爲。而願彼之久行。故曰。可爲長太息者此也。以上不挫辱大臣太息之五

奏疏以漢人爲極軌。而氣勢最盛。事理最顯者。尤莫善於治安策。故千古奏議。推此篇爲極唱。可流涕者少一條。可長太息者少一條。漢書所載者。殆尙非賈子全文。賈生爲此疏時。當在文帝七年。僅三十歲耳。於三代及秦治術。無不貫徹。漢家中外政事。無不通曉。蓋有天授。非學所能幾耳。

奏議以明白顯豁。人人易曉爲要。後世讀此文者。疑其稱名甚古。其用字甚雅。若倉猝不能解者。不知在漢時乃人人共稱之名。人人慣用之字。卽人人所能解也。卽以稱名而論。其稱淮南濟北。如今日稱端華肅順也。其

稱匈奴。如今日稱英吉利也。其稱淮陰侯黥布彭越韓信張敖盧縮陳稀六七公。猶今日稱洪秀全李秀成石達開張洛刑苗沛霖苗匪回匪也。其稱樊鄴絳灌。猶今日稱江塔羅李也。其稱郡國。猶今日府廳也。其稱傅相丞尉。猶今日稱司道守令也。又以用字而論。其用厝字。猶今日稱用置字也。其用庫字。猶今日用平字也。其用慮字。猶今日用大字也。其用執字。猶今日用勢字也。其用亡字。猶今日用無字也。其用重字。猶今日用但字也。其用幾幸。猶今日用冀倖也。其用險字。猶今日用踰字也。其用懸字。猶今日用懸字也。由此等以類推。則當日通稱之名。通用之字。斷無不共喻者。然則居今日而講求奏章。亦用今日通稱之名。通用之字可矣。

劉向極諫外家封事

臣聞人君莫不欲安。然而常危。莫不欲存。然而常亡。失御臣之術也。夫大臣操權柄持國政。未有不爲害者也。昔晉有六卿。齊有田崔。衛有孫寧。魯有季孟。常掌國事。世執朝柄。終後田氏取齊。六卿分晉。崔杼弑其君光。孫林父甯殖出其君衎。弑其君剽。季氏八佾舞於庭。三家者以雍徹。並專國政。卒逐昭公。周大夫尹氏筮朝事。濁亂王室。子朝子猛更立。連年乃定。故經曰。『王室亂。』又曰。『尹氏弑王子克。』甚之也。春秋舉成敗錄禍福如此類。甚衆。皆陰盛而陽微。下失臣道之所致也。故書曰。『臣之有作威作福。害於而家。凶於而國。』孔子曰。『祿去公室。政逮大夫。危亡之兆。』秦昭王舅穰侯及涇陽葉陽君專國擅勢。上假太后之威。三人者。權重於昭王。家富於秦國。國甚危殆。賴寤范雎之言。而秦復存。二世委任趙高。專權自恣。壅蔽大臣。終有閭樂望夷之禍。秦遂以亡。近事不遠。即漢所代也。漢興諸呂無道。擅用尊王。呂產呂祿。席太后之寵。據將相之位。兼南北軍之衆。擁梁趙王之尊。驕盈無厭。欲危劉氏。賴忠正大臣絳侯朱虛侯等竭誠盡節。以誅滅之。然後劉氏復安。以上歷數權臣害國而以呂氏之亂引出王氏。今王氏一姓。乘朱輪華轂者二十三人。青紫貂蟬。充盈幄內。魚鱗左右。大將軍乘事用權。五侯驕奢僭盛。並作威福。擊斷自恣。行奸而寄治。奸亂也。寄亦託也。行本奸亂。而託爲澄治。身私而託公。依東宮之尊。假甥舅之親。以爲威重。尚書九卿。州牧郡守。皆出其門。筮執樞機。朋黨比周。稱譽者登進。忤恨者誅傷。游談者助之說。執政者爲之言。排擯宗室。孤弱公族。其有智能者。尤非毀而不進。遠絕宗室之任。不令得給事朝省。恐其

與己分權。數稱燕王蓋主。以疑上心。避諱呂霍而不肯稱。內有管蔡之萌。外假周公之論。兄弟據重。宗族警互。歷上古至秦漢。外戚僭貴。未有如王氏者也。雖周皇父。秦穰侯。漢武安。呂霍上官之屬。皆不及也。以上極言王氏僭盛物盛必有非常之變。先見爲其人徵象。孝昭帝時。冠石立於泰山。仆柳起於上林。而孝宣帝卽位。今王氏先祖墳墓在濟南者。其梓柱生枝葉。扶疏上出屋。根垂地中。垂當作番。番與插同。雖立石起柳。無以過此之明也。指明梓柱之徵。果爲王氏篡漢之兆。向之忠直出於至誠。故其道可以前知。讀至王劉不並立等語。至今如觀其鼎泣之狀。如聞其嗚咽之聲。事勢不兩大。王氏與劉氏亦且不並立。如下有泰山之安。則上有累卵之危。陛下爲人子孫。守持宗廟。而令國祚移於外親。降爲卑隸。縱不爲身。奈宗廟何。婦人內夫家。外父母家。此亦非皇太后之福也。以上言王氏安則劉氏危。孝宣皇帝不與舅平昌樂昌侯權。所以全安之也。夫明者起福於無形。銷患於未然。宜發明詔。吐德音。援近宗室。親而納信。黜遠外戚。毋授以政。皆罷令就第。以則效先帝之所行。厚安外戚。全其宗族。誠東宮之意。外家之福也。王氏永存。保其爵祿。劉氏常安。不失社稷。所以褒睦外內之姓。子子孫孫。無疆之計也。如不行此策。田氏復見於今。六卿必起於漢。爲後嗣憂。昭昭甚明。不可不深慮。易曰。『君不密則失臣。臣不密則失身。幾事不密則害成。』唯陛下深留聖思。審固幾密。覽往事之戒。以折中取信。居萬安之寶。用保宗廟。久承皇太后。天下幸甚。

秦疏惟西漢之文。冠絕古今。西漢前推賈勗。後推匡劉。賈勗以才勝。匡劉以學勝。此人人共知者也。余尤好劉子政忠愛之忱。若有所甚。不得已於中者。足以貫三光而通神明。是故識精而不炫。氣盛而不矜。料王氏之必篡。思有以早爲之所。而又無誅滅王氏之意。宅心平實。指事確鑿。皆本忠愛二字。彌綸周浹。而出吾輩欲師其文章。先師其心術。根本固則枝葉自茂矣。

劉向論起昌陵疏

臣聞易曰。『安不忘危。存不忘亡。』是以身安而國家可保也。故聖賢之君。博觀終始。窮極事情。而是非分明。王者必通三統。明天命所授者博。非獨一姓也。孔子論詩。至於『殷士膚敏。裸將于京。』喟然嘆曰。『大哉天命。善

不可不傳於子孫。是以富貴無常。不如是。則王公其何以戒慎。民萌何以勸勉。『萌與毗同。力田之民曰毗。蓋傷微子之事周而痛殷之亡也。雖有堯舜之聖。不能化丹朱之子。雖有禹湯之德。不能順末孫之桀紂。自古及今。未有不亡之國也。昔高皇帝既滅秦將都雒陽。感悟劉敬之言。自以德不及周。而賢於秦。遂徙都關中。依周之德。因秦之阻。世之長短。以德爲效。故常戰慄不敢諱亡。孔子所謂富貴無常。蓋謂此也。以上言自古無不亡之國。宜薄葬以免後世之發掘。孝文皇帝居霸陵。北臨廁。意悽愴悲懷。顧謂羣臣曰。『嗟乎。以北山石爲槨。用紵絮斲陳漆其間。豈可動哉。』陳施也。以石爲槨。又以紵絮斲陳漆。而施漆於其間。猶吾鄉之以薺灰和漆封棺之日也。張釋之進曰。『使其中有可欲。雖錮南山猶有隙。使其中無可欲。雖無石槨。又何戚焉。』夫死者無終極。而國家有廢興。故釋之之言爲無窮計也。孝文寤焉。遂薄葬不起山墳。以上因國家有廢興。引出孝文薄葬之賢。易曰。『古之葬者。厚衣之以薪。藏之中野。不封不樹。後世聖人。易之以棺槨。棺槨之作。自黃帝始。』黃帝葬於橋山。堯葬濟陰。邱隴皆小。葬具甚微。舜葬蒼梧。二妃不從。禹葬會稽。不改其列。殷湯無葬處。文武周公葬於畢。秦穆公葬於雍。橐泉宮。祈年館下。樽里中葬於武庫。皆無邱隴之處。此聖帝明王。賢君智士。遠覽獨慮。無窮之計也。其賢臣孝子。亦承命順意。而薄葬之。此誠奉安君父。忠孝之至也。夫周公。武王弟也。葬兄甚微。孔子葬母於防。稱古墓而不墳。曰丘。東西南北之人也。不可不識也。爲四尺墳。遇雨而崩。弟子修之。以告孔子。孔子流涕曰。『吾聞之古者不修墓。』蓋非之也。延陵季子適齊而反。其子死。葬於贏博之間。穿不及泉。斂以時服。封墳掩坎。其高可隱。其高可隱。謂人隔墳而立。可隱肘也。不能遮蔽全身。不甚高耳。而號曰。骨肉歸復於土。命也。魂氣則無不之也。夫贏博去吳千有餘里。季子不歸葬。孔子往觀曰。『延陵季子於禮合矣。』故仲尼孝子。而延陵慈父。舜禹忠臣。周公弟弟。其葬君親骨肉。皆微薄矣。非苟爲儉。誠便於禮也。宋桓司馬爲石槨。仲尼曰。『不如速朽。』秦相呂不韋集知略之士。而造春秋。亦言薄葬之義。皆明於事情者也。以上雜引聖哲薄葬之事。逮至吳王闔閭。違禮厚葬。十有餘年。越人發之。及秦惠文武昭嚴襄五王。皆大作邱隴。多其瘞藏。咸盡發掘暴露。甚足悲也。秦始皇帝葬於驪山之阿。下錮三泉。上崇山墳。其高五十餘丈。周回五里有餘。石槨爲游館。游館以石爲離宮。別館於地下。人膏爲燈燭。水銀爲江海。黃金爲鳧雁。珍寶之藏。機械之變。棺槨之麗。宮館之盛。不可勝原。又多殺宮人。生理工匠。計以萬數。天

苦其役而反之。驪山之作未成。而周章百萬之師。至其下矣。項籍燔其宮室營宇。往者咸見發掘。其後牧兒亡羊。羊入其鑿。牧者持火照求羊。失火燒其藏櫛。自古及今。葬未有盛如始皇者也。數年之間。外被項籍之災。內罹牧豎之禍。豈不哀哉。是故德彌厚者葬彌薄。知愈深者葬愈微。無德寡知。其葬愈厚。邱隴彌高。宮廟甚麗。發掘必速。由是觀之。明暗之效。葬之吉凶。昭然可見矣。以上歷言厚葬之禍。而合前段薄葬總一收束。周德既衰。而奢侈。宣王賢而中興。更爲儉宮室。小寢廟。詩人笑之。斯干之詩是也。上章道宮室之如制。下章言子孫之衆多也。及魯嚴公刻飾宗廟。嚴公卽魯莊公。莊爲漢帝之諱。故班氏漢書避之多築臺囿。後嗣再絕。春秋刺焉。周宣如彼。而昌魯秦如此。而絕。是則奢侈之得失也。以上泛言奢侈之得失。陛下卽位。躬親節儉。始營初陵。其制約小。天下莫不稱賢明。及徙昌陵。增埤爲高。埤與卑同。積土爲山。發民墳墓。積以萬數。營起邑居。期日迫卒。卒與葬同。功費大萬百餘。死者恨於下。生者愁於上。怨氣感動陰陽。因之以饑饉。物故流離。以十萬數。臣甚懼焉。憎與閔同。以死者爲有知。發人之墓。其害多矣。若其無知。又焉用大。謀之賢知。則不說。以示衆庶。則苦之。苟以說愚夫淫侈之人。又何爲哉。以上言昌陵功費太鉅。陛下慈仁篤美甚厚。聰明疏達蓋世。宜宏漢家之德。崇劉氏之美。光昭五帝三王。而顧與暴秦亂君。競爲奢侈。比方邱隴。說愚夫之目。隆一時之觀。違賢知之心。亡萬世之安。臣竊爲陛下羞之。唯陛下上覽明聖。黃帝堯舜禹湯文武周公仲尼之制。下觀賢知。穆公延陵樽里張釋之之意。孝文皇帝去墳薄葬。以儉安神。可以爲則。秦昭始皇增山厚藏。以侈生害。足以爲戒。初陵之撫。宜從公卿大臣之議。以息衆庶。首段言自古無不亡之國。近世奏議。不敢如此立言。至於結構整齊。詞旨深厚。皆漢文中之最便揣摩者。沅弟性情極厚。故見余之文氣篤厚。則嗜之如饑渴。然余謂欲求文氣之厚。總須讀漢人奏議二三十首。醞釀日久。則不期厚而自厚矣。

劉向論甘延壽疏

漢元帝時。陳湯甘延壽滅郅支單于。將論功封爵。匡衡石顯以爲湯與延壽。擅與師矯制。不宜加封。劉向上此疏爭之。

郅支單于囚殺使者吏士以百數事。暴揚外國。傷威毀重。羣臣皆閔焉。陛下赫然欲誅之意。未嘗有忘西域。都護延壽副校尉湯承聖旨。倚神靈。總百蠻之軍。搃城郭之兵。搃猶持之也。城郭。西域有城郭之國也。出百死。入絕域。遂蹈康居。康居初臣服匈奴之國。而後構怨者屠五重城。舉欽侯之旗。欽侯匈奴之貴將。斬郅支之首。縣旌萬里之外。揚威昆山之西。掃谷吉之恥。谷吉漢使至匈奴被殺者。立昭明之功。萬夷懼服。莫不懼震。呼韓邪單于與郅支已誅。呼韓邪單于與郅支單于相仇。而先降漢者。且喜且懼。鄉風慕義。稽首來賓。願守北藩。累世稱臣。立千載之功。建萬世之安。羣臣之勳莫大焉。昔周大夫方叔吉甫爲宣王誅獫狁。而百蠻從。其詩曰。『嘽嘽焯焯。如霆如雷。顯允方叔。征伐獫狁。蠻荆來威。』易曰。『有嘉折首。獲匪其醜。』言笑誅首惡之人。而諸不順者皆來從也。今延壽湯所誅震。雖易之折首。詩之雷霆。不能及也。論大功者。不錄小過。舉大笑者。不疵細瑕。司馬法曰。『軍賞不踰月。欲民速得爲善之利也。』蓋急武功。重用人也。吉甫之歸。周厚賜之。其詩曰。『吉甫宴喜。既多受祉。來歸自鎬。我行永久。』千里之鎬。猶以爲遠。况萬里之外。其勤至矣。延壽湯既未獲受祉之報。反屈捐命之功。久挫於刀筆之前。捐命謂捐棄軀命。猶今言拚命也。刀筆謂文吏也。非所以勸有德。厲戎士也。昔齊桓前有尊周之功。後有滅項之罪。齊桓公於僖十七年滅項。君子以功覆過。而爲之諱行事。行事謂近事。猶今稱曰近日成案也。貳師將軍李廣利捐五萬之師。糜億萬之費。經四年之勞。而廬獲駿馬三十匹。廬與僅同。雖斬宛王毋鼓之首。猶不足以復費。復費謂償其所費也。其私罪惡甚多。孝武以爲萬里征伐。不錄其過。遂封拜兩侯三卿。二千石。百有餘人。今康居國強於大宛。郅支之號重於宛王。殺使者罪甚於留馬。而延壽湯不煩漢士。不費斗糧。比於貳師。功德百之。且常惠隨欲擊之烏孫。常惠大破匈奴。實用烏孫。全國五萬之兵。常惠不憚隨護之耳。鄭吉迎自來之日。逐日逐王降漢。鄭吉迎之。猶皆列土受爵。故言威武勤勞。則大於方叔吉甫。列功覆過。則優於齊桓貳師。進事之功。則高於安遠長羅。常惠封長羅侯。鄭吉封安遠侯。而大功未著。小惡數布。臣竊痛之。宜以時解縣通籍。縣罪未竟也。猶今言案未了結也。解縣。速結案而諱封也。除過勿治。尊寵爵位。以勸有功。

匈奴爲漢患百餘年。武帝用衛霍諸大將。殫竭天下財貨。與師數十年。卒不能大創之。元帝之世。陳湯甘延壽矯詔發西域諸國之兵。禽滅郅支單于。由是漢世迄無邊患。實千古奇功。乃爲匡衡石顯所沮。久不褒封。石顯

宦官佞幸。本不足責。匡衡以宰相名儒。而亦嫉妬若此。殊不可解。厥後陳湯屢次獲罪。谷永耿育上疏救之。漢書并錄三疏於湯傳中。百世而下。讀者猶爲嗚咽感歎。茲并錄之。以備循省。俾知有功之臣。必戰兢惕厲。以立於無過之地。而儒生處具瞻之地。尤不可不力持大體。鏘除媚嫉私衷。以匡衡爲鑒戒也。

谷永救陳湯疏

自劉向上疏後。延壽封蒙承侯。湯封關內侯。至成帝時。匡衡復奏湯前收康居財物。坐免官。又湯上書。言康居侍子非王子也。按驗實爲王子。湯下獄當死。谷永上此疏救之。

臣聞楚有子玉得臣。文公爲之仄席而坐。趙有廉頗馬服。馬服君趙將趙奢也。強秦不敢窺兵井陘。近漢有郅都魏尚。匈奴不敢南鄉沙漠。由是言之。戰克之將。國之爪牙。不可不重也。蓋君子聞鼓鼙之聲。則思將率之臣。竊見關內侯陳湯。前使副西域都護。忿郅支之無道。閔王誅之不加。策慮愒億。懼億憤怒之貌。義勇奮發。卒與師奔遊。橫厲烏孫。渡水日厲。橫厲猶橫行也。踰集都賴。都賴郅支城外之水名也。屠三重城。斬郅支首。報十年之遠誅。雪邊吏之宿恥。威震百蠻。武暢西海。漢元以來。征伐方外之將。未嘗有也。今湯坐言事非是。幽囚久繫。歷時不決。執憲之吏。欲致之大辟。昔白起爲秦將。南拔郢都。北阬趙括。以纖介之過。賜死杜郵。秦民憐之。莫不隕涕。今湯親秉鉞。席捲喋血。萬里之外。喋血菑踐。血謂足踏血而行也。其字應作傑。不從口。薦功祖廟。告類上帝。介冑之士。靡不慕義。以言事爲罪。無赫赫之惡。周書曰。『記人之功。忘人之過。宜爲君者也。』夫犬馬有勞於人。尙加帷蓋之報。况國之功臣者哉。竊恐陛下忽於鼓鼙之聲。不察周書之意。而忘帷蓋之施。庸臣遇湯。遇待也。謂以庸臣之禮待。遇湯也。卒從吏議。使百姓介然有秦民之恨。介然猶耿耿。非所以厲死難之臣也。

耿育訟陳湯書

前谷永上書。湯得免罪。復起爲從事中郎。後又得罪。謫徙敦煌。耿育上此疏訟之。

延壽湯爲聖漢揚鉤深致遠之威。雪國家累年之恥。討絕域不羈之君。絕域之君。謂郅支單于也。繫萬里難制之。

虜豈有比哉。先帝嘉之，仍下明詔，仍下謂頻下詔也。宣著其功，改年垂歷，傳之無窮。應是南郡獻白虎，邊陲無警備。會先帝寢疾，然猶垂意不忘。數使尙書賈問丞相，趣立其功。獨丞相匡衡排而不予，封延壽湯數百戶。此功臣戰士所以失望也。孝成皇帝承建業之基，乘征伐之威，兵革不動，國家無事。而大臣傾邪，讒佞在朝，曾不深惟本末之難，以防未然之戒。欲專主威，排妬有功，使湯塊然被冤，拘囚不能自明。卒以無罪，老棄敦煌。正當西域通道，令威名折衝之臣。古人以衝車攻城，故能禦侮者謂之折衝。旋踵及身，復爲郅支遺虜所笑，誠可悲也。至今奉使外蠻者，未嘗不陳郅支之誅，以揚漢國之盛。夫援人之功，以懼敵，棄人之身，以快讒，豈不痛哉。且安不忘危，盛必慮衰。今國家素無文帝累年節儉富饒之畜，又無武帝薦延臯俊禽敵之臣。薦延謂臣下薦達而帝延納之也。臯俊謂臯雄俊傑之材，獨有一陳湯耳。假使異世不及陛下，尙望國家追錄其功，封表其墓，以勸後進也。湯幸得身當聖世，功曾未久，反聽邪臣鞭逐斥逐，使亡逃分竄，死無處所，遠覽之士莫不計度，以爲湯功累世不可及，而湯過人情所有，湯尙如此，雖復破絕筋骨，暴露形骸，猶復制於脣舌，爲嫉妬之臣所繫虜耳。此臣所以爲國家尤戚戚也。

劉安諫伐閩越書

漢武帝初，閩越發兵，擊南越。南越上書告急，帝遣兩將軍將兵誅閩越。淮南王劉安上書諫之。

陛下臨天下，布德施惠，緩刑罰，薄賦斂，哀鰥寡，恤孤獨，養耆老，振匱乏，盛德上隆，和澤下洽。近者親附，遠者懷德，天下攝然，人安其生。攝者收斂之意，攝然猶安然也。自以沒身不見兵革，今聞有司舉兵，將以誅越。臣安竊爲陛下重之，越方外之地，鬻髮文身之民也。鬻古鬻字，不可以冠帶之國法度理也。自三代之盛，胡越不與受正朔，非強弗能服，威弗能制也。以爲不居之地，不收之民，不足以煩中國也。故古者封內甸服，封外侯服，侯衛賓服，蠻夷要服，戎狄荒服，遠近異勢也。自漢初定以來，七十二年，吳越人相攻擊者，不可勝數。然天子未嘗舉兵而入其地也。臣聞越非有城郭邑里也，處谿谷之間，篁竹之中，習於水門，便於用舟，地深昧而多水險，中國之人不知其勢阻，而入其地，雖百不當其一，得其地不可郡縣也，攻之不可暴取也。以地圖察其山川要塞，相去不過寸數，而問

獨數百千里。險阻林叢，弗能盡著。視之若易，行之實艱。天下賴宗廟之靈，方內大甯。戴白之老，不見兵革。民得夫婦相守，父子相保。陛下之德也。越人名爲藩臣，貢酎之奉，不輸大內。一卒之用，不給上事。自相攻擊，而陛下發兵救之，是反以中國而勞蠻夷也。且越人愚戇輕薄，負約反覆。其不用天子之法度，非一日之積也。一不奉詔，舉兵誅之。臣恐後兵革無時得息也。以上言閩越不宜用兵間者。數年歲比不登，民待賣爵鬻子，以接衣食。賴陛下德澤賑救之，得毋轉死溝壑。四年不登，五年復蝗，民生未復。今發兵行數千里，資衣糧入越地，輿轎而隄領，領卽嶺字。自貴州廣西廣東福建浙東皆共此嶺。古嶺內爲中國，嶺外爲百越。今之嶺內爲湖南江西浙西三省，嶺外則黔廣閩浙五省。扞舟而入水，行數百千里，夾以深林叢竹，水道上下擊石，林中多蝮蛇猛獸。夏月暑時，嘔泄霍亂之病，相隨屬也。曾未施兵接刃，死傷者必衆矣。前時南海王反，陛下先臣使將軍間忌將兵擊之。先臣淮南厲王長也，安之父，故稱先臣。間忌人姓名也。以其軍降，處之上淦。後復反，會天暑多雨，樓船卒水居擊檣，未戰而病死者過半。親老涕泣，孤子號號，破家散業，迎尸千里之外，裹骸骨而歸。悲哀之氣，數年不息。長老至今以爲記。曾未入其地而禍已至此矣。臣聞軍旅之後，必有凶年。言民各以其愁苦之氣，薄陰陽之和，感天地之精，而災氣爲之生也。陛下德配天地，明象日月，恩至禽獸，澤及草木。一人有饑寒，不終其天年而死者，爲之悽愴於心。今方內無狗吠之警，而使陛下甲卒死亡，暴露中原，露漬山谷，暴露謂骨露積謂血也。邊境之民，爲之早閉晏開，鼂不及夕。鼂音朝。臣安竊爲陛下重之。以上言軍士隄嶺死亡必多，不習南方地形者。多以越爲人衆兵強，能難邊城。能難邊城謂能爲難也。淮南全盛之時，多爲邊吏。臣竊聞之，與中國異。限以山高，人迹所絕，車道不通。天地所以隔內外也。其入中國必下領水。今湖南之柳州河，江西之贛州河，皆領水也。此領水當指建昌河。廣信河言之。故下文言至餘干界中領水之山峭峻，漂石破舟，不可以大船載食糧下也。越人欲爲變，必先田餘干界中，積食糧。乃入伐材治船。邊城守候誠謹，越人有入伐材者，輒收捕焚其積聚。雖百越，奈邊城何。且越人絛力薄材，不能陸戰。又無車騎弓弩之用。然而不可入者，以保地險，而中國之人，不能其水土也。不能卽不耐也。猶今言不服水土。臣聞越甲卒不下數十萬，所以入之，五倍乃足。輓車奉饗者，不在其中。南方暑濕，近夏瘴熱，暴露水居，蝮蛇蠱生。蒼音壘，毒也。疾癘多作，兵未血刃，而病死者什二三。雖舉越國而虜之，不足以償所亡。臣聞道路言，閩越王弟甲弒而

殺之。甲以誅死。其罪未有所屬。陛下若欲來內。來同軌。內同軌。謂招徠收納之也。處之中國。使重臣臨存。施德垂賞。以招致之。此必攜幼扶老。以歸聖德。若陛下無所用之。則繼其絕世。存其亡國。建其王侯。以爲畜越。此必委質爲藩臣。世共貢職。陛下以方寸之印。丈二之組。鎮撫方外。不勞一卒。不頓一戟。而威德並行。以上言越人易防且可就撫。今以兵入其地。此必震恐。以有司爲欲屠滅之也。必雉兔。逃入山林險阻。雉兔。逃謂如雉兔之驚而逃也。背而逃之。則復相羣聚。留而守之。歷歲經年。則士卒罷勦。食糧乏絕。男子不得耕稼。樹種。婦人不得紡績。織紵。丁壯從軍。老弱轉餉。居者無食。行者無糧。民苦兵事。逃亡者必衆。隨而誅之。不可勝盡。盜賊必起。臣聞長老言。秦之時。嘗使尉屠睢擊越。尉官也。屠睢姓名也。又使監祿鑿渠通道。監官也。祿名也。越人逃入深山。山林叢。不可得攻。留軍屯守空地。曠日持久。士卒勞倦。越乃出擊之。秦兵大破。乃發適戍以備之。當此之時。內外騷動。百姓靡敝。行者不還。往者莫反。皆不聊生。亡逃相從。羣爲盜賊。於是山東之難始興。山東之難。謂秦二世時陳涉等作難。皆在太行山以東也。此老子所謂「師之所處。荆棘生之」者也。兵者凶事。一方有急。四面皆從。臣恐變故之生。奸邪之作。由此始也。周易曰。「高宗伐鬼方。三年而克之。」鬼方小蠻夷。高宗殷之盛天子也。以盛天子伐小蠻夷。三年而後克。言用兵之不可不重也。臣聞天子之兵。有征而無戰。言莫敢校也。如使越人蒙死徼倖。蒙死。猶冒死也。徵幸。越人自知不能勝中國而徵求幸勝也。以逆執事之顏行。文穎曰。顏行猶雁行。鼯案。信陵君書請爲天下雁行頓刃。雁行者。相連而進。頓刃。乃是居前當鋒刃也。顏行者。頓者。頓。頓居前。行者若頓然。與雁行義異。廝與之卒。有一不備而歸者。雖得越王之首。臣猶竊爲大漢羞之。以上言伐越之害。陛下以四海爲境。九州爲家。八數爲圉。江漢爲池。生民之屬。皆爲臣妾。人徒之衆。足以奉千官之共。租稅之收。足以給乘輿之御。玩心神明。秉執聖道。負黼依憑玉几。南面而聽斷。號令天下。四海之內。莫不嚮應。陛下垂德惠以覆露之。使元元之民。安生樂業。則澤被萬世。傳之子孫。施之無窮。天下之安。猶泰山而四維之也。夷狄之地。何足以爲一日之間。而煩汗馬之勞乎。詩云。「王猶允塞。徐方旣來。」言王道甚大。而遠方懷之也。臣聞之。農夫勞而君子養焉。愚者言而智者擇焉。臣安幸得爲陛下守藩。以身爲障蔽。人臣之任也。邊境有警。愛身之死而不畢其愚。非忠臣也。臣安竊恐將吏之以十萬之師。爲一使之任也。一使人便可鎮撫閩越。何必以十萬之師。僅代一使之任乎。以上言以僞懷遠。不必用兵。

淮南王安收養文士。著淮南子。亦猶呂不韋好客養士。著呂覽一書也。此篇蓋亦八公輩所爲。陳義甚高。摛辭居要。無淮南子冗蔓之弊。而精警處相似。班史以載入嚴助傳中。與主父偃徐樂嚴安賈捐之諸篇并列。以見務廣窮兵之害。均爲有國者所當深鑒。後世如蘇子瞻代張方平諫用兵書。亦可與此數篇方軌並駕。

賈捐之罷珠厓對

賈捐之字君房。賈誼之曾孫也。武帝時立儋耳珠厓郡。其後二十餘年。反者六次。昭帝五年。罷儋耳郡。并屬珠厓。至宣帝元帝時。珠厓反者又三次。帝欲大發軍討之。捐之以爲不當。帝使王商詰問之。捐之以書對。

臣幸得遭明盛之朝。蒙危言之策。無忌諱之患。敢昧死竭卷卷。卷卷猶拳拳。亦作惓惓。臣聞堯舜。聖之盛也。禹入聖域而不優。故孔子稱堯曰大哉。韶曰盡善。禹曰無間。以三代之德。地方不過數千里。西被流沙。東漸於海。朔南聲聲。教訖於四海。欲與聲教則治之。不欲與者不強治也。故君臣歌德。含氣之物。各得其宜。武丁成王。殷周之大仁也。然地東不過江黃。西不過氐羌。南不過蠻荆。北不過朔方。是以頌聲並作。視聽之類。咸樂其生。越裳氏重九譯而獻。此非兵革之所能致。及其衰也。南征不還。齊桓救其難。孔子定其文。以上言唐虞三代不務地廣。以至平秦。與兵遠攻。貪外虛內。務欲廣地。不慮其害。然地南不過閩越。北不過太原。而天下潰畔。禍卒在於二世之末。長城之歌。至今未絕。以上秦務廣地而速亡。賴聖漢初興。爲百姓請命。平定天下。至孝文皇帝。閔中國未安。偃武行文。則斷獄數百。民賦四十。丁男三年而一事。本一年供役一次。因天下民多。故三年僅供一役也。事卽役也。時有獻千里馬者。詔曰。『鸞旗在前。屬車在後。吉行日五十里。師行日三十里。朕乘千里之馬。獨先安之。』於是還馬與道里費。而下詔曰。『朕不受獻也。其令四方毋求來獻。』當此之時。逸遊之樂絕。奇麗之賂塞。鄭衛之倡。微矣。夫後宮盛色。則賢者隱處。佞人用事。則諍臣杜口。而文帝不行。故諍爲孝文。廟稱太宗。以上文帝與民休息。不務遠略。至孝武皇帝。元狩六年。太倉之粟紅腐而不可食。都內之錢貫朽而不可校。乃探平城之事。平成高祖被圍之地。錄冒頓以來。數爲邊害。冒頓在漢初最強。武帝欲報祖宗之仇。故興兵以伐匈奴。又兼用兵於西南北三。地籍兵厲馬。因富民以攘服之。西連諸國。至於安息。東過碣石。以玄菟樂浪爲郡。北卻匈奴。萬里更起營塞。制南

海。以爲入郡。則天下斷獄萬數。民賦數百。造鹽鐵酒榷之利。以佐用度。猶不能足。當此之時。寇賊並起。軍旅數發。父戰死於前。子鬥傷於後。女子乘亭鄣。亭鄣邊塞屯宿之所。猶今城上之更柵也。孤兒號於道。古文中五字句極少。此連用四句。聲調悲壯。可歌可泣。老母寡婦。飲泣巷哭。遙設虛祭。想魂乎萬里之外。淮南王盜寫虎符。陰聘名士。關東公孫勇等。詐爲使者。是皆廓地泰大。征伐不休之故也。以上武帝好用兵天下騷然。今天下獨有關東。關東大者。獨有齊楚。民衆久困。連年流離。離其城郭。相枕席於道路。人情莫親父母。莫樂夫婦。至嫁妻賣子。法不能禁。義不能止。此社稷之變也。今陛下不忍悄悄之忿。欲驅士衆。擠之大海之中。珠厓隔海。卽今之瓊州也。故曰擠之大海之中。快心幽冥之地。非所以救助饑饉。保全元元也。詩云。『蠢爾蠻荆。大邦爲讎。』言聖人起則後服。中國衰則先畔。動爲國家難。自古而患之久矣。何況乃復其南方萬里之蠻乎。駱越之人。父子同川而浴。相習以鼻飲。與禽獸無異。本不足郡縣置也。顓顓獨居一海之中。顓顓與專專同猶日區區也。霧露氣濕。多毒草蟲蛇。水土之害。人未見虜。戰士自死。又非獨珠厓有珠犀瑋瑁也。棄之不足惜。不擊不損威。其民譬猶魚鱉。何足貪也。臣竊以往者。兇軍言之。暴師曾未一年。兵出不踰千里。費四十餘萬萬。大司農錢盡。乃以少府禁錢續之。少府藏帝之私錢。故曰禁錢。夫一隅爲不善。費尙如此。況於勞師遠攻。亡士毋功乎。求之往古則不合。施之當今又不便。臣愚以爲非冠帶之國。禹貢所及。春秋所治。皆可且無以爲。願遂棄珠厓。專用恤關東爲憂。

賈君房在當世有文名。故楊興曰。『君房下筆語言妙天下。』昔亡弟愨烈公溫甫好。『語言妙天下』五字。尤好讀罷珠厓對。大抵西漢之文。氣味深厚。音調鏗鏘。迥非後世可及。固由其措詞之高。胎息之古。亦由其義理正大。有不可磨滅之質。如如此篇。及路溫舒尙德。緩刑書。非獨文辭超前絕後。卽說理亦與六經同風已。

諸葛亮出師表

臣亮言。先帝創業未半。而中道崩殂。今天下三分。益州罷弊。此誠危急存亡之秋也。然侍衛之臣。不懈於內。忠志之士。亡身於外者。蓋追先帝之殊遇。欲報之於陛下也。誠宜開張聖聽。以光先帝遺德。恢宏志士之氣。不宜妄自菲薄。引喻失義。以塞忠諫之路也。以上志義不可卑薄。宮中府中。俱爲一體。陟罰臧否。不宜異同。若有作姦犯科。

及爲忠善者。宜付有司。論其刑賞。以昭陛下平明之治。不宜偏私。使內外異法也。侍中侍郎郭攸之費禕董允等。此皆良實。志慮忠純。是以先帝簡拔以遺陛下。愚以爲宮中之事。事無大小。悉以咨之。然後施行。必能裨補闕漏。有所廣益。將軍向寵。性行淑均。曉暢軍事。試用於昔日。先帝稱之曰『能』。是以衆議舉寵爲督。愚以爲營中之事。事無大小。悉以咨之。必能使行陣和穆。優劣得所也。親賢臣。遠小人。此先漢所以興隆也。親小人。遠賢臣。此後漢所以傾頹也。先帝在時。每與臣論此事。未嘗不歎息痛恨於桓靈也。侍中尙書長史參軍。此悉貞亮死節之臣也。願陛下親之信之。則漢室之隆。可計日而待也。以上言宮府內外視同一體。賢才尙可倚任。臣本布衣。躬耕於南陽。苟全性命於亂世。不求聞達於諸侯。先帝不以臣卑鄙。猥自枉屈。三顧臣於草廬之中。諮臣以當世之事。由是感激。遂許先帝以馳驅。後值傾覆。受任於敗軍之際。奉命於危難之間。爾來二十有一年矣。先帝知臣謹慎。故臨崩寄臣以大事也。受命以來。夙夜憂歎。恐託付不效。以傷先帝之明。故五月渡瀘。深入不毛。今南方已定。兵甲已足。當獎帥三軍。北定中原。庶竭駑鈍。攘除姦凶。興復漢室。還於舊都。此臣之所以報先帝而忠陛下之職分也。以上自敘生平志事。至於斟酌損益。進盡忠言。則攸之禕允之咎。以彰其慢。陛下亦宜自謀。以諮諏善道。察納雅言。深追先帝遺詔。臣不勝受恩感激。今當遠離。臨表涕泣。不知所云。以上總收一節。

古人絕大事業。恆以精心敬慎出之。以區區蜀漢一隅。而欲出師關中。北伐曹魏。其志願之宏大。事勢之艱危。亦古今所罕見。而此文不言其艱鉅。但言志氣宜恢宏。刑賞宜平允。君宜以親賢納言爲務。臣宜以討賊進諫爲職而已。故知不朽之文。必自襟度遠大。思慮精微始也。

前漢宮禁。尙參用士人。後漢宮中。如中常侍小黃門之屬。則悉用閹人。不復雜調他士。與府中有內外之分。大亂朝政。諸葛公鑒於桓靈之失。痛憾閹宦。故力陳宮中府中。宜爲一體。蓋恐宦官日親。賢臣日疏。內外隔闕也。公以丞相而兼元帥。凡宮中府中。以及營中之事。無不兼綜。公舉郭費董三人治宮中之事。舉向寵治營中之事。殆皆指留守成都者言之。其府中之事。則公所自治。百司庶政。皆公在軍中親爲裁決焉。

陸贄奉天請罷瓊林大盈二庫狀

右臣聞作法於涼。其弊猶貪。作法於貪。弊將安救。以上四句見左傳昭公九年。示人以義。其患猶私。示人以私。患必難弭。以上四句不知有所本否。故聖人之立教也。賤貨而尊讓。遠利而尚廉。天子不問有無。諸侯不言多少。百乘之室。不畜聚斂之臣。夫豈皆能忘其欲賄之心哉。誠懼賄之生人心。而開禍端。傷風教。而亂邦家耳。是以務塲斂而厚其帑。積之積者。鳩聚也。匹夫之富也。務散發而收其兆庶之心者。天子之富也。天子所作。與天同方。生之長之。而不恃其爲。成之收之。而不私其有。付物以道。混然忘情。取之不爲貪。散之不爲費。以言乎體。則博大。以言乎術。則精微。數句言天子理財之道。極大極精。亦何必撓廢公方。崇聚私貨。降至尊而代有司之守。辱萬乘以效匹夫之藏。虧法失民。誘姦聚怨。以斯制事。豈不過哉。以上言天子不蓄私財。今之瓊林大盈。自古悉無其制。傳諸耆舊之說。皆云創自開元。貴臣貪權。飾巧求媚。乃言郡邑貢賦所用。蓋各區分稅賦。當委之有司。以給經用。貢獻宜歸乎天子。以奉私求。元宗悅之。新是二庫。蕩心侈欲。萌柢於茲。迨乎失邦。終以鉅寇。記曰。『貨悖而入。必悖而出。』豈非其明效歟。以上言開元始置二庫。旋即喪邦。陛下嗣位之初。務遵理道。敦行約儉。斥遠貪饜。雖內庫舊藏。未歸太府。而諸方曲獻。曲獻猶云私獻不入禁闈。清風肅然。海內丕變。議者咸謂漢文卻馬。晉武焚裘之事。復見於當今。近以寇逆亂常。鑿輿外幸。旣屬憂危之運。宜增警勵之誠。臣奉使軍營。出由行殿。忽覩右廊之下。榜列二庫之名。懼然若驚。不識所以。何則。天衢尙梗。天衢尙梗。言世亂也。猶皇路清夷。言世治也。師旅方殷。瘡痍呻吟之聲。噢咻未息。忠勤戰守之效。賞賚未行。而諸道貢珍。遽私別庫。萬目所視。孰能忍懷。以上言大難未平。不宜遽私二庫。竊揣軍情。或生缺望。試詢候館之吏。公時奉使出外。故詢候館之吏。今之馳驛者。州縣皆至。公館迎候。兼探道路之言。果如所虞。果如所虞。即果如所慮也。不作慮者。謂平仄馬蹄耳。積憾已慎。或忿形謗讟。醜肆謳謠。頗含思亂之情。亦有悔忠之意。是知吐俗昏鄙。識昧高卑。不可以尊極臨。而可以誠義感。頃者六師初降。百物無儲。外扞兇徒。內防危堞。晝夜不息。迨將五旬。凍餒交侵。死傷相枕。畢命同力。竟夷大艱。良以陛下不厚其身。不私其欲。絕甘以同卒伍。輟食以啗功勞。無猛制而人不攢懷。懷所感也。無厚賞而人不怨。悉所無也。今者攻圍已解。衣食

已豐。而謠譏方興。軍情稍阻。豈不以勇夫恆性。嗜貨矜功。其患難既與之同憂。而好樂不與之同利。苟異恬默。能無怨咨。此理之常。固不足怪。彼軍士怨讎之興。款款入情。婉婉動聽。此等處最不易及。記曰。『財散則民聚。財聚則民散。』唐諱民皆作人。各書多有未盡改者。豈非其殷鑒歟。衆怒難任。蓄怨終泄。其患豈徒民散而已。亦將慮有構姦鼓亂。干紀而強取者焉。以上言軍情離怨。恐生變亂。夫國家作事。以公共爲心者。人必樂而從之。以私奉爲心者。人必拂而叛之。故燕昭築金臺。天下稱其賢。殷紂作玉杯。百代傳其惡。蓋爲人與爲己殊也。周文之囿百里。時患其尙小。齊桓之囿四十里。時病其太大。蓋同利與專利異也。爲人上者。當辨察茲理。灑濯其心。奉三無私。以壹有衆。壹對三。有衆對無私。開後世借對之法。究不宜學。人或不率。於是用刑。然則宜其利而禁其私。天子所恃以理天下之具也。捨此不務。而壅利行私。欲人無貪。不可得已。今茲二庫珍幣所歸。不須度支。是行私也。不給經費。非宣利也。物情離怨。不亦宜乎。以上言所以致離怨之由。智者因危而建安。明者矯失而成德。以陛下天姿英聖。儻加之見善必遷。是將化蓄怨爲銜恩。反過差爲至當。促殄遺孽。永垂鴻名。易如轉規。指顧可致。然事有未可知者。但在陛下行與否耳。能則安。否則危。能則成德。否則失道。此乃必定之理也。願陛下慎之。陛下誠能近想重圍之殷憂。追戒平居之專欲。器用取給。不在過豐。衣食所安。必以分下。凡在二庫貨賄。盡令出賜有功。坦然而布懷。與衆同欲。是後納貢。必歸有司。每獲珍華。先給軍賞。環異織利。一無上供。推赤心於其腹中。降殊恩於其望外。將卒慕陛下必信之賞。人思建功。兆庶悅陛下改過之誠。孰不歸德。如此亂則必靖。賊必平。徐駕六龍。旋復都邑。興行墜典。整輯禁綱。乘輿有舊儀。郡國有恆賦。天子之貴。豈當憂貧。是乃散其小儲。而成其大儲也。捐其小寶。而固其大寶也。舉一事而衆美具行之。又何疑焉。以上言轉禍爲福。改過散財。恡少失多。廉賈不處。溺近迷遠。中人所非。况乎大聖應機。固當不俟終日。不勝管窺願效之至。謹陳冒以聞。謹奏。

駢體文爲大雅所差稱。以其不能發揮精義。并恐以蕪累而傷氣也。陸公則無一句不對。無一字不諧。平仄無一聯不調。馬蹄而義理之精。足以比隆濂洛。氣勢之盛。亦堪方駕韓蘇。退之本爲陸公所取士。子瞻奏議。終身效法陸公。而公之剖析事理。精當不移。則非韓蘇所能及。吾輩學之。亦須略用對句。稍調平仄。庶筆仗整齊。令人刮目耳。

蘇軾代張方平諫用兵書

臣聞好兵猶好色也。傷生之事非一。而好色者必死。賊民之事非一。而好兵者必亡。此理之必然者也。夫惟聖人之兵。皆出於不得已。故其勝也。享安全之福。其不勝也。必無意外之患。後世用兵。皆得已而不可。故其勝也。則變遲而禍大。其不勝也。則變速而禍小。是以聖人不計勝負之功。而深戒用兵之禍。何者。興師十萬。日費千金。內外騷動。始於道路者七十萬家。內則府庫空虛。外則百姓窮匱。飢寒逼迫。其後必有盜賊之憂。死傷愁怨。其終必致水旱之報。上則將帥擁衆。有跋扈之心。下則士衆久役。有潰叛之志。變故百出。皆由用兵。至於興事首議之人。冥謫尤重。蓋以平民無故。緣兵而死。怨氣充積。必有任其咎者。數句非儒者之言。亦失陳奏之體。是以聖人畏之重之。非不得已。不敢用也。以上渾言用兵必有禍災。自古人主好動干戈。由敗而亡者。不可勝數。臣今不敢復言。請爲陛下言其勝者。秦始皇既平六國。復事胡越。戍役之患。被於四海。雖拓地千里。遠過三代。而墳土未乾。天下怨叛。二世被害。子嬰被擒。滅亡之酷。自古所未嘗有也。漢武帝承文景富溢之餘。首挑匈奴。兵連不解。遂使侵尋及于諸國。歲歲調發。所向成功。建元之間。兵禍始作。是時蚩尤旗出。長與天等。其春戾太子生。自是師行三十餘年。死者無數。及巫蠱事起。京師流血。僵尸數萬。太子父子皆敗。班固以爲太子生長於兵。與之終始。帝雖悔悟。自克而歿身之恨。已無及矣。隋文帝既下江南。續事夷狄。煬帝嗣位。此心不衰。皆能誅滅疆國。威震萬里。然而民怨盜起。亡不旋踵。唐太宗神武無敵。尤喜用兵。既已破滅突厥。高昌。吐谷渾等。猶且未厭。親駕遼東。皆志在立功。非不得已。而用。其後武氏之難。唐室凌遲。不絕如綫。蓋用兵之禍。物理難逃。不然。太宗仁聖寬厚。克己裕人。幾至刑措。而一傳之後。子孫塗炭。此豈爲善之報也哉。武氏之禍。謂由太宗窮兵所致。亦非事實。由是觀之。漢唐用兵於寬仁之後。故其勝而僅存。秦隋用兵於殘暴之餘。故其勝而遂滅。臣每讀書至此。未嘗不掩卷流涕。傷其計之過也。若使此四君者。方其用兵之初。隨即敗。惕然戒懼。知用兵之難。則禍敗之與。當不至此。不幸每舉輒勝。故狂於功利。慮患不深。臣故曰。勝則變遲而禍大。不勝則變速而禍小。不可不察也。以上用兵勝者亦有大禍。敗者更不必論。昔仁宗皇帝。覆育天下。無意用兵。將士惰偷。兵革朽鈍。元昊乘間。竊發西鄙。延安涇原麟府之間。敗者三四。

所喪動以萬計。而海內晏然。兵休事已。而民無怨言。國無遺患。何者。天下臣庶。知其無好兵之心。天地鬼神。諒其有不得已之實故也。以上仁宗雖用兵而民不怨。今陛下天錫勇智。意在富彊。卽位以來。繕治甲兵。伺候鄰國。羣臣百寮。窺見此指。多言用兵。其始也。弼臣執國命者。無憂深思遠之心。樞臣當國論者。無慮害持難之識。在臺諫之職者。無獻替納忠之議。從微至著。遂成厲階。旣而諱向爲橫山之謀。韓絳效深入之計。陳升之呂公弼等。陰與之協力。師徒喪敗。財用耗屈。較之寶元慶歷之敗。不及十一。然而天怒人怨。邊兵背叛。京師騷然。陛下爲之旰食者累月。何者。用兵之端。陛下作之。是以吏士無怒敵之意。而不直陛下也。以上今日用兵而民怨之。尙賴祖宗積累之厚。皇天保佑之深。故使兵出無功。感悟聖意。然淺見之士。方且以敗爲恥。力欲求勝。以稱上心。於是王韶構禍於熙河。章惇造釁於梅山。熊本發難于渝瀘。然此等皆戕賊已降。俘纍老弱。困弊腹心。而取空虛無用之地。以爲武功。使陛下受此虛名。而忽於實禍。勉強砥礪。奮於功名。故沈起劉彝復發於安南。使十餘萬人。暴露瘴毒。死者十而五六。道路之人。弊於輸送。貨糧器械。不見敵而盡。以爲用兵之意。必且少衰。而李憲之師復出於洮州矣。今師徒克捷。銳氣方盛。陛下喜於一勝。必有輕視四夷。陵侮敵國之意。天意難測。臣實畏之。以上戰勝而銳氣方盛。兵無已時。且夫戰勝之後。陛下可得而知者。凱旋捷奏。拜表稱賀。赫然耳目之觀耳。至於遠方之民。肝腦屠於白刃。筋骨絕於餽餉。流離破產。鬻賣男女。熏眼折臂。自經之狀。陛下必不得而見也。慈父孝子。孤臣寡婦之哭聲。陛下必不得而聞也。譬猶屠殺牛羊。剝鱗魚鼈。以爲膳羞。食者甚美。死者甚苦。使陛下見其號呼於梃刃之下。宛轉於刀几之間。雖入珍之美。必將投筯而不忍食。而況用人之命。以爲耳目之觀乎。以上戰勝亦可哀矜而不足喜。姚姬傳氏謂東坡此書是子虛烏有之事。方平並未入奏。蓋在黃州時聞承樂徐禧之敗。神宗悔痛。故追作是文。以發揮己意。其以屠殺膳羞爲譬。亦是黃州戒殺時議論也。國藩謂東坡好佛。以好殺喻鬻兵。理自可通。惟首段言冥譴尤重。則失體耳。且使陛下將卒精強。府庫充實。如秦漢隋唐之君。旣勝之後。禍亂方興。尙不可救。而況所在將吏罷軟。凡庸較之古人。萬萬不逮。而數年以來。公私窘乏。內府累世之積。掃地無餘。州郡征稅之儲。上供殆盡。百官俸廩。僅而能繼。南郊賞給。久而未辦。以此舉動。雖有智者。無以善其後矣。且飢疫之後。所在盜賊蠱起。京東河北。尤不可言。若軍事一興。橫斂隨作。民窮而無告。其勢不爲大盜。無以自全。邊事方深。內患復起。則勝廣

之形。將在於此。此老臣所以終夜不寐。臨食而歎。至於慟哭而不能止也。以上兵弱餉絀盜賊將起且臣聞之。凡舉大事。必順天心。天之所向。以之舉事必成。天之所背。以之舉事必敗。蓋天心向背之迹。見於災祥豐歉之間。今自近歲日蝕星變。地震山崩。水旱癘疫。連年不改。民死將半。天心之向背。可以見矣。而陛下方且斷然不顧。興事不已。譬如人子得過於父母。惟有恭順靜思。引咎自責。庶幾可解。今乃紛然詰責奴婢。恣行箠楚。以此事親。未有見赦於父母者。故臣願陛下遠覽前世興亡之迹。深察天心向背之理。絕意兵革之事。保疆睦鄰。安靜無爲。固社稷長久之計。上以安二宮朝夕之養。下以濟四方億兆之命。則臣雖老死溝壑。瞑目於地下矣。以上言察天心之向背與愛庶民昔漢祖破滅羣雄。遂有天下。光武百戰百勝。祀漢配天。然至白登被圍。則講和親之議。西域請吏。則出謝絕之言。此二帝者。非不知兵也。蓋經變既多。則慮患深遠。今陛下深居九重。而輕議討伐。老臣庸懦。私竊以爲過矣。然人臣欲說於君。因其既厭而止之。則易爲力。迎其方銳而折之。則難爲功。凡有血氣之倫。皆有好勝之意。方其氣之盛也。雖布衣賤士。有不可奪。自非智識特達。度量過人。未有能勇於奮發之中。舍己從人。惟義是聽者也。今陛下盛氣於用武。勢不可回。臣非不知。而獻言不已者。誠見陛下聖德寬大。聽納不疑。故不敢以衆人好勝之常心。望於陛下。且意陛下他日親見用兵之害。必將哀痛悔恨。而追咎左右大臣。未嘗一言。臣亦將老且死。見先帝於地下。亦有以藉口矣。惟陛下哀而察之。

東坡之文。其長處在徵引史事。切實精當。又善設譬諭。凡難顯之情。他人所不能達者。坡公輒以譬諭明之。如百步洪詩。首數句設譬入端。此外詩文。亦幾無篇不設譬者。此文以屠殺膳羞。喻輕視民命。以箠楚奴婢。喻上忤天心。皆巧於構想。他人所百思不到者。既讀之而適爲人人意中所有。古今奏議。推賈長沙陸宣公蘇文忠三人爲超前絕後。余謂長沙明於利害。宣公明於義理。文忠明於人情。吾輩陳言之道。縱不能兼明此三者。亦須有一二端明達深透。庶無格格不吐之態。

蘇軾上皇帝書

臣近者不度愚賤。輒上封章。言買鑿事。自知瀆犯天威。罪在不赦。席藁私室。以待釜鉞之誅。而側聽逾旬。威命不

至問之府司。則買證之事。尋以停罷。乃知陛下不惟赦之。又能聽之。驚喜過望。以至感泣。何者。改過不吝。從善如流。此堯舜禹湯所以勉強而力行。秦漢以來之所絕無而僅有。願此買證毫髮之失。豈能上累日月之明。而陛下翻然改命。曾不移刻。則所謂智出天下而聽於至愚。威加四海而屈於匹夫。臣今知陛下可與爲堯舜。可與爲湯武。可與富民而措刑。可與強兵而伏戎虜矣。有君如此。其忍負之。惟當披露腹心。捐棄肝腦。盡力所至。不知其他。乃者。臣亦知天下之事。有大於買證者矣。而獨區區以此爲先者。蓋未信而諫。聖人不與。交淺言深。君子所戒。是以試論其小者。而其大者固將有待而後言。今陛下果赦而不誅。則是既已許之矣。許而不言。臣則有罪。是以願終言之。臣之所欲言者三。願陛下結人心。厚風俗。存紀綱而已。以上總起篇首三百餘字。失之尤漫。漢唐制科對策。往往如此。今京曹奏疏。首段亦多浮詞。若督撫奏疏。宜就事論事。閒語不可太多。人莫不有所恃。人臣恃陛下之命。故能役使小民。恃陛下之法。故能勝伏強暴。至於人主所恃誰與。書曰。『予臨兆民。稟乎若朽索之馭六馬。』言天下莫危於人主也。聚則爲君臣。散則爲仇讎。聚散之間。不容毫釐。故天下歸往。謂之王。人各有心。謂之獨夫。由此觀之。人主之所恃者。人心而已。人心之於人主也。如木之有根。如鏡之有膏。如魚之有水。如農夫之有田。如商賈之有財。木無根則槁。鏡無膏則滅。魚無水則死。農夫無田則饑。商賈無財則貧。人主失人心則亡。此必然之理也。不可道之災也。其爲可畏。從古以然。苟非樂禍好亡。狂易喪志。孰敢肆其胸臆。輕犯人心乎。昔子產焚載書以弭衆言。賂伯石以安巨室。以爲衆怒難犯。專欲難成。而孔子亦曰。『信而後勞其民。未信則以爲厲己也。』惟商鞅變法。不顧人言。雖能驟致富強。亦以召怨天下。使其民知利而不知義。見刑而不見德。雖得天下。旋踵而亡。至於其身。亦卒不免。負罪出走。而諸侯不納。車裂以徇。而秦人莫哀。君臣之間。豈願如此。宋襄公雖行仁義。失衆而亡。田常雖不義。得衆而強。是以君子未論行事之是非。先觀衆心之向背。謝安之用諸桓。未必是。而衆之所樂。則國以乂安。庾亮之召蘇峻。未必非。而勢有不可。則反爲危辱。自古迄今。未有和易同衆而不安。剛果自用而不危者也。以上彈言結人心以下。屬列失人心之事。今陛下亦知人心之不悅矣。中外之人。無賢不肖。皆言祖宗以來。治財用者。不過三司。使副判官。經今百年。未嘗闕事。今者無故又創一司。號曰制置。三司條例司。六七少年。日夜講求於內。使者四十餘輩。分行營幹於外。造端宏大。民實驚疑。創法新奇。吏皆惶惑。賢者則求其說而不可得。

未免於憂。小人則以其意度於朝廷。遂以爲謗。謂陛下以萬乘之主而言利。謂執政以天子之宰而治財。商賈不行。物價騰踊。近自淮甸。遠及川蜀。喧傳萬口。論說百端。或言京師正店。議置監官。夔路深山。當行酒禁。拘收僧尼。常住。減剋兵吏廩祿。如此等類。不可勝言。而甚者。至以爲欲復肉刑。斯言一出。民且狼顧。陛下與二三大臣。亦聞其語矣。然而莫之顧者。徒曰。『我無其事。又無其意。何恤於人言。』夫人言雖未必皆然。而疑似則有以致謗。人必貪財也。而後人疑其盜。人必好色也。而後人疑其淫。何者。未置此司。則無此謗。豈去歲之人皆忠厚。而今歲之人皆虛浮。孔子曰。『工欲善其事。必先利其器。』又曰。『必也。正名乎。』今陛下操其器而諱其事。有其名而辭其意。雖家置一喙。以自解。市列千金。以購人。人必不信。謗亦不止。夫制置三司條例司。求利之名也。六七年。與使者四十餘輩。求利之器也。驅鷹犬而赴林藪。語人曰。『我非獵也。』不如放鷹犬而獸自馴。操網罟而入江湖。語人曰。『我非漁也。』不如捐網罟而人自信。善言事者。每於最難明之處。設譬喻以明之。東坡詩文。皆以此擅長。故臣以爲消譏。隱而召和氣。復人心。而安國本。則莫若罷制置三司條例司。夫陛下之所以創此司者。不過以興利除害也。使罷之而利不興。害不除。則勿罷。罷之而天下悅。人心安。興利除害。無所不可。則何害而不罷。陛下欲去積弊而立法。必使宰相熟議。而後行。事若不由中書。則是亂世之法。聖君賢相。夫豈其然。必若立法。不免由中書。熟議。不免使宰相。此司之設。無乃冗長而無名。以上言不宜設制置三司條例司之官。智者所圖。貴於無迹。漢之文景。紀無可書之事。唐之房杜。傳無可載之功。而天下之言治者。與文景。言賢者。與房杜。蓋事已立。而迹不見。功已成。而人不知。故曰。善用兵者。無赫赫之功。豈惟用兵。事莫不然。今所圖者。萬分未獲其一也。而迹之布告天下者。若泥中之鬥獸。亦可謂拙謀矣。陛下誠欲富國。擇三司官屬。與漕運使副。而陛下與二三大臣。孜孜講求。磨以歲月。則積弊自去。而人不知。但恐立志不堅。中道而廢。孟子有言。『其進銳者。其退速。』若有始有卒。自可徐徐。十年之後。何事不立。孔子曰。『欲速則不達。見小利則大事不成。』使孔子而非聖人。則此言亦不必用。書曰。『謀及卿士。至於庶人。翕然大同。乃底元吉。若逆多而從少。則靜吉而作凶。』今自宰相大臣。既已辭免不爲。則外之議論。斷亦可知。宰相人臣也。且不欲以此自污。而陛下獨安受其名而不辭。非臣愚之所識也。宰相人臣也。四句有傾軋王介甫之意。君臣宵旰幾一年矣。而富國之效。茫如捕風。徒聞內帑出數百萬緡。祠部度五千餘人。

耳。以此爲術。其誰不能。以上言謀事貴於無迹。且遣使縱橫。本非令典。漢武遣繡衣直指。桓帝遣八使。皆以守宰狼籍盜賊公行。出於無術。行此下策。宋文帝元嘉之政。比於文景。當時責成郡縣。未嘗遣使。及至孝武以郡縣遲緩。始命臺使督之。以至蕭齊。此弊不革。故景陵王子良上疏。極言其事。以爲此等朝辭禁門。情態卽異。暮宿州縣。威福便行。驅迫郵傳。折辱守宰。公私煩擾。民不聊生。唐開元中。宇文融奏置勸農判官使。裴寬等二十九人。並攝御史。分行天下。招攜戶口。檢責漏田。時張說楊瑒皇甫璟楊相如皆以爲不便。而相繼罷黜。雖得戶八十餘萬。皆州縣希旨。以主爲客。以少爲多。及使百官集議都省。而公卿以下。懼融威勢。不敢異辭。陛下試取其傳讀之。觀其所行。爲是爲否。近者均稅寬恤。冠蓋相望。朝廷亦旋覺其非。而天下至今以爲謗。曾未數歲。是非較然。臣恐後之視今。猶今之視昔。且其所遣。尤不適宜。事少而員多。人輕而權重。則人多不服。或致侮慢。以與爭事。少而員多。則無以爲功。必須生事。以塞責。陛下雖嚴賜約束。不許邀功。然人臣事君之常情。不從其令而從其意。今朝廷之意好動而惡靜。好同而惡異。指意所在。誰敢不從。臣恐陛下赤子。自此無甯歲矣。以上論遣使太多。至於所行之事。行路皆知其難。何者。汴水濁流。自生民以來。不如種稻。秦人之歌曰。『涇水一石。其泥數斗。且溉且糞。長我禾黍。』何嘗曰。『長我粳稻耶。』今欲陂而清之。萬頃之稻。必用千頃之陂。一歲一淤。三歲而滿矣。陛下遽信其說。且使相視地形。萬一官更苟且順從。真謂陛下有意興作。上糜帑廩。下奪農時。隄防一開。水失故道。雖食議者之肉。何補於民。天下久平。民物滋息。四方遺利。蓋略盡矣。今欲鑿空尋訪水利。所謂卽鹿無虞。豈惟徒勞。必大煩擾。凡所譬畫利害。不問何人。小則隨事酬勞。大則量才錄用。若官私格沮。並行黜降。不以赦原。若才力不辦。與修便許。申奏替換。賞可謂重。罰可謂輕。然並終不言。諸色人妄有申陳。或官私課與功役。當得何罪。如此則妄庸輕剽。浮浪姦人。自此爭言水利矣。成功則有賞。敗事則無誅。官司雖知其疏。豈可便行抑退。所在追集老少。相視可否。吏卒所過。雞犬一空。若非灼然難行。必須且爲興役。何則。格沮之罪重。而誤興之過輕。人多愛身。勢必如此。且古陂廢堰。多爲側近冒耕。歲月既深。已同永業。苟欲興復。必盡追收。人心或搖。甚非善政。又有好訟之黨。多怨之人。妄言某處可作陂渠。規壞所怨田產。或指人舊業以爲官陂。冒佃之訟必倍今日。臣不知朝廷本無一事。何苦而行此哉。以上論興水利自古役人必用鄉戶。猶食之必用五穀。衣之必用絲麻。濟川之必用舟楫。行

地之必用牛馬。雖其間或有以他物充代。然終非天下所可常行。今者徒聞江浙之間。數郡雇役。王荆公新法。惟雇役爲善政。當日諸君子亦爭之不已。厥後司馬溫公改雇役。仍爲差役。東坡又力爭之。雇役猶今軍中雇募民夫。給與飯錢也。差役猶今擲人當夫。不給錢文也。而欲措之天下。是猶見燕晉之棗栗。岷蜀之蹲鴟。而欲以廢五穀。豈不難哉。又欲官賣所在坊場。以充衙前雇直。衙前猶差總之名也。凡縣有大役如運送官物錢糧之類。則責成衙前爲夫役之總。故宋時派充衙前者。鄉之富民。立即貧窮。韓魏公司馬溫公皆有疏論之。王荆公以坊場爲衙前之雇價。較之前此全不給錢者。已稍優矣。雖有長役。更無酬勞。長役所得既微。自此必漸衰散。則州郡事體。憔悴可知。士大夫捐親戚。棄墳墓。以從官於四方者。宣力之餘。亦欲取樂。此人之至情也。若凋弊太甚。廚傳蕭然。則似危邦之陋風。恐非太平之盛觀。陛下誠慮及此。必不肯爲。且今法令莫嚴於御軍。軍法莫嚴於逃竄。禁軍三犯。廂軍五犯。大率處死。然逃軍常半天下。不知雇人爲役。與廂軍何異。若有逃者。何以罪之。其勢必輕於逃軍。則其逃必甚於今日。爲其官長。不亦難乎。近者雖使鄉戶頗得雇人。然至於所雇逃亡。鄉戶猶任其責。今遂欲於兩稅之外。別立一科。謂之庸錢。以備官雇。則雇人之責。官所自任矣。自唐楊炎廢租庸調。以爲兩稅。取大歷十四年應於賦斂之數。以定兩稅之額。則是租調與庸。兩稅既兼之矣。今兩稅如故。奈何復欲取庸。聖人立法。必慮後世。豈可於兩稅之外。別立科名。萬一不幸後世有多欲之君。輔之以聚斂之臣。庸錢不除。差役仍舊。使天下怨謫。推所從來。則必有任其咎者矣。又欲使坊郭等第之民。鄉戶均役。品官形勢之家。與齊民並事。其說曰。周禮田不耕者出屋粟。宅不毛者有里布。而漢世宰相之子。不免戍邊。此其所以藉口也。古者官養民。今者民養官。給之以田而不耕。勸之以農而不力。於是乎有里布屋粟夫家之征。而民無以爲生。去爲商賈。事勢當爾。何名役之。且一歲之戍。不過三日。三日之雇。其直三百。今世三大戶之役。自公卿以降。無得免者。其費豈特三百而已。大抵事若可行。不必皆有故事。若民所不悅。俗所不安。縱有經典明文。無補於怨。若行此二者。必怨無疑。女戶單丁。蓋天民之窮者也。古之王者。首務恤此。而今陛下首欲役之。此等苟非戶將絕而未亡。則是家有丁而尙幼。若假之數歲。則必成丁而就役。老死而沒官。富有四海。忍不加恤。以上論雇役。孟子曰。『始作俑者。其無後乎。』春秋書作邱甲。用田賦。皆重其始爲民患也。青苗放錢。自昔有禁。今陛下始立成法。每歲常行。雖云不許抑配。而數世之後。暴言

汙吏陛下能保之與。異日天下恨之。國史記之曰。青苗錢自陛下始。豈不惜哉。且東南買絹。本用現錢。陝西糧草。不許折兌。朝廷既有著令。職司又每舉行。然而買絹未嘗不折鹽。糧草未嘗不折鈔。乃知青苗不許抑配之說。亦是空文。只如治平之初。揀刺義勇。當時詔旨慰諭。明言永不戍邊。著在簡書。有如盟約。於今幾日。論議已播。或以代還東軍。或欲抵換弓手。約束難恃。豈不明哉。買絹之初。本發見錢。後亦失信。揀刺義勇之初。本言永不戍邊。後亦失信。以喻王介甫放青苗錢之初。本言不許抑配。不久亦必失信也。東坡言事。或引古事以譬之。或引近事以譬之。取其易曉。縱使此令決行。果不抑配。計其間願請之戶。必皆孤貧不濟之人家。若自有贏餘。何至與官交易。此等鞭撻已急。則繼之逃亡。逃亡之餘。則均之保鄰。勢有必至。理有固然。今之領常平倉穀者。亦皆孤貧不濟之人。况宋領青苗錢。須還利錢乎。且夫常平之爲法也。可謂至矣。所守者約而所及者廣。借使萬家之邑。止有千斛。而穀貴之際。千斛在市。物價自平。一市之價既平。一邦之食自足。無操瓢乞丐之弊。無里正催驅之勞。今若變爲青苗家貸一斛。則千戶之外。孰救其飢。且常平官錢。常患其少。若盡數收糴。則無借貸。若留充借貸。則所糴幾何。乃知常平青苗。其勢不能兩立。壞彼成此。所喪愈多。虧官害民。雖悔何逮。臣竊計陛下欲考其實。則亦必問人。人知陛下方欲力行。必謂此法有利無害。以臣愚見。恐未可憑。何以明之。臣頃在陝西。見刺義勇。提舉諸縣。臣嘗親行。愁怨之民。哭聲振野。當時奉使還者。皆言民盡樂爲。希合取容。自古如此。又以刺義勇時。民怨而帝不聞。喻青苗一事。亦民怨而帝不聞。不然。則山東之盜。二世何緣不覺。南詔之敗。明皇何緣不知。今雖未至於斯。亦望陛下審聽而已。以上論青苗錢。昔漢武之世。財力匱竭。用買人桑弘羊之說。買賤賣貴。謂之均輸。於時商賈不行。盜賊滋熾。幾至於亂。孝昭既立。學者爭排其說。霍光順民所欲。從而予之。天下歸心。遂以無事。不意今者此論復興。立法之初。其說尙淺。徒言徙貴就賤。用近易遠。然而廣置官屬。多出緡錢。豪商大賈。皆疑而不敢動。以爲雖不明言販賣。然既已許之變易。變易既行。而不與商賈爭利者。未之聞也。夫商賈之事。曲折難行。其買也。先期而予錢。其賣也。後期而取直。多方相濟。委曲相通。倍稱之息。由此而得。今官買是物。必先設官置吏。簿書廩祿。爲費已厚。非良不售。非賄不行。是以官買之價。比民必貴。及其賣也。弊復如前。商賈之利。何緣而得。朝廷不知慮此。乃捐五百萬緡以與之。此錢一出。恐不可復。縱使其間薄有所獲。而征商之額。所損必多。均輸。猶官運之鹽也。商稅。猶各卡

之抽釐也。官運多則釐稅少。自然之理。今有人爲其主牧牛羊者。不告其主。以一牛而易五羊。一牛之失。則隱而不言。五羊之獲。則指爲勞績。陛下以爲壤常平而言青苗之功。虧商稅而取均輸之利。何以異此。以上論均輸。陛下天機洞照。聖略如神。此事至明。豈有不曉。必謂已行之事。不欲中變。恐天下以爲執德不一。用人不終。是以遲留歲月。庶幾萬一。臣竊以爲過矣。古之英主。無出漢高。酈生謀撓楚權。欲復六國。高祖曰。『善。趣刻印。』及聞留侯之言。吐哺而罵曰。『趣銷印。』夫稱善未幾。繼之以罵。刻印銷印。有同兒戲。何嘗累高祖之知人。適足以明聖人之無我。陛下以爲可而行之。知其不可而罷之。至聖至明。無以加此。議者必謂民可與樂成。難與慮始。故勸陛下堅執不顧。期於必行。此乃戰國貪功之人。行險徼幸之說。陛下若信用之。則是徇高論而逆至情。持空名而邀寶禍。未及樂成。而怨已起矣。臣之所願結人心者。此之謂也。以上言不宜堅執前說。結人心。止此士之進言者。爲不少矣。亦嘗有以國家之所以存亡。歷數之所以長短。告陛下者乎。夫國家之所以存亡者。在道德之淺深。而不在于平強與弱。歷數之所以長短者。在風俗之厚薄。而不在于平富與貧。道德誠深。風俗誠厚。雖貧且弱。不害於長而存。道德誠淺。風俗誠薄。雖強且富。不救於短而亡。人主知此。則知所輕重矣。是以古之賢君。不以弱而亡。道德不以貧而傷風俗。而智者觀人之國。亦必以此察之。齊至強也。周公知其後必有篡弑之臣。衛至弱也。季子知其後亡。吳破楚入郢。而陳大夫逢滑知楚之必復。晉武既平吳。何曾知其將亂。隋文既平陳。房喬知其不久。元帝斬郢支。朝呼韓。功多於武宣矣。偷安而王氏之釁生。宣宗收燕趙。復河湟。力強於憲武矣。銷兵而龐勳之亂起。臣願陛下務崇道德。而厚風俗。不願陛下急於有功。而貪富強。使陛下富如隋。強如秦。西取靈武。北取燕薊。謂之有功可也。而國之長短。則不在此。夫國之長短。如人之壽夭。人之壽夭在元氣。國之長短在風俗。世有尫羸而壽考。亦有盛壯而暴亡。若元氣猶存。則尫羸無害。及其已耗。則盛壯而愈危。是以善養生者。慎起居。節飲食。導引關節。吐故納新。不得已而用藥。則擇其品之上。性之良。可以久服而無害者。則五藏和平而壽命長。不善養生者。薄節慎之功。遲吐納之效。厭上藥而用下品。伐真氣而助強陽。根本已空。僵仆無日。天下之勢。與此無殊。故臣願陛下愛惜風俗。如護元氣。以上言培養國脈。不在富強。古之聖人。非不知深刻之法。可以齊衆。勇悍之夫。可以集事。忠厚近於迂闊。老成初若遲鈍。然終不肯以彼而易此者。知其所得小而所喪大也。曹參賢相也。曰。『慎無擾獄市。』黃霸

循吏也。曰「治道去泰甚。」或譏謝安以清談廢事。安笑曰。「秦用法吏。二世而亡。」劉晏爲度支。專用果銳少年。務在急速集事。好利之黨。相師成風。德宗初即位。擢崔祐甫爲相。祐甫以道德寬大。推廣上意。故建中之政。其聲翕然。天下相望。庶幾正觀。及盧杞爲相。諷上以刑名整齊天下。馴致澆薄。以及播遷。我仁祖之御天下也。持法至寬。用人有敘。專務掩覆過失。未嘗輕改舊章。然考其成功。則曰未至。以言乎用兵。則十出而九敗。以言其府庫。則僅足而無餘。徒以德澤在人。風俗知義。是以升遐之日。天下如喪考妣。社稷長遠。終必賴之。則仁祖可謂知本矣。今議者不察。徒見其末年吏多因循。事不振舉。乃欲矯之以苛察。齊之以智能。招來新進勇銳之人。以圖一切速成之效。未享其利。澆風已成。且天時不齊。人誰無過。國君含垢。至察無徒。若陛下多方包容。則人材取次可用。必欲廣置耳目。務求瑕疵。則人不自安。各圖苟免。恐非朝廷之福。亦豈陛下所願哉。漢文欲用虎圈嗇夫。釋之以爲利口傷俗。今若以口舌捷給而取士。以應對遲鈍而退人。以虛誕無實爲能文。以矯激不仕爲有德。則先王之澤。遂將散微。以上言用人宜求老成忠厚。不取新銳刻深。自古用人。必須歷試。雖有卓異之器。必有已成之功。一則使其更變而知難。事不輕作。一則待其功高而望重。人自無辭。昔先主以黃忠爲後將軍。而諸葛亮憂其不可以爲忠之名望。素非關張之倫。若班爵遽同。則必不悅。其後關羽果爲言。以黃忠豪勇之姿。以先主君臣之契。尙復慮此。而况其他。世嘗謂漢文不用賈生。以爲深恨。臣嘗推究其旨。竊謂不然。賈生固天下之奇才。所言亦一時之良策。然請爲屬國。欲係單于。則是處士之大言。少年之銳氣。昔高祖以三十萬衆。困于平城。當時將相羣臣。豈無賈生之比。三表五餌。人知其疏。而欲以困中行說。尤不可信。兵凶器也。而易言之。正如趙括之輕秦。李信之易楚。若文帝亟用其說。則天下殆將不安。使賈生嘗歷艱難。亦必自悔其說。用之晚歲。其術必精。不幸喪亡。非意所及。不然。文帝豈棄才之主。絳灌豈蔽賢之士。至於晁錯。尤號刻薄。文帝之世。止於太子家令。而景帝既立。以爲御史大夫。申屠賢相。發憤而死。更法改令。天下騷然。至於七國發難。而錯之術亦窮矣。文景優劣。於此可見。大抵名器爵祿。人所奔趨。必使積勞而後遷。以明持久而難得。則人各安其分。不敢躁求。今若多開驟進之門。使有意外之得。公卿侍從。跬步可圖。其得者既不以徵倖自名。則不得者必皆以沈淪爲恨。使天下常調。循資按格者。謂之常調。官舉生安心。恥不若人。何所不至。欲望風俗之厚。豈可得哉。選人之改京官。常須十年以上。薦更險阻。計析

毫釐。其間一事聱牙。常至終身淪棄。今乃以一人之薦舉而予之。猶恐未稱。章服隨至。使積勞久次而得者。何以厭服哉。夫常調之人。非守則令。員多闕少。久已患之。不可復開多門。以待巧進。若巧者侵奪已甚。則拙者迫怵無聊。利害相形。不得不察。故近來樸拙之人愈少。而巧進之士益多。惟陛下重之惜之。哀之救之。如近日三司獻言。使天下郡選一人。催驅三司文字。許之先次指射。以酬其勞。則數年之後。審官吏部。又有三百餘人。得先占闕。常調待次。不其愈難。此外句當發運均輸。按行農田水利。已據監司之體。各懷進用之心。轉對者望以稱旨而驟遷。奏課者求爲優等而速化。相勝以力。相高以言。而名實亂矣。惟陛下以簡易爲法。以清淨爲心。使姦無所緣。而民德歸厚。臣之所願厚風俗者。此之謂也。以上言不宜驟等用人。不貴驟遷。速化厚風俗。止此古者建國。使內外相制。輕重相權。如周如唐。則外重而內輕。如秦如魏。則外輕而內重。內重之失。必有姦臣指鹿之患。外重之弊。必有大國問鼎之憂。聖人方盛而慮衰。常先立法以救弊。國家租賦。總於計省。重兵聚於京師。以古揆今。則似內重。恭惟祖宗所以預圖而深計。固非小臣所能臆度。而周知。然觀其委任臺諫之一端。則是聖人過防之至計。歷觀秦漢以及五代。諫爭而死。蓋數百人。而自建隆以來。未嘗罪一言者。縱有薄責。旋即超升。許以風聞。而無官長。無官長。猶云無上司也。今都察院之總憲副憲。雖稱臺長。亦非堂官之體。風采所繫。不問尊卑。言及乘輿。則天子改容。事關廊廟。則宰相待罪。故仁宗之世。議者譏宰相但奉行臺諫風旨而已。聖人深意。流俗豈知。擢用臺諫。固未必皆賢。所言亦未必皆是。然須養其銳氣。借之重權者。豈徒然哉。將以折姦臣之萌。而救內重之弊也。夫姦臣之始。以臺諫折之。而有餘。及其既成。以干戈取之。而不足。今法令嚴密。朝廷清明。所謂姦臣。萬無此理。然養貓以去鼠。不可以無鼠。而養不捕之貓。畜狗以防姦。不可以無姦。而畜不吠之狗。陛下得不。上念祖宗設此官之意。下爲子孫立萬世之防。朝廷紀綱。孰大於此。臣自幼小所記。及聞長老之談。皆謂臺諫所言。常隨天下公議。公議所與。臺諫亦與之。公議所擊。臺諫亦擊之。及至英廟之初。始建稱親之議。本非人主大過。亦無典禮明文。徒以衆心未安。公議未允。當時臺諫以死爭之。今者物論沸騰。怨讟交至。公議所在。亦可知矣。而相顧不發。中外失望。夫彈劾積威之後。雖庸人亦可以奮揚。風采消委之餘。雖豪傑有不能振起。臣恐自茲以往。習慣成風。盡爲執政私人。以致人主孤立。紀綱一廢。何事不生。以上言介甫之威。足以脅制臺諫。使不敢言執政私人等句。亦有傾軋之意。孔子

曰：『鄙夫可與事君也與哉！其未得之也，患不得之；既得之，患失之。苟患失之，無所不至矣。』臣始讀此書，疑其太過，以爲鄙夫之患失，不過備位而苟容，及觀李斯憂蒙恬之奪其權，則立二世以亡秦，盧杞憂懷光之數其惡，則誤德宗以再亂，其心本生於患失，而其禍乃至於喪邦。孔子之言，良不爲過。是以知爲國者，平居必常有忘軀犯顏之士，則臨難庶幾有殉義守死之臣。苟平居尙不能一言，則臨難何以責其死節？人臣苟皆如此，天下亦曰殆哉。君子和而不同，小人同而不和，如和羹，同如濟水，故孫寶有言：『周公上聖，召公大賢，猶不相悅，著於經典，兩不相損。晉之王導，可謂元臣，每與客言，舉坐稱善，而王述不悅，以爲人非堯舜，安得每事盡善？導亦斂衽謝之，若使言無不同，意無不合，更唱迭和，何者非賢？萬一有小人居其間，則人主何緣得以知覺？』臣之所謂願存紀綱者，此之謂也。以上存紀綱，存紀綱一節事實太少，議論亦淺，與前二條殊不相稱，不足平列爲三。臣非敢歷詆新政，苟爲異論，如近日裁減皇族恩例，刑定任子條式，修完器械，閱習鼓旗，皆陛下神算之至明，乾剛之必斷，物議既允，臣敢有辭。然至於所獻三言，則臣之私見，中外所病，其誰不知？昔禹戒舜曰：『無若丹朱傲，惟慢遊是好。』舜豈有是哉？周公戒成王曰：『無若殷王受之迷亂，酗於酒德哉。』成王豈有是哉？周昌以漢高爲桀紂，劉毅以晉武爲桓靈，當時人君，曾莫之罪，書之史冊，以爲笑談，使臣所獻三言，皆朝廷未嘗有此，則天下之幸，臣與有焉。若有萬一似之，則陛下安可不察，然而臣之爲計，可謂愚矣。以螻蟻之命，試雷霆之威，積其狂愚，豈可屢赦？大則身首異處，破壞家門，小則削籍投荒，流離道路，雖然，陛下必不爲此，何也？臣天賦至愚，篤於自信，向者與議學校貢舉，首違大臣本意，已期竄逐，敢意自全，而陛下獨然其言，曲賜召對，從容久之，至謂臣曰：『方今政令得失安在，雖朕過失，指陳可也。』臣卽對曰：『陛下生知之性，天縱文武，不患不明，不患不勤，不患不斷，但患求治太速，進人太銳，聽言太廣。』又備述其所以然之狀，陛下領之曰：『卿所獻三言，朕當熟思之。』臣之狂愚，非獨今日，陛下容之久矣，豈有容之於始，而不赦之於終，特此而言，所以不懼。臣之所懼者，譏刺既重，怨仇實多，必將詆臣以深文，中臣以危法，使陛下雖欲赦臣而不得，豈不殆哉？死亡不辭，但恐天下以臣爲戒，無復言者，是以思之經月，夜以繼日，書成復毀，至於再三，感陛下聽其一言，懷不能已，卒吐其說，惟陛下憐其愚而卒赦之，不勝俯伏待罪，憂恐之至。

奏疏總以明顯爲要。時文家有典顯淺三字訣。奏疏能備此三字。則盡善矣。典字最難。必熟於前史之事蹟。並熟於本朝之掌故。乃可言典。至顯淺二字。則多本於天授。雖有博學多聞之士。而下筆不能顯豁者多矣。淺字與雅字相背。白香山詩。務令老嫗皆解。而細求之。皆雅飭而不失之率。吾嘗謂奏疏能如白詩之淺。則遠近易於傳播。而君上亦易感動。此文雖不甚淺。而典顯二字。則千古所罕見。

朱熹戊申封事

戊申爲宋孝宗淳熙十五年。朱子於時年五十九歲。前一年丁未。除公爲江西提刑。辭不允。戊申正月。又辭不允。三月啓行。在道再辭。趣公入對。六月召對於延和殿。公所面告孝宗者。語多切直。並面陳奏劄五件。旋除兵部郎官。以足疾辭。七月在道再辭。江西提刑之任。遂除直寶文閣。管嵩山崇福宮。九月十月。復召公入對。十一月遂上此封事。

十一月一日。朝奉郎直寶文閣主管西京嵩山崇福宮臣朱熹。謹齋沐具疏。昧死再拜。獻於皇帝陛下。臣猥以庸陋。蒙被聖知。有年於此矣。而兩歲以來。受恩稠疊。有加於前。顧視輩流。無與爲比。其爲感激之深。固有言所不能諭者。然竊惟念狂妄之言。抵觸忌諱。雖蒙聽納。不以爲罪。而伏俟數月。未見其有略施行者。臣誠不自知求所以堪陛下非常之恩者。而未知其出也。是以慚懼。久不自安。不意陛下又欲召而見之。臣愚於此仰窺聖意。尤不識其果何謂也。以爲欲聽其計策。則言已陳而不可用。以爲欲加之恩意。則寵既厚而無以加。二者之間。未有所當。此臣之所以徘徊前卻。懇扣辭避。而不能已也。然而陛下猶未之許。則臣又重思之。前日進對之時。口陳之說。迫於疾作。而猶有未盡言者。蓋嘗請以封事上聞。而久未敢進。豈非陛下偶垂記憶。而欲卒聞之乎。抑其別有以乎。臣不得而知也。然君父之命。至於再下。而爲臣子者。堅臥於家。則臣於此。實有所未安者。其所深慮。獨恐進見之後。所言終不可用。而又徒竊譖寵。如前之爲。則臣之辭受。將有所甚難處。而終得罪者。是以輒因前請。而悉其所言以獻。九月十月兩次召公入對。公再辭不欲進見。故此三行云云。以爲雖使得至陛下之前。所言不過如此。伏惟聖慈。幸賜觀省。若以其言爲是。而次第行之。則臣之志願。千萬滿足。退伏巖穴。死無所憾。萬一聖意必欲其來。

則臣亦不過求一望見清光。而後懇請以歸而已。若見其言果無可取。則是臣之所學之陋。他無所有。政使冒進。陛下亦將何所用之。不若因其懇請而許其歸休。猶足兩有所全也。又況陛下之庭。侍從之列。方有造焉飛語。以中害善。良唱焉橫議。以脅持上下。其巧謀陰計。又有甚於前日之不思而妄發者。陛下無爲使臣輕犯其鋒。而復蹈已覆之轍也。以上自明其不入殿奏對。而但陳封事之故。蓋臣竊觀今日天下之勢。如人之有重病。內自心腹。外達四肢。蓋無一毛一髮。不受病者。雖於起居飲食。未至有妨。然其危迫之證。深於醫者。固已望之而走矣。是必得如盧扁華佗之輩。授以神丹妙劑。爲之瀚腸滌胃。以去病根。然後可以幸於安全。如其不然。則病日益深。而病者不覺其可寒心。殆非俗醫常藥之所能及也。故臣前日之奏。輒引藥不瞑眩。厥疾不瘳之語。意蓋謂此。而其言有未盡也。然天下之事。所當言者不勝其衆。顧其序有未及者。臣不暇言。且獨以天下之大本。與今日之急務。深爲陛下言之。蓋天下之大本者。陛下之心也。今日之急務。則輔翼太子。選任大臣。振舉綱維。變化風俗。愛養民力。修明軍政。六者是也。臣請昧死而悉陳之。惟陛下之留聽焉。以上具列所陳之大要。臣之輒以陛下之心爲天下之大本者。何也。天下之事。千變萬化。其端無窮。而無一不本於人主之心者。此自然之理也。故人主之心正。則天下之事無一不出於正。人主之心不正。則天下之事無一得由於正。蓋不惟賞之所勸。刑之所威。各隨所向。勢有不能已者。而其觀感間之風動神速。又有甚焉。是以人主以眇然之身。居深宮之中。其心之邪正。若不得而窺者。而其符驗之著於外者。常若十目所視。十手所指。而不可掩。此大舜所以有惟精惟一之戒。孔子所以有克己復禮之云。皆所以正吾此心。而爲天下萬事之本也。此心既正。則視明聽聰。周旋中禮。而身無不正。是以所行無不及。而能執其中。雖以天下之大。而無一人不歸吾之仁者。然邪正之驗著於外者。莫先於家人。而次及於左右。然後有以達於朝廷。而及於天下焉。若宮闈之內。端莊齊肅。后妃有關雎之德。後宮無盛色之譏。貫魚順序。而無一人敢恃恩私以亂常典。納賄賂而行請謁。此則家之正也。退朝之後。從容燕息。貴戚近臣。攜僕奄尹。陪侍左右。各恭其職。而上憚不惡之嚴。下謹戴盆之戒。無一人敢通內外。竊威福。招權市寵。以紊朝政。此則左右之正也。內自禁省外。徹朝廷。二者之間。洞然無有毫髮私邪之間。然後發號施令。羣聽不疑。進賢退姦。衆志成服。紀綱得以振。而無侵撓之患。政事得以修。而無阿私之失。此所謂朝廷百官。六軍萬民。無敢不出於正。而治道畢也。心一不正。

則是數者固無從而得其正。是數者一有不正。而曰心正。則亦安有是理哉。是以古先聖王。兢兢業業。持守此心。雖在紛華波動之中。悠悠獨肆之地。而所以精之一之。克之復之。如對神明。如臨淵谷。未嘗敢有須臾之意。然猶恐其隱微之間。或有差失而不自知也。是以建師保之官。以自開明。列諫諍之職。以自規正。而凡其飲食酒漿衣服次舍器用財賄。與夫宦官宮妾之政。無一不領於冢宰之官。使其左右前後一動一靜。無不制以有司之法。而無纖芥之隙。瞬息之頃。得以隱其毫髮之私。蓋雖一人之尊。深居九重之邃。而凜然常若立乎宗廟之中。朝廷之上。此先王之治。所以由內及外。自微不至。精粹純白。無少瑕駁。而其遺風餘烈。猶可以爲後世法程也。以上言古聖王正心之法。陛下試以是而思之。吾之所以精一克復而持守其心者。果嘗有如此之功乎。所以修身齊家而正其左右者。果嘗有如此之效乎。宮省事禁。臣固有不得而知者。然不見其形而視其影。不覩其內而占其外。則爵賞之濫。貨賂之流。閭巷竊言。久已不勝其籍籍矣。臣竊以是窺之。則陛下之所以修之家者。恐其未有以及古之聖王也。以上言修身齊家未能出於一正。至於左右便嬖之私。恩遇過當。往者淵覲說抃之徒。龍大淵會觀張說王抃皆以近習而至。卿相勢焰熏灼。傾動一時。今已無可言矣。獨有前日臣所面奏者。所面奏者即內侍甘昇也。雖蒙聖慈。委曲開譬。然臣之愚。終竊以爲此輩。但當使之守門傳命。供掃除之役。不當假借崇長。使得逞邪媚作淫巧於內。以蕩上心。立門庭招權勢於外。以累聖政。而其有才無才。有罪無罪。自不當論。況其有才適所以爲姦。有罪而不可復用乎。且如向來主管喪事。欽奉几筵之命。遠近傳聞。無不竊笑。臣不知國史書之。野史記之。播於外國。傳於後世。且以陛下爲何如主也。縱有曲折如前日。所以論諭臣者。陛下亦安能家置一喙。而人曉之耶。刑餘小醜。不比人類。顧乃熒惑聖心。虧損聖德。以至此極。而公卿大臣。拱手熟視。無一言以救其失。臣之痛心。始者惟在於此。比至都城。則又知此曹之用事者。非獨此人。而侍從之臣。蓋已有出其門者。至其納財之塗。則又不於士大夫而專於將帥。臣於前日嘗輒以面奏。而陛下諭臣以爲誠當深察而痛懲之矣。退而始聞陛下比於環列之尹。已嘗有所易置。乃知陛下固已深察其弊。而無所待於人言。然猶未能明正其罪。而反寵以崇資巨鎮。使即便安。此曹無知。何所忌憚。況中外將帥。其不爲此者無幾。陛下亦未能推其類而悉去之也。陛下竭生靈之膏血。以奉軍旅之費。本非得已。而爲軍士者。顧乃未嘗得一溫飽。甚者採薪織屨。掇拾糞壤。以度朝夕。其又甚者。至

使妻女盛塗澤，倚市門以求食也。怨詈謗讟，悖逆絕理。正有不可聞者。一有緩急，不知陛下何所倚仗。是皆爲將帥者。巧爲名色，頭會箕斂，陰奪取其糧賜，以自封殖。而行貨賂於近習，以圖進用。彼此既厭足矣。然後時以薄少號爲羨餘，陰奉燕私之費。以嫁士卒，怨怒之毒於陛下。且幸陛下受其獻，則後日雖知其罪，而不得復有所問也。出入禁闈，腹心之臣，外交將帥，共爲欺蔽，以至於此。豈有一毫愛戴陛下之心哉。方望篋謂朱子封事，雖明季楊左之忠直敢言，無以過之。當卽謂此等處耳。而陛下不悟，反寵暱之，以是爲我之私人。至使宰相不得讖其制置之得失，給諫不得論其除授之是非。以此而觀，則陛下所以正其左右，未能及古之聖王又明矣。以上言將帥賄賂近習，未能正其左右，且私之得名，何爲也哉。据己分之所獨有，而不得以通乎其外之稱也。故自匹夫而言，則以一家爲私，而不得以通乎其鄉。自鄉人而言，則以一鄉爲私，而不得以通乎其國。自諸侯而言，則以一國爲私，而不得以通乎天下。至於天子，則際天之所覆，極地之所載，莫非己分之所有，而無外之不通矣。又何以爲私哉。今以不能勝其一念之邪，而至於有私心，以不能正其家人近習之故，而至於有私人，以私心用私人，則不能無私費。于是內損經費之入，外納羨餘之獻。而至於有私財。陛下上爲皇天之所子，全付所覆，使其無有私而不公之處。其所以與我者，亦不細矣。乃不能充其大，而自爲割裂，以狹小之，使天下萬事之弊，莫不由此而出。是豈可不惜也哉。以上言不應有私財，私人若以時勢之利害言之，則天下之勢，合則彊，分則弱。故諸葛亮之告其君曰：『宮中府中，俱爲一體。陟罰臧否，不宜異同。若有作姦犯科及爲忠善者，宜付有司，論其刑賞，以昭陛下平明之理，不宜偏私，使內外異法也。』當是之時，昭烈父子，以區區之蜀，抗衡天下，十分之九，規取中原，以興漢室，以亮忠智爲之深謀，而其策不過如此。可謂深知時務之要，而暗合乎先王之法矣。夫以蜀之小，而於其中又以公私自分，彼此如兩國，然則是將以梁益之半，圖吳魏之全。又且內小人而外君子，廢法令而保姦回，使內之所出者，日有以賊乎外。公之所立者，常不足以勝乎私。則是此兩國者，又自相攻，而其內之私者常勝，外之公者常負也。外有鄰敵之虞，內有陰邪之寇，日夜夾攻而不置，爲國家者，亦以危矣。夫以義理言之，既如彼，以利害言之，又如此。則今日之事，如不早正，臣恐陛下之心，雖勞於求賢，而一有所妨乎此，則賢人必不得用，而所用者，皆庸謬儉巧之人。雖勤於立政，而一有所礙乎此，則善政必不得立，而所行者，皆阿私苟且之政。日往月來，養成禍本，而

貽燕之謀未遠。輔相之職不修。紀綱壞於上。風俗壞於下。民愁兵怨。國勢日卑。一旦猝有不虞。臣竊寒心。不知陛下何以善其後也。然則臣之所謂天下大本。惟在陛下之一心者。可不汲汲皇皇而求有以正之哉。以上三段皆言天下之大本首在正心而去私至於輔翼太子之說。則臣前日所謂數世之仁者。蓋以徵發其端。而未敢索言之也。夫太子天下之本。其輔翼之不可不謹。見於保傳傳者詳矣。保傳傳見大戴禮。賈生政事疏所引最多。陛下聖學高明。洞貫古今。宜不待臣言而喻。然臣竊嘗怪陛下所以調護東宮者。何其疏略之甚也。由前所論而觀之。豈非所以自治者。猶未免於疏略。因是亦以是爲當然而不之慮耶。夫自王十朋陳良翰之後。宮寮之選。號爲得人。而能稱其職者。蓋已鮮矣。而又時使邪佞薄闇冗庸妄之輩。咸得參錯於其間。所謂講讀。聞亦姑以應文備數。而未聞其有箴規之效。至於從容朝夕。陪侍遊燕者。又不過使臣宦者數輩而已。皇太子睿性夙成。閱理久熟。雖若無待於輔導。然人心難保。氣習易污。習於正則正。習於邪則邪。此古之聖王教世子者。所以必選端方正直道術博聞之士。與之居處。而又使之逐去邪人。不使見惡行。蓋嘗謹之於微。不待其有過而後規也。今三代之制。雖不可考。且以唐之六典論之。東宮之官。師傅賓客。既職輔導。而詹事府兩春坊。實擬天子之三省。故以詹事庶子領之。其選甚重。今則師傅賓客。既不復置。而詹事庶子。有名無實。其左右春坊。遂直以使臣掌之。何其輕且褻之甚耶。夫立太子而不置師傅賓客。則無以發其隆師親友。尊德樂義之心。獨使春坊使臣得侍左右。則無以防其戲慢嫖狎。奇袤雜進之害。此已非細事矣。至於皇孫德性未定。聞見未廣。又非皇太子之比。則其保養之具。尤不可以不嚴。而今日之官屬尤不備。責任尤不專。豈任事者亦有所未之思耶。謂宜深詔大臣。討論前代典故。東宮除今已置官外。別置師傅賓客之官。使與朝夕遊處。罷去春坊使臣。而使詹事庶子。各復其職。宮中之事。一言之入。一令之出。必由於此。而後通焉。又置贊善大夫。擬諫官以箴闕失。王府則宜稍放六典親王之制。置賓客咨議。以司訓導。置長史司馬。以總衆職。妙選耆德。不雜他材。皆置正員。不爲兼職。明其職掌。以責功效。則其官屬已略備矣。陛下又當以時召之。使侍燕遊。從容啓迪。凡古先聖王正心修身平治天下之要。陛下之所服行而已有效。與其勉慕而未能及。愧悔而未能免者。傾倒羅列。悉以告之。則聖子神孫。皆將有以得乎陛下心傳之妙。而宗社之安。統業之固。可以垂於永久而無窮矣。此今日急務之一也。以上輔翼太子急務之一。至於選任大臣說。則

臣前所謂勞於求賢而賢人不得用者。蓋已發其端矣。夫以陛下之聰明。豈不知天下之事。必得剛明公正之人。而後可任也哉。其所以常不得如此之人。而反容鄙夫之竊位者。非有他也。直以一念之間。未撤其私邪之蔽。而燕私之好。便嬖之流。不能盡由於法度。若用剛明公正之人。以爲輔相。則恐其有以妨吾之事。害吾之人。而不得肆。是以選掄之際。常先排擯此等。置之度外。而後取凡疲懦軟熟。平日不敢直言正色之人。而揣摩之。又于其中。得以至庸極陋。決然可保其不至於有所防者。然後舉而加之於位。是以除書未出。而其物色先定。姓名未顯。而中外已逆知其決非天下之第一流矣。此等語實甚懸直孝宗以其爲賢者而優容之耳。故以陛下之英明剛斷。略不世出。而所取以自輔者。未嘗有如汲黯魏徵之比。顧常反得如秦檜晚年之執政臺諫者而用之。彼以人臣竊國柄。而畏忠言之悟主。以發其姦也。故專取此流。以塞賢路。蔽主心。乃其勢之不得已者。陛下尊居宸極。威福自己。亦何賴於此輩。而乃與之共天下之政。以自蔽其聰明。自壞其綱紀。而使天下受其弊哉。夫其所以取之者如此。故其選之不得而精。選之不精。故任之不得而重。任之不重。則彼之所以自任者亦輕。夫以至庸之材。當至輕之任。則雖名爲大臣。而其實不過供給唯諾。奉行文書。以求不失其窠坐資級。如吏卒之爲而已。求其有以輔聖德修朝政而振紀綱。不待智者而知其必不能也。下此一等。則惟有作姦欺植黨與。納貨賄。以濁亂陛下之朝廷耳。其尤甚者。乃至十有餘年。而後敗露以去。然其列布於後。以希次補者。又已不過此等人矣。蓋自其臺諫爲侍從。而其選已如此。其後又擇其尤碌碌者而登用之。則亦無怪乎陛下常不得天下之賢材而屬任之也。然方用之初。亦曰姑欲其無所害於吾之私而已。夫豈知其所以害夫天下之公者。乃至於此哉。陛下誠反是心以求之。則庶幾乎得之矣。蓋不求其可喜。而求其可畏。不求其能適吾意。而求其能輔吾德。不憂其自任之不重。而常恐吾所以任之者之未重。不爲燕私近習一時之計。而爲宗社生靈萬世無窮之計。陛下誠以此取之。以此任之。而猶曰不得其人。則臣不信也。此今日急務之二也。以上選任大臣急務之一。至於振肅紀綱。變化風俗之說。則臣前所謂勤於立政而善政卒不得立者。亦已發其端矣。夫以陛下之心。憂勤願治。不爲不至。豈不欲夫綱維之振。風俗之美哉。但以一念之閒。未能去其私邪之弊。是以朝廷之上。忠邪雜進。刑賞不分。士大夫之閒。志趣卑污。廉恥廢壞。顧猶以爲事理之當然。而不思有以振厲矯革之也。蓋明於內然後有以齊乎外。無諸已而後可以

非諸人。今宮省之間。禁密之地。而天下不公之道。不正之人。顧乃得以窟穴盤據於其間。而陛下目見耳聞。無非不公不正之事。則其所薰蒸銷鑠。使陛下好善之心不著。疾惡之意不深。其害已有不可勝言者矣。及其作姦犯法。則陛下又未能深割私愛。而付諸外廷之議。論以有司之法。是以紀綱不能無所撓敗。而所以施諸外者。亦因是而不欲深究切之。且如頃年方伯連帥。自且如頃年以下二十二行。皆當時政事之大案。綱紀者。但未明指其姓名。今亦不能一一指出矣。嘗以有贓污不法聞者矣。鞠治未竟。而已有與郡之命。及臺臣有言。則遂與之祠祿。而理爲自陳。至於其所藏匿作過之人。則又不復逮捕付獄。名爲降官。而實以解散其事。此雖宰相曲庇鄉黨。以欺陛下。然臣竊意陛下非全然不悟其欺者。意必以爲人情各有所私。我旣欲遂我之私。則彼亦欲遂彼之私。君臣之間。顏情稔熟。則其勢不得不少容之。且以爲雖或如此。亦未至甚害於事。而不知其敗壞綱紀。使中外聞之。腹非巷議。皆有輕侮朝廷之心。姦賊之吏。則皆鼓舞相賀。不復畏陛下之法令。則亦非細故也。又如廷爭議配享。其間邪正曲直。固有所在。則兩無所問。而并去之。監司挾私以誣。郡守則不問其曲直。而兩皆罷免。監司使酒以凌。郡守亦不問其曲直。而兩皆與祠。宰相植黨營私。孤負任使。則曲加保全。而使之去。臺諫懷其私恩。陰拱不言。而陛下亦不之問也。其有初自小官擢爲臺諫。三四年間。趨和承意。不能建明一事。則年除歲遷。至極其選。一日論及一二武臣罪惡。則便斥爲郡守。而不與職名。從臣近典東畿。遠帥西蜀。一遭飛語。則體究具析。體究具析。皆宋時公牘字樣。猶今日憲究日查辦也。無所不至。及究析來上。而所聞不實。則言之者晏然亦無所訶。山陵諸使。鬻賣辟闕。煩擾吏民。御史有言。亦無行遣。而或反得超遷。御史言及畿漕。則名補卿列。而實奪之權。其所言者。則雖量加絀削。而繼以進用。從班之中。賢否猶雜。至有終歲緘默。不聞一言。以裨聖德者。顧亦隨羣逐隊。排連償補。其桀黠者。乃敢造飛語。立橫議。如臣前所陳者。而宰相畏其凶焰。反撓公議而從之。臺諫亦不敢聞於陛下。而請其罪。陛下視此紀綱爲何如。可不反求諸身而亟有以振肅之耶。以上振肅紀綱急務之三綱紀。不振於上。是以風俗頽弊於下。蓋其爲患之日久矣。而漸中尤爲甚。大率習爲軟笑之態。依阿之言。而以不分是非。不辨曲直爲得計。下之事上。固不旣少忤其意。上之御下。亦不敢稍拂其情。惟其私意之所在。則千塗萬轍。經營計較。必得而後已。甚者以金珠爲脯醢。以契券爲詩文。宰相可昭則昭。宰相。近習可通則通。近習。惟得之求。無復廉恥。父詔其

子。兄勉其弟。一用其術。而不復知有忠義名節之可貴。其俗已成之後。則雖賢人君子。亦不免習於其說。一有剛毅正直守道循理之士。出乎其間。則羣議衆排。指爲道學之人。而加以矯激之罪。上惑聖聰。下鼓流俗。蓋自朝廷之上。以及閭里之間。十數年來。以此二字。禁錮天下之賢人君子。復如崇宣之間。所謂元祐學術者。崇宣謂北宋崇寧宣和之際也。時以司馬光蘇軾等爲元祐學術。立黨人碑以禁錮之。南宋亦禁道學。排擯詆辱。必使無所容措其身而後已。嗚呼。此豈治世之事。而尙復忍言之哉。又其甚者。乃敢誦言於衆。以爲陛下嘗謂今日天下幸無變故。雖有仗節死義之士。亦何所用。此言一播。大爲識者之憂。而臣知其有以必非陛下之言也。夫仗節死義之士。當平居無事之時。誠若無所用者。然古之人君。所以必汲汲以求之者。蓋以如此之人。臨患難而外死生。則其在平世。必能輕爵祿。臨患難而能盡忠節。則其在平世。必能不詭隨。平日無事之時。得而用之。則君心正於上。風俗美於下。足以逆折姦萌。潛消禍本。自然不至真有仗節死義之事。非謂必知後日當有變故。而預蓄此人。以擬矯激。而尊寵之。是以綱紀日壞。風俗日偷。非常之禍。伏於冥冥之中。而一旦發於慮慮之所不及。平日所用之人。交臂降叛。而無一人可同患難。然後前已擯棄流落之人。始復不幸而著其忠義之節。以天寶之亂觀之。其將相貴戚近幸之臣。皆已頓顙賊庭。而起兵討賊。卒至於殺身繼族而不悔。如巡遠杲卿之流。則遠方下邑。人主不識其面目之人也。使明皇早得巡等而用之。豈不能銷患於未萌。巡等早見用於明皇。又何至真爲仗節死義之舉哉。商鑒不遠。在夏后之世。此識者所以深憂於或者之言也。雖以臣知陛下聖學高明。識慮深遠。決然不至有此譏論。然每念小人敢託聖訓以蓋其姦。而其爲害至於足以深沮天下忠臣義士之氣。則亦未嘗不痛心疾首。而不敢以識者之慮。爲過計之憂也。陛下視此風俗爲何如。可不反求諸身。而亟有以變革之耶。此今日急務之第一也。以上變革風俗急務之四。至於愛養民力。修明軍政之說。則民力之未裕。生於私心之未克。而宰相臺諫失職也。軍政之未修。生於私心之未克。而近習得以謀帥也。是數說者。臣皆以極陳於前矣。今請即民力之未裕。而推言之。臣聞虞允文之爲相也。蓋取版曹歲入窠名之。必可指擬者。號爲歲終羨餘之數。而輸之內帑。願以其有名無實。積累掛欠。空載簿籍。不可催理者。撥還版曹。窠名猶今日款目。版曹今之戶部也。必可指者。猶今日有著

之款不可催理者。猶今日無著之款。其爲說曰。內帑之積。將以備他日用兵進取不時之需。而版曹目今經費。已自不失歲入之數。聽其言誠甘且美矣。然自是以來二十餘年。內帑歲入不知幾何。而認爲私貯。典以私人。宰相不得以式貢均節其出入。版曹不得以簿書句考其在亡。其日銷月耗。以奉燕私之費者。蓋不知其幾何矣。而曷嘗聞其能用此錢以易敵人之首。如太祖皇帝之言哉。徒使版曹經費闕乏日甚。督趣日峻。以至廢去祖宗以來破分良法。舊法州縣催理官物。已及九分以上。謂之破分。諸司即亦住催。版曹亦置不問。貧民些少拖欠。亦得遷延。以待蠲免。自會懷用事。始除此法。舊欠悉行拘催。而必以十分登足爲限。以爲未足。則又造爲比較。監司郡守殿最之法。以誘脅之。不復問其政教設施之得失。而一以其能剝民奉上者爲賢。於是中外承風。競爲苛急。監司明諭州郡。郡守明諭屬邑。不必留心民事。惟務催督財賦。此民力之所以重困之本。而稅外無名之賦。如和買折帛科罰月椿之屬。尙未論也。其次則陛下所用之宰相。不能擇中外大吏。而惟徇私情之厚薄。所用之臺諫。不能公行糾劾。而惟快一己之愛憎。是以監司郡守多不得人。而其賢者或以舉職業忤臺諫而遭斥逐也。至於監司太多。而事權不歸於一。銓法雖密。而縣令未嘗擇人。則又其法之有未善者。然其本正。則此等不難爲處。其本未正。則雖或舉此。臣恐未見其益。而反有害也。以上民力未裕。又當即夫軍政之不修而推之。則臣聞日者諸將之求進也。必先掙剋士卒。以殖私財。然後以此自結於陛下之私人。而祈以姓名。達於陛下之貴將。貴將得其姓名。即以付之軍中。使自什伍以上。節次保明。稱其材武。堪任將帥。然後具爲奏牘。而言之陛下之前。陛下但見其等級推先。案牘具備。則誠以爲公薦。而可以得人矣。今軍中士卒。稟保而後具奏。當時蓋有此例。咸豐十年。王有齡令軍中將士具呈。公保何桂清。請免治罪。或亦做其例與。而豈知其諧價輸錢。已若晚唐之債帥哉。只此一事。有耳者無不聞。有口者無不道。然以其門戶幽深。蹤迹詭秘。故無路得以窺其交通之實狀。是以雖或言之。而陛下終不信也。夫將者三軍之司命。而其選置之方。乖刺如此。則彼智勇材略之人。其孰肯抑心下首於宦官宮妾之門。而陛下之所以得爲將帥者。皆庸夫走卒。固不知兵謀師律之爲何事。而惟剋剋之是先。交結之是圖矣。理直而氣剛。陛下不知其然。而猶望其修明軍政。激勸士卒。以疆國勢。豈不誤哉。以上軍政不修。然將帥之不得人。非獨兵卒之受其弊也。推其爲害之極。則又有以及乎民者。蓋將帥得人。則尺籍嚴而蓄儲羨。屯田立而漕運省。今

爲將帥者如此。則固無望其肯核軍實。而豐儲蓄矣。至於屯田。則彼自營者。尤所不願。故朝廷不免爲之別置使者。以典治之。而屯兵之衆。資其撥遣。則又不免使參其務。然聞其占護軍人。不肯募其願耕者以行。而疆其不能者以往。至屯則偃蹇不耕。而反爲民田之害。使者文吏。其力蓋有所不能制者。屯田之衆。須由軍中撥交。屯田使者不得不令諸將參與其事。占護。猶今言霸占袒護也。是以陛下欲爲之。而久不得成也。屯田不立。漕運煩費。水路輸送。日漕。陸路輸送。日運。日轉。凡物皆然。不獨米糧也。諸州苗米。至或盡數起發。而無以供州兵之食。則加耗斛面之弊。紛紛而起。而民益困矣。又凡和買折帛科罰月椿之類。往往亦爲供軍之故。而不可除。若屯田立而所資於諸路者減。則此屬庶乎其皆可禁矣。今乃不然。則是置將之不善。而害足以及民也。以上置將不善而害民。因軍政不修而民力愈困。急務之五六。凡此數者。根株深固。枝葉廣闊。若不可以朝變而夕除者。然究其本。則亦在夫陛下之反諸身耳。聖心誠無不正。則必能出私帑以歸版曹矣。版曹不至甚闕。必能復破分之法。除殿最之科。以寬州縣矣。聖心誠無不正。則必能擇宰相以選牧守矣。擇臺諫以供刺舉矣。聖心誠無不正。則必能嚴官官兵將交通之禁。而以選將屬宰相矣。宰相誠得其人。則必能爲陛下擇將帥以作士氣。計軍實。廣屯田。以省漕運矣。上自朝廷。下達州縣。治民典軍之官。既皆得人。然後明詔宰相。議省監司之員。而精其選。重其責。又詔銓曹。使以縣之劇易。分爲差等。而常切詢訪之。天下之官吏。能爲縣者。不拘薦舉之有無。不限資格之高下。而籍其姓名。使以次補最劇之縣。果有治績。則優而進之。不勝其任。則絀而退之。凡州縣之間。無名非理之供。橫斂巧取之政。其泰甚而可去者。可以漸去。而民力庶乎其可寬矣。以上因言民力而推本於正心。則百弊皆除。貫串乎大本之一。急務之四。至於屯田之利。則以臣愚見。當使大將軍募軍士。使者招遊民。各自爲屯。不相牽制。其給授課督。賞罰政令。各從本司。自爲區處。軍中自有將校可使。不須別置官吏。使者則聽其辟置官屬三五人。指使一二十人。以備使令。又擇從官。通知兵農之務。兼得軍民之情者一員。爲屯田使。總治兩司之政。而通其奏請。趣其應副。又以歲時按行。察其勤惰之實。以行誅賞。如此則兩屯心競。各務其功。田事可成。漕運可省。而諸無名非理之供。橫斂巧取之政。前日有所不獲已。而未可盡去者。今亦可以悉禁。民力庶乎其益裕矣。此今日急務之五六也。以上因民力而論改屯田之政。凡此六事。皆不可緩。而其本則在於陛下之一心。一心正則六事無不正。一有人心私

欲以介乎其間。則雖欲儻精勞力。以求正夫六事者。亦將徒爲文具。而天下之事。愈至於不可爲矣。故所謂天下之大本者。又急務之最急。而尤不可以少緩者。惟陛下深留聖意。而亟圖之。使大本誠正。急務誠修。而治效不進。國勢不彊。中原不復。仇敵不滅。則臣請伏鈇鉞之誅。以謝陛下。陛下雖欲赦之。臣亦不敢承也。以上歸於大本之正。總結上文。然又竊聞之。今日士大夫之論。其與臣不同者。非一。及究其實。則皆所謂似是而非者也。蓋其樂因循之無事者。則曰陛下之年。寢高。而天下亦幸無事。年寢高而血氣不能不衰。天下無事。則不宜更爲庸人所擾。其欲奮厲而有爲者。則又曰祖宗之積憤。不可以不據。中原之故疆。不可以不復。以此爲務。則聖心不待勸勉而自彊。舍此不圖。則雖策厲以有爲。而無所向望。以爲標準。亦卒歸於委靡而已。凡此二說。亦皆有理。而臣輒皆以爲非者。蓋樂因循者。知聖人之血氣。有時而衰。而不知聖人之志氣。無時而衰也。知天下之有事。之不可以苟安。而不知天下無事。之尤不可以少怠也。况今日之天下。又未得爲無事乎。且以衛武公言之。其年九十有五矣。猶箴儆於國。以求規諫。而作抑戒之詩。以自警。使人朝夕誦之。不離於其側。此其年豈不甚高。而其戒謹恐懼之心。豈以是而少衰乎。况陛下視武公之年。三分未及其二。而責任之重。地位之高。又有千百千萬於武公者。臣雖不肖。又安敢先處陛下於武公之下。而直謂其不能乎。且天下之事。非艱難多事之可憂。而宴安耽毒之可畏。政使功成治定。無一事之可爲。尙當朝兢夕惕。居安慮危。而不可以少怠。况今天下雖若未有目前之急。然民貧財匱。兵情將驕。外有彊暴之寇仇。內有愁怨之軍民。其他難言之患。隱於耳目之所不加。思慮之所不接者。近在堂奧之間。而遠在數千里之外。何可勝數。追計其前。既未有可見之效。卻顧於後。又未有可守之規。亦安得遽謂無事。而遂以逸豫處之乎。以上嚴因循無事之說者。其思奮厲者。又徒知恢復之不可忘。頽惰之不可久。然不知不世之大功易立。而至微之本心難保。中原之戎寇易逐。而一己之私意難除也。誠能先其所難。則其易者將不言而自辦。不先其難。而徒僥倖於其易。則雖朝夕談之不絕於口。是亦徒爲虛言。以快天下之意而已。又况此事之失。已在隆興之初。不合遽然罷兵講和。遂使宴安耽毒之害。日滋日長。而坐薪嘗膽之志。日遠日忘。是以數年以來。綱維解弛。鸞孽萌生。區區東南。事猶有不勝慮者。何恢復之可圖乎。故臣不敢隨例迎合。苟爲大言。以欺陛下。而所望者。則惟欲陛下先以東南之未治爲憂。而正心克己。以正朝廷。修政事。庶幾真實功效。可以馴至。而不至於

別生患害。以防遠圖。蓋所謂善易者不言易。而真志於恢復者。果不在於撫劍抵掌之間也。以上嚴奮厲有爲之說者。論者又或以爲陛下深於老佛之學。而得其識心見性之妙。於古先聖王之道。蓋有不約而自合者。是以不悅於世儒之常談死法。而於當世之務。則甯以管商一切功利之說爲可取。今乃以其所厭厭鄙薄者。陳於其前。亦見其言愈多而愈不合也。臣以爲此亦似是而非之論。非所以進盛德於日新也。彼老子浮屠之說。固有疑於聖賢者矣。然其實不同者。則此以性命爲真實。而彼以性命爲空虛也。此以爲實。故所謂寂然不動者。萬理粲然於其中。而民彝物則無一之不具。所謂感而遂通天下之故。則必順其事。必循其法。而無一事之或差。彼以爲空。則徒知寂滅爲樂。而不知其爲實理之原。徒知應物見形。而不知其有真妄之別也。是以自吾之說而修之。則體用一原。顯微無間。而治心修身齊家治國。無一事之非理。由彼之說。則其本末橫分。中外斷絕。雖有所謂明澈靈通。虛靜明妙者。而無所救於滅理亂倫之罪。顛倒運用之失也。故自古爲其學者。其初無不似有可喜。考其終則詖淫邪遁之見。鮮有不作而害於政事者。是以程顥常闢之曰。『自謂窮神知化。而不足以開物成務。言爲無不周徧。而實外於倫理。窮深極微。而不可以入堯舜之道。天下之學。自非淺陋固滯。則必入於此。是謂正路之榛蕪。聖門之蔽塞。闢之而後可與入道。』嗚呼。此真可謂理到之言。惜乎其未有以聞於陛下者。使陛下過聽髡徒誑妄之說。而以爲真有合於聖人之道。至分治心治身治人。以爲三術。而以儒者之學爲最下。則臣竊爲陛下憂此心之害於政事。而惜此說之布於來今也。如或未以臣言爲然。則聖質不爲不高。學之不爲不久。而所以正心修身以及天下者。其效果安在也。是豈可不思其所以然者。而亟反之哉。若夫管商功利之說。則又陋矣。陛下所以取之者。則以既斥儒者之道爲常談死法。而天下之務。日至於前。彼浮屠之學。又不足應之。是以有味乎彼之言。而冀其富國強兵。或有近效耳。然自行其說。至今幾年。而國日益貧。兵日益弱。所謂近效者。亦未之見。而聖賢所傳生財之道。理財之義。文武之怒。道德之威。則固所以爲富強之大。而反未有講之者也。豈不誤哉。今議者徒見老佛之高。管商之便。而聖賢所傳明善修身齊家治國平天下者。初無新奇可喜之說。遂以爲常談死法而不足學。夫豈知其常談之中。自有妙理。死法之中。自有活法。固非老佛管商之陋。所能彷彿其萬分也哉。伏惟陛下察臣之言。以究四說之同異而明辨之。因循奮厲老莊管商。卽上文所駁之四說也。則知臣之所言。非臣所爲之說。

乃古先聖賢之說。非聖賢所爲之說。乃天經地義自然之理。雖以堯舜禹湯文武周公之聖。顏曾伋軻之賢。而有所不能違也。則於臣之言。與夫論者之說。其爲取舍從違。不終日而決矣。以上殿老佛管商蓋孝宗生平宗旨如此。抑臣於此。又竊有感而自悲焉。蓋臣之得事陛下。於今二十有七年矣。而於其間得見陛下。數不過三。自其始見於隆興之初。固嘗輒以近習爲言矣。辛丑再見。又嘗論之。今歲三見。而其所言。又不過此。臣環方下土。田野之人。豈有積怨深怒於此曹。而固欲攻之以快己私也哉。其所以至於屢進不合而不敢悔者。區區之意。獨爲國家之計。而不敢自爲身謀。其愚亦可見矣。然自頃以來。歲月逾邁。如川之流。一往而不復返。不惟臣之蒼顏白髮。已迫遲暮。而竊仰天顏。亦覺非昔時矣。臣之鄙滯。固不能別有忠言奇謀。以裨聖德。而陛下日新之盛德。亦未能有以使臣釋然而忘其夙昔之憂也。則臣於此。安得不深有感而重自悲乎。身伏衡茅。心馳魏闕。竊不勝其愛君憂國之誠。敢冒萬死。剗瀝肺肝。以效野人食芹炙背之獻。且以自乞其不肖之身焉。以上自傷其老感君以誠伏惟陛下哀憐財赦。而擇其中。則非獨愚臣之幸。實宗社生靈之幸。臣薰誠惶誠恐昧死再拜謹言。

此篇正文。一萬一百一十字。公之自注夾行書寫者。又二千九百一十四字。北宋之萬言書。以蘇東坡王介甫兩篇爲最著。南宋之萬言書。以公此篇。及文信國對策爲最著。文章則蘇王較健。義理則公較精。篇中約分四節。第一節言所以不上殿入對。而僅陳封奏之事。故第二節陳大本一端。第三節言急務六事。第四節辨駁當時士大夫四說。第三節所指各務。皆切中時政之得失。其躉直殆過於汲黯魏徵。其氣節之激昂。則方望溪氏以擬明季楊左者。庶幾近之。他人諫其事。公則格其心。他人攻君之失。公則並糾大臣近臣之過。第二節第四節所論。皆本其平日讀書學道。深造有得之言。實有諸己。而後以獻諸君。初無一語取辦於臨時者。此非文士所可襲取也。惟過於冗長。似一筆書成。無修飾潤色之功。故乏勁健之氣。鏗鏘之節。其逐段夾行分注。以違未盡之意。似不可以爲訓。茲故置之不錄。第四節辨駁四說。似不宜屢入此篇之內。學古者不可不知。

王守仁申明賞罰以厲人心疏

據江西按察司整飭兵備帶管分巡嶺北道副使楊璋呈。『伏覩大明律內。該載失誤軍事條。領兵官已承調遣。

不依期進兵策應。若承差告報軍期而違限。因而失誤軍機者。並斬。從軍違期條。若軍臨敵境。託故違期。三日不至者斬。主將不固守條。官軍臨陣先退。及圍困敵城而逃者斬。此皆罰典也。及查得原擬直隸山東江西等處。征討流賊。陞賞事例。一人並二人爲首。就陣擒斬以次劇賊一名者五兩。二名者十兩。三名者陞實授一級。不願者費十兩。陣亡者陞一級。俱世襲。不願者費十兩。擒斬從賊六名以上至九名者。止陞實授二級。餘功加賞。不及六名。除陞一級之外。扣算賞銀。三人四人五人以上。其擒斬以次劇賊一名者。賞銀十兩均分。從賊一名者。費五兩均分。領軍把總等官。自斬賊級。不准陞賞。部下獲功七十名以上者。陞署一級。五百名者。陞授一級。不及數者。量賞一人。捕獲從賊一名者。賞銀四兩。二名者賞八兩。三名者陞一級。以次劇賊一名者。陞署一級。俱不准世襲。不願者賞五兩。此皆賞格也。以上備述例載罰典賞格。皆楊璋所引。賞罰如此。宜乎人心激勸。功無不立。然而有未能者。蓋以賞罰之典雖備。然罰典止行於參題之後。而不行於臨陣對敵之時。賞格止行於大軍征剿之日。而不行於尋常用兵之際故也。且以嶺北一道言之。四省連絡。盜賊淵藪。近年以來。如賊首謝志珊。高快馬黃秀魁。池大鬚之屬。不特攻城掠鄉。動輒數千餘徒。每每督兵追剿。不過遙爲聲勢。俟其解圍退散。卒不能取決一戰者。以無賞罰爲之激勸耳。合無申明賞罰之典。今後但遇前項賊情。領兵官不拘軍衛有司。所領兵衆。有退縮不用命者。許領兵官軍前以軍法從事。領兵官不用命者。許總統兵官軍前以軍法從事。所統兵衆。有能對敵擒斬功次。或赴敵陣亡。從實開報。覆勘是實。轉達奏聞。一體陞賞。至若生擒賊徒。鞫問明白。即時押赴市曹。斬首示衆。庶使人知警畏。亦與見行事例。決不待時。無相悖戾。如此則賞罰既明。人心激勵。盜賊生發。得以即時撲滅。糧餉可省。事功可見矣。』具呈到臣。以上錄楊璋原呈卷查三省盜賊。二三年前。總計不過三千有餘。今據各府州縣兵備守備等官。所報已將數萬。蓋已不啻十倍於前。臣嘗深求其故。詢諸官僚。訪諸父老。采諸道路。驗諸田野。皆以爲盜賊之日滋。由於招撫之太濫。招撫之太濫。由於兵力之不足。兵力之不足。由於賞罰之不行。誠有如副使楊璋所議者。臣請因是爲陛下略言其故。盜賊之性。雖皆凶頑。固亦未嘗不畏誅討。夫唯爲之而誅討不及。又從而招撫之。然後肆無所忌。蓋招撫之議。但可偶行於無辜脇從之民。而不可常行於長惡怙終之寇。可一施於回心向化之徒。而不可屢施於隨招隨叛之黨。南贛之盜。其始也被害之民。恃官府之威令。猶可聚衆而與之角。嗚之於

官。而有司者以爲既招撫之。則皆置之不問。盜賊習知官府之不彼與也。與。敵也。左傳襄二十五年一與一。謂一人敵一人也。吾鄉諺語曰。个打个。史記龍且曰。吾平生知韓信爲人易與耳。謂易敵也。此與字之古義也。陽明云。不彼與。猶俗云官府不敢惹他也。益從而讎脇之。民不任其苦。知府官之不足恃。亦遂靡然而從賊。由是盜賊益無所畏。而出劫日頻。知官府之必將己招也。百姓益無所恃。而從賊日衆。知府官之必不爲己地也。夫平夏有冤苦無伸。而盜賊乃無求不遂。爲民者困征輸之劇。而爲盜者獲犒賞之勤。則亦何苦而不彼從乎。是故近賊者爲之戰守。遠賊者爲之鄉導。處城郭者爲之交援。在官府者爲之間諜。其始出於避禍。其卒也從而利之。故曰。盜賊之日滋。由於招撫之太濫者。此也。以上敘招撫太濫。夫盜賊之害。神怒人怨。孰不痛心。而獨有司者。必欲招撫之。亦豈得已哉。誠使疆兵悍卒。足以殲渠魁而蕩巢穴。則百姓之憤雪。地方之患除。功成名立。豈非其所欲哉。然而南贛之兵。素不練養。類皆脆弱驕惰。每遇征發。追呼拘攝。旬日而始集。約東齋遣。又旬日而始至。則賊已捆載歸巢矣。或猶遇其未退。望賊塵而先奔。不及交鋒而已敗。以是禦寇。猶驅羣羊而攻猛虎也。安得不以招撫爲事乎。故凡南贛之用兵。不過文移調遣。以苟免坐視之罰。應名勦捕。聊爲招撫之媒。求之實用。斷有不敢。何則。兵力不足。則勦捕未必能克。勦捕不克。則必有失律之咎。則必征調日繁。督責日至。糾舉論劾者。四面而起。往往坐是而至於落職敗名者有之。招撫之策行。則可以安居而無事。可以無調發之勞。可以無戴罪殺賊之責。無地方多事不得遷轉之滯。夫如是。孰不以招撫爲得計。是故甯使百姓之荼毒。而不敢出一卒以抗方張之虜。甯使孤兒寡婦之號哭。顛連疾苦之無告。而不敢提一旅以忤反招之賊。蓋招撫之議。其始也。出於不得已。其卒也。遂守以爲常策。故曰。招撫之太濫。由於兵力之不足者。此也。以上敘兵力不足。古之善用兵者。驅市人而使戰。收散亡之卒。以抗疆虜。今南贛之兵。尙足以及數千。豈盡無可用乎。然而金之不止。鼓之不進。未見敵而亡。不待戰而北。何者。進而效死。無爵賞之勸。退而奔逃。無誅戮之及。則進有必死而退有幸生也。何苦而求必死乎。吳起有云。『法令不明。賞罰不信。雖有百萬。何益於用。』凡兵之情。畏我則不畏敵。畏敵則不畏我。今南贛之兵。皆畏敵而不畏我。欲求其用。安可得乎。故曰。兵力之不足。由於賞罰之不行者。此也。以上敘賞罰不行。今朝廷賞罰之典。固未嘗不具。但未申明而舉行耳。古者賞不踰時。罰不後事。過時而賞。與無賞同。後事而罰。與不罰同。況過時而不賞。後事

而不罰。其亦何以齊一人心。而作興士氣。是雖使韓白爲將。亦不能有所成。况如臣等腐儒小生。才識昧劣。而素不知兵者。亦復何所冀乎。議者以南贛諸處之賊。連絡數郡。蟠據四省。非奏調狼兵。大舉夾攻。恐不足以掃蕩巢穴。是固一說也。然臣以爲狼兵之調。非獨所費不貲。兼其所過殘掠。不下於盜。大兵之興。曠日持久。聲勢彰聞。比及舉事。諸賊渠魁。悉已逃遁。所可得者。不過老弱脅從。無知之民。於是乎有橫罹之慘。於是乎有妄殺之弊。班師未幾。而山林之間。復已呼嘯成羣。此皆往事之已驗者。臣亦近揀南贛之精銳。得二千有餘。部勒操演。略有可觀。誠使得以大軍誅討之。賞罰而行之。平時。假臣等以便宜行事。不限以時。而惟成功是責。則比於大軍之舉。臣竊以爲可省半費。而收倍功。以上言不必調狼兵。但用南贛之兵。行大軍誅討之例。即可成功。臣請以近事證之。臣於本年正月十五日抵贛。卷查兵部所咨。申明律例。今後地方但有草賊生發。事情緊急。該管官司。即便依律調撥官軍。乘機勦捕。應合會捕者。亦就調發策應。但係軍情火速。差人申奏。敢有遲延隱匿。巡撫巡按三司官。即便參問。依律罷職充軍等項。發落。雖不係聚草賊。但係有名強盜。肆行劫掠。賊勢凶惡。或白晝攔截。或明火持杖。不拘人數多少。一面設法緝捕。即時差人申報。合于上司。并具申本部。知會處置。如有仍前朦朧隱蔽。不即申報。以致聚衆滋蔓。貽患地方。從重參究。決不輕貸等因。題封欽依。備行前來。右八行錄兵部文欽依。今日欽遵。備行今日行知。或曰。咨行移行時。以前官久缺。未及施行。臣即刊印數千百紙。通行所屬。布告遠近。未及一月。而大小衙門。以賊情來報者接踵。亦遂屢有斬獲一二人。或五六人。七八人者。何者。兵得隨時調用。而官無觀望掣肘。則自然無可推託逃避。思效其力。由此言之。律例具存。前此唯不申明而舉行耳。今使賞罰之典。悉從而申明之。其獲效亦未必不如是之速也。伏望皇上念盜賊之日熾。哀民生之日蹙。憫地方荼毒之愈甚。痛百姓冤憤之莫伸。特敕兵部俯采下議。特假臣等。令旗令牌。使得便宜行事。如是而兵有不精。賊有不滅。臣等亦無以逃其死。以上言申明律例。獲效必速。請頒令旗令牌。夫任不專。權不重。賞罰不行。以至於儻軍敗事。然後選重臣。假以總制之權。而往拯之。縱善其後。已無救於其所失矣。臣才識淺昧。且體弱多病。自度無足以辦此。行從陛下乞骸骨。苟全餘喘於林下。但今方待罪於此。心知其弊。不敢不爲陛下盡言。自請旗牌。恐人疑爲貪權。故又自明其脫履名位之素志。陛下從臣之請。使後來者得效其分寸。收討賊之功。臣亦得以少道死罪於萬一。

文章之道。以氣象光明俊偉爲最難而可貴。如久雨初晴。登高山而望曠野。如樓俯大江。獨坐明窗淨几之下。而可以遠眺。如英雄俠士。褐裘表而來。絕無齷齪猥鄙之態。此三者。皆光明俊偉之象。文中有此氣象者。大抵得於天授。不盡關乎學術。自孟子韓子而外。惟賈生及陸敬輿蘇子瞻。得此氣象最多。陽明之文。亦有光明俊偉之象。雖辭旨不甚淵雅。而其軒爽洞達。如與曉事人語。表裏粲然。中邊俱徹。固自不可幾及也。沅弟之文。筆光明豁達。得之天授。若更加以學力。使篇幅不失之冗長。字句悉歸於精當。則優入古人之域。不自覺矣。

方苞請矯除積習興起人材劄子

此疏爲乾隆二年所上。公年七十矣。公以康熙三十八年舉於鄉。四十五年成進士。時年三十九歲。因聞母病。未應殿試而歸。五十年。以戴名世之案。被逮入京。下獄。五十二年出獄。召入南書房。雍正間。屢遷至內閣學士。乾隆二年。擢禮部右侍郎。上此疏。

臣聞人臣之義。國爾忘家。君爾忘身。士大夫敦尙氣節。東漢以後。惟前明爲盛。居官而致富厚。則朝士避之若浼。鄉里皆以爲羞。至論大事。擊權姦。則大臣多以去就爭。臺諫之官。朝受廷杖。諫疏夕具。連名繼進。至魏忠賢播惡。自公卿以及庶官。甘流竄。捐腰領。受錐鑿炮烙之毒。而不悔者。踵相接也。雖曰激於意氣。然亦不可謂非忠孝之實心矣。惟其如是。故正嘉以後。國政偵於上。而臣節砥於下。賴以維持而不至亂亡者。尙百有餘年。以上言前明氣節之感。臣竊見之。本朝敬禮大臣。優恤庶官。遠過於前明。而公卿大臣。抗節效忠者。寥寥無幾。士大夫之氣習風聲。則遠不逮也。臣少遊四方。所至輒問守土之吏之爲民利病者。無何而大病於民者。已列薦章矣。民所愛戴者。多因事罷黜矣。叩其故。則曰此富人也。非然。則督撫之親戚故舊也。非然。則善於趨承詭法逢迎者也。其罷黜者。則以某事忤某上官耳。間有貪殘而被劾。循良而得舉者。則督撫兩司中。必有賢者焉。而亦寥寥可數矣。以上言外官之積習。至於九卿乃九牧之倡。萬官庶事之樞紐也。督撫臺垣之條奏。特下九卿。必國體民生所繫。猶叩樹本。百枝皆動。而可或有差忒乎。以臣所聞見。凡下廷議。其爲督撫所奏請。則衆皆曰此某部某長官所交好也。或上方嚮用。未敢駁正也。已而議上。則果謂宜從矣。其爲科道所條奏。則衆皆曰原議某所建也。其事某某所不

利也。已而議上，則果謂必不可從矣。科道條奏部議駁斥者多，此風後來更甚。同官中卽有持正而力爭，各部院卽有心知其非，不肯畫題者，而其議之上達自若也。其保舉僚屬，半出私意，亦不異於外吏。但偏近輦轂，耳目衆著，出於公道，尙可參半耳。以上言京官之積習，是以聖祖仁皇帝中年以後，灼知此弊，刑誅流錮，以懲姦貪，拔擢矜全，以勸廉吏，而親信清公樸實之人。世祖憲皇帝敬承此意，極力廓清，宵旰孜孜，惟務發外吏之欺蒙，破在廷之結習，十餘年間，少知畏法，而終未革心。蓋由營私附勢之習深，而正直公忠之人少也。我皇上至誠惻怛，諄諄開諭，可謂深切著明矣。而特旨薦舉，服在大僚，尙或引用富人，以便身家，在外督撫，多以報荒爲難，而州縣又以匿荒爲自安之計，其有不肖者，每遭歲歉，轉日夜徵比，以迫蹙貧民，冀邀蠲免，因緣爲利，此風不改，則皇上日夜憂勤於上，而治教禁令，不能不墮壞於冥昧之中，尙安望百度之皆釐，實德之及下乎？以上言三聖整頓而積習未革，臣伏讀三年中前後諭旨，於臣所陳之積弊，亦既洞晰於聖心，而思有以矯革之矣。然所以矯革之者，則有本統焉。文武之政，非其人猶莫舉，而知人則哲，帝堯猶難之。治道之興，必內而六部都察院，各得忠誠無私，深識治體者兩三人，然後可以檢制僚屬，而防胥吏之姦欺，外而督撫兩司，每省必得公正無欲通達事理者三四人，然後可董率道府，辦察州縣，以切究生民之利病，能如此者，乃有才有識有守，而幾於有德者也。雖數人十數人，不易得，況一旦而得數十人哉？然不如是，終不可以興道而致治。孟子云：猶七年之病，求三年之艾也。自古聖君賢主，未嘗借才於異代，亦惟我皇上勤心以察之，依類以求之，按實積久以磨礪之，信賞必罰，期以勸懲之耳。以上言爲政在於得人，知人之道有四端，所謂勤心以察之者，一則明辨部議會議是非之實也，凡一事之興廢，其利害常伏於數傳之後，故雖周公之聖，猶有仰而思之，夜以繼日，而未得者，況庸常之人，雜以私意，而揣摩瞻徇乎？而姦邪文法之吏，每能巧飾偏辭，變亂是非，言之鑿鑿，使觀者難辨。孔子所以惡佞之亂義，惡利口之覆邦家也。是以唐宋以來，凡廷議以宰相爲斷決之，以學士參議之，以給事中駁正之，自明中葉以後，姦相擅權，毒流天下。聖祖仁皇帝時，亦有以招撫籠賄，家累鉅萬者，賴聖明剛斷，同時罷黜，而自是以後，潔己自好者，皆以避權爲安。內閣擬票，雖有兩簽，從未有摘發部議之非，而奏請政議者，古者御史之外，別設給事中，專駁宰相成議，上及詔旨，而南宋以後，舊典寢廢，以故朱子屢數之，以臣所聞見，聖祖仁皇帝，世祖憲皇帝，暨我皇上，特有盡屏廷議。

而獨斷其行止者。命下必大服衆心。故臣愚以爲凡部議會議。有關於國體民生者。勿遽批發。必再三尋覽。以究其事理之虛實。意見之公私。微有所疑。必召平時聖心素信其忠誠無私。通達事理者。盡屏左右。每人而獨問之。參伍衆說。然後內斷於聖心。此卽虞舜好問好察。以輔其惟精惟一之學。而孔子所歎爲大智也。臣伏見皇上於部議從者十九。於九卿兩議。大抵從其列名衆多者。道路之口。頗有未協。聖心如天。或以爲主議者衆。必人心所同。而不知其實乃本部一二人之私意。或九卿中一二人之偏見。怯懦瞻徇者。明知其非。而不敢辨也。右勤察部議會議。抑又聞用人之道。惟知之爲難。凡人之智識。必叩之而後知其材勇。必試之而後見其忠邪誠僞。必久與之習。而後得其真。太公望。文王之師也。武王用之。猶反覆窮究。相與問答者。凡數萬言。管夷吾。齊國之望。鮑叔牙所深知也。桓公用之。猶每事諮度。相與問答者。凡數萬言。武王問太公之語。見六韜。桓公問管仲之語。見管子。各數萬言。方今四海九州。萬事百度。皆總歸於六部。而決於卿貳五六人。每日文書到部。最少一二百件。苟一事之失其理。則姦心必滋於蠹吏。實害必被於兵民。即此五六人皆至公至明。虛己和衷。日夜講求。尙慮其有失誤。而我皇上於六部卿貳中。灼知其才識。深信其忠誠者。凡幾人乎。古聖王用人惟己。必先勞於求賢。臣伏願皇上惟盛暑嚴寒。宜安聖躬。不可過勞。外此少之餘閒。即延見廷臣。凡六部都察院奏事。披覽之下。微有所疑。卽召見問訊。使各陳所見。聽其言語。則明昧可知矣。觀其氣象。察其精神。則公正私曲。大略可見矣。卽有利口而飾爲抗直。邪媚而貌類恪恭者。以我皇上之至誠至明。久與之習。必有呈露於幾微。而不能自揜者矣。其餘京堂科道條陳。屢合事理。翰林敷奏。深當聖心者。亦宜慎選其人。俾輪班侍值。事有疑難。隨時召問。以習察其志行。而劑度其材能。至于大僚中。已爲我皇上所深信者。尤宜朝夕燕見。與議論天下之事。以窮究其底蘊。右勤察部院堂官果能忠誠無私。而又通達事理。則於同官百吏。皆能助皇上以檢察。而得其實矣。以上勤心以察之。所謂依類以求之者。天下惟君子與小人。性情心術。如冰炭之不相入。小人所悅。必諛佞側媚者。雖有才智。而爲國患更深。樸直清慎者。雖無才智。尙可奉公守法。竭力自效。是以周公立政之篇。所三致意者。惟勿用儉人。而求吉士。以勸相國家而已。所謂儉人。諛佞側媚而有才智者也。所謂勸相。樸直清正之士。雖才智不足。而率作策勵。尙可以有輔於庶政也。自古有君子而誤信小人者。斷無小人而能進君子者。故求賢之道。必以其類爲招。保舉舊例。臨時按品秩。

資格。俾各舉一二人。法本無愆。而人多難信。我皇上於在內之九卿。在外之督撫。深信其忠誠無欲者。必各有數人。伏願特下密旨。命盡舉所知。而別其才之所宜。然後考覆試驗。而次第用之。比之按資格以汎舉者。必爲得實。而聽請託利身家之結習。不禁而自除矣。以上依賴以求之。所謂切實積久以磨礱者。自漢唐以後。雖仍大官之名。而職事多非周官之舊矣。而就今功令所宜秉承者。則吏部之職。非獨按籍呼名。循例黜陟也。其實在使請囑者。望風而自止。巧法者百變而難欺。戶部之職。非獨謹守管鑰。會計出納也。其實在明於萬貨滋殖之源。生民實耗之本。禮部雖奉行舊典。而事有特舉。必當酌古準今。可爲後法。且寅清端直。無玷其官。兵部之實。在戢將校之驕氣。以綏靖兵民。消禍變于無形。以折衝萬里。此段立論太高。多不切於事實。今之兵部與將校並不相接。何能勦其驕氣。刑部之實。在時情罪之寬嚴。以砥維風教。辦四方之僞獄。以震懾職司。工部之實。在識海內山川之形勢。以知疏鑿之宜。覈水土人功之等差。以定工程之度。至於都察院之設。本以肅朝廷之綱紀。做百吏之官常。劾中外文武之不法。而自副都御史郭琇排擊要人以後。郭琇參劾明珠名震中外五十年來。未聞力爭國家之大事。斥指大吏之非人者。不過掌行過文書而已。然則此職蓋幾於虛曠矣。伏願我皇上於部院卿貳。必慎簡忠誠。而以明達者佐之。辨其材之所宜。而各責之以實。使日夜奮勵其僚屬。而隨時以進退之。則中材以上。咸自矜奮。數年以來。公正之風可作。而練達事理者亦漸多矣。以上切實積久以磨礱之。所謂信賞必罰以懲勸者。凡中人之志行。多以獎進激勵而成。平時主部議者。不過正卿中一二人。主會議者。不過九卿中皇上所嚮用之數人。順從緘默者。長得自安。據理直言者。必遭忌嫉。積習爲常。所以靡靡日趨於瞻徇。而非果竟無人也。倘我皇上時時延見。一一考驗。忠詳者篤信之。明達者褒嘉之。懷私者廢斥之。庸昧者退罷之。則旬歲之間。勃然而興起矣。世宗憲皇帝於大計保舉之員。賊罪敗露。督撫降調。司道革職。條例甚嚴。而奉行不實。惟奉特旨。獨舉一人者。降調甚多。而督撫司道之計典無聞焉。蓋以所舉衆多。不能盡詰。而姑從寬貸耳。用此賂請陰行。舉劾顛倒。無所顧忌。若一依雍正六年定例。執法不移。則孰敢徇私任意以自累乎。自耗羨歸公以後。以下言州縣及京官資給宜優。與本段信賞必罰之意。不相聯貫。州縣之繁劇者。養廉至千數百金。猶不足延幕客。辦公事。在內諸司。雖蒙加俸一倍。猶不足以僦屋賃僕。秣馬供車。伏願通計天下之耗羨。及經賦所餘。詳加籌畫。必使州縣得備其公事。諸司得

贖其身家。然後一犯賊私。嚴法不貸。其聲績顯著者。則時賜金帛。進爵秩。而使久於其任。如此則凡爲吏者。皆得俯仰窺然。潔己以奉公。孰肯苟且行私。以自取終身之墜陷乎。以上信賞必罰。以懲勸之。信能行此四者。則忠良有恃以不恐。奸邪有術而難施。中外大臣。日夜孜孜。以進賢退不肖爲己任。庶司百吏。皆知奉公守法。潔己愛民之爲安。數年之後。衆正盈庭。官守經法。民無倖心。雖大艱猝投。無難共濟。而況舉先王足民之大經。布前代屢驗之良法。尙何慮其阻撓廢格。縱私生事以擾民乎。至於民食既足。則當漸爲禮俗之防。官常既修。則當實講教士之法。內治既定。則興屯衛於邊關。設軍田於內地。使精神可以折衝。立制防於海嶠。謹治教於苗疆。使患消于未兆。皆宜次第修舉。而臣不敢以爲言。誠以積習不除。人材不足。官常不立。則爲之而必不可成。成之而必不可久也。凡所陳奏。皆臣五十年來所耳聞目見。確知其狀。不得入告聖明者。臣老矣。生世無幾時。如以臣言爲可用。伏望留臣此摺。以驗羣情。以考治法。時復賜覽。如用臣言。而無利於民。無益於國。雖臣死之後。尙可奪臣之爵命。播臣之過言。以示懲責也。昧死上陳。不勝悚息瞻企之至。謹奏。

望溪先生古文辭。爲國家二百餘年之冠。學者久無異辭。卽其經術之湛深。入股文之雄厚。亦不愧爲一代大儒。雖乾嘉以來。漢學諸家。百方攻擊。曾無損於毫末。惟其經世之學。持論太高。當時同志諸老。自朱文端楊文定數人外。多見謂迂闊而不近人情。此疏閱歷極深。四條皆確實可行。而文氣深厚。則國朝奏議中所罕見。況甫生平篤慕望溪。嘗欲疏請從祀孔廟。蓋將奉爲依歸。昔望溪於乾隆初。請以湯文正從祀聖廟。未蒙俞允。厥後道光三年。湯公果祔祀聖廟。而望溪之志行。幾與湯公相伯仲。躋之兩廡。殆無愧色。沅甫知取法乎上。或亦慨然睇古而思齊與。

孫嘉淦三習一弊疏

臣一介庸愚。學識淺陋。荷蒙風紀重任。乾隆元年。孫文定公進此疏時。爲左都御史。故曰風紀重任。日夜悚惶。思竭愚夫之千慮。仰贊高深於萬一。而數月以來。捧讀上諭。仁心仁政。愷切周詳。凡臣民之心所欲。而口不敢言者。皇上之心而已。皇上之心。仁孝誠敬。加以明恕。豈復尙有可議。而臣猶欲有言者。正於心無不純。政無不善之中。

而有所慮焉。故過計而預防之也。今夫治亂之循環。如陰陽之運行。坤陰極盛而陽生。乾陽極盛而陰始。事當極盛之際。必有陰伏之機。其機藏於至微。人不能覺。而及其既著。遂積重而不可返。此其間有三習焉。不可不慎戒也。以上總舉大意。言治亂循環。倚伏其機甚微。主德清則臣心服而頌。仁政多則民身受而感。出一言而盈廷稱聖。發一令而四海謳歌。在臣民原非獻諛。然而人君之耳。則熟於此矣。耳與譽化。匪譽則逆。故始而匡拂者拒。繼而木訥者厭。久而頌揚之不工者亦絀矣。是謂耳習於所聞。則喜諛而惡直。上愈智則下愈愚。上愈能則下愈畏。趨踰諂脇。顧盼而皆然。免冠叩首。應聲而卽是。在臣工以爲盡禮。然而人君之目。則熟于此矣。目與媚化。匪媚則觸。故始而倨野者斥。繼而嚴憚者疏。久而便辟之不巧者亦忤矣。是謂目習於所見。則喜柔而惡剛。敬求天下之士。見之多而以爲無奇也。則高己而卑人。慎辦天下之務。閱之久而以爲無難也。則雄才而易事。質之人而不聞其所短。返之己而不見其所過。於是乎意之所欲。信以爲不踰。令之所發。概期於必行矣。是謂心習於所是。則喜從而惡違。三習既成。乃生一弊。何謂一弊。喜小人而厭君子是也。以上實指耳目心三習。生一喜小人而厭君子之弊。今夫進君子而退小人。豈獨三代以上知之哉。雖叔季之主。臨政願治。孰不用君子。且自智之君。各賢其臣。孰不以爲吾所用者必君子。而決非小人。乃卒於小人進而君子退者。無他。用才而不用德故也。德者。君子之所獨。才則小人與君子共之。而且勝焉。語言奏對。君子訥而小人佞諛。則與耳習投矣。奔走周旋。君子拙而小人便辟。則與目習投矣。卽課事考勞。君子孤行其意。而恥於言功。小人巧而迎合。而工於顯勤。則與心習又投矣。小人挾其所長以善投。人君溺於所習而不覺。審聽之而其言入耳。諦觀之而其貌悅目。歷試之而其才稱乎心也。於是乎小人不約而自合。君子不逐而自離。夫至於小人合而君子離。其患豈可勝言哉。而揆厥所由。皆三習爲之蔽焉。治亂之機。千古一轍。可考而知也。以上言所以小人進而君子退之故。皆由三習有以引之。而不自覺。我皇上聖明首出。無微不照。登庸耆碩。賢才彙升。豈惟並無此弊。亦並未有此習。然臣正及其未習也。而言之。設其習既成。則有知之而不敢言。抑或言之而不見聽者矣。今欲預除三習。永杜一弊。不在乎外。惟在乎心。故臣願言皇上之心也。語曰。『人非聖人。孰能無過。』此淺言也。夫聖人豈無過哉。惟聖人而後能知過。惟聖人而後能改過。孔子曰。『五十以學易。可以無大過矣。』大過且有。小過可知也。聖人在下。過在一身。聖人在上。過在一世。書

曰。『百姓有過。在予一人』是也。文王之民無凍餒。而猶視以爲如傷。惟文王知其傷也。文王之易貫天人。而猶望道而未見。惟文王知其未見也。賢人之過。庸人不知。聖人之過。聖人知之。賢人不知。欲望人之繩愆糾謬。而及於所不知。難已。故望皇上之聖心自懷之也。危微之辨精。而後知執中難允。懷保之願宏。而後知民隱難周。謹幾存誠。返之己。而真知其不足。老安少懷。驗之世。而實見其未能。夫而後欲然不敢以自是。不敢自是之意。流貫於用人行政之間。夫而後知諫諍切確者。愛我良深。則諛悅爲容者。愚己而陷之阱也。耳目之習除。而便辟善柔便佞之態。一見而若澆。取舍之極定。而嗜好宴安功利之說。無緣以相投。夫而後治臻於郅隆。化成於久道。以上言惟聖人能自見其過。而匡君以不自是。不自是。而自是之根不拔。則雖斂心爲慎。慎之久而覺其無過。則謂可以少寬。勵志爲勤。勤之久而覺其有功。則謂可以稍慰。夫賢良輔弼。海宇昇平。人君之心稍慰。而欲少自寬。似亦無害於天下。而不知此念一轉。則嗜好宴安功利之說。漸入耳而不煩。而便辟善柔便佞者。亦熟視而不見。其可憎。久而習焉。忽不自知。而爲其所中。則黑白可以轉色。而東西可以易位。所謂機伏於至微。而勢成于不可返者。此之謂也。是豈可不慎戒而預防之哉。書曰。『滿招損謙受益』。又曰。『德日新。萬邦爲懷。志自滿。九族乃離』。大學言見賢而不能舉。見不賢而不能退。至於好惡拂人之性。而推所由失。皆因於驕泰。滿與驕泰者。自是之謂也。以上極言自是之害。由此觀之。治亂之機。轉於君子小人之進退。進退之機。握於人君一心之敬肆。能知非。則心不期敬而自敬。不見過。則心不期肆而自肆。敬者君子之招而治之本。肆者小人之媒而亂之階也。然則沿流溯源。約言蔽義。惟望我皇上時時事事。常存不敢自是之心。而天德王道。舉不外於此矣。以上總言治亂原於君子小人之進退。而實根於不自是。語曰。『狂夫之言。而聖人擇焉』。臣幸生聖世。昌言不諱。故敢竭其狂瞽。伏惟皇上包容而垂察焉。則天下幸甚。

乾隆初。鄂張兩相當國。蔡文勤輔翼聖德。高宗聰明天亶。如旭日初升。四海清明。每詔諭禎示中外。識者以比之典謨誓誥。獨孫文定公。以不自是。匡弼聖德。可謂憂盛危明。以道事君者矣。純廟御宇六十年。盛德大業。始終不懈。未必非此疏裨助高深。厥後嘉慶元年。道光元年。臣僚皆抄此疏進呈。至道光三十年。文宗登極。壽陽相國祁雋藻。亦抄此疏進呈。余在京時。聞諸士友。多稱此疏爲本朝第一。余以其文氣不甚高古。稍移易。

之。近年細加紬繹。其所云三習一弊。凡中智以上。大抵皆蹈此弊。而不自觉。而所云自是之根不拔。黑白可以轉色。東西可以易位。亦非絕大智慧。猛加警惕者不能道。余與沅弟忝竊高位。多聞諛言。所謂三習者。余自反實所難免。沅弟屬官較少。此習較淺。然亦不可不預爲之防。吾昆弟各錄一通於座右。亦小宛詩人邁征之邁也。

鳴原堂論文後序

右鳴原堂論文兩卷。吾師湘鄉曾文正公選漢唐已來。迄於國朝名臣奏疏十七首。論述義法。以詒其弟沅甫宮保者。宮保出示定安。命校讎刊之。敘曰。三代以上。人臣告誡其君。如禹皋伊周召之所作。載在尙書。尙已。彼皆聖賢之徒。體道深而更事久。其陳義甚高。而可見諸施行。其指斥甚直。而必出之和平淵懿。不爲危言悚論。詭激抵觸之辭。其託意甚幽邃。而使讀者易曉。其切于世情。而達於時變也。仍必原本道德。不爲一切苟且僥倖之計。至於春秋內外傳所錄訐謏讜言。篤厚深笑。猶有訓誥遺意。下逮戰國士。或爲廋詞隱語。譏訕笑詈。聳撼炫駭。同於俳優。其不幸者。觸怒人主。身蹈大戮。禍甚烈矣。說亦稍戇焉。自茲以降。敷陳之道。約分兩途。儒者拘牽文義。喜談上古。致君必曰堯舜。禮樂必俟百年。井田封建學校之制。累牘而不煩。世主習聞其迂。則以爲老生常談。而厭薄之。奇才之士。度時之所能行。揣摩迎合。以售其縱橫富彊之術。往往輒驗。天下稍驚於功利矣。若夫漢之賈誼。唐之陸贄。宋之蘇軾。陳善責難。累數萬言。論是非則持其平。講制度則求其當。達閭閻顛連之隱狀。顯軍中倚伏之秘謀。高而不戾於今。卑而不違夫古。豈非敷奏之極軌哉。善乎。公之論文也。曰。『必其平日讀書學道。深造有得。實有諸己。而後獻諸君。又必熟于前代事蹟。本朝掌故。乃爲典雅。』嗚呼。斯言盡之矣。公所爲奏疏若干卷。其佳篇傳播人間。士大夫多能舉其詞。所選經史百家雜鈔二十六卷。另刊行世。是書卷帙不多。蓋猶黃河之濫觴耳。然苟循河而東。乘秋水。駕巨筏。以望於北海。洋洋乎包天地而涵古今。豈不更爲宇宙大觀也哉。同治十二年九月。門人東湖王定安敘於長沙寓齋。

仿古字版

曾文正公孟子要略

世界書局印行

序

凡孟子書二百六十章。朱子采入要略者八十五章。其不入者曰。孟子見梁惠王。王立于沼上。章。寡人之于國也。章。寡人願安承教。章。晉國天下莫強焉。章。孟子見梁襄王。莊暴見孟子曰。章。文王之囿。章。交鄰國有道乎。章。齊宣王見孟子于雪宮。章。人皆謂我毀明堂。章。王之臣有託其妻子。章。所謂故國者。章。湯放桀。武王伐紂。章。爲巨室。章。齊人伐燕。勝之。章。齊人伐燕。取之。章。鄒與魯鬪。章。滕小國也。章。滕小國也。竭力以事大國。章。以上梁惠王篇。曰。仁則榮。章。尊賢使能。章。伯夷非其君不事。章。天時不如地利。章。孟子將朝王。章。前日于齊。王餽兼金一百而不受。章。孟子之平陸。章。孟子謂蚘蠹曰。章。孟子爲卿于齊。章。孟子自齊葬于魯。章。沈同以其私問曰。章。燕人畔。章。孟子致爲臣而歸。章。孟子去齊。宿于晝。章。孟子去齊。尹士語人曰。章。孟子去齊。居休章。以上公孫丑篇。曰。滕定公薨。章。滕文公問爲國。章。有爲神農之言者。章。墨者夷之。章。周霄問曰。章。彭更問曰。後車數十乘。章。宋小國也。今將行王政。章。孟子謂戴不勝曰。章。不見諸侯。何義。章。戴盈之曰。章。陳仲子。章。以上滕文公篇。曰。三代之得天下也。章。人有恆言。章。天下有道。小德役大德。章。桀紂之失天下也。章。居下位而不獲于上。章。伯夷辟紂。章。求也爲季氏宰。章。存乎人者。章。恭者不侮人。章。男女授受不親。章。君子之不教子。章。有不虞之譽。章。人之易其言也。章。人之患章。樂正子從于子敖之齊。章。子之從于子敖來。章。不孝有三。章。舜生于諸馮。章。子產聽鄭國之政。章。君之視臣。如手足。章。無罪而殺士。章。君仁莫不仁。章。非禮之禮。章。中也養不中。章。言人之不善。章。言不必信。章。養生者。章。博學而詳說之。章。以善服人者。章。言無實不詳。章。徐子曰。章。王者之迹熄。章。君子之澤。章。可以取。章。逢蒙學射于羿。章。西子蒙不潔。章。天下之言性也。章。公行子章。匡章通國皆稱不孝焉。章。曾子居武城。章。儲子曰。章。齊人有一妻一妾。章。以上離婁篇。曰。語云。盛德之士。章。堯以天下與舜。章。人有言至于禹而德衰。章。百里奚自鬻于秦。章。周室班爵祿也。章。敢問友。章。敢問交際何心也。章。士之不託諸侯。章。敢問不見諸侯。章。孟子謂萬章曰。一鄉之善士。章。齊宣王問卿。章。以上萬章篇。曰。性猶杞柳也。章。生之謂性。章。何以謂義內也。章。羿之教人射。章。任人有問屋廬子曰。章。小弁。小人人之詩也。章。孟子居鄒。章。先名實者。章。五霸者。章。魯欲使慎子爲將軍。章。今之事君者。

章。吾欲二十而取一章。丹之治水也章。君子不亮章。魯欲使樂正子爲政章。古之君子如何則仕章。教亦多術矣章。（以上告子篇）曰。行之而不著焉章。恥之于人大矣章。古之賢王章。孟子謂宋勾踐曰章。待文王而後興者章。附之以韓魏之家章。以佚道使民章。霸者之民章。仁言不如仁聲章。舜之居深山之中章。人之有德慧術知者章。有事君人者章。伯夷辟紂章。易其田疇章。孔子登東山章。楊子取爲我章。柳下惠不以三公易其介章。有爲者譬若掘井章。伊尹曰。予不狎于不順章。詩曰。不素餐兮章。仲子不義章。孟子自范之齊章。食而弗愛章。齊宣王欲短喪章。君子之所以教者五章。道則高矣笑矣章。天下有道章。滕更之在門也章。知者無不知也章。不仁哉梁惠王也章。春秋無義戰章。盡信書章。有人曰。我善爲陳章。梓匠輪輿章。舜之飯糗茹草也章。吾今而後知殺人親之重也章。古之爲關也章。身不行道章。周于利者章。好名之人章。不信仁賢章。不仁而得國者章。民爲貴章。仁也者人也章。孔子之去魯曰章。君子之厄于陳蔡之間章。貉稽曰章。賢者以其昭昭章。山徑之蹊間章。禹之聲章。齊飢陳臻曰章。逃墨必歸于楊章。有布縷之征章。諸侯之寶三章。盆成括仕于齊章。孟子之滕館于上宮章。曾皙嗜羊棗章。由堯舜至于湯章。（以上盡心篇）都一百七十五章。孟子之書。自漢唐以來。不列于學官。陸氏經典釋文亦不之及。而司馬光晁說之之倫。更相疑詆。至二程子始表章之。而朱子遂定爲『四書』。既薈萃諸家之說。爲孟子精義。又采其尤者。爲集注七卷。又剖析異同。爲或問十四卷。用力亦已勤矣。而茲又簡擇爲要略五卷。好之如此其篤也。蓋深造自得。則夫詠于心而味于口者。左右而逢其源。參伍錯綜而備其條理。雖以國藩旣承亡友劉君遺之。亦但見其首尾完具。而不復知衡決顛倒之爲病。則其犁然而當于人人之心。可知已。國藩旣承亡友劉君遺令。爲之排定付刻。因頗仿近思錄之例。疏明分卷之大指。俾讀者一覽而得焉。大賢之旨趣。誠知非末學所可幸中。獨未知于吾亡友之意。合邪否邪。死者不可復生。徒使予茫然四顧而傷心也夫。曾國藩又識。

朱子所編孟子要略。自來志藝文者。皆不著于錄。朱氏經義考。亦稱未見。竇應王白田氏爲朱子年譜。謂此書久亡佚矣。吾亡友漢陽劉芸雲傳瑩。始于金仁山。孟子集注考證內搜出。復還此書之舊。王氏勤一生以治朱子之業。號爲精核無倫。而不知要略一書。具載金氏書。卽四庫館中諸臣。于金氏集注考證爲提要數百言。亦未嘗道及此書。蓋耳目所及。百密而不免一疏。事之常也。觀金氏所記。則朱子當日編緝要略。別爲注解。與集注間有異

同。金氏于人皆有所不忍。章云：「要略注尙是舊說。」桃應問曰：「章云：『要略注文微不同。今散失既久，不可復覩。』」葉雲僅能排比次第，屬國藩校刻，以顯于世。抑猶未完之本與。然如許叔重五經異義，余隱文尊孟辨之類，皆湮晦數百年矣。一旦于他書中刺取，掇零拾墜，遂復故物，則此書之出，安知不更有人焉。蒐得原注，以補今日之闕乎。天下甚大，來者無窮，必有能篤着朱子之書，罔羅以彌遺恨者。是吾茶雲地下之靈，禱祀以求之者也。道光二十九年四月，湘鄉會國藩敘。

朱子語類五則

第一百五卷

先生因編孟子要旨云：「孟子若讀得無統，也是費力。某從十七八歲，讀至二十歲，只逐句去理會，更不通透。二十歲以後，方知不可恁地讀。元來許多長段，都自首尾相照管。脈絡相貫串，只恁地熟讀，自見得意思。從此看孟子，覺得意思極痛快，亦因悟作文之法。如孟子當時固不是要作文，只言語說出來，首尾相應，脈絡相貫，自是合著如此。又曰：『某當初讀自暴自棄章，只恁地鶻突讀去。伊川易傳云：『拒之以不信，絕之以不爲。』』當初也匹似閑看過，因在舟中偶思量，比將孟子上下文看，乃始通串。方始說得是。如此亦溫故知新之意。又曰：『看文字不可恁地看過便道了。須是時復玩味，庶幾忽然感悟到得義理，與踐履處融會，方是自得。這箇意思，與尋常思索而得意思不同。』」（葉賀孫）

問孟子首章是先剖判箇天理人欲，令人曉得其託始之意甚明。若先生所編要略，卻是要從源頭說來，所以不同。曰：「某向時編此書，今看來亦不必。只孟子便直恁分曉示人，自是好了。時舉曰：『孟子前面多是分明說與時君，且如章首說，上下交征利，其害便至于不奪不壓，說仁義便云：『未有遺其親後其君。』次章說賢者，便有此樂，不賢者便不能有此樂，都是一反一正，言其效驗如此。亦欲人君少知恐懼之意耳。』」曰：「也不是要人君知恐懼，但其效自必至此。孟子之書明白親切，無甚可疑者，只要日日熟讀，須教他在吾肚中，轉作千百回，便自然純熟。某當初看時，要逐句去看他，便但覺得意思迫切，到後來放寬看，卻有條理。然此書不特是義理精明，又且是甚次第底文章，某因熟讀後便見自此也知作文之法。（潘時舉）

敬之問看要略見先生所說孟子皆歸之仁義。如說性。反以後諸處皆然。曰。是他見得這道理通透。見得裏面本來都無別物事。只有箇仁義。到得說將出。都離這箇不得。不是要安排如此道。也是離這仁義不得。舍仁義不足以見道。如造化只是箇陰陽。捨陰陽不足以明造化。問古人似各有所主。如曾子只守箇忠恕。子思只守箇誠。孟子只守箇仁義。其實皆一理也。曰。也不是他安排要如此。是他見得道理。做出都是這箇。說出也只是這箇。只各就地頭說。不是把定這箇將來做。如堯舜是少道理。到得後來衣鉢之傳。只說『人心惟危。道心惟微。惟精惟一。允執厥中。』緊要在上三句。說會如此。方得箇中。方得箇恰好。這也到這地頭。當說中。便說箇中。聖賢言語。初不是著意安排。只遇着這字。便說出這字也。（葉賀孫）

因整要略謂孟子發明許多道理都盡。自此外更無別法。思惟這箇先從性看。看得這箇物事破了。然後看入裏面去。終不甚費力。要知雖有此數十條。是古人已說過。不得不與他理會。到得做工夫時。卻不用得許多。難勇猛底人。截直便做去。（葉賀孫）

敬之問要旨不取杞柳一章。曰。此章自分曉。更無可玩索。不用入亦可。卻是生之謂性一段難曉。說得來反恐鶻突。故不編入。（葉賀孫）

朱子文集一則

第四十六卷

答黃直卿書云。前書所論大學兩條。似未然。如此則是『明德新民。』其初且苟簡做一截。到『止于至善』處。又子細做一截也。知至之至。向來卻是誤作切至之至。只合依舊爲極至之至。然此至字。雖與至善之至。皆訓極字。而用處不同。至善是自然極至之至。知至是功夫極至之至。難作一例說也。可試思之。此義非獨熹不謂然。以示季通諸人。亦皆疑。直卿不知何故作此見也。病中看得孟子要略數章。分明覺得從前多是衍說。已略修正寫去。此書似有益于學者。但不合顛倒卻聖賢成書。此爲未安耳。大學諸生看者多無入處。不如看語孟者漸見次第。不知病在甚處。似是規模太廣。令人心量包羅不得也。

眞西山文集一則 第二十九卷

孟子要略後序云。太守陳侯旣刊文公朱先生論語詳說于郡齋。又得孟子要略以示學者。曰。『先生之于孟子。發明之也至矣。其全在集注。而其要在此編。蓋性者義理之本源。學者必明乎此。而後知天下萬善皆由此出。非有假乎外也。』故此編之首。曰性善焉。性果何物哉。曰五常而已矣。仁義者。五常之綱領也。故論性之次。曰仁義焉。心者。性之主。不可以無操存持養之功。故論心爲仁義之次。事親從兄。天性之自然。而本心發見之尤切者也。故孝弟爲論心之次。仁義者。人心之所同。而所以賊之者利也。學者必審乎義利之分。然後不失其本心之正。故義利爲孝弟之次。義利明矣。推之于出處。則修吾天爵而不誘于人爵。推之于政事。則純乎王道而不雜乎霸功。故義利之次。二者繼之。聖賢之學。循天理之正。所以盡其性也。異端之學。徇人欲之私。所以拂其性也。故以是終焉。先後次第之別。其指豈不甚明也哉。學者于集注求其全體。而又于此玩其要旨焉。則七篇之義。無復餘蘊矣。雖然。學者之于道。豈苟知而已耶。昔嘗聞先生與其門人論輯此書之意。而誨之曰。『觀書不可僅過目而止。必時復玩味。庶幾忽然感悟。到得義理與踐履處融會。乃爲自得。』嗚呼。是又先生教人之要指也。予之刻此書也。豈苟然哉。侯以序引見屬。退惟末學。未能窺先生之門牆。故于侯之命。雖不敢辭。而亦不敢以序自任也。故論次侯本語。系諸編末。爲朋友共講云。

朱竹垞經義考一則 第二百三十四卷

孟子要略（未見）真德秀序曰。（云云見上）按是序亦載劉燾雲莊集

王白田朱子年譜一則 第四卷考異第四卷

光宗紹熙三年壬子六十三歲。孟子要略成。語錄云云見上考異。云李本無。洪本附注除知靜江府之下。今立一條。要略又名指要。一名要指。蓋一書也。其書今不傳。故附載語錄。以見其概。

孟子要略目次

言人性本善欲存人心養性以復其初	一
論孝弟之道	七
嚴義利之辨	九
辯王霸之方明治道之要	三
孟子尙論古人而自言其爲學要領	七

孟子要略

一 言人性本善欲人存心養性以復其初

滕文公爲世子。將之楚。過宋而見孟子。孟子道性善。言必稱堯舜。世子自楚反。復見孟子。孟子曰。『世子疑吾言乎。夫道一而已矣。成覿謂齊景公曰。『彼丈夫也。我丈夫也。吾何畏彼哉。』顏淵曰。『舜何人也。予何人也。有爲者。亦若是。』公明儀曰。『文王我師也。周公豈欺我哉。』今滕絕長補短。將五十里也。猶可以爲善。國書曰。『若藥不瞑眩。厥疾不瘳。』』集注云。孟子之言性善。始見于此。而詳具于告子之篇。然默識而旁通之。則七篇之中。無非此理。國藩謹按朱子編次要略一書。于每卷之首章必有數語發明大指。今其說不可得聞。然如此章集注之說。則要略之所以託始于此者。亦差可窺尋矣。

公都子曰。『告子曰。性無善無不善也。或曰。性可以爲善。可以爲不善。是故文武與則民好善。幽厲與則民好暴。或曰。有性善有性不善。是故以堯爲君而有象。以瞽瞍爲父而有舜。以紂爲兄之子且以爲君。而有微子啓。王子比干。今日性善。然則彼皆非與。』孟子曰。『乃若其情。則可以爲善矣。乃所爲善也。若夫爲不善。非才之罪也。惻隱之心。人皆有之。羞惡之心。人皆有之。恭敬之心。人皆有之。是非之心。人皆有之。惻隱之心。仁也。羞惡之心。義也。恭敬之心。禮也。是非之心。智也。仁義禮智。非由外鑠我也。我固有之也。弗思耳矣。故曰。『求則得之。舍則失之。或相倍蓰。而無算者。不能盡其才者也。』詩曰。天生蒸民。有物有則。民之秉夷。好是懿德。孔子曰。爲此詩者。其知道乎。故有物必有則。民之秉夷也。故好是懿德。』

孟子曰。『人之所以異于禽獸者幾希。庶民去之。君子存之。舜明于庶物。察于人倫。由仁義行。非行仁義也。』曹交問曰。『人皆可以爲堯舜。有諸。』孟子曰。『然。』交聞文王十尺。湯九尺。今交九尺四寸以長。食粟而已。如何則可。』曰。『奚有于是。亦爲之而已矣。有人于此。力不能勝一匹雛。則爲無力人矣。今日舉百鈞。則爲有力人矣。然則舉烏獲之任。是亦爲烏獲而已矣。夫人豈以不勝爲患哉。弗爲耳。徐行後長者。謂之弟。疾行先長者。謂之

不弟。夫徐行者豈人所不能哉。所不爲也。堯舜之道。孝弟而已矣。子服堯之服。誦堯之言。行堯之行。是堯而已矣。子服桀之服。誦桀之言。行桀之行。是桀而已矣。』曰。『交得見于鄒君。可以假館。願留而受業于門。』曰。『夫道若大路然。豈難知哉。人病不求耳。子歸而求之。有餘師。』

告子曰。『性猶湍水也。決諸東方則東流。決諸西方則西流。人性之無分于善不善也。猶水之無分于東西也。』

孟子曰。『水信無分于東西。無分于上下乎。人性之善也。猶水之就下也。人無有不善。水無有不下。今夫水搏而躍之。可使過顙。激而行之。可使在山。是豈水之性哉。其勢則然也。人之可使爲不善。其性亦猶是也。』

孟子曰。『人皆有不忍人之心。先王有不忍人之心。斯有不忍人之政矣。以不忍人之心。行不忍人之政。治天下可運之掌上。所以謂人皆有不忍人之心者。今人乍見孺子將入于井。皆有怵惕惻隱之心。非所以內交于孺子之父母也。非所以要譽于鄉黨朋友也。非惡其聲而然也。由是觀之。無惻隱之心。非人也。無羞惡之心。非人也。無辭讓之心。非人也。無是非之心。非人也。惻隱之心。仁之端也。羞惡之心。義之端也。辭讓之心。禮之端也。是非之心。智之端也。人之有是四端也。猶其有四體也。有是四端。而自謂不仁者。自賊者也。謂其君不能者。賊其君者也。凡有四端于我者。知皆擴而充之矣。若火之始然。泉之始達。苟能充之。足以保四海。苟不充之。不足以事父母。』

孟子曰。『人皆有所不忍。達之于其所忍。仁也。人皆有所不爲。達之于其所爲。義也。人能充無欲害人之心。而仁不可勝用也。人能充無穿踰之心。而義不可勝用也。人能充無受爾汝之實。無所往而不爲義也。集注云。爾汝人所輕賤之稱。人雖或有所貪昧隱忍而甘受之者。然其中心必有慚忿而不肯受之之實。人能卽此而推之。使其充滿無所虧缺。則無實而非義矣。語錄云。文公因沈備之問。自謂注中因何解不分曉。謂實字當對名字說。不欲人以爾汝之稱加諸我。是惡爾汝之名也。然反之于身而去其無可爾汝之行。是能充其無受爾汝之實也。金氏集注考證云。履祥按注中不明者。謂舊說作誠實解也。然今注亦未大分曉。當從語錄之說。士未可謂以而言。是以言鈺之也。可以言而不言。是以不言鈺之也。是皆穿踰之類也。』金氏曰。此章要略注尙是舊說。國藩謹按此要略注之舊說。今不可詳。恐卽無受汝之實一節。金氏所謂舊說作誠實解者也。故備錄集注語錄及金氏之說于右。

告子曰：『食色性也。仁內也。非外也。義外也。非內也。』孟子曰：『何以謂仁內義外也。』曰：『彼長而我長之。非有長于我也。猶彼白而我白之。從其白于外也。故謂之外也。』曰：『異于張氏曰。異于二字疑衍。李氏曰。或有關文。白馬之白也。無以異于白人之白也。不識長馬之長也。無以異于長人之長與。且謂長者義乎。長之者義乎。』曰：『吾弟則愛之。秦人之弟則不愛也。是以我爲悅者也。故謂之內也。楚人之長亦長吾之長。是以長爲悅者也。故謂之外也。』曰：『耆秦人之炙。無以異于耆吾炙。夫物則亦有然者也。然則耆炙亦有外與。』

孟子曰：『富歲子弟多賴。凶歲子弟多暴。非天之降才爾殊也。其所以陷溺其心者然也。今夫粢麥播種而耰之。其地同。樹之時又同。淳然而生。至于日至之時。皆熟矣。雖有不同。則地有肥磽。雨露之養。人事之不齊也。故凡同類者。舉相似也。何獨至于人而疑之。聖人與我同類者。故龍子曰：不知足而爲屨。我知其不爲躡也。屨之相似。天下之足同也。口之于味。有同耆也。易牙先得我口之所嗜者也。如使口之於味也。其性與人殊。若犬馬之與我不同類也。則天下何耆皆從易牙之於味也。至于味。天下期于易牙。是天下之口相似也。惟耳亦然。至于聲。天下期于師曠。是天下之耳相似也。惟目亦然。至于子都。天下莫不知其姣也。不知子都之姣者。無目者也。故曰：口之于味也。有同耆焉。耳之于聲也。有同聽焉。目之于色也。有同美焉。至于心。獨無所同然乎。心之所同然者何也。謂理也。義也。聖人先得我心之所同然耳。故理義之悅我心。猶芻豢之悅我口。』

孟子曰：『牛山之木嘗美矣。以其交于大國也。斧斤伐之。可以爲美乎。是其日夜之所息。雨露之所潤。非無萌蘖之生焉。牛羊又從而牧之。是以若彼濯濯也。人見其濯濯也。以爲未嘗有材焉。此豈山之性也哉。雖存乎人者。豈無仁義之心哉。其所以放其良心者。亦猶斧斤之于木也。旦而伐之。可以爲美乎。其日夜之所息。平旦之氣。其好惡與人相近也者幾希。則其旦晝之所爲。有梏亡之矣。梏之反覆。則其夜氣不足以存。夜氣不足以存。則其達禽獸不遠矣。人見其禽獸也。而以爲未嘗有才焉。是豈人之情也哉。故苟得其養。無物不長。苟失其養。無物不消。』

孔子曰：『操則存。舍則亡。出入無時。莫知其鄉。惟心之謂與。』

孟子曰：『有天爵者。有人爵者。仁義忠信。樂善不倦。此天爵也。公卿大夫。此人爵也。古之人。修其天爵。而人爵從之。今之人。修其天爵。以要人爵。既得人爵。而棄其天爵。則惑之甚者也。終亦必亡而已矣。』

孟子曰。『欲貴者。人之同心也。人人有貴於己者。弗思耳。人之所貴者。非良貴也。趙孟之所貴。趙孟能賤之。詩云。既醉以酒。既飽以德。言飽乎仁義也。所以不願人之膏粱之味也。令聞廣譽施于身。所以不願人之文繡也。』

孟子曰。『今有無名之指。屈而不信。非疾痛害事也。如有能信之者。則不遠秦楚之路。爲指之不若人也。指不若人。則知惡之心不若人。則不知惡。此之謂不知類也。』

孟子曰。『拱把之桐梓。人苟欲生之。皆知所以養之者。至于身。而不知所以養之者。豈愛身不若桐梓哉。弗思甚也。』

孟子曰。『人之于身也。兼所愛。兼所愛。則兼所養也。無尺寸之膚不愛焉。則無尺寸之膚不養也。所以考其善不善者。豈有他哉。于己取之而已矣。體有貴賤。有大小。無以小害大。無以賤害貴。養其小者爲小人。養其大者爲大人。今有場師。舍其梧櫨。養其楸棘。則爲賤場師焉。養其一指。而失其肩背而不知也。則爲狼疾人也。飲食之人。則人賤之矣。爲其養小以失大也。飲食之人。無有失也。則口腹豈適爲尺寸之膚哉。』

公都子問曰。『鈞是人也。或爲大人。或爲小人。何也。』孟子曰。『從其大體爲大人。從其小體爲小人。』曰。『鈞是人也。或從其大體。或從其小體。何也。』曰。『耳目之官。不思而蔽于物。物交物則引之而已矣。心之官則思。思則得之。不思則不得也。此天之所以與我者。先立乎其大者。則其小者不能奪也。此爲大人而已矣。』國藩謹按。人性皆善本體也。存心養性以復其初工夫也。孟子之言大抵就本體指點而示人以致功之方。如滕文公章道性善者本體也。藥瞑眩者工夫也。公都子章非由外鑠者本體也。求則得之者工夫也。異于禽獸章幾希者本體也。存之者工夫也。曹交章可爲堯舜者本體也。徐行後長者工夫也。人皆有不忍章四端者本體也。擴充者工夫也。自此以上十六章。皆可類推。自此以下各章。則歸重工夫一邊。朱子編輯之意。旣已不傳。而吾亡友劉君又不作。竊以意妄測次第如此。

孟子曰。『仁人心也。義人路也。舍其路而弗由。放其心而不知求。哀哉。人有雞犬放。則知求之。有放心而不知求。學問之道無他。求其放心而已矣。』

孟子曰。『養心莫善于寡欲。其爲人也寡欲。雖有不存焉寡矣。其爲人也多欲。雖有存焉寡矣。』

孟子曰：「大人者，不失其赤子之心者也。」

孟子曰：「形色天性也。惟聖人可以踐形。」

孟子曰：「萬物皆備于我矣。反身而誠，樂莫大焉。彊恕而行，求仁莫近焉。」

孟子曰：「盡其心者，知其性也。知其性，則知天矣。存其心，養其性，所以事天也。夭壽不貳，修身以俟之，所以立命也。」

孟子曰：「君子深造之以道，欲其自得之也。自得之，則居之安。居之安，則資之深。資之深，則取之左右逢其原。故君子欲其自得之也。」

王子墊問曰：「士何事？」孟子曰：「尚志。」曰：「何謂尚志？」曰：「仁義而已矣。殺一無罪，非仁也。非其有而取之，非義也。居惡在，仁是也。路惡在，義是也。居仁由義，大人之事備矣。」

孟子曰：「矢人豈不仁于函人哉？矢人惟恐不傷人，函人惟恐傷人。巫匠亦然。故術不可不慎也。孔子曰：里仁爲美，擇不處仁，焉得智？夫仁，天之尊爵也。人之安宅也。莫之禦而不仁，是不智也。不仁不智，無禮無義，人役也。人役而恥爲役，由弓人而恥爲弓，矢人而恥爲矢也。如恥之，莫如爲仁。仁者如射，射者正己而後發，發而不中，不怨勝己者，反求諸己而已矣。」

孟子曰：「君子所以異于人者，以其存心也。君子以仁存心，以禮存心。仁者愛人，有禮者敬人。愛人者人恆愛之，敬人者人恆敬之。有人于此，其待我以橫逆，則君子必自反也。我必不仁也，必無禮也。此物奚宜至哉？其自反而仁矣，自反而有禮矣，其橫逆由是也。君子必自反也。我必不忠，自反而忠矣。其橫逆由是也。君子曰：此亦妄人也已矣。如此，則與禽獸奚擇哉？于禽獸又何難焉。是故君子有終身之憂，無一朝之患也。乃若所憂，則有之。舜人也，我亦人也。舜爲法于天下，可傳于後世，我由未免爲鄉人也。是則可憂也。憂之如何？如舜而已矣。若夫君子所患，則亡矣。非仁無爲也，非禮無行也。如有一朝之患，則君子不患矣。」

孟子曰：「愛人不親，反其仁。治人不治，反其智。禮人不答，反其敬。行有不得者，皆反求諸己。其身正而天下歸之。」

孟子曰：「舜發于畎畝之中，傅說舉于版築之間，膠鬲舉于魚鹽之中，管夷吾舉于土，孫叔敖舉于海，百里奚舉于市。故天將降大任于是人也，必先苦其心志，勞其筋骨，餓其體膚，空乏其身，行拂亂其所爲，所以動心忍性，曾益其所不能。人恆過然後能改，困于心，衡于慮，而後作，徵于色，發于聲，而後喻。入則無法家拂士，出則無敵國外患者，國恆亡。然後知生于憂患，而死于安樂也。」程子曰：自舜發于畎畝以下，若粟熟也，須從這裏過。尹氏曰：言困窮拂鬱能堅人之志，而熟人之仁，以安樂失之者多矣。國藩謹披。孟子之意，欲人明于窮通順逆，乃屈伸自然之常。但處安順者易以盛滿致吝，處困窮者易以惕厲致福耳。朱子編此章于要略首卷，意謂不仁者不可以久，處約能動忍，困橫以處窮約，正其疆勉以存養本心也。自此以下各章，皆承疆勉以存本心之意。

孟子曰：「無爲其所不爲，無欲其所不欲，如此而已矣。」

孟子曰：「無或乎王之不智也。雖有天下易生之物也，一日暴之，十日寒之，未有能生者也。吾見亦罕矣。吾退而寒之者至矣。吾如有萌焉，何哉？今夫弈之爲數小數也，不專心致志，則不得也。弈秋，通國之善弈者也。使弈秋誨二人弈，其一人專心致志，惟弈秋之爲聽，一人雖聽之，一心以爲有鴻鵠將至，思援弓繳而射之，雖與之俱學，弗若之矣。爲是其智弗若與？曰：非然也。」

孟子曰：「仁之勝不仁也，猶水勝火，今之爲仁者，猶以一杯水救一車薪之火也，不熄則謂之水不勝火，此又與于不仁之甚者也，亦終必亡而已矣。」

孟子曰：「五穀者種之笑者也，苟爲不熟，不如荑稗，夫仁亦在乎熟之而已矣。」

孟子曰：「自暴者不可與有言也，自棄者不可與有爲也，言非禮義，謂之自棄也。吾身不能居仁由義，謂之自棄也。仁人之安宅也，義人之正路也，曠安宅而弗居，舍正路而弗由，哀哉！」

孟子曰：「人不可以無恥，無恥之恥無恥矣。」

孟子曰：「不仁者可與言哉，安其危而利其菑，樂其所以亡者，不仁而可與言，則何亡國敗家之有？有孺子歌曰：『滄浪之水清兮，可以濯我纓，滄浪之水濁兮，可以濯我足。』」孔子曰：「小子聽之，清斯濯纓，濁斯濯足矣，自取之也。夫人必自侮，然後人侮之，家必自毀，而後人毀之，國必自伐，而後人伐之。」太甲曰：「天作孽，猶可違，自作

孽不可活。」此之謂也。」集注云。不仁之人。私欲固蔽。失其本心。故其顛倒錯亂。至于如此。又云。此章言心存則有以審夫得失之幾。不存則無以辨于存亡之著。禍福之來。皆其自取。國藩謹按。此章言不仁者。知覺昏迷。莫燭治亂之幾。夫子編次要略首卷大旨發明人性本善。或爲氣拘物蔽。欲人強忍存心以復本性。此章稍覺不類。不知何以闖入。姑闕疑以俟正焉。

一一 論孝弟之道

孟子曰。『人之所不學而能者。其良能也。所不慮而知者。其良知也。孩提之童。無不知愛其親也。及其長也。無不知敬其兄也。親親仁也。敬長義也。無他。達之天下也。』

孟子曰。『仁之實。事親是也。義之實。從兄是也。智之實。知斯二者弗去是也。禮之實。節文斯二者是也。樂之實。樂斯二者。樂則生矣。生則惡可已也。惡可已。則不知足之蹈之。手之舞之。』

孟子曰。『事孰爲大。事親爲大。守孰爲大。守身爲大。不失其身。而能事其親者。吾聞之矣。失其身而能事其親者。吾未之聞也。孰不爲事。事親事之本也。孰不爲守。守身守之本也。曾子養曾皙。必有酒肉。將徹。必請所與。問有餘。必曰有。曾皙死。曾元養曾子。必有酒肉。將徹。不請所與。問有餘。曰亡矣。將以復進也。此所謂養口體者也。若曾子則可謂養志也。事親若曾子者可也。』

孟子曰。『天下大悅而將歸己。視天下悅而歸己。猶草芥也。惟舜爲然。不得乎親。不可以爲人。不順乎親。不可以爲子。舜盡事親之道。而瞽瞍底豫。瞽瞍底豫而天下化。瞽瞍底豫而天下之爲父子者定。此之謂大孝。』

萬章曰。『舜往于田。號泣于旻天。何爲其號泣也。』孟子曰。『怨慕也。』萬章曰。『父母愛之。喜而不忘。父母惡之。勞而不怨。然則舜怨乎。』曰。『長息問于公明高曰。舜往于田。則吾既得聞命矣。號泣于旻天。于父母。則吾不知也。公明高曰。是非爾所知也。夫公明高以孝子之心。爲不若是怨。我竭力耕田。共爲子職而已矣。父母之不我愛。于我何哉。帝使其子九男二女。百官牛羊。倉廩備。以事舜于畎畝之中。天下之士。多就之者。帝將胥天下而遷之焉。爲不順于父母。如窮人所無歸。天下之士悅之。人之所欲也。而不足以解憂。好色人之所欲。妻帝之二女而

不足以解憂。富人之所欲。富有天下而不足以解憂。貴人之所欲。貴爲天子而不足以解憂。人悅之好色富貴無足以解憂者。惟順于父母可以解憂。人少則慕父母。知好色則慕少艾。有妻子則慕妻子。仕則慕君。不得于君則熱中。大孝終身慕父母。五十而慕者。予于大舜見之矣。」

萬章問曰：「詩云：娶妻如之何，必告父母。信斯言也，宜莫如舜。舜之不告而娶何也？」孟子曰：「告則不得娶。男女居室，人之大倫也。如告則廢人之大倫，以黷父母，是以不告也。」萬章曰：「舜之不告而娶，則吾既得聞命矣。帝之妻舜而不告何也？」曰：「帝亦知告焉，則不得妻也。」萬章曰：「父母使舜完廩，捐階，瞽瞍焚廩，使浚井出，從而揜之。象曰：謨蓋都君，咸我績，牟牟父母，倉廩父母，干戈朕，琴朕，弼朕，二嫂，使治朕棲，象往入舜宮，舜在牀琴。象曰：鬱陶思君爾，忸怩，舜曰：惟茲庶，汝其于予治，不識舜不知象之將殺己與。」曰：「奚而不知也。象憂亦憂，象喜亦喜。」曰：「然則舜僞喜者與？」曰：「否。昔者有饋生魚于鄭子產，子產使校人畜之池，校人烹之。」反命曰：「始舍之，圉圉焉，少則洋洋焉，攸然而逝。」子產曰：「得其所哉，得其所哉。」校人出曰：「孰謂子產智，予既烹而食之，曰：得其所哉，得其所哉。故君子可欺以其方，難罔以非其道。彼以愛兄之道來，故誠信而喜之。奚僞焉。」金氏曰：「要略自萬章曰：父母使舜完廩以下，至然則舜僞喜者與曰否，卽下接君子可欺以其方，至奚僞焉，首去娶妻如之何二節。中去子產一節，履祥妄謂去子產一節，不若去象曰一段，此何止齊東野人之語，幾不可述于君子之口。况帝之妻舜，在其烝又不格，姦之後，此語既非事實，尤不當存。要略一書，晚年方出，此章去取似爲一書之玷。國藩謹按：朱子編次此書之意，蓋擇其要者時時切己體察，而欲凡讀孟子者皆反諸身而體驗之也。不然，以孔孟之經，任意去取顛倒錯置，此佔畢庸夫所不爲，而謂朱子之賢爲之耶。卽此章不錄首二節與子產一段，亦不過芟去繁文，尤便省覽耳。非有所去取于其間也。其存象曰一段，則以見聖人遭人倫之變而不失理之常。正欲存此語以爲處變之法。事之荒怪有無蓋不足辨。仁山先生之論，似未嘗深究朱子之本意。今刻此書，悉載本章全文。而于首二節及子產一段，并乙以識之，以存朱子之舊云。」

桃應問曰：「舜爲天子，皋陶爲士，瞽瞍殺人，則如之何？」孟子曰：「執之而已矣。」曰：「然則舜不禁與？」曰：「夫舜惡得而禁之。夫有所受之也。」曰：「然則舜如之何？」曰：「舜視棄天下，猶棄敝屣也。竊負而逃，遵海濱而處，終

身訖然樂而忘天下。』集注云。此章言爲士者但知有法。不知天子父之爲尊。爲子者但知有父。而不知天下之爲大。蓋其所以爲心者。莫非天理之極。人倫之至。學者察此而有得焉。則不待計較論量而天下無難處之事矣。金氏曰。此章要略注文微不同。而集注爲明徑。國藩謹按。金氏謂要略注文微不同。不可考矣。所謂集注明徑者。今特錄于右。觀朱子以此章次娶妻章之後。益知其欲窮極人倫之變以爲處之者之法。設詞愈離奇。處之愈平常。爾。金氏去取之說可無致疑已。

萬章問曰。『象日以殺舜爲事。立爲天子。則放之何也。』孟子曰。『封之也。』或曰。『放焉。』萬章曰。『舜流共工于幽州。放驩兜于崇山。殺三苗于三危。殛鯀于羽山。四罪而天下咸服。誅不仁也。象至不仁。封之有庠。有庠之人奚罪焉。仁人固如是乎。在他人則誅之。在弟則封之。』曰。『仁人之于弟也。不藏怒焉。親愛之而已矣。親之欲其貴也。愛之欲其富也。封之有庠。富貴之也。身爲天子。弟爲匹夫。可謂親愛之乎。』『敢問或曰放者何謂也。』曰。『象不得有爲于其國。天子使吏治其國。而納其貢稅焉。故謂之放。豈得暴彼民哉。雖然。欲常常而見之。故源源而來。不及貢以政。接于有庠。此之謂也。』

孟子曰。『君子之于物也。愛之而弗仁。于民也。仁之而弗親。親親而仁民。仁民而愛物。』

孟子曰。『道在邇而求諸遠。事在易而求諸難。人人親其親長其長。而天下乎。』

孟子曰。『于不可已而已者。無所不已。于所厚者薄。無所不薄也。其進銳者。其退速。』

二 嚴義利之辨

孟子見梁惠王。王曰。『叟不遠千里而來。亦將有以利我國乎。』孟子對曰。『王何必曰利。亦有仁義而已矣。』王曰。『何以利吾國。』大夫曰。『何以利吾家。』士庶人曰。『何以利吾身。』上下交征利。而國危矣。萬乘之國。弑其君者。必千乘之家。千乘之國。弑其君者。必百乘之家。萬取千焉。千取百焉。不爲不多矣。苟爲後義而先利。不奪不饜。未有仁而遺其親者也。未有義而後其君者也。王亦曰仁義而已矣。何必曰利。』

孟子曰。『雞鳴而起。孳孳爲善者。舜之徒也。雞鳴而起。孳孳爲利者。蹠之徒也。欲知舜與蹠之分。無他。利與善之

問也。」

孟子曰：「魚，我所欲也；熊掌，亦吾所欲也。二者不可得兼，舍魚而取熊掌者也。生，亦我所欲也；義，亦我所欲也。二者不可得兼，舍生而取義者也。生亦我所欲，所欲有甚于生者，故不爲苟得也。死亦我所惡，所惡有甚于死者，故患有所不辟也。如使人之所欲，莫甚于生，則凡可以得生者，何不用也？使人之所惡，莫甚于死者，則凡可以辟患者，何不爲也？由是則生而有不用也，由是則可以辟患而有不爲也，是故所欲有甚于生者，所惡有甚于死者，非獨賢者有是心也，人皆有之，賢者能勿畏耳。一簞食，一豆羹，得之則生，弗得則死。噓爾而與之，行道之人弗受；蹴爾而與之，乞人不屑也。萬鍾則不辨禮義而受之，萬鍾于我何加焉？爲宮室之美，妻妾之奉，所識窮乏者得我與？鄉爲身死而不受，今爲宮室之美爲之，鄉爲身死而不受，今爲妻妾之奉爲之，鄉爲身死而不受，今爲所識窮乏者得我而爲之，是亦不可以已乎？此之謂失其本心。」

陳代曰：「不見諸侯，宜若小然。今一見之，大則以王，小則以霸，且志曰：『枉尺而直尋，宜若可爲也。』」孟子曰：「昔齊景公田，招虞人以旌，不至，將殺之，志士不忘在溝壑，勇士不忘喪其元，孔子奚取焉？取非其招不往也。如不待其招而往，何哉？且夫枉尺而直尋者，以利言也。如以利，則枉尋直尺，而利亦可爲與？昔者趙簡子使王良與嬖奚乘，終日而不獲一禽，嬖奚反命曰：『天下之賤工也。』或以告王良，良曰：『請復之。』彊而後可，一朝而獲十禽，嬖奚反命曰：『天下之良工也。』」簡子曰：「我使掌與汝乘，謂王良，良不可曰：『吾爲之，範我馳驅，終日不獲一禽，爲之詭遇，一朝而獲十禽。』詩云：『不失其馳，舍矢如破。』我不贊與小人乘，請辟御者，且羞與射者比。比而得禽獸，雖若邱陵，弗爲也。如枉道而從彼，何也？且子過矣，枉己者，未有能直人者也。」

景春曰：「公孫衍、張儀，豈不誠大丈夫哉？一怒而諸侯懼，安居而天下熄。」孟子曰：「是焉得爲大丈夫乎？子未學禮乎？丈夫之冠也，父命之；女子之嫁也，母命之，往送之門，戒之曰：『往之女家，必敬必戒，無違夫子。』以順爲正者，妾婦之道也。」居天下之廣居，立天下之正位，行天下之大道，得志與民由之，不得志獨行其道，富貴不能淫，貧賤不能移，威武不能屈，此之謂大丈夫。」國藩謹按：此章亦剖別義利之最嚴者。妾婦之道，阿諛苟容，竊取權勢，利也。丈夫之事，直道而行，浩然無累，義也。故朱子編入此卷。

宋經將之楚。孟子遇于石邱曰。『先生將何之。』曰。『吾聞秦楚搆兵。我將見楚王。說而罷之。楚王不悅。我將見秦王。說而罷之。二王我將有所遇焉。』曰。『軻也。請無問其詳。願聞其指。說之將如何。』曰。『我將言其不利也。』曰。『先生之志則大矣。先生之說則不可。先生以利說秦楚之王。秦楚之王說于利。以罷三軍之師。是三軍之士樂罷而悅于利也。爲人臣者。懷利以事其君。爲人子者。懷利以事其父。爲人弟者。懷利以事其兄。是君臣父子兄弟。終去仁義。懷利以相接。然而不亡者。未之有也。先生以仁義說秦楚之王。秦楚之王悅于仁義。而罷三軍之師。是三軍之士樂罷而悅于仁義也。爲人臣者。懷仁義以事其君。爲人子者。懷仁義以事其父。爲人弟者。懷仁義以事其兄。是君臣父子兄弟。去利。懷仁義以相接也。然而不王者。未之有也。何必曰利。』

萬章問曰。『人有言。伊尹以割烹要湯。有諸。』孟子曰。『否。不然。伊尹耕于有莘之野。而樂堯舜之道焉。非其義也。非其道也。祿之以天下。弗顧也。繫馬千駟。弗視也。非其義也。非其道也。一介不以與人。一介不以取諸人。湯使人以幣聘之。囂囂然曰。『我何以湯之聘幣爲哉。我豈若處吠畝之中。由是以樂堯舜之道哉。』湯三使往聘之。旣而幡然改曰。『與我處吠畝之中。由是以樂堯舜之道。吾豈若使是君爲堯舜之君哉。吾豈若使是民爲堯舜之民哉。吾豈若于吾身親見之哉。天之生此民也。使先知覺後知。使先覺覺後覺也。予天民之先覺者也。予將以斯道覺斯民也。非予覺之而誰也。思天下之民。匹夫匹婦。有不被堯舜之澤者。若己推而內之溝中。其自任以天下之重如此。故就湯而說之。以伐夏救民。未聞枉己而正人者也。況辱己以正天下者乎。聖人之行不同也。或遠或近。或去或不去。歸潔其身而已矣。吾聞其以堯舜之道要湯。未聞以割烹也。伊訓曰。天誅造攻自牧宮。朕載自毫。』

萬章問曰。『或謂孔子于衛主癰疽。于齊主侍人瘠環。有諸乎。』孟子曰。『否。不然也。好事者爲之也。于衛主顏雝由。彌子之妻。與子路之妻兄弟也。彌子謂子路曰。『孔子主我。衛卿可得也。』子路以告。孔子曰。『有命。孔子進以禮。退以義。得之不得。曰有命。而主癰疽。與侍人瘠環。是無義無命也。孔子不悅于魯衛。遭宋桓司馬。將要而殺之。微服而過宋。是時孔子當厄。主司城貞子。爲陳侯周臣。吾聞觀近臣。以其所爲主。觀遠臣。以其所主。若孔子主癰疽與侍人瘠環。何以爲孔子。』

孟子曰。『莫非命也。順受其正。是故知命者不立乎巖牆之下。盡其道而死者正命也。桎梏死者。非正命也。』
孟子曰。『口之于味也。目之于色也。耳之于聲也。鼻之于臭也。四肢之于安佚也。性也。有命焉。君子不謂性也。仁之于父母也。義之于君臣也。禮之于賓主也。智之于賢者也。聖人之于天道也。命也。有性焉。君子不謂命也。』
孟子曰。『求則得之。舍則失之。是求有益于得也。求在我者也。求之有道。得之有命。是求無益于得也。求在外者也。』

孟子曰。『君子有三樂而王天下。不與存焉。父母俱存。兄弟無故。一樂也。仰不愧于天。俯不忤于人。二樂也。得天下英才而教育之。三樂也。君子有三樂。而王天下不與存焉。』

孟子曰。『廣土衆民。君子欲之。所樂不存焉。中天下而立。定四海之民。君子樂之。所性不存焉。君子所性。雖大行不加焉。雖窮居不損焉。分定故也。君子所性。仁義禮智根于心。其生色也。晬然見于面。盎于背。施于四體。四體不言而喻。』

孟子曰。『說大人則藐之。勿視其巍巍然。堂高數仞。榱題數尺。我得志弗爲也。食前方丈。侍妾數百人。我得志弗爲也。般樂飲酒。驅騁田獵。後車千乘。我得志弗爲也。在彼者皆我所不爲也。在我者皆古之制也。吾何畏彼哉。』
國藩謹按。右三章言內重則外自輕。亦必義利之介明。乃能見此。故朱子編入此卷。

魯平公將出。嬖人臧倉者請曰。『他日君出則必命有司所之。今乘輿已駕矣。有司未知所之。敢請。』公曰。『將見孟子。』曰。『何哉。君所爲輕身以先于匹夫者。以爲賢乎。禮義由賢者出。而孟子之後喪踰前喪。君無見焉。』公曰。『諾。』樂正子入見曰。『君奚爲不見孟軻也。』曰。『或告寡人曰。孟子之後喪踰前喪。是以不往見也。』曰。『何哉。君所謂踰者。前以士後以大夫。前以三鼎而後以五鼎與。』曰。『否。謂棺槨衣衾之美也。』曰。『非所謂踰也。貧富不同也。』樂正子見孟子曰。『克告于君。君爲來見也。嬖人有臧倉者。沮君。君是以不果來也。』曰。『行或使之止。或尼之。行止非人所能也。吾之不遇魯侯。天也。臧倉之子。焉能使予不遇哉。』
孟子去齊。充虞路問曰。『夫子若有不豫色然。前日虞聞諸夫子曰。君子不怨天。不尤人。』曰。『彼一時。此一時也。五百年必有王者興。其間必有名世者。由周而來。七百有餘歲矣。以其數則過矣。以其時考之。則可矣。夫天未

欲平治天下也。如欲平治天下。當今之世。舍我其誰也。吾何爲不豫哉。國藩謹按。色之不豫。若出于憂世之誠。則爲義。若有一毫謀己之私。則爲利。此聖賢內斷之心。辨于微茫之間者。

滕文公問曰。『齊人將築薛。吾甚恐。如之何則可。』孟子對曰。『昔者太王居邠。狄人侵之。去之岐山之下。居焉。非擇而取之。不得已也。苟爲善。後世子孫。必有王者矣。君子創業垂統。爲可繼也。若夫成功。則天也。君如彼何哉。疆爲善而已矣。』國藩謹按。此章言謀國之道。雖極危急存亡之秋。而義利之辨。尤不可忽。董子所稱正其誼不謀其利。明其道不計其功。正與此同旨。

孟子曰。『飢者甘食。渴者甘飲。是未得飲食之正也。飢渴害之也。豈惟口腹有飢渴之害。人心亦皆有害。人能無以飢渴之害爲心害。則不及人。不爲憂矣。』

孟子曰。『人有不爲也。而後可以有爲。』

孟子曰。『仕非爲貧也。而有時乎爲貧。娶妻非爲養也。而有時乎爲養。爲貧者辭尊居卑。辭富居貧。辭尊居卑。辭富居貧。惡乎。宜乎抱關擊柝。孔子嘗爲委吏曰。『會計當而已矣。嘗爲乘田矣。曰。牛羊茁壯長而已矣。位卑而言高。罪也。立乎人之本朝而道不行。恥也。』國藩謹按。官卑而不能行道。尙能稱職者。則爲義。官尊而不能行道。但知苟祿者。則爲利。凡義利無定。在隨其所居之位所值之時。而公私枉直確有不可易之界易之道。所爲隨時變易以處中也。孟子七篇。于辭受取與出處進退之間。所以剖晰義利者致詳。朱子此卷采取略盡。昔亡友劉君于丁未戊申之年。實始講求精義之學。搜得朱子此書。宜其躍然而欣慰也。

四 辯王霸之方明治道之要

齊宣王問曰。『齊桓晉文之事。可得聞乎。』孟子對曰。『仲尼之徒。無道桓文之事者。是以後世無傳焉。臣未之聞也。無以則王乎。』曰。『德何如。則可以王矣。』曰。『保民而王。莫之能禦也。』曰。『若寡人者。可以保民乎哉。』曰。『可。』曰。『何由知吾可也。』曰。『臣聞之胡齋曰。王坐于堂上。有牽牛而過堂下者。王見之。曰。牛何之。對曰。『將以擊鐘。』王曰。舍之。吾不忍其斃。若無罪而就死地。對曰。然則廢斃鐘與。曰。何可廢也。以羊易之。不識有

諸。』曰。『有之。』曰。『是心足以王矣。百姓皆以王爲愛也。臣固知王之不忍也。』王曰。『然誠有百姓者。齊國雖褊小。吾何愛一牛。卽不忍其覈鯨。若無罪而就死地。故以羊易之也。』曰。『王無異于百姓之以王爲愛也。以小易大。彼惡知之。王若隱其無罪而就死地。則牛羊何擇焉。』王笑曰。『是誠何心哉。我非愛其財而易之以羊也。宜乎百姓之謂我愛也。』曰。『無傷也。是乃仁術也。見牛未見羊也。君子之于禽獸也。見其生不忍見其死。聞其聲不忍食其肉。是以君子遠庖廚也。』王說曰。『詩云。他人有心。予忖度之。夫子之謂也。夫我乃行之。反而求之。不得吾心。夫子言之。于我心有戚戚焉。此心之所以合于王者何也。』曰。『有復于王者曰。吾力足以舉百鈞而不足以舉一羽。明足以察秋毫之末而不見輿薪。則王許之乎。』曰。『否。』曰。『今恩足以及禽獸。而功不至于百姓者。獨何與。然則一羽之不舉。爲不用力焉。輿薪之不見。爲不用明焉。百姓之不見保。爲不用恩焉。故王之不王。不爲也。非不能也。』曰。『不爲者與不能者之形。何以異。』曰。『挾太山以超北海。語人曰。我不能。是誠不能也。爲長者折枝。語人曰。我不能。是不爲也。非不能也。故王之不王。非挾太山以超北海之類也。王之不王。是折枝之類也。老吾老以及人之老。幼吾幼以及人之幼。天下可運于掌。詩云。刑于寡妻。至于兄弟。以御于家邦。言舉斯心加諸彼而已。故推恩足以保四海。不推恩無以保妻子。古之人所以大過人者。無他焉。善推其所爲而已矣。今恩足以及禽獸。而功不至于百姓者。獨何與。權然後知輕重。度然後知長短。物皆然。心爲甚。王請度之。抑王興甲兵。危士臣。搆怨于諸侯。然後快于心與。』王曰。『否。吾何快于是。將以求吾所大欲也。』曰。『王之所大欲。可得聞與。』王笑而不言。曰。『爲肥甘不足于口與。輕煖不足于體與。抑爲采色不足視于目與。聲音不足聽于耳與。便嬖不足使令于前與。王之諸臣。皆足以供之。而王豈爲是哉。』曰。『否。吾不爲是也。』曰。『然則王之所大欲。可知已。欲辟土地。朝秦楚。莅中國。而撫四夷也。以若所爲。求若所欲。猶緣木而求魚也。』王曰。『若是其甚與。』曰。『殆有甚焉。緣木求魚。雖不得魚。無後災。以若所爲。求若所欲。盡心力而爲之後。必有災。』曰。『可得聞與。』曰。『鄒人與楚人戰。則王以爲孰勝。』曰。『楚人勝。』曰。『然則小固不可以敵大。寡固不可以敵衆。弱固不可以敵強。海內之地方千里者九。齊集有其一。以衣服八。何以異于鄒敵楚哉。蓋亦反其本矣。今王發政施仁。使天下仕者。皆欲立于王之朝。耕者皆欲耕于王之野。商賈皆欲藏于王之市。行旅皆欲出于王之塗。天下之欲疾其

君者。皆欲赴愬于王。其若是。孰能禦之。』王曰。『吾憎不能進于是矣。顧夫子輔吾志。明以教我。我雖不敏。請嘗試之。』曰。『無恆產而有恆心者。惟士爲能。若民則無恆產。因無恆心。苟無恆心。放辟邪侈。無不爲已。及陷于罪。然後從而刑之。是罔民也。焉有仁人在位。罔民而可爲也。是故明君制民之產。必使仰足以事父母。俯足以畜妻子。樂歲終身飽。凶年免于死亡。然後驅而之善。故民之從之也輕。今也制民之產。仰不足以事父母。俯不足以畜妻子。樂歲終身苦。凶年不免于死亡。此惟救死而恐不贍。奚暇治禮義哉。王欲行之。則盍反其本矣。五畝之宅。樹之以桑。五十者可以衣帛矣。雞豚狗彘之畜。無失其時。七十者可以食肉矣。百畝之田。勿奪其時。八口之家。可以無飢矣。謹庠序之教。申之以孝悌之義。頽白者不負戴于道路矣。老者衣帛食肉。黎民不飢不寒。然而王者未之有也。』

公孫丑問曰。『夫子當路于齊。管仲晏子之功。可復許乎。』孟子曰。『子誠齊人也。知管仲晏子而已矣。或問乎曾西曰。吾子與子路孰賢。曾西蹴然曰。吾先子之所畏也。曰。然則吾子與管仲孰賢。曾西艷然不悅曰。爾何曾比予于管仲。管仲得君。如彼其專也。行乎國政。如彼其久也。功烈如彼其卑也。爾何曾比予于是。曰。管仲曾西之所不爲也。而子爲我願之乎。』曰。『管仲以其君霸。晏子以其君顯。管子晏子猶不足爲與。』曰。『以齊王由反手也。』曰。『若是則弟子之惑滋甚。且以文王之德。百年而後崩。猶未洽于天下。武王周公繼之。然後大行。今言王若易然。則文王不足法與。』曰。『文王何可當也。由湯至于武丁。賢聖之君六七作。天下歸殷久矣。久則難變也。武丁朝諸侯有天下。猶運之掌也。紂之去武丁未久也。其故家遺俗。流風善政。猶有存者。又有微子微仲王子比干箕子膠鬲。皆賢人也。相與輔相之。故久而後失之也。尺地莫非其有也。一民莫非其臣也。然而文王猶方百里起。是以難也。齊人有言曰。雖有智慧。不如乘勢。雖有鎡基。不如待時。今時則易然也。夏后殷周之盛。地未有過千里者也。而齊有其地矣。雞鳴狗吠相聞。而達乎四境。而齊有其民矣。地不改辟矣。民不改聚矣。行仁政而王。莫之能禦也。且王者之不作。未有疏于此時者也。民之憔悴于虐政。未有甚于此時者也。飢者易爲食。渴者易爲飲。孔子曰。德之流行。速于置郵而傳命。當今之時。萬乘之國。行仁政。民之悅之。猶解倒懸也。故事半古之人。功必倍之。惟此時爲然。』此章朱子原本僅錄至而子爲我願之乎止。以下不錄。國藩謹按。朱子之意特重在崇王黜伯。其

去後半。尤便省覽耳。竊意此章後半言乘勢待時。而歸重于行仁政。可見聖賢謀國。未嘗不顧時勢。而政之本原。悉依于王道。非同後世雜霸苟且一切藉口救時者之所爲也。今仍錄本章全文。而于爲我顧之乎下乙以識之。以存朱子之舊。

孟子曰。『以力假仁者霸。霸必有大國。以德行仁者王。王不待大。湯以七十里。文王以百里。以力服人者。非心服也。力不贍也。以德服人者。中心悅而誠服也。如七十子之服孔子也。』詩云。『自西自東。自南自北。無思不服。』此之謂也。』

孟子曰。『言近而指遠者。善言也。守約而施博者。善道也。君子之言也。不下帶而道存焉。君子之守。修其身而天下平。人病舍其田而芸人之田。所求于人者重。而所以自任者輕。』

孟子曰。『人不足與適也。政不足聞也。惟大人爲能格君心之非。君仁莫不仁。君義莫不義。君正莫不正。一正君而國定矣。』

孟子曰。『離婁之明。公輸子之巧。不以規矩。不能成方員。師曠之聰。不以六律。不能正五音。堯舜之道。不以仁政。不能平治天下。今有仁心仁聞。而民不被其澤。不可法于後世者。不行先王之道也。故曰。徒善不足以為政。徒法不能以自行。』詩云。『不愆不忘。率由舊章。』遵先王之法而過者。未之有也。聖人既竭目力焉。繼之以規矩準繩。以爲方員平直。不可勝用也。既竭耳力焉。繼之以六律正五音。不可勝用也。既竭心思焉。繼之以不忍人之政。而仁覆天下矣。故曰。爲高必因邱陵。爲下必因川澤。爲政不因先王之道。可謂智乎。是以惟仁者宜在高位。不仁而在高位。是播其惡于衆也。上無道揆也。下無法守也。朝不信道。工不信度。君子犯義。小人犯刑。國之所存者幸也。故曰。城郭不完。兵甲不多。非國之災也。田野不辟。貨財不聚。非國之害也。上無禮。下無學。賊民興。喪無日矣。詩曰。天之方蹶。無然泄泄。泄泄猶沓沓也。事君無義。進退無禮。言則非先王之道者。猶沓沓也。故曰。責難于君。謂之恭。陳善閉邪。謂之敬。吾君不能。謂之賊。』鄭氏曰。此章言爲治者。當有仁心仁聞。以行先王之政。而君臣又當各任其責。自是以惟仁者至喪無日矣。所以責其君。自詩云天之方蹶至末。所以責其臣。國藩謹按。孟子七篇言君道者甚多。而莫要于修其身而天下平一語。言臣道者甚多。而莫要于大人格君心之非一語。朱子編次此卷。前二

章辨王霸之術不同。第四章言君道。第五章言臣道。此章及下規矩章兼言君臣之道。爲治之要。粗備于此矣。孟子曰。『規矩方員之至也。聖人。人倫之至也。欲爲君盡君道。欲爲臣盡臣道。二者皆法堯舜而已矣。不以舜之所以事堯事君。不敬其君者也。不以堯之所以治民治民。賊其民者也。孔子曰。『道二。仁與不仁而已矣。暴其民甚則身弑國亡。不甚則身危國削。名之曰幽厲。雖孝子慈孫。百世不能改也。詩云。『殷鑒不遠。在夏后之世。』此之謂也。』

五 子孟子尙論古人而自其言爲學要領

孟子曰。『堯舜性者也。湯武反之也。動容周旋中禮者。盛德之至也。哭死而哀。非爲生者也。經德不回。非以干祿也。言語必信。非以正行也。君子行法。以俟命而已矣。』

孟子曰。『禹惡旨酒而好善言。湯執中。立賢無方。文王視民如傷。望道而未之見。武王不泄譴。不忘遠。周公思兼三王以施四事。其有不合者。仰而思之。夜以繼日。幸而得之。坐以待旦。』

孟子曰。『堯舜性之也。湯武身之也。五霸假之也。久假而不歸。惡知其非有也。』

孟子曰。『伯夷目不視惡色。耳不聽惡聲。非其君不事。非其民不使。治則進。亂則退。橫政之所出。橫民之所止。不忍居也。思與鄉人處。如以朝衣朝冠。坐于塗炭也。當紂之時。居北海之濱。以待天下之清也。故聞伯夷之風者。頑夫廉。懦夫有立志。伊尹曰。何事非君。何使非民。治亦進。亂亦進。曰。天之生斯民也。使先知覺後知。使先覺覺後覺。予天民之先覺者也。予將以此道覺斯民也。思天下之民。匹夫匹婦。有不與被堯舜之澤者。若己推而內之溝中。其自任以天下之重也。柳下惠不羞污君。不辭小官。進不隱賢。必以其道。遺佚而不怨。阨窮而不憫。與鄉人處。由然不忍去也。爾爲爾。我爲我。雖袒裼裸裎于我側。爾焉能浼我哉。故聞柳下惠之風者。鄙夫寬。薄夫敦。孔子之去齊接淅而行。去魯曰遲遲吾行也。去父母國之道也。可以速而速。可以久而久。可以處而處。可以仕而仕。孔子之也。』孟子曰。『伯夷聖之清者也。伊尹聖之任者也。柳下惠聖之和者也。孔子聖之時者也。孔子之謂集大成。集大成也者。金聲而玉振之也。金聲也者。始條理也。玉振之也者。終條理也。始條理者。智之事也。終條理者。聖之事也。』

也。智譬則巧也。聖譬則力也。由射于百步之外也。其至爾力也。其中非爾力也。」

孟子曰：「聖人百世之師也。伯夷柳下惠是也。故聞伯夷之風者。頑夫廉。懦夫有立志。聞柳下惠之風者。薄夫敦。鄙夫寬。奮乎百世之上。百世之下。聞者莫不興起也。非聖人而能若是乎。而況于親炙之者乎。」

孟子曰：「仲尼不爲己甚者。」

禹稷當平世。三過其門而不入。孔子賢之。顏子當亂世。居于陋巷。一簞食。一瓢飲。人不堪其愛。顏子不改其樂。孔子賢之。孟子曰：「禹稷顏回同道。禹思天下有溺者。由己溺之也。稷思天下有飢者。由己飢之也。是以如是其急也。禹稷顏子易地則皆然。今有同室之人鬪者。雖被髮纓冠而救之可也。鄉鄰有鬪者。被髮纓冠而往救之。則惑也。雖閉戶可也。」

孟子曰：「子路人告之以有過則喜。禹聞善言則拜。大舜有大焉。善與人同。舍己從人。樂取于人。以爲善。自耕稼陶漁以至爲帝。無非取于人者。取諸人以爲善。是與人爲善者也。故君子莫大乎與人爲善。」

公孫丑問曰：「夫子加齊之卿相。得行道焉。雖由此霸王不異矣。如此則動心否乎。」孟子曰：「否。我四十不動心。」曰：「若是。則夫子過孟賁遠矣。」曰：「是不難。告子先我不動心。」曰：「不動心有道乎。」曰：「有。北宮黝之養勇也。不膚撓。不目逃。思以一毫挫于人。若撻之于市朝。不受于褐寬博。亦不受于萬乘之君。視刺萬乘之君。若刺褐夫。無嚴諸侯。惡聲至。必反之。孟施舍之所養勇也。曰：視不勝猶勝也。量敵而後進。慮勝而後會。是畏三軍者也。舍豈能爲必勝哉。能無懼而已矣。孟施舍似曾子。北宮黝似子夏。夫二子之勇。未知其孰賢。然而孟施舍守約也。昔者曾子謂子襄曰：「子好勇乎。吾嘗聞大勇于夫子矣。自反而不縮。雖褐寬博。吾不憚焉。自反而縮。雖千萬人。吾往矣。孟施舍之守氣。又不如曾子之守約也。」曰：「敢問夫子之不動心。與告子之不動心。可得聞與。」告子曰：「不得于言。勿求于心。不得于心。勿求于氣。不得于心。勿求于氣。可。不得于言。勿求于心。不可。夫志。氣之帥也。氣。體之充也。夫志至焉。氣次焉。故曰：持其志。無暴其氣。」曰：「既曰志至焉。氣次焉。又曰：持其志。無暴其氣者。何也。」曰：「志壹則動氣。氣壹則動志也。」曰：「今夫蹶者趨者。是氣也。而反動其心。敢問夫子惡乎長。」曰：「我知言。我善養吾浩然之氣。」曰：「敢問何謂浩然之氣。」曰：「難言也。其爲氣也。至大至剛。以直養而無害。則塞于

天地之間。其爲氣也。配義與道。無是餒也。是集義所生者。非義襲而取之也。行有不慊于心。則餒矣。我故曰。告子未嘗知義。以其外之也。必有事焉。而勿正心。勿忘勿助長也。無若宋人然。宋人有憫其苗之不長而揠之者。茫茫然歸。謂其入曰。今日病矣。予助苗長矣。其子趨而往視之。苗則槁矣。天下之不助苗長者寡矣。以爲無益而舍之者。不耘苗者也。助之長者。揠苗者也。非徒無益。而又害之。『何謂知言。』曰。『鼓辭知其所蔽。淫辭知其所陷。邪辭知其所離。遁辭知其所窮。生于其心。害于其政。發于其政。害于其事。聖人復起。必從吾言矣。宰我子貢。善爲說辭。冉牛閔子顏淵。善言德行。孔子兼之曰。我于辭命則不能也。』然則夫子既聖矣乎。曰。『惡。是何言也。昔者子貢問于孔子曰。夫子聖矣乎。孔子曰。聖則吾不能。我學不厭而教不倦也。』子貢曰。『學不厭智也。教不倦仁也。仁且智。夫子既聖矣。』夫聖。孔子不居。是何言也。昔者竊聞之。子夏子游子張。皆有聖人之一體。冉牛閔子顏淵。則具體而微。敢問所安。曰。『姑舍是。』曰。『伯夷伊尹何如。』曰。『不同道。非其君不事。非其民不使。治則進。亂則退。伯夷也。何事非君。何使非民。治亦進。亂亦進。伊尹也。可以仕則仕。可以止則止。可以久則久。可以速則速。孔子也。皆古聖人也。吾未能有行焉。乃所願則學孔子也。』伯夷伊尹。于孔子若是班乎。曰。『否。自有生民以來。未有孔子也。』曰。『然則有同與。』曰。『有得百里之地而君之。皆能以朝諸侯。有天下。行一不義。殺一不辜。而得天下。皆不爲也。是則同。』曰。『敢問其所以異。』曰。『宰我子貢有若。智足以知聖人。汙不至阿其所好。宰我曰。以予觀于夫子。賢于堯舜遠矣。子貢曰。見其禮而知其政。聞其樂而知其德。由百世之後。等百世之王。莫之能違。曰。自生民以來。未有夫子也。有若曰。豈惟民哉。麒麟之于走獸。鳳凰之于飛鳥。泰山之于邱垤。河海之于行潦類也。聖人之于民亦類也。出乎其類。拔乎其萃。自生民以來。未有盛于孔子也。』

公都子曰。『外人皆稱夫子好辯。敢問何也。』孟子曰。『予豈好辯哉。予不得已也。天下之生久矣。一治一亂。當堯之時。水逆行。氾濫于中國。蛇龍居之。民無所定。下者爲巢。上者爲窟。書曰。洪水警余。洪水者。洪水也。使禹治之。禹掘地而注之海。驅蛇龍而放之。沮水由地中行。江淮河漢是也。險阻既遠。鳥獸之害人者消。然後人得平地而居之。堯舜既沒。聖人之道衰。暴君代作。壞宮室以爲汚池。民無所安息。棄田以爲園囿。使民不得衣食。邪說暴行。又作園囿汚池。沛澤多而禽獸至。及紂之身。天下又大亂。周公相武王。誅紂。伐之三年。討其君。驅飛廉于海隅。

而戮之。滅國者五十。驅虎豹犀象而遠之。天下大悅。書曰。『丕顯哉文王謨。丕承哉武王烈。佑啓我後人。咸以正無缺。』世衰道微。邪說暴行有作。臣弑其君者有之。子弑其父者有之。孔子懼。作春秋。春秋天下之事也。是故孔子曰。『知我者其惟春秋乎。罪我者其惟春秋乎。』聖王不作。諸侯放恣。處士橫議。楊朱墨翟之言盈天下。天下之言不歸楊。則歸墨。楊氏爲我是無君也。墨子兼愛。是無父也。無父無君。是禽獸也。公明儀曰。庖有肥肉。廄有肥馬。民有飢色。野有餓殍。此率獸而食人也。楊墨之道不息。孔子之道不著。是邪說誣民。充塞仁義也。仁義充塞。則率獸食人。人將相食。吾爲此懼。閑先聖之道。距楊墨。放淫辭。邪說者不得作。作于其心。害于其事。作于其事。害于其政。聖人復起。不易吾言矣。昔者禹抑洪水而天下平。周公兼夷狄。驅猛獸而百姓甯。孔子成春秋而亂臣賊子懼。詩云。『戎狄是膺。荆楚是懲。則莫我敢承。』無父無君。是周公所膺也。我亦欲正人心。息邪說。距詖行。放淫辭。以承三聖者。豈好辯哉。予不得已也。能言距楊墨者。聖人之徒也。』

浩生不害問曰。『樂正子何人也。』孟子曰。『善人也。信人也。』『何謂善。何謂信。』曰。『可欲之謂善。有諸己之謂信。充實之謂美。充實而有光輝之謂大。大而化之之謂聖。聖而不可知之之謂神。樂正子二之中。四之下也。』萬章問曰。『孔子在陳曰盍歸乎來。吾黨之士。狂簡進取。不忘其初。孔子在陳。何思魯之狂士。』孟子曰。『孔子不得中道而與之。必也狂狷乎。狂者進取。狷者有所不爲也。孔子豈不欲中道哉。不可必得。故思其次也。』『敢問何如斯可謂狂矣。』曰。『如琴張。曾皙。牧皮者。孔子之所謂狂矣。何以謂之狂也。曰。其志嚆嚆然。曰古之人。古之人。夷考其行。而不掩焉者也。狂者又不可得。欲得不屑不潔之士而與之。是獯也。是又其次也。孔子曰。過我門而不入我室。我不恨焉者。其爲鄉原乎。鄉原德之賊也。』曰。『何如斯可謂之鄉原矣。』曰。『何以是嚆嚆也。言不顧行。行不顧言。則曰古之人。古之人。行何爲踴躍涼涼。生斯世也。爲斯世也。善斯可矣。闐然媚于世也者。是鄉原也。』萬章曰。『一鄉皆稱原人焉。無所往而不爲原人。孔子以爲德之賊。何哉。』曰。『非之無舉也。刺之無刺也。同乎流俗。合乎污世。居之似忠信。行之似廉潔。衆皆悅之。自以爲是。而不可與入堯舜之道。故曰德之賊也。』孔子曰。『惡似而非者。惡莠恐其亂苗也。惡佞恐其亂義也。惡利口恐其亂信也。惡鄭聲恐其亂樂也。惡紫恐其亂朱也。惡鄉原恐其亂德也。君子反經而已矣。經正則庶民興。庶民興斯無邪慝矣。』國藩謹按。朱子編次此章卽

近思錄末卷論聖賢氣象之意。著學道而獨得于心無與晤語。則向友古人以發其志趣。若孔子見文子琴張。姬
于夢。及論語微子篇中所論列是也。其後如莊周荀卿揚雄王雘之書。亦往往抗論古人。評騭當世。孟子七篇。尤
數數稱述先民。朱子此卷采錄凡十二章。予常以類求之。有不盡于此卷者。如誦詩讀書知人論事一章。似可冠
諸此卷之首。堯舜湯文見知聞知一章。似可殿于此卷之末。而朱子俱不甄錄。要略一書。久已佚亡。其注文不可
考矣。而吾友劉君搜得此書。又不先補韓顯幽逐章而爲之說。遂使末學竄仰無自。徒與孤陋之難也。悲夫。

朱子年六十三時。成孟子要略。其書今佚。幸此書注中。具載某章。入幾卷之幾。他日病愈。當依次編成。以
復朱子之舊。戊申七月。劉傳瑩題。金氏孟子集注考證後。

朱子所編孟子要略一書。原本久佚。傳瑩證于金仁山先生孟子集注考證內搜出。得復此書之舊。至是
書顛末。詳見語類。自著書門。文集答黃直卿書。戊申七月之季。漢陽通慶生傳瑩識。

